

釋宗金書



禪宗全書

# 史傳部二三

( 23 )

藍吉富 主編

北京圖書館出版社

圖書在版編目 (CIP) 數據

禪宗全書 / 藍吉富主編. — 北京: 北京圖書館出版社,  
2004.12

ISBN 7-5013-2602-9

I. 禪… II. 藍… III. 禪宗 - 文獻 - 匯編 IV. B946.5

中國版本圖書館 CIP 數據核字 (2004) 第 103681 號

責任編輯: 王冠 于浩

封面設計: 許冬麗

ISBN 7-5013-2602-9



9 787501 326020 >

本書原名為《禪宗全書》，藍吉富主編，經北京版權代理有限公司代理，授權北京圖書館出版社獨家出版發行。

書名 禪宗全書 (全 101 冊)

著者 藍吉富 主編

出版 北京圖書館出版社 (100034 北京市西城區文津街 7 號)

發行 010-66139745, 66175620, 66126153, 66174391 (傳真),  
66126156 (門市部)

E-Mail cbs@nlc.gov.cn (投稿) btsfxb@nlc.gov.cn (郵購)

Website www.nlcpress.com

印刷 河北三河燕郊古籍印裝廠

開本 880 × 1230 毫米 1/16

印張 4414

版次 2004 年 12 月第 1 版 2004 年 12 月第 1 次印刷

書號 ISBN 7-5013-2602-9/B · 108

定價 18000 圓

# 解題

## 一、徑石滴乳集

編譯組

全書五卷。清·山鐸真在編、石源機雲續編。主要輯錄徑山淨慈寺斷橋妙倫禪師派下諸祖的本緣及語要。由於斷橋妙倫爲無準師範的法嗣，故書中首列徑山無準師範禪師，接著以斷橋爲徑山第一世，收至第十七世，總計二百三十八人（除九名「語別見」者）。

依凡例所述，此書未竣，真在即逝世，由嗣法門人機雲補輯完成。書中卷五收有真在的列傳語要。

## 二、宗統編年

藍吉富

清·紀蔭撰。卅二卷。本書是一部收載釋尊時代至清初之間之禪宗史實的禪宗編年史籍。作者紀蔭，清康熙時僧，住祥符寺。本書卷三十二末有光緒年間陸鼎翰後序，嘗略述其生平。並述其撰述此書之緣起及態度，其文云：

「（紀蔭）嘗以佛祖紀綱，宗師血脈，歷數千年來，記述之衆或體例未精，或徵采踳駁，未足

爲千古正傳。……因博采經史釋乘，一仿朱子綱目體例，斷以周昭王二十二年，我佛降生爲始。迄國朝康熙二十八年，曰佛紀、祖紀、五宗紀。其自明萬曆四十三年以後，諸方之出處，附書年甲之下，曰略紀，以俟後之宗紀定而詳系焉。上下二千六百四十年間，紹述宗風之次序，授受法印之機緣，備及朝政興廢之有關係氏者。淹貫翔核，融儒釋爲一貫。正其謬，闕其疑，自爲註，以發明之。謹嚴一遵史法。……當時以天童三峯二世，互相成襯，開悟來學。厥後子孫，各立門戶，分左右袒。……蔭雖三峯的裔，而中立無倚毗。」

陸氏後序所述內容，大體本諸此書卷前之凡例所載。茲據紀蔭此書之凡例內容。另擇要摘錄數則於次並略加說明。以見此書之特徵。（引號內文字皆凡例原文。）

一、「大道之統，歸於正宗。正宗之傳，統乎大道。故曰「宗統」。此所謂「宗統」，即宗門法統。以今語稱之，實即禪宗傳法系統，故此書可稱之爲禪宗法統編年史。

二、「佛法宗旨，隨機設化，編年紀事，據實徵時，其間紀註正變，一本紫陽綱目。他如五經、孔子家語、諸子、通鑑……。法門文字如釋迦譜……。皆詳考合訂，不敢一字私涉臆見。」此可見紀蔭其書所受朱熹通鑑綱目體例之影響。其「不敢一字私涉臆見」之語，顯現其確有陸氏後序所說「謹嚴一遵史法」之治史態度。

三、「是編單紀宗紀，凡正傳宗統者，大書其嗣統示寂之年。昭法化也。支流旁出者，皆不具書。……諸方拈頌論議……。切要者書之，否則不書。」

四、「……講律並書，儒道兼攝，昭宗統無外也。國政時事，有關宗統，須參考者，亦附書之。」作者此等態度，最切合今日治佛教史者之需要。由此亦可見此書與單述禪風之書（如五燈

嚴統)之不同。

五、「文獻俱闕，地異時遠，無從稽定者曰闕文。文獻並微，因時因事，不能無礙，未敢據定者，曰闕疑。自昔互有異同，至今確實考證者，曰考定。諸子百家別集中，參合可證者，曰別證。文闕獻微，據實淮定，以俟後稽者，曰存考。」紀蔭此段有關史學方法之語句，實精闢之至。即衡諸吾國正統史學界，此等論調，實亦未多睹。於此亦可見吾國之佛教史學方法實不可忽，有大加整理之必要。

六、「迦文開宗垂統，爲佛紀。迦葉以至黃髮雲巖諸祖，紹統傳宗，爲祖紀。五宗而後，承宗繼統，爲宗紀。臨濟禹門、曹洞宗鏡，兩祖之下，諸方法化，正在繁衍，宗統未敢遂定。諸方之出處大略，隨年編至今康熙己巳，爲諸方略紀。以俟後來補定。」

茲略誌全書大略如次：

卷一至二：佛紀。單紀釋迦牟尼佛事蹟。而未如五燈會元、嚴統等書之自七佛記起。此亦可見作者之別具史眼。

卷三至七：記迦葉以下之西天廿七祖弘法事蹟。

卷八至十：記達磨至慧能等東土六祖事蹟。

卷十一至十三：記南嶽、青原以迄洞山曹山，共十餘祖之弘化事蹟。

自卷三至十三，爲祖紀。

卷十四至三十：五宗紀。記臨濟、曹洞、潯仰、雲門、法眼等五宗嫡傳諸祖之弘化事蹟。

卷卅一至卅二：諸方略紀。記明萬曆四十三年以後，迄康熙二十八年間之禪門史實。

此書雖然僅記禪宗正統諸師之事蹟，然以甚具史法，故頗值今人參考。其書訂正舊傳禪宗史書（如「景德傳燈錄」等）之誤者多處。且有考定、有別證、有發明。故姑不論其成果是否爲必定可信，然能持此等史學立場，已迥非俗僧所能夢見矣。至其體例之依循「紫陽綱目」一事，吾人尤可依此以見儒家史學對佛家史學之影響。

# 目次

解題

壹、徑石滴乳集

序

凡例

原書目錄

卷一

徑山無準師範禪師——田素菴大士

卷二

月溪惟激禪師——白雲無量滄禪師

卷三

天目寶芳進禪師——伏牛無礙明理禪師

卷四

徑山無幻性冲禪師——天臺聞谷廣印禪師

一

二

三

四

十一

二十七

四十四

六十二

卷五.....七八

雲峯衡石悟鈞禪師——杲如證菴主

貳、宗統編年.....九九

序.....一〇二

原書目錄.....一〇五

凡例.....一一〇

卷一.....一二四

釋迦牟尼佛(上)

卷二.....一四〇

釋迦牟尼佛(下)

卷三.....一五二

一祖迦葉尊者——六祖彌遮迦尊者

卷四.....一六三

七祖婆須蜜尊者——十二祖馬鳴大士

卷五.....一七八

十三祖迦毗摩羅尊者——十九祖鳩摩羅多尊者

卷六.....一九一

二十祖闍夜多尊者——二十四祖師子尊者

卷七.....二〇五

二十五祖婆舍斯多尊者——二十七祖般若多羅尊者

卷八.....二二四

第一世少林菩提達磨祖師

卷九.....二三六

第二世鄴都可祖師——第四世蕪春信祖師

卷十.....二五一

第五世東山忍祖師、第六世曹溪能祖師

卷十一.....二六七

第七世南嶽讓祖師——第八世石頭遷祖師

卷十二.....二八二

第九世百丈海祖師——鴻仰開宗第一世祐寂祖師

卷十三.....二九九

第十世黃檗運祖師——曹洞開宗第一世价寂祖師

卷十四.....三一一

五宗紀——鴻仰開宗第一世祐寂祖師

卷十五.....三二四

臨濟開宗第一世臨濟玄祖師、曹洞開宗第一世價寂祖師

卷十六.....三三六

臨濟宗第二世興化獎祖師——曹洞宗第二世雲居膺祖師

卷十七.....三四七

臨濟宗第三世南院顥祖師——雲門開宗第一世雲門偃祖師

卷十八.....三六二

臨濟宗第三世南院顥祖師——法眼開宗第一世清涼益祖師

卷十九.....三七六

臨濟宗第五世首山念祖師——曹洞宗第六世太陽玄祖師

卷二十.....三九一

臨濟宗第七世石霜圓祖師——曹洞宗第七世投子青祖師

卷二十一.....四一一

臨濟宗第十世五祖演祖師——曹洞宗第八世芙蓉楷祖師

卷二十二.....四二三

臨濟宗第十世五祖演祖師、曹洞宗第八世芙蓉楷祖師

卷二十三.....四三六

臨濟宗第十一世昭覺勤祖師——曹洞宗第十世長蘆了祖師

卷二十四.....四五三

臨濟宗第十三世歸宗華祖師——曹洞宗第十八世雪巖滿祖師

卷二十五.....四七三

臨濟宗第十五世臥龍先祖師——曹洞宗第二十世雪庭裕祖師

卷二十六.....四八四

臨濟宗第十七世仰山欽祖師——曹洞宗第二十二世寶印遇祖師

卷二十七.....四九九

臨濟宗第十九世中峯本祖師——曹洞宗第二十四世萬安嚴祖師

卷二十八.....五一六

臨濟宗第二十一世萬峯蔚祖師——曹洞宗第二十六世嵩山斌祖師

卷二十九.....五三二

臨濟宗第二十四世翼善慈祖師——曹洞宗第二十九世宗鏡書祖師

卷三十.....五四二

臨濟宗第二十八世圓通寶祖師——曹洞宗第二十九世宗鏡書祖師

卷三十一.....五五九



諸方略紀(上)

卷三十二.....五八三

諸方略紀(下)

# 徑石滴乳集

清・山鐸真在 編



序

徑石滴乳者山鐸在公所編道脈淵源之書也書垂成而在公脫去其得法門人石源雲公取而錄成之以彰先人之用以述宗統之全其編始自徑山探於曹石倉譚埤菴及錢牧齋三君子當萬曆啓禎之際天下皆知讀佛書而能邇派尋源惟三君子爲最悉三君子蓋親親臨濟所書源流於徑山者也是時鼓獅絃者如林而袁了凡身受雲谷之秘愍大師自謂親得谷公鉗鎚博綜教典橫豎妙用如夢遊影響諸書未嘗不全提也故於雲居嗣公有特祝焉或律以淑身或教以演義奚必人人豎拳而日如來真實妙義遂如此發明哉不知祕密真機蚤已託之傳人藏之雪谷無事宣洩眞傍觀斯世之仰止矣余因讀雲公徑石滴乳而慨然有得於古人也楊岐踞臨濟之正宗應菴登金輪之正脈其始蓋寥寥其人而懸絲之繫惟超宗者得之何啻板震而千人鉢鳴鐘動而食指雲下族鄧林之木不足供其枝材幾牝堯之種不能充其挑慶耶是編亦未必汗雪山之牛鏤刻亦

未必盈雲藻之棟而讀其一語恍若霹靂之震天關識其德履捷若六馬之臨平坂直心顯然眞諦宛在大鑑之霧臨濟之祕非賴是書以發光哉誠宜貯之香囊書之褱皮直如親見斷橋面受徑山而無所疑貳矣非嫡承師乳而何能若是耶吾因有會於賢劫千佛之故也昔毗舍離城有千小兒執弓杖以亂其國王憂之小夫人知之於東樓上呼千小兒仰食其乳左乳放五百道右乳亦放五百道千小兒各各滿足皆知其母夫小夫人非眞兒母則千道之乳何能悉出惟千小兒各知其母各足其乳而千道之乳始爲眞滴也天下之闡揚法席者豈止千小兒哉要皆未得其母者也未得眞乳有左五百道右五百道在東樓間也時東城固有樓矣夫人懸兩乳以待千小兒矣或能於鏡交光處一承摩頂以入三摩地則徑石滴乳之刻吾知與正法眼藏羅湖野錄現無見項相於眞丹世界矣山鐸在公之爲法門正統也石源雲公之爲師乳眞滴也惟具眼者自識之

皆

康熙二十一年十月初六日楚廣濟學人舒逢吉康

伯氏題於東衡之黃牛院

徑山滴乳集凡例

一是書乃東林先師所彙集者緣諸方燈錄於臨濟正宗斷橋下諸祖或隱或現多有僅存傳法偈而法語機緣闕如者因是博攷祖錄參以傳記合成全書集未竣而先師辭世存藁散失過半雲遊先志遍歷窮蒐凡遇一言半句宗眼圓明者靡不亟爲採入以完先師未了之願抑亦少盡小子繼述之職云

一燈以傳道統以繼脈道之不明統之不正先聖之所憂也先師之見法門之有壘斷憂深而慮遠故輯此書真得憲章祖述之旨今刪繁取要詳略會同俾後之學者開卷而有得焉

一滴乳集單錄倫祖一派因諸方燈錄不以佛祖嫡傳慧命爲重專以我人私淑去取爲乖致令諸祖語錄行世者不多審梓者亦鮮今詳採補入以補

諸燈之闕略

一是書本爲流通宗眼第眞機兩竄各闢一方一時難以彙齊惟先得者先書後得者後紀未得者俟補

一諸錄載無盡燈伏牛理儀峯象幻寄庭慈山清等於未詳者總未得其眞也今按諸公源流收彼本師之下俾知師承有在弗至湮沒

一性空聞下出月潭澄澄出薦福愷愷出華山聞聞出天目定定出浮山智智出妙峯理其嗣裔久闕雲貴不及採集俟補

一黃檗有諸書收在未詳惟弘覺綴於大休墜下雲閱大休錄見有公叙曰師於嘉靖二十一年示寂越二年而余始生又越十八年方始行脚至四十五歲方得打開夢眼云云據此有公雖得大休心印實未謀面是書亦復收於未詳不敢編入正宗以紊統系也

一鷲湖心燈錄載之未詳其載機緣與蘭風華山錄內機緣相符據此則師承昭著何得云爲未詳但

驚湖示寂後進嗣者不收

黃州石門後學 機雲 識

徑石滴乳集目錄

第一卷

徑山無準師範禪師 大鑒下第二十世  
臨濟下第十五世

徑山下第一世

徑山範禪師法嗣

天台斷橋妙倫禪師

徑山下第二世

天台倫禪師法嗣

瑞巖方山文寶禪師

雪山法曇禪師

南華永宗達本禪師

絕象鑒禪師

竹屋簡禪師

藏室會珍禪師

竹山如圭禪師

古田屋禪師 語別  
見

徑山下第三世

瑞巖寶禪師法嗣

天台無見先親禪師

鳳山一源靈禪師

松巖秋江元湛禪師

天台無盡祖燈禪師

鏡堂古禪師 不列  
卒次

丁生居士

古田屋禪師法嗣

東王禪師 語別  
見

徑山下第四世

天台觀禪師法嗣

福林無聞智度禪師

鏡堂古禪師法嗣

則中度禪師

徑山下第五世

白雲度禪師法嗣

天界古拙俊禪師

太守密菴何居士 不列  
卒次

第二卷

徑山下第六世

天界俊禪師法嗣

道林無際明悟禪師

虎跑性天如皎禪師

密菴何太守法嗣

素菴田大士

徑山下第七世

東林悟禪師法嗣

太閤月溪惟嚴禪師

妙峰玄禪師

伏牛無礙鑒禪師

東山楚山紹琦禪師

鹵禪雪峰瑞禪師

潔空圓通禪師

不二圓禪師

素菴田大士法嗣

天寧和菴忠禪師

建寧佛跡顯菴眞禪師

徑山下第八世

太岡濠禪師法嗣

太岡夷峯方寧禪師

東永福自秀禪師

天淵道塔一源禪師

壞空成禪師

廬山無爲一禪師

古庭善堅禪師

大定太虛冲禪師

伏牛物外圓信禪師

八峰寶月潭禪師

德翁淳禪師二人見

四明法中正堪禪師

牛頭古心寶禪師

靈隱性天宗杲禪師

德山古心安禪師

南陽峻中嶽禪師

五臺孤月淨澄禪師

壞空成禪師法嗣

光澤道惠禪師

妙峰玄禪師法嗣

風穴福緣廣禪師

廬山一禪師法嗣

神鼎寶藏淨玉禪師

伏牛鑒禪師法嗣

仰山無隱正道禪師

大滄獨潭海昌禪師

天竺行一秀禪師

古庭堅禪師法嗣

波羅禪師

洱水道菴居士

東山琦禪師法嗣

八峯性空閑禪師

中溪隱山昌雲禪師

天真菴峰本善禪師

斗峯德章淨滿禪師

無邊古道通禪師不列

西山古巖從定禪師

龍牙鐵牛勤禪師

五臺顯淨倫禪師

金山僧寶禪師

海雲深禪師

湛淵齋禪師

濟川洪禪師

大雲興禪師

石經海珠祖意禪師

長松大心眞源禪師

大悲一天智中國師

石經豁堂祖裕禪師

月光常慧禪師

翠微悟空眞空禪師

玉峰如琳禪師

天成古音韶禪師

香巖古溪覺澄禪師

珪菴祖玠侍者

天溪凝禪師別見

西禪瑞禪師法嗣

性空覺禪師

東明曉菴昇禪師

寶文洪印禪師

無相眞禪師

大初性圓禪師

南竺橘禪師

太初忍禪師

天目秀禪師三人不列

潔空通禪師法嗣

黔中正法雪光通禪師

方湖德嚴本禪師

印空海禪師

默堂照禪師不列章次

八峯潭禪師法嗣

護國無用文全禪師

東方古裕禪師語別見

崇福大慧華禪師

天寧默堂宣禪師

伏牛月天禪師

荊山理禪師

了禪能禪師

翠峰山禪師三人不列章次

天寧忠禪師法嗣

徑山寂菴潛禪師

用剛宗軟禪師

佛跡眞禪師法嗣

廣福天然浩禪師

別峰寶芳藏禪師

白雲無量滄禪師

寶峰行菴柔禪師不列章次

第三卷

徑山下第九世

太岡寧禪師法嗣

天目寶芳進禪師

天淵源禪師法嗣

祖堂興禪師

棲霞突空昇禪師

德山安禪師法嗣

南嶽春山景禪師

西竺中天表禪師

天真善禪師法嗣

法華鏡堂明禪師

洞山惠禪師法嗣

巫山壽堂松禪師語別見

嵩山別傳宗禪師

仰山道禪師法嗣

能仁秋月以澄禪師

古道通禪師法嗣

西宗慶禪師不列章次

八峯閒禪師法嗣

鸞福月潭寂澄禪師

三祖天淵銳禪師

石門濟舟演禪師

昭覺無礙通禪師

香嚴澄禪師法嗣

成都西宗祐禪師

金山寂菴湛禪師

龍門悟禪師法嗣

司空碧天朗禪師

性空悅禪師法嗣

金山東巖亮禪師

大雲興禪師法嗣

玉峯鐵牛堅禪師

石經裕禪師法嗣

萬松曉堂滿禪師

無相真禪師法嗣

少室南宗勝禪師

淨慈休休禪師法嗣

昭慶雪庭禪師

性空覺禪師法嗣

圓通夢菴覺禪師

玉泉龍關主

黃龍徹空通禪師

南竺橋禪師法嗣

寶鑑無聞明聰禪師

太初忍禪師法嗣

華亭無涯順禪師

天目秀禪師法嗣

雪巖祖清禪師

印空海禪師法嗣

萬峰普覺明方禪師不列章次東澹證果如福禪師

方湖本禪師法嗣

斗方隱峰高禪師

默堂照禪師法嗣

太虎園禪師

荊山理禪師法嗣

瀉山方溪清禪師

伏牛天禪師法嗣

金臺空幻大覺禪師不列章次

了禪能禪師法嗣

法幢金禪師

昭覺寶藏通禪師

天寧宣禪師法嗣

牛頭吉菴祚禪師

徑山天才英禪師

翠峰山禪師法嗣

伏牛文若焄禪師不列章次

東方裕禪師法嗣

碧峰天通顯禪師

徑山潛禪師法嗣

碧峰道瑩瑛禪師

吳殿登禪師

寶峰柔禪師法嗣

育王傑峰慧禪師

徑山下第十世

天目進禪師法嗣

東塔野翁曉禪師

棲霞昇禪師法嗣

石門無盡海禪師

巫山松禪師法嗣

斗峰古音琴禪師

白雲寶明鑑禪師

西宗慶禪師法嗣

大千照禪師不列章次

薦福澄禪師法嗣

天成無聞性愷禪師

石門浪禪師法嗣

石門佛勤宗紹禪師

萬峰方禪師法嗣

靈鷲中峰素禪師

斗峰高禪師法嗣

三角東巖喜禪師不列章次

西林無相頂禪師不列章次

金臺覺禪師法嗣

太平璉振宗禪師

徑山萬松林禪師

參宗本文  
作宗據

牛頭禪師法嗣

天寧法舟道濟禪師

伏牛斌禪師法嗣

白虎妙中玄禪師

碧峰顯禪師法嗣

天池月泉法聚禪師

薦福傑禪師法嗣

三祖天然慧禪師

廣慧連禪師法嗣

龍門無礙辨禪師

育王慧禪師法嗣

松竹大方寬禪師

徑山下第十一世

東塔曉禪師法嗣

敬畏無趣如空禪師

石門海禪師法嗣

七尖大休隆禪師

斗峰琴禪師法嗣

斗峰天真道覺禪師

大千照禪師法嗣

雙峰輝天興昶禪師

天成愷禪師法嗣

龍池默菴慧聞禪師

三角喜禪師法嗣

南宗法印禪師

西林頂禪師法嗣

能仁濟舟法洪禪師

天寧濟禪師法嗣

胥山雲谷法會禪師

天池聚禪師法嗣

浮峰普恩上座

語別見

薦福愷禪師法嗣

默菴慧聞禪師

開福寬禪師法嗣

伏牛無礙明理禪師

第四卷

精嚴冬溪方澤禪師

徑山下第十二世

敬畏空禪師法嗣

徑山無幻性冲禪師

祇園性曜和尚語別見

駱懶翁居士有言志變行世

雲谷會禪師法嗣

曹溪慈山德清禪師

龍池聞禪師法嗣

天目蘭風真定禪師

鵝湖□□禪師

伏牛理禪師法嗣

佛巖不二真際禪師

徑山下第十三世

徑山冲禪師法嗣

徑山南明慧廣禪師

天目定禪師法嗣

浮山朗目智禪師

佛巖際禪師法嗣

妙峰登禪師

白馬儀峯方彖禪師

白虎如幻禪師

徑山下第十四世

徑山廣禪師法嗣

普明駕湖妙用禪師

浮山智禪師法嗣

妙峰徹庸周理禪師

白馬彖禪師法嗣

天臺聞谷廣印禪師

第五卷

徑山下第十五世

普明用禪師法嗣

雲峰衡石悟鈞禪師

永正一初悟元禪師

徑山下第十六世

金明進禪師法嗣

栢山素弘真理禪師

安化世高本則禪師

妙峰素顯堅禪師

三埭主峯法禪師

金明介菴悟進禪師

萬年夢堂眞倪禪師

金明東巖璨禪師

三角古壁文禪師

金明晦巖炯禪師

三角天峰性禪師	金明別傳化禪師
海月天嚴啓禪師	繡雪官陳修禪師
衡山範禪師	雲門既白旭禪師
承天時現曇禪師	高峰雪子淨禪師
東林山鐸在禪師	藕菴竹菴衍禪師
三增妙雲雄禪師	友可鐵容玄禪師
甘露逾祖覺禪師	牧園企賢清禪師
竺山吼菴證禪師	祖嚴豐上座
夢菴書記	報恩松岫源禪師
太平素嚴智禪師	翠峯裴公琦禪師
玉芝玄暉性禪師	普明雲菴量禪師
蓮花尼可度禪	明心尼佛音戒
空諸羅居士	約菴施居士
牧公謙大士	道耕田居士
眞和陸居士	眞慧陸居士
汝諸卜居士	眞毅朱居士
振聲許居士	眞寄李居士
永正元禪師法嗣	

報本冲默開禪師 東溪斷愚智禪師  
 耿惟眞藏禪師 法雨行洪禪師  
 寓庸禪師 永正通濟上座  
 杲如證菴主

徑石滴乳集卷之一

清 嗣祖沙門江州 眞在 編  
 嗣法門人齊安 機雲 續

大鑑下第二十世臨濟第十六世

杭州徑山無準師範禪師。劍州梓潼雍氏子。九歲依陰平山道欽出家。經書過目成誦。紹熙五年冬。登具。明年次成都。坐夏。正法遇。睹堂高弟名堯者。請益坐禪之法。堯曰。禪是何物。坐底阿誰。師晝夜體究。一日於廁提前話。有省。

石門雲曰。首座善舞太阿。使百尺竿頭。做伎倆底。一見便能死盡偷心。乾坤別構。所謂心不負人面。

無慚色

師謁育王佛照。問何處人。師曰劍州。照曰帶得劍來麼。師隨聲便喝。照笑曰者鳥頭子也。亂作。

破菴住秀峰。日有僧入室菴。打逐至法堂。時師解曰。禪和家爭禪。亦常事耳。菴曰豈不聞道我肚饑。聞板聲要喫飯去。響師聞不覺汗流夾背。

破菴爲靈隱第一座。師復從一日同遊石筍菴。菴有道者請益曰。糊糝子捉不住。乞師方便。菴曰用捉作麼。如風吹水自然成紋。師在傍大徹。

東林在曰城門失火殃及池魚。

牧雲門頌曰城門失火。臭烟薰殃及池魚。是盡焚無處更求三尺水。好看振鬣上青雲。

南澗問頌曰氣飲長虹已食牛。血漫漫地照人愁。因風吹火無多力。春滿皇都四百州。

南嶽際頌曰眉間霜劍倚天寒。試展鋒銑海樣寬。

石筍路逢沽酒店。三杯兩盞破愁顏。

石門雲頌曰霜飛六月禍私門。殃及平民已覆盆。

南北東西無處去。一拳打破鐵崑崙。

破菴付師法偈曰我若不見時汝應不見見見非自心自心常顯現未幾破菴過天童掃塔師偕往復拉月石溪同遊台雁至瑞巖雲巢留師分座夜夢偉衣冠者持把茆見授翌日明州清涼專使至師受請入院見所伽藍神茅其姓衣冠與疇昔所夢無異陞座開法一香供破菴三年遷焦山期年遷雪竇又三年被敕移育王又三年嵩少林散席徑山朝命以師補處明年寺燬師逆知其數不動容經意是年冬十月有旨召入內廷上御修政殿引見師奏對詳明土爲色動賜金襴僧伽衣又宣入慈明殿陞座說法帝垂簾而聽大悅賜號佛鑑禪師三年寺成閱六年復燬而多助雲至不數年復還舊觀去寺四十里築室百楹接待雲水額曰萬年正續正續西數百步結菴一區爲歸藏所上建重閣祕藏先後所賜御翰敝室東西偏奉祖師與先世香火遇始生日爲飯僧佛事以贊冥福蓋蜀乳師之先祀遂絕祠奉以旌孝慕上聞嘉歎

上堂名不得狀不得取不得捨不得只麼得且道得

箇甚麼三人證龜成鳖

問石梁頌云。滾滾紅珠非眼。血紙灰染作花蝴蝶。自從夢斷識莊周。亂撒金錢飄黃葉。

上堂若論箇事。直是省要易會多。是諸人自作艱難。自作障礙。所以尋常東廊西廡。見諸人和南問訊。山僧便乃低頭相接。其實無他。只要諸人識得長老。是西川隆慶府人氏。若識得便與諸人打些鄉談。說些鄉話。如今且未說你識得長老。且各自知得自己鄉貫。還知麼。明州六縣奉化人鄉。

上堂五峰門下百種全無。禪床迫窄。堂供蕭疎。脚下踏著底破磚頭。碎瓦片。面前撞見底王獐獐李麻胡。恁麼薄福住山。真箇孤負先哲良久。雖然如是。更點分明。

上堂一夏已滿。無事不辦。遂府盍孟功州磁碗。淳祐戊申。秋師築室明月池。上榜曰。退耕乞老于朝。而舊疾適作。已酉三月旦日。陞座謂衆曰。山僧既老。且病無力。與諸人東語西話。今勉強出來。將從前說不到的盡情向諸人抖擻去也。遂起身抖衣曰。是多。

少便歸方丈

十五日集衆區畫後事。親書遺表及遺書十數言。笑如常。其徒以遺偈爲請。師執筆書曰。來時空索索去也。亦條條更要問端的。天台有石橋。偈畢移頃而逝。東林在頌曰。戰罷雄風笑倚樓。虎頭虎尾一齊收。時人不諳風雲色。腦後遭繩執解羞。停龜二七日上遷中使。降香賜幣奉全身。葬於正觀之側。塔曰圓照。

徑山下第一世

臨濟下十七世

徑山範禪師法嗣

台州天台國清寺斷橋妙倫禪師。姓徐。台之黃巖人。母劉氏。夢月而孕。年十八於永嘉廣慈院落髮。見谷源於瑞巖。聞麻三斤話。有疑。一日謁雲居。見山堂偶閱楞伽。至蚊蟲螻蟻。無有言說。而能辯事。處頓省。師往雪竇參佛鑑。鑑以狗子因何有業識。令師下語。凡三十轉。不契。師曰。可無方便乎。鑑舉真淨頌曰。言有業識在。誰云意不深。海枯終見底。人死不知心。師竦然良久。忽聞口聲通身汗下。於是脫然契證。

中臺下  
盤旋

徑山進頌曰。漏屋恰逢連夜雨。更多愁霧鎖柴門。  
忽然雲盡孤輪湧。疊青山插遠層。

一初元頌曰。頂門一擊汗如油。捉敗當年老趙州。

自是黃河連底竭。一番驟雨一番愁。

天巖啓頌曰。用盡機關欲斷窮。板聲一擊頂門通。

推開碧落松千尺。放出金烏子夜紅。

藕菴衍頌曰。三春鶯囀綠陰濃。叢漢父從容渭水東。

畢竟有貪香餌者。比來喜不浪施功。

龍門性頌曰。陣雲角曉怒風號。蟻穴珠穿戰愈高。

欲道賊身無處去。一回躍馬便衝霄。

護國鐸頌曰。錦衣公子醉田家。倚檻披襟看落霞。

忽爾風翻荷葉動。池心獨露一枝花。

石門雲頌曰。相逢把手御街邊。歷亂春光四百州。

電尾電頭通一線。黑風翻轉釣魚舟。

佛鑑付師法偈曰。真理直如絃。何言復何默。我今善

什。囑表心本無得。鑑移育王師。皆分座祇園。遷瑞岩

後住淨慈室中。嘗學萬法歸一。以驗學者。凡下語不

契。即趁出高峰。於此打失眼睛。

徑山進曰。斷橋老漢。固是婆心。不免教壞人家男  
女。高峰雖然打失眼睛。要且恩大難酬。金明要問  
大眾。如何是萬法歸一。一歸何處。月似彎弓。少雨  
多風。

東林在曰。古佛垂慈。血心片片。如慈明置劍。秘魔  
擎叉。臨濟入門。便喝。德山入門。便棒。種種施設。要  
人死盡偷心。不落透路。瑞岩慣設虎。牢籠天下。  
高峰如此打失眼睛。大似平地撞彩。要且。不識萬  
法歸一。

徑山廣頌曰。侵晨出去晚頭歸。赤脚蓬頭滿面灰。  
無底鍋燒無米飯。臭烟烽煇煇尖吹。

上堂。德山低頭夾山。點頭俱胝。豎起手指。頭玄沙。築  
破脚。指頭拈拄杖曰。都來不出山。僧拄杖頭。何以見  
得卓拄杖曰。一葉落。天下秋。

希覺銳曰。德山低頭。刻舟求劍。夾山點頭。剜肉作  
瘡。俱胝豎起手指。頭裁角。呼牛玄沙。築破脚。指頭  
因誰。致得大眾。要會教忠。拄杖頭。麼孤月照臨山。  
巖靜幾多人。此中休。

收公諫頌曰。奇與百怪。只在一毫端。拈却毫端。看霜花六月寒。

讀夫峻頌曰。幾座畫閣。環樓數條。花街柳巷。從頭說與遊人聽。在長安市上。

濟北弘頌曰。西風昨夜到梧桐。零落名園思未工。婦婿直教歸未得。暮簾斜對夢我紅。

龍門淵頌曰。細雨斜風。一葉舟。渠儂遲俊不知休。一聲牧笛傳幽谷。紅蓼汀前起白鷗。

上堂舉雲門示衆。乾坤之內。宇宙之間。中有一寶。秘在衫山。因緣頌曰。隱隱烟村。聞犬吠。欲尋尋不見人家。忽逢橋斷。溪迴處。流出碧桃三四花。

上堂舉慈明室中插劍一口。草鞋一雙。水一盆。因緣頌曰。百花叢裏。證鞭過。俊逸風流有許多。未第儒生。偷眼觀。滿懷無奈。舊愁何。

上堂。荊山有玉。獲得者不在荊山。赤水有珠。拾得者不在赤水。精僧有無位真人。證得者出入在面門。蕭拈拄杖曰。會麼。幽州江口石人踰。

上堂舉達觀顯示衆。七佛是性。緣萬法是心。奴且道。

主人翁在甚處。自喝曰。七佛以下出頭。又自諾曰。各自祇候。師曰。喚七佛爲性。緣指萬法爲心。奴達觀。自謂有出身路。及平自喝自諾。又是奴緣邊事。主人翁何曾夢見。在大衆要見麼。以拂子拂一拂曰。曉來一陳春風。動開遍園林百樣花。

悅堂問參。師問臨濟遭黃檗三頓痛棒。是否。曰。是。師曰。因甚。大愚肋下築三拳。曰。得人一牛。還人一馬。師領之。問禮拜。

師一日入堂。見閻危坐。屹然。師向耳邊吹一吹。聞張眸視。師欲言。師震聲一喝。閻後謂衆曰。佛法不是小可。昔被淨慈一喝。只得魂飛魄散。

臨終集衆入室。作書辭諸山及魏國公公。饋藥不受。又遣人問曰。和尚生在天台。因甚死在淨慈。師曰。日出東方。夜落西。書偈而化。

金明旭曰。淨慈怎麼答話。未免俗官看破。宜林能別曰。不怎麼答。亦被俗官看破。

徑山下第二世

天台倫禪師法嗣

台州瑞巖方山寶禪師潭陽葛氏子隨父宦遊一日于杭之淨慈飯僧偶閱六祖壇經恍如舊習乃舉黃梅衣鉢因緣問鞏禪師既不會佛法爲甚又紹祖位鞏曰不但祖師大人不會佛法亦紹祖位師曰和尚還紹祖位否鞏曰若紹祖位即會佛法

黃龍無上禪和尚曰大小淨慈答話不了

剡叟是曰淨慈大似富嫌千口少貧恨一身多

佛鑑孝詔住徑山師與天界日等結侶往參盡得旨要一日忽疑變化四方八面來話遂請益佛鑑鑑曰老僧不能爲汝說汝但自看師請益至再終不爲說指參石橋師稟命至彼聽其機用橋皆不諾師猛力參究請益至十一度一晚危坐忽覩燈光面前豁然次早入方丈橋曰子捉賊也師禮拜曰賊已收下請和尚驗贓橋舉萬法歸一師答橋亦不肯齋後營請師手忘所舉橋驚拈竟根示曰是什麼師乃大悟圓通究止參和尚落堂舉石橋拈竟根方山大悟因緣問復且你道得力在甚麼處且曰方山在佛鑑得體石橋得用如風吹水自然成紋若謂悟在

竟根則埋沒先代參深肯

徑山進頌曰竟根拈起骨毛寒好肉無端索灸瘰

悟得單傳真祕訣風前總是活人丹

東林在頌曰抵死攀鞍不肯休平原奪鼓覓封侯

路傍藥餌纔拈起化作神仙上酒樓

石門雲頌曰洗清凡骨躍龍門振鬣揚鬐鼓要津

那畔不棲無影象從教寶藏自甘貧

橋付師法偈曰本無迷悟人迷悟自家討記得少壯

時而今不覺老即繼橋席凡僧入室觀豎拂子曰是

甚麼僧擬議直打出二十年少有契其機者

黃尖頌戟易禪師曰古人門庭恁麼施設近時搖

尾乞憐惟恐蟻不解腥蠅不來臭

石門雲曰祇如師僧家識得拂子又作麼生良久

彈指一下

金明旭拈石門語識得拂子買草鞋行脚

無盡燈參師豎拂子曰是甚麼燈亦曰是甚麼師曰

與我除却四大別道一句燈從東過西師垂左足燈

從西過東師垂右足燈近前叉手而立師以拂子便

打燈禮拜

金明旭曰禮拜卽得要且不識拂子

無盡問達磨西來未審傳箇甚麼師曰你道東土人曾少甚麼盡曰既不少神光爲甚立雪斷臂師曰止圖破家蕩產盡於言下大悟

僧問曹溪水派派朝東瑞潑水爲甚流向西師曰土座好惡不識曰比來問水答好惡不識那師曰瞎漢果然不識便打問如何是佛師曰迷人犯夜問如何是祖師西來意師曰正抓著我癢處問如何是般若體師曰八角磨盤曰如何是般若用師曰八角磨盤空裏走

結制上堂燭烈燄于大千界內直下片雪飛舞舉鉗錘于妙密場中就裏點鐵成金赤沙灘上杖林山中箇箇食砒霜飲鴆毒冰梭上走劍刃上行所謂鑊湯無冷處汝等抱定枯桐守住死灰何曰豆爆西菴今日爲汝爐內添炭好著精彩

上堂橫按拄杖顧視大眾曰彼此彼此便下座

上堂諸聖情存見網難透不立階級曠劫無門般若

之智常明真如之體獨露諸方學者心地不明皆因邪師雜緣如蠶作繭似蛇戀窟自謂到家不肯見人間有聰明意識卜度僞侗真如瞞頂佛性誠可惡哉師住瑞巖常設三問以驗學者曰真正出格高流如良馬見鞭影而行中下之士何堪□冀□□□□撐鐵船過海底人爲甚麼向針孔裏叫屈

警珠嘯月恒和尚頌曰黃河遠上白雲間一片孤城萬仞山羌笛何須怨楊柳春風不度玉門關

既是臨濟大師爲甚入拔舌犁耕

石門雲頌曰澄潭無水月無緣滿載輝娥詠碧天蔽垢偶趨金殿過橫身帶惹御爐烟

玉峰乾頌曰邊霜昨夜墮關榆吹角當城片月孤無限塞鴻飛不度秋風吹入小單于

那邊不立者邊不行截斷中流爲甚不住

黃尖欽頌曰半夜回舟入楚鄉月明山水共蒼蒼

孤猿更叫秋風裏不是愁人亦斷腸

護國鐸頌曰直下全提殺活該聲前無路出塵埃海門迸出金星子萬象森羅吼似雷

師一日爲衆挂牌入室垂語曰南泉斬却猫兒時如何衆下語不契適有一僕在傍曰老鼠做大師笑曰好一轉語只是不合從你口裏出

全真請上堂千斤石礮水上浮四兩葫蘆沉到底火燒狗尾猪頭焦南辰竄入北斗裏

至元元年正月初七日書偈曰來無一物去無一物盡却今時虛空鐵檟擲筆而逝

南華永宗本禪師頌船子公案笑中棄却竹林寺將謂華亭有許多窮性命於橈下喪看來成敗自蕭何雪山法曇禪師臨終謂衆曰老僧有一件事天來大諸人還識麼維那曰不識師推出枕子曰者箇擲便化室中異香經時不散

絕象鑑禪師頌洞山不安洞山有路透雲巖絕處教通到者難拄杖頭邊開活路方知不隔一毫端

竹屋麓禪師頌鼓山聖箭青童雙勒玉驄嘶淡白春衫綠帶圍半夜歸來花底月金鞭敲落亂紅飛

藏室會珍禪師頌洞山辭雲巖掘起藍田一坐墳珊瑚瑪瑙合粧成驢駝馬載休云寶禍及兒孫盡滅門

○日錄

僧問臘月火燒山意旨如何師曰徧尋無荅草竹山如圭禪師脫略異常一日遊佛巖聞風吹殿角鈴聲倚杖脫去茶毗得舍利無數塔於佛巖之陰

徑山下第三世

瑞巖寶禪師法嗣

台州天台無見先觀禪師台之僑居葉氏子也宋咸淳乙丑五月六日誕師少而資性穎秀嗜讀書過日成誦父一日會沙門善公過而識之曰此法器也宜毋滯鄉里率敬信善許諾逮冠從古田屋和尚雍染於郡之天寧登具俾歸侍司旦夕以此道策進參方山於西菴師問如何是佛法大義山張口吐舌示之師罔措山以拄杖趨出往參天封珍理前話未竟珍亦打復返西菴途中把滑有省及見山山問汝返何速師曰和尙此時打某甲不得山曰天封與你道甚麼師述途中因緣山又打

惟範琪曰方山與麼提持可謂烜赫古今華頂若非臨濟兒孫幾乎打破蔡州

石門雲頌曰一箭西沉勢已危更加一箭破重圍

幾多機刺生擒者。猶把弓梢伴酒卮。

師築室華頂。精苦自勵。因作務次。渙然頓釋所疑。往西菴呈解山一見契之。乃付偈曰。此心極廣大。虛空比不得。此道只如是。受持休外覓。

調實和頌曰。九轉靈丹仍化丹。紫霞籠壁衆星攢。壁開金鼎火光噴。傾出直教天地寒。

萬峰蔚久侍座下。師問萬法歸一。一歸何處。蔚進前問訊叉手而立。師曰。如何。是道。蔚曰。道無可道。師曰。不道有不道箇甚麼。蔚曰。正要和尚疑著。師曰。疑著卽錯。蔚曰。不疑亦錯。師便喝。蔚亦喝。師曰。言無再響。蔚拂袖而出。

示衆風冷冷日杲杲。簷蔔花開滿路香。池塘一夜生春草。堪悲堪笑老瞿曇。四十九年說不到。阿呵呵。拍禪床一下。

上堂若論此事。三世諸佛一大藏教。詮註不及天下老和尚拈提不起。直饒有傾湫之辯。倒嶽之機。一點也用不著。諸仁者。饑則喫飯。困則打眠。熱則乘涼。寒則向火。一一天真。一一明妙。倘得踏步向前。論禪論

道。誤將魚目爲珠。錯認橋皮爲火。不見道大機須透徹。大用須直截。不識東家孔丘翁。却向他邦尋禮樂。卓拄杖曰。錯復舉龐居士問馬大師。不與萬法爲侶者。是甚麼人。馬祖曰。待汝一口吸盡西江水。卽向汝道。士有省。師頌曰。一口吸盡西江水。鷗鷺啼在深花裏。縱饒直下便承當。何啻白雲千萬里。

小參過去諸如來。斯門已成就。夢裏求形水中捉月。現在諸菩薩。今各入圓明。捕得老鼠打破油甕。未來修學人。當依如是法。彼自無瘡勿傷之也。無計較中翻成計較。無途轍中翻成途轍。殊不知屠房酒肆全彰古佛家風。鬧市紅塵顯出祖師巴鼻。若也舉一明三目機銖。兩何啻白雲萬里。嗔花開花落。任風吹自。有清香滿天地。

示徐直翁長夏獲以同居巖間松下一語一默喜不自勝。且道與古人夏中不聞正因兩字是同是別。請直翁下一轉語。機先著眼。未是俊流。昔汾陽參七十七餘員善知識。後見首山問。百丈卷席意旨如何。山曰。龍袖拂開全體現。汾又問。師意如何。山曰。象王行處。

絕孤踪汾陽於此大悟禮拜起曰萬古碧潭空界月  
再三撈撈始應知。傍有僧曰汝見什麼道理便乃自  
肯汾曰正是我放身捨命處看他古人終不肯自小  
結果參禪縱有所省若不見人謂之癡禪悟迹不除  
翻成籠檻一切處爲之禁制坐在勝妙界中前輩謂  
之鷄臭布衫最難卸却更宜審諦第一不得向黑山  
下鬼窟裏作活計第二不得向急水上打毬子四威  
儀內急切用工。雖然撈破面門元來只是舊時人更  
無絲毫爲障爲礙言多道遠勉之

元統甲戌五月一日遺誠汝等出家當行出家之行  
當念四恩難報信施難消努力以道爲重不可虛度  
時光常住十方僧物爲老病故毋得競爭人我增長  
無明閹搆是非戒之慎之來日頌大眾早爲焚化不  
須剃頭不用洗浴一爐猛火千足萬足

初二日辭世偈云現成句子不妨舉似處空撲落須  
彌起舞奄然而逝壽七十臘五十卽以卒之九日茶  
毗收舍利建塔於寺西證妙明眞覺禪師之號塔曰  
寂光

杭州鳳山一源靈禪師參方山於瑞巖充堂司一日  
入室請益趙州勘婆子話有省後住鳳山上堂舉世  
尊陞座文殊白椎公案師曰世尊已是錯說文殊已  
是錯傳新鳳山今日已是錯舉會麼字經三寫鳥焉  
成馬

明州松巖秋江元湛禪師久從絕象遊後參方山得  
旨偶遊明之松巖愛其清勝不忍去遂跌坐石上俄  
有二虎踞坐其側若護衛狀師命之伏枕其背熟睡  
山民異之卽其處剏精藍以居之師不涉世事法施  
之外澹如也將化別衆就龕說偈曰洗浴著衣生祭  
了跏趺晏坐入龕藏花開鐵樹泥牛吼一月長輝天  
地光復爲衆曰十五年後寺當火啓龕則火可止至  
期果然衆承開龕師神色如生爪髮俱長  
天台上雲峰無盡祖燈禪師四明王氏子參日溪詠  
公於天寧問生死事大無常迅速乞賜指示溪曰十  
二時中密密參究忽然觸著却來再問師抗聲曰無  
常迅速生死事大語未終溪便喝師遽禮拜溪曰見  
何道理便爾作禮師曰開口卽錯溪頷之尋參方山

得法卓錫上雲峰影不出山五十年

洪武二年二月八日示微疾夜將半顧左右曰天向明乎曰未也或曰和尚正當此際何如師破顏笑曰昔德山坐疾僧問還有不病者麼德曰有曰如何是不病者德曰阿哪阿哪師良久曰如此喚作病得否衆無語師曰色身無常早求證悟時至吾將去矣侍者執紙求偈師曰終不無偈便未可死耶侍者請益堅乃書偈曰生滅與去來本是如來藏拶倒五須彌廓然無背向投筆端坐而逝

丁居士素以針工在方山座下久之冀明本分山惟東敵西擊間毀罵諸方凡有言說皆流俗鄙士老僧不欲以惡毒中汝丁一日剔琉璃有省書偈呈山提起提起放下放下者點光明照天照地山喜其行業淳素乃印可之

#### 徑山下第四世

#### 天台觀禪師法嗣

處州福林白雲智度禪師姓吳郡之麗水人年十五從假禪師剃髮深習禪定徧參無有可其意者復還

里之白雲就澄禪師故基築室居之後訪淨慈西峰俱不契晚侍無見問西來密意未審如何見曰待婆羅峯點頭卽向汝道師以手搖拽擬答見便喝師曰婆羅峯頂白浪滔天花開芒種後葉落立秋前見曰我家無殘羹剩飯也師曰此非殘羹剩飯而何見領之師禮拜

宜林能曰當日無見祖翁推倒華山壓殺赤縣神州三百八十四家人直教巨靈擡手不及而今舉揚臨濟宗旨石橋綱要教他百千萬億婆羅峯一齊點頭猶未許他何故換骨洗腸重整頓通身是眼更須參

石門雲頌曰張鸞踏碎崑崙頂雲鎖懸河凍鎖津劫外長風幸有在一時吹綻上林春

金明旭頌曰泣發窮途逢驟雨攀鞍抵死到長安

隴頭凱奏神明府萬國山河一統看

見付師偈曰至大是此心至聖是此法燈燈光不差了此心者達師辭見囑曰昔南嶽受大鑑記前後得馬祖授以心法針芥相契不在言多勿掉三寸舌誑

人須真正見解。著于行履。方爲報佛深恩耳。師佩服久之。復往長沙。見方普雲。居謁小隱。大至正甲午。還福林。尋主龍泉。普慈遷武峰。太守何密菴參師。舉白雲謂五祖曰。有數禪客。自廬山來。皆有悟入。教伊說。亦說得有來。由學因緣。問伊亦明。得教伊下。悟亦下。得祇是未。在既有悟入。因甚未。在菴微笑。師曰。五祖道。因茲出一身白汗。便明得下。載清風。你作麼生。菴拂袖便行。師曰。居士且仔細。菴更不迴首。

復且問圓通。白雲舉下。載清風。密菴拂袖便行。意作麼生。通曰。你如何會。且曰。莫是他放捨身命處。麼。通曰。如是如是。

栢山理頌曰。尋得桃源好。避秦無端。却被賊來侵。而今匹馬溪前過。敗國亡家恨轉深。

東林在頌曰。一曲平沙鋪落雁。陽春白雪卒難和。子期去後無知己。消得枯桐恨幾多。

洪武己酉。詔徵天下高僧。建法會於廬山。師應詔會。事解嚴。由京口過虎丘。禮隆祖塔。轉至杭州。州人奉居虎跑。秋趨華頂。庚戌春。示微疾。仍還福林沐浴。更

衣索筆書偈曰。無世可辭。有案可別。大虛空中。何必釘橛。擲筆而逝。茶毗舍利五色塔于院西。世壽六十七。臘五十三。

### 鏡堂古禪師法嗣

平湖則中度禪師。上堂結制來天陰。四十日今朝晴。明好曬眼。雖然臂肘不向外。曲諸人分上。也要檢點分明。

上堂秋水潔秋雲。白秋到梧桐風瑟瑟。江上芙蓉落彩紅。幾人夢斷識莊蝶。

### 徑山下第五世

### 白雲度禪師法嗣

金陵天界古拙俊禪師。松陵人。少有神聰。日記千言。蒐窮羣典。則曰。吾儒風規之儀。老莊幻化之術。惟佛性義理。智海淵深。吾實不欺。若欲窮諸玄。歸妙悟真宗。無如禪道。年二十往越州日鑄寺。祝髮。遍扣諸方。不能灑脫。遂結伴歸里。立限壁觀。九年。每三年然一指。歷然三指。一日忽然瞥地。聞白雲門風。孤峻學者罕入其室。師欣然往謁。雲一見器之。即留首衆。

師一日請益從上宗旨。雲上堂舉世尊拈花平地。骨堆迦葉微笑。忍俊不禁。二俱翻成特地。師豁然大悟。以手搖曰。止。止。雲擲拂子下座。師隨入方丈。雲詰之曰。你適纔見箇甚麼。便與麼師曰。若有見可見。則辜負和尚了也。雲深肯。

東林在曰。當門按劍。魔佛形消。毒鼓一過。人天膽喪。其間聲不死者。原不在數。如風穴上堂。舉世尊以青蓮目。顧視大眾。乃曰。正當恁麼時。因緣首山。警爾自肯。又潯山撥火洞山。觀影俱皆聞聲。即喪。古拙纔問。從上宗旨。還白雲輕輕。搗動毒鼓。便解分身。塵刹得非靈丹九轉乎。

石門雲頌曰。水晶宮出水晶水。太液池翻太液波。一夜好風吹不足。天明無奈雪深何。

顯戟易頌曰。多年故舊忽相逢。逞興登樓話熱衷。最是一般難訴處。垂垂珠淚透心紅。

白雲付師法偈曰。心中有自心。法中有至法。我今可付囑心法。無心法。衆欲推出世。師遁跡出山。留偈曰。半載相依唱祖機。幾番談道奉嚴威。出山便說歸時。

路又是重添眼上眉。韶光嚴整三十餘年。有平生最愛。限嚴整三十餘年。懶送迎之句。

師住南極日。單舉無字。勘驗來學。諸方時號南無字。洪武間。奉旨剃度千僧。至繁昌八峰山。衆請東婁山開堂。曾說示衆禪之一字。亦是強名云。何曰。參在信而已。擬議即乖。開口即錯。若是發心。不真志不猛利者。邊經冬那邊過夏。今日進前。明日退後。久久撲索不著。便道佛法無靈驗。却向外邊記一肚抄部。如臭糟糲相似。是者般野狐精。直饒到彌勒下生。有甚交涉。真正道流。若要脫生死。須透祖師關。祖師透生死。脫不是說了。便休。要將從上諸祖做箇樣子。趙州老人四十餘年。不雜用心。爲甚麼事。長慶俊公坐破蒲團。七箇爲甚麼事。香嚴老師四十年。方成一片爲甚麼事。乃至歷代真實履踐。克苦勵志。爲甚麼事。山僧今日口喃喃地。引古驗今。爲甚麼事。諸禪德既有從上不惜身命。積功累德。妙悟親證的樣子。何不發大勇猛。起大精進。對三寶前。深發重願。若生死不明。祖關不透。誓不下山。如是發願之後。截斷千差路頭。不

與萬法爲侶向長連床上七尺單前高挂鉢囊壁立  
千仞寬立限期急下手脚盡此一生做教徹去若辦  
此心決不相賺我今爲汝保任此事終不虛也

上堂八峰今日披毛戴角銜鐵撻鞍負五須彌遊四  
大海無處藏鼠性命總在諸人手裏幸是可憐生若  
是箇平分風月把守封疆底自不走作直須者裏一  
拶粉碎

上堂魚躍於淵不能躍於階級之上太末蟲到處能  
緣不能緣於火燄之上衲僧家超越祖腰包天地  
鼻孔一缺不能補滿良久曰又爭怪得

上堂龍興海底浪湧山頭不疾一刻不遲一刻石火  
電光捫不及卒風暴雨避不及有般漢向者裏橫拖  
倒拽未免犯手傷鋒殊不知一聲霹靂青霄外雨霽  
雲收片月孤

上堂南方火爐頭有箇無賓主話至今三十年無人  
舉著趙州恁麼道已作屎臭氣諸人還掇起便行劍  
刃上走麼偏地橫屍直下免得麼八峰今日爲汝等  
揭示去也汝等也須自救一半

塔院事

永樂丁亥復奉旨天界一日示疾書偈曰兀兀突突  
運運騰騰都來打碎徧剎徧塵擲筆瞑目而逝塔全  
身塔於八峰山

徑山下第六世

天界俊禪師法嗣

普州道林月幻無際明悟禪師別號蚤骨蜀之安岳  
通賢鎮莫氏子年二十出家請益老宿坐禪之要後  
往樓山訪清菩薩清誨以趙州無字話師乃縛竹爲  
菴研勵無懈四指大書帖亦不顧只是拍盲做鈍工  
夫西江悟首座指參天界客無念過松隱咸皆稱賞  
其志及見白雲雲舉萬法歸一問師師答雲乃喝出  
一晚經行廊下雲入堂遂擒住曰大衆快將火來老  
僧擒下一箇賊師曰是家內人雲以手掩師口曰如  
何是家內事速道速道如有省

宜林能頌曰大冶紅爐烹佛祖規模鎔盡片時間  
歸來古路橫秋色拄杖消飛日月斑  
石門雲頌曰風來赤水珠含碧月到藍田玉吐光  
策馬巫山十二峽一聲猿斷九回腸

白雲一日謂師曰：八峯汝師也，毋宜滯此。師返八峯，峰曰：還我照用來。師曰：若有照用，卽成障礙。峰曰：者斯著空佛也，教不得。師曰：有無俱寂，滅空佛悉皆非。峰謂侍者曰：者僧有福德，相拈拄杖，靠椅坐。命師供說行脚。師爲直敘。峰曰：你且去，我不知你者樣工夫。師一日復上，方丈峰震聲一喝，拈拄杖作打勢。師呈身就棒。峰曰：我棒頭有眼，不打你者般死漢。拽拄杖，便出。師拱立不動。峰復還坐。薙割問曰：大地平沉，你在甚麼處。師曰：全露法王身。峰曰：萬法歸一，一歸何處。速道。速道。師曰：不道。峰曰：因甚不道。師曰：亘古亘今。峰曰：亘古亘今，且置。你在西川，什麼物恁麼來。師良久。峰曰：啞子得夢，向誰說。

一日，峰爲師更號無際。師曰：恁麼則無際亦未在天。下老和尚盡向者裏成道。歷代祖師盡向者裏成佛。卽今有說佛說祖底出來，盡教遣出門去，不如某甲者裏駒駒打睡。峰笑曰：者漢此後不受人瞞去也。乃付偈曰：一道不心光，三際十方明。何如明白中有明，有不明。

今向靈前

師辭峰曰：路逢達道者，不將語默對。將甚麼對。師曰：劈面攔腮，掌擬議，喪却渠峰。曰：子深得大機之用。師出世道林。

古庭參師曰：子將從前做工夫處，親似一遍庭實供說。至見諦處，叉手默然。師曰：子見諦處如何。與我不同。庭以兩手大展曰：者箇非別。師曰：者箇還著言句也。無庭曰：實無一字。師曰：只此無一字處，吾爲汝證明。已竟。

楚山參師曰：數年來，住在何處。山曰：我所住，廓然無定。在師曰：汝有何所得。山曰：本自無失，何得之。有師曰：莫不是學得來者。山曰：一法不有，學自何來。師曰：汝落空也。山曰：我向非我，誰落誰空。師曰：畢竟若何。山曰：水淺石出，雨霽雲收。師曰：莫亂道。只如佛祖來，也不計縱你橫吞，藏教現百千神通到者裏，更自不許。山曰：和尚雖見把斷，要津其奈勞神不易。師拍膝一下曰：會麼。山便喝。師笑曰：克家須是破家兒。恁麼幹疊也。省力山掩耳而出。

師至晚復召山詰曰：汝將平昔次第發明處說來。山

從實具對師曰。還我無字意來。山曰。者僧問處偏多。事趙老何曾涉。所思信口一言都吐露。翻成特地使人疑。師曰。如何是汝不疑處。山曰。青山綠水燕詩驚。歸歷歷分明。更疑何事。師曰。未在。更道山曰。頭頂虛空。腳踏實地。師曰。亦未在。更道山乃禮拜。師曰。如是如是。

與龍在曰。道林門牆千尺。得其堂奧者。或鮮矣。宗廟之美。百官之富。深固幽遠。無人能到。偶披胸襟。從卮字中湧出。百寶光明雲。與楚山相見。楚山道頭頂虛空。腳踏實地。將謂有多少奇特。僧問。透水透沙時。如何。師曰。硬不破軟。

玉峰乾頤曰。透透何曾透。那邊秋光萬頃碧。連天一聲漁笛。千門曉。釣罷歸來月滿船。

正統九年。應詔設法。上大悅。賜紫加妙心普濟禪師之號。

上堂。堯風清宇。宙舜日耀乾坤。紫閣傳丹詔。靈山一會新。復舉憲宗迎佛舍利入大內。現五色光。百僚皆賀。惟韓愈端立。帝問百僚皆賀。卿爲甚不賀。愈曰。臣

今同題

曾看佛經來。佛光非青黃赤白相。此是龍神阿助之光。帝曰。如何是佛光。愈無對。師代曰。陛下聖明。難逃智照。

石門雲聖節上堂。舉公案。舉曰。隆恩法門龍象。憲宗一朝天子。雖然賓主互叶。道合君臣。舉見千載一時未免。檢點石門。遇此太平盛世。皇上聖節。有問如何是佛光。敢道。日月光天德。山河壯帝居。上堂。踞虎頭。把虎尾。未是禪僧極。則拈拄杖。喝一喝下座。

上堂。隆恩一冬百種俱全。祇少箇推算的。所以屬牛人撞著露柱。

上堂。德山托鉢。饑虛逼人。普化搖鈴。大似眼熱雲門。餅趙州茶。從頭勘過。何異推門落臼。將錯就錯。若是七彎八彎。三曲四曲。一任銀山鐵壁。空出衲僧爪牙。不然。饒伊向佛肚裏過來。也只是箇能行的矢橛。上堂。荒草渡頭開正眼。如披雲霧見青天。平地上撞彩去。獅子兒。頓增勇猛。把手拽向百尺竿頭。一錐一割。尿急尿急。一總放過。三十年後破草鞋。蓋得龜殼。

住隆恩替你道箇轉身句子

杭州虎跑性天如皎禪師四明周氏子從正菴中受染謁古拙和尚領鉗錘一夕推簾見月有省乃曰元來恁麼登旦趨見拙便震聲一喝拙曰如貧得寶耶師曰寶即不得即非寶拙曰憑何如是師近前問訊叉手而立拙曰還我向上一句來師便掩耳而出復呈偈曰午夜推簾月一彎輕輕踏破上頭關不須向外從他覓只麼怡怡展笑顏拙爲助喜後住武林虎跑臨終示衆文章佛法空中色名相身心柳上烟唯有死生眞大事殷勤了辦莫遷延大眾且道如何了辦良久吾今無暇爲君說聽取松風瀾底聲語畢而逝龜停七日顏色如生

何密菴居士法嗣

楊州田素菴大士示衆近來篇志參禪者少纔提箇話頭便被昏散二魔纏縛殊不知昏散與疑情正相對治信心重則疑情必重疑情重則昏散俱無

徑石滴乳集卷之一

徑石滴乳集第二卷永遠流通伏願共明般若道果恒新

徑石滴乳集卷之二

清 嗣祖沙門江州 眞在 編  
嗣法門人齊安 機雲 續

徑山下第七世

東林悟禪師法嗣

金陵太岡月溪澈禪師禮圓照寺無著出家精究天台止觀有方僧謂師曰你向後爲法門甘露毋久滯此師乃請益佛法大意僧令自看一日偶閱傳燈見地藏舉肇論曰天地與我同根萬物與我一體始知山河大地草木昆蟲都善法要自此一錫徧參最後至東普道林呈所見林不諾師以林強抑出不遜語辭林知是法器遂負囊送至山門忽指黃犬曰畜生爲甚有業識無佛性師於言下大悟

太陽聞禪師曰道林垂釣四海月溪曳裙龍門雖然通身偏身未免龍頭蛇尾還有爲月溪擔鎗奪

鼓者麼出來與拄杖子相見

道林一日舉無字示徒師在傍深得奧旨付偈曰我無法可付汝無心可受無付無受心何人不成就

石門雲曰牛喫禾馬腹脹復頌曰拈出當陽鬼見愁據天索價許誰酬一聲布穀千林曉春滿皇都

四百州

毒峯善參師問如何是無字曰本善一向隨人道是箇無字今日看來是口金剛王寶劍師曰如何是金剛王寶劍曰寒霜皎皎輝古騰今師曰還我劍來曰擬動卽犯他鋒銳師曰橫按當軒時如何曰佛來也殺祖來也殺師曰老僧來濟曰亦不相饒師曰殺敗後如何曰且喜天下太平

師住太岡上堂揚眉瞬目也不得不揚眉瞬目也不得揚眉瞬目不揚眉瞬目總不得太岡與你二便二一便一還得麼一僧出師便打僧喝師又打僧連喝兩喝師曰你說好喝那僧擬議師便喝  
景泰初應詔住廣恩寺上日臨聽法甚悅賜號爲慈普禪師三年勅歸一日室中出祖衣示徒曰此衣是

唐朝宮主所置今八百餘年矣祖祖相傳至東普先師先師付與老僧若是克家種子方堪紹荷孤假虎威焉敢希冀又曰如百丈侍馬祖祖侍南嶽嶽侍曹溪六祖皆久久親炙磨光剝銳乃能豁徹重關窮嶺壑盡微見窠臼深得大機大用可爲人天眼目

上堂高提祖印朗慧日於中天再振額網扇淳風於末運旋機陷虎轉令屠龍但恁麼去二乘膽落十地魂消放開一線妙契心宗坐却三叉相逢狹路拽在萬仞了無向背密移一步地濶天空所以風搏妙翅雷送遊龍不卽不離續四七二三祖之慧命不離不卽弘石橋雙徑祖之微猷直下洞徹玄微就中披見肝膽兒孫匝地誰不丈夫隨行踏斷流水縱觀寫出禽跡針鋒上不許帶僧躡身諸人脚跟下爲甚黑漆漆問木馬吸乾滄海水魚龍蝦蟇以何爲命問無邊剎境自他不隔於毫端龍王爲甚失却定海珠問鯢化鰲眼在蚯蚓化百合何在問爲甚鐵牛眠少室問向上一路羅籠不住呼喚不回大力量人爲甚坐在百尺竿頭

師一日謂衆曰。老僧明日遊天台。常住宜速備辦。監院曰。和尚去甚麼時。回師屈指示。曰。二五至五鼓坐脫時。大風震起。白光燭地。塔全身於本山。

壞空成禪。師僧問。如何是六不收。師曰。石敢當。

金陵妙峰玄禪。師僧問。如何是異類。師曰。角邊鷹搭。鸞眉底赤雙睛。

廬山天池無爲一禪。師僧問。祖意教意。是同是別。師曰。牛拖犁馬拽磨。

伏牛無礙鑒禪。師僧參。師喝曰。看劍。僧曰。幸是某甲。若是別人。一場禍事。師曰。那箇是別人。試指出看。僧揪倒禪床。師曰。幸是老僧。若是別人。打折你驢腰。

金臺大容山古庭善鑒禪。師演之昆明人。參一歸何處話。一日定中。聞僧曰。見無所見。卽眞見。師於此頓然脫落。

正統乙丑。參無際得法。就止大容山。雲水不絕。無際恐出世早。命爲首座。問曰。子別在甚麼處。師曰。佛祖行不到處。際曰。還計人來否。師曰。坦然無礙。際曰。從上古人。阿誰有超祖之智。師曰。黃檗。際曰。子見黃檗麼。

師曰。縱是黃檗。也須見攬際。曰。敢在我者裏說大話。師曰。正眼無私。際曰。觀子之見。吾非子之師也。師曰。無有過量。豈免貶剝。際曰。如是如是。是師後歸。昆明古庭示寂。古庭與盤山并峙。至今二大士肉身存焉。

舒州投子楚山幻叟荆璧紹琦禪師。蜀之唐安雷氏子。九歲從玄極通受業。首參道林。一日聞板聲。有省。復徧叩海舟月溪諸老。咸稱賞之。正統六年。再參道林。得法後。出世天柱。僧問。如何是天柱境。師曰。潤潤雲歸晚。山高日出遲。曰。如何是境中人。師曰。額下眉遮眼。腮邊耳搭肩。曰。如何是天柱家風。師曰。雲鶴炊松粉。冰鎗煮月圓。曰。如何是祖師西來意。師曰。海神撒出夜明珠。曰。學人不會。師曰。文殊失却玻璃盞。景泰五年。遷投子上堂。僧問。遠離口山來。據投子海衆臨筵。請師祝聖。師曰。鼎內長生篆。峰頭不老松。曰。祝聖已蒙師的旨。投子家風事若何。師曰。提瓶穿市過。不是賣油翁。曰。只如祖師道。不許夜行。投明須到還端的也。無師曰。雖然眼裏有筋。爭奈舌頭無骨。曰。趙州道我早。猴白你早。猴黑意作麼。生師曰。不因弓。

矢盡未肯豎降旗。問和尚今日陞座說法未審有何祥瑞。師曰：麒麟步驟丹霄外，優鉢花開烈火中。曰：如何是祖師西來意。師曰：雪消山頂露，風過樹頭搖。問寶劍未出匣時如何。師曰：神號鬼哭。曰：出匣後時如何。師曰：佛祖吞聲。曰：出與未出時如何。師曰：無鬚鎖子兩頭搖。僧提起坐具。師便喝。僧擬議。師便打。乃曰：毒蛇頭上揩癢，猛虎口裏橫身也。□恁般人始得適來者僧大似一員戰將。敢來者裏□鼓撓旗。惜乎龍頭蛇尾。死在棒下。若解轉身活路。□然不犯鋒鏑。所以道弄蛇須是弄蛇手。不會弄蛇。蛇咬殺復舉法燈示衆。山僧本欲深藏岩穴。隱遁過時。蓋爲清涼老人有未了公案。不免出來爲渠了却。時有僧問：未審清涼老人有甚未了公案。燈拈拄杖便打。曰：祖師不了。殃及兒孫。曰：過在甚處。燈曰：過在我殃及你。師曰：大凡宗師出世。尤要拈出己見。然後方可定斷古今。看他法燈如此作略。美則美矣。了則未了。幻叟今日亦爲蚕骨老人有未了公案。出來爲渠了却。若有問：蚕骨老人有甚未了公案。應聲便喝。眼目定動。連棒打

出大衆。山僧怎麼提持。且道與法燈用處還有優劣也。無若縑素得出。許他是箇同參。上堂衆集。師歛衣就座。良久曰：分明記取。便下座。示修淨土。上堂誰心無佛。誰佛無心。心佛殊名。體無二致。是故念佛念心心念。念佛無念。無心無心。無佛心佛兩忘。念不可得。只者不可得處。脫體分明。纖塵不間。是以真機觸目。徧界難藏。山色溪聲。頭頭顯露。性相平等。理事混融。箇裏覓一毫自他淨穢之相了不可得。何凡聖迷悟之有也。於此果能豁開智眼。頓悟其真。直下知歸。不勝慶快。還識心佛麼。直須揣見虛空。骨看取優曇火裏開。

上堂顧視大衆曰：只者些子。請訛古今多少師僧到者裏開口不得。思量不及。舉揚不出。薦拈拄杖曰：今日爲甚。却落在山僧手中。以拄杖橫按曰：橫也由我。豎起拄杖曰：豎也由我。放下拄杖曰：放下也由我。以致恁舒殺活。總由我。又以拄杖向空中點一下曰：正當恁麼時。從上佛祖以至天下老和尚到者裏只得乞命。有分衆中莫有爲佛祖出氣底麼。良久卓拄杖。

一下曰。截賭金剛正眼。靠倒空王寶殿。汝等諸人。討甚麼碗。

示衆。選佛場。開定祖機。辨明邪正。在錯認。雷門浪暖。風雷動。正是魚龍變化。時衆中。莫有衝波激浪者麼。良久。以拂子打。曰。機先一著。觀面全提。擊禪床一下。句外一言。和聲揚露。不許傍思。顧。容擬議。分

疎。既得眼來。劍云久矣。饒佛祖到。只攢眉有分。何故。蓋爲非。路可通。非心識可測。若是英俊。落

僧向未舉。已前便當點首。一笑。猶較些子。近世人心。不古。學者不務真參實。是接響承虛。以學識依

通爲悟。明穿鑿機緣。爲參究。破壞律儀。爲解脫。資緣據立。爲。世以致祖風凋弊。魔說熾然。塞佛祖之坦

途。警。天之正眼。使吾祖教外別傳之道。於斯委地。大。世尊於二。衆生心病。預設多

垂規。則故曰。末世衆生。道無令求。悟惟多聞增長。我見又。使普令開

以結制安居。則之則。生無礙故。結。時也。諸大德。於九十日中。還曾證悟也。

○ 疑難

○ 疑難

○ 疑難

○ 疑難

○ 疑難

○ 疑難

已悟者。且置勿論。如或未悟。則此一期。又是虛喪了。若是真正。以十方法界爲圓覺期場。無論百日子。但以舉起話。始一年。悟參一年。十年不。年及至二十年三十年。盡平生。不悟。決定不移。此志。只要見箇徹頭徹尾。真實究竟處。方一放參之日。所謂一萬年。豈虛語哉。豎起拂子。諸大德。還知落處麼。幻叟。今。舌更。諸人下箇註脚。猛火鑄成金彈子。當機捏碎。又。等閒得失。俱拈却。風送潮音出。

天順敗元。由匡廬歸蜀。韓都候於方山建雲峰寺。迎

師住持。成化九年三月望日。示微疾。衆請末後句。師

展兩手。曰。會麼。復曰。今年今日。推車撞壁。撞破虛空。

青天霹靂。阿呵。泥牛吞却老龍珠。澄澄性海。漚花

息泊然而逝。壽七十。僧臘六十一。

普州大定太虎冲禪師。問無際德山。用棒臨濟行喝。

還當得。際曰。臨濟德山。且止。親切還我話頭來。師

曰。若論親切處。和尚也須迴避。際拈拄杖。師便喝。

重慶西禪雪峰瑞禪師。天奇瑞參師。問。無字意作

可麗奇

麼生可乃移時方覺答曰。潤底頑冰吞宇宙。性湖明月匝天寒。師大喝曰。汝還有嫌凡愛聖底心。掃妄求真底見。奇曰。是師曰。你若嫌凡愛聖。斷般若之善根。你若掃妄求真。絕諸佛之命脉。震聲又喝曰。真又是誰妄。又是誰凡。又是誰聖。又是誰奇。豁然便禮拜。伏牛物外無念圓信禪師。金臺高氏子。生於宣德己酉。九歲出家。受具後。首見無際於隆恩。有省入天。順已卯。歸牛山結茆。辛巳詣繁昌。參月幻幻。問何處來。師曰。牛山幻曰。人在者裏。牛灣師曰。覲面不相識。全體露堂堂。幻曰。雖然如是。頭角不全。在師曰。某甲今日山行。困幻復拈起竹篋曰。喚作竹篋。則觸。不喚作竹篋。則背上座作麼。生師曰。有勞神用幻曰。未在。更道。師便進前奪竹篋。擲於地。幻軒渠大笑。師曰。某甲罪過。便禮拜。幻乃撫而印之。師菴居三十載。開法伏牛。僧問。龐居士道。一種沒絃琴。惟師彈得妙。某甲今日請和尚彈。看師欸。嗽一聲。僧曰。不會。師曰。鐘作鐘聲。鼓作鼓響。曰。意旨如何。師曰。馬祖去世久矣。問如何。是。師曰。心。師曰。富兒易驕。曰。非心非佛。又作麼。

生師曰。窮坑難滿。曰。某甲不會。師曰。若道。即心即佛。大似好肉剜瘡。若言非心非佛。何異灸瘡。如艾直饒道不是。心不是。佛不是。物也是。平地乞交。且道。畢竟如何。坐來拭几添香火。粥罷呼童洗鉢盂。

黃州石門山黃荊潔空圓通禪師。上堂拂子未拈已前。針錐徧地。及向諸人面門一拂。便覺有生有殺。有權有實。離文喪德。伊誰之咎。你有拄杖子。我與你拄杖子。你無拄杖子。我奪你拄杖子。石門不是痛處。著艾要與古人抖筋抖骨。所謂珠簾半捲。剛羞面彩袖餘霞。拂石苔。

太平府八峰山廣善寶月潭禪師。大慧參師問。如何是祖師西來意。慧曰。東嶺上有雲。師曰。有雨雲。無雨雲。慧曰。雨淋淋。地師曰。下後如何。慧曰。白浪滔天。師曰。盡大地是箇火坑。得何三昧。不被燒却。慧曰。東海鯉魚吞却日。

成化間。一日。過鼓上堂。化緣已畢。大地山河。絕消息。黃金殿上。無知音。免教諸人空狼藉。便化。

素菴田大士法嗣

楊州天寧寺和菴忠禪師僧參師曰甚處來曰嵩山師曰曾到五乳峯麼曰在彼過夏師曰聽月岩畔石爲甚麼大底大小底小僧無對師打曰何曾到彼來大雲入曰要到五乳峯麼豎拂子曰盡大地人向者裏相見

四明法中正堪禪師僧參師豎拂子曰你道喚作甚麼曰寧可永劫沉淪不向諸聖求解脫師擲下拂子復豎拳曰你道者箇喚作甚麼曰學人終不作鬼窟裏活計師笑曰龍蛇易辨禪子難瞞僧禮拜

佛跡頤菴眞禪師示衆青山疊疊綠水滔滔於斯會得獨步高超雖然如此也是尋常茶飯古德云欲窮千里目更上一層樓承古有言機不離位墮在毒海語不驚人陷於流俗若擊石火裏別縈素閃電光中辨殺活可以坐斷千差壁立萬仞還知有恁麼時節也無錯勘破了也如今談禪者脚跟點地鼻孔撐天具正眼者落落罕聞所以偏正不一各立異端堅執已解勿通實理所謂正法難扶邪法競興古云信有十分則疑有十分疑有十分則悟有十分可將眼裏

所見耳裏所聞惡知惡見奇言妙句禪道佛法真高我慢等心徹底傾瀉莫存毫末只就向未明未了公案上距定脚跟豎起脊梁無分晝夜無參處參無疑處疑直得東西不辨南北不分呆樁椿地却如箇有氣的死人相似心隨境化觸著還知打破觸體不從他得豈不慶快平生

#### 徑山下第八世

#### 太岡澄禪師法嗣

南京太岡夷峰寧禪師杭州錢氏子生而岐嶷舉止不凡年十二博通經史無濟世意禮雪峰善和尚披剃親靈隱扣雪骨侍妙峰有年凡師所到無有拆其機者後侍月溪因僧請益溪曰佛法不是鮮魚怕爛却那即打出師在傍大悟

石門雲頌曰丹奏宸衷隔翠微瑋璋屏列尚依依微簾忽聽金鐘曉五鳳樓前各自歸

月溪付師法偈曰心即能知心法即可知法今所付法心非心亦非法師繼澄席

上堂心王自在法性無偏一切佛事水月空花本來

寂靜釋迦老子全身在汝眉毛罅裏諸人會麼若不  
會太岡替你下涅槃堂

上堂大凡提唱宗綱須具三要第一要明宗旨勸  
辨邪正第二要識大道真體不屬有無第三要解作  
大師子吼威鎮一切具此三要如車有輪如鳥有翼  
翼折不能高舉輪折不能轉運宗師家爲後學眼目  
若不具此三要安能奮鎮一切然雖如是要在第一  
句下領取

上堂一句子不作一句子會天無四壁萬里雲消佛  
祖攢眉人天膽喪累我迦葉頭白齒黑一句子若作  
一句子會誤他千聖萬賢頭出頭沒戴角披毛眼裏  
沙耳裏水薦卓拄杖曰權且放過

上堂臨濟大師道第一句薦得堪與佛祖爲師第二  
句薦得堪與人天爲師第三句薦得自救不了慈明  
道第一句薦得和泥合水第二句薦得無繩自縛第  
三句薦得四稜著地師曰慈明只解澆油救然不解  
藥裏去病太岡卽不然第一句薦得山門頭與你商  
量第二句薦得僧堂前與你商量第三句薦得寮舍

裏與你商量太岡雖恁麼舉諸人須向一念未舉以  
前會得略較些子

成化二十一年奉旨重修山門褒寵甚渥於弘治  
四年九月三日示疾時羣鶴遶殿而逝奏賜圓明普  
覺大師之號塔曰寂照

南京牛頭古心寶禪師楚湘郭氏子世業儒師讀中  
庸至喜怒哀樂之未發渙然見諦禮南嶽瞿白爲師  
造大鴻圓具聞月溪應詔歸太岡乃折節參叩溪一  
日舉無字始得徹悟景泰七年歸寂

黃梅東永福自秀禪師因僧問真空不空如何是空  
師曰劫外無奇絲毫絕相僧曰妙有不有如何是有  
師曰隨緣施設豈混尋常僧曰空有雙絕如何不絕  
師曰七長八短

靈隱性天宗杲禪師參月溪看無字公案一日失手  
打破淨瓶有省景泰二年示寂偈曰幻軀五十七日  
用事祕密打破祖師關晴空轟霹靂  
天淵道湛一源禪師參月溪請益溪曰佛法不是鮮  
魚怕爛却那遭痛打一頓一日見流水有省

德山古心安禪師。僧問。盡大地是沙門。一隻眼爲甚有樓臺殿閣。師曰。藏盡楚天月。猶存漢地星。

南陽峻中巖禪師。上堂。月溪老人。胸藏北斗。眼蓋乾坤。嶽上座平生。不幸觸他毒氣。今日對衆剖露。依然弄巧成拙。卓拄杖曰。咩咩咩。託詞。

杭州天真壽峰善禪師。鳳陽吳氏子。父宦遊廣東。雷陽而生。年十七出家。初遇源明和尚。示無字話。師當下便能領解。舉似明明曰。我二十年看箇無字。如蚊子上鐵牛。纔學做工夫。便有許多知見。復曰。觀子根器。有異於人。切莫途中被人哄去。作長老。悞汝大事。師蒙誨。卽發願。一味拍育做工夫。自誓此生以悟爲期。嘉無際。道風入川。參叩會縣蒙詔。赴京。遂掩關不設臥具。惟置小凳。皆重去凳。一日聞鐘聲。有省。說偈曰。沉沉寂寂。絕施爲。觸著無端。吼似雷。動地一聲消。息盡。觸體粉碎。夢初回。再往謁際適際。遷化。遂求證於月溪。溪曰。佛法不是鮮魚怕爛。却那日爲東。戴西。擊暗垂勸。驗一日。侍溪園中。坐次。溪曰。畢竟如何。是無字意。師曰。賊賊分明。溪曰。賊卽且置。還我賊來。師

曰。六六三十六。溪曰。未。在。更道。師曰。夜短睡不足。日長饑有餘。溪曰。牛過隱。樵頭體四足。都過了。因甚。尾巴過不得。師曰。了無一法。當情警衛。通身露地。溪曰。你卽今在甚處。安身立命。師曰。何處不稱尊。後辭溪。遊浙中。掩關天目之萬峰。菴。月溪亦蒙旨。欽錫歸金陵。太阿遣書詔師。付囑師。適因事他出。溪臨委。息命。送衣拂界之師。住山凡四十餘年。天順間。建西湖之三塔。泊天目之招明。吳山之寶蓮。南山之甘露。成化初。掩關石屋。後住天真。僧問。如何。是和尙家風。師曰。前江潮急。魚行遲。後嶺風高。鳥泊難。壬寅示寂。塔於本山。

代州五臺孤月淨澄禪師。天順改元。返清涼。代王請詣內掖。問道。感光明。庭煥王心。大悅。以師禮爲。遂斥俸金。建寺華嚴谷。額曰。普濟山居。偈曰。寰中獨許五臺高。無位真人伴寂寥。一汪諸方風浩。浩常空。兩眼視雲霄。

### 壞空成禪師法嗣

光澤道惠禪師。僧問。浩浩靈源。如何證得。師乃叉手。

當胸僧參師曰。道得轉身句。與你烏藤三十道不得。  
籬裏飯桶裏羹。一任受用。其僧無對。

建寧斗峰德章淨滿禪師。作務次見朗禪人有喜色。  
呼近前曰。公案作麼生。朗曰。不會。師大笑歸方丈。

妙峰玄禪師法嗣

汝州風穴福緣廣禪師。上堂。一毛現。神變一切佛同。  
說卓拄杖喝。一喝下座。

天池一禪師法嗣

神鼎寶藏淨玉禪師。上堂。古德道。毫釐有差。天地懸。  
隔。師曰。咽。又曰。青蘿黃線。直上寒松之頂。白雲淡竹。  
出沒太虛之中。以拄杖卓一卓下座。

伏牛鑒禪師法嗣

仰山無隱正道禪師。上堂。著子混沌已前。現現成。  
成惡辣。捺諸人隱隱。地似覺有箇物。舌尖有利劍。吐。  
得却自然。蕩蕩地。與麼省事。諸人自作艱難。

大潯獨潭海昌禪師。在伏牛。受以鬼神觀。不破參究。  
累日。聞僧舉。眉間挂劍。有省。後住潯山。凡見僧。參乃。  
曰。看劍。

洪州西山古岩從定禪師。上堂。道不用修。但莫染汙。  
如寡敵衆。念念在生死上著脚。自然河清海晏。  
杭州天竺行一秀禪師。參伏牛。看龐居士。參馬祖。機。  
緣有省。住後雲水不絕。一日。謂侍僧曰。風稍不禁。便。  
坐化。

龍牙鐵牛勒禪師。僧問。如何是諸佛出身處。師曰。水。  
向石邊流出。冷風從花裏過來。香。問作麼生。是玄之。  
又玄。師曰。死貓頭。

古庭堅禪師法嗣

五臺山顯通大魏淨倫禪師。雲南康氏子。生於宣德。  
丁未。正統間。從無極泰。受染。古庭住浮山。師往叩室。  
中機契。後住顯通。上堂。無孔鐵鎚。當面擲。黑漆崑崙。  
攔路坐。莫有挨拶得入。拈弄得出。底出來。道看僧問。  
如何是臺山境。師曰。不是天晴。便是下雨。曰。如何是。  
境中人。師曰。金剛窟裏萬菩薩。曰。未審尋常所說。何。  
法師曰。清風吹幽松。近聽聲愈好。問。如何是佛法的。  
的大意。師曰。今年調雨。水農家好。春麥問。如何是祖。  
師西來意。師曰。待飯。僊山轉身。卽向汝道。乃曰。拈砵。

霜作醜醜亦曾有也。撒珍珠於瓦礫，誰箇不然。開眼上樹，特地喪全身。夢昇兜率，也是揚家醜。未動情思，轉魔女盡成菩提。寶器不勞腕力，指娑婆便爲妙喜。淨邦長水，潯岳積而來。瑯琊覺冰消而去，信腳踏翻琉璃。穿等閒擊碎珊瑚枝。

上堂三聖震威一喝，正法眼裏撒沙。南泉白刃高揮，古佛家風塌土。何必不必探竿，豈在人手。湘南潭北，塔樣脫體持來。不萌枝上放春，回烈燄堆中飛片雪。有斯作略，可謂其人。誰家井底無天，到處波心有月上。堂體相用三大齊，影塵攝入因果智。五周頓證，法法圓融。百城烟水，不出一毫。十世古今，非移當念。紅藕花開，水香觸著。蟻蟻蟲半邊，鼻青山低處。關展開渡，蚊子一莖眉。百川競注而水體不流，萬象共號而風本自寂。金獅子不勞蹄，地水牯牛隨分納些動。容滿目家山，依然青天白日。

冬至示衆五項瓊瑤堆千松，珠玉枝盡疊山泉石。烟雲飛樓擁殿，總是又殊一隻智眼。眞光是汝諸人常在于其中，經行及坐臥，還知從不曾動著他一莖眉。

毛麼若也與麼見得，便爾攝大千於毫端，廣塵沙於法界。其或未然，切忌東卜西卜。老僧爲汝諸人眞實告報，今朝冬至一陽生，珍重。

示衆山高水濶，月朗風清。松蒼石白，夏暑冬寒。如是歷歷分明，一一成現。且道，諸僧分上，成得箇甚麼邊事。莫有道得者麼，不妨出來道看。若無老僧自道去也，拈拄杖便下座。

示衆演祖道有則奇特，因緣學似諸人欲說又被說。礙不說又被不說，礙大小演祖大似靈龜曳尾一言。既落人耳，如何諱得。老僧也有一則奇特，因緣索性舉似大方，令你倚門傍戶者，一箇箇壁立千仞，便下座。

示衆老僧者裏也不說，東村李大郎太儉也不說，西社王二姊太奢也不會。安角呼兔也不會，添足畫蛇早起一盃白粥。午後一盃清茶，誰管他陳年爛葛藤。冷地開花展兩手，曰汝等諸人來者裏討甚麼。乾木查師有山居吟，無事山房門不開。土堦春雨綠生苔，此心將謂無人委。幽鳥一聲何處來，後示寂塔於

本山

東山琦禪師法嗣

太平府八峯山性空禪師問楚山如何是佛山曰生鐵秤錘師曰如何是法山曰石頭土塊師曰如何是僧山曰黑漆拄杖師於此信入後請益茅山三問始得脫然山命師首衆

涿州金山寶禪師參楚山山問具得正眼當明向上一機如何是向上一機師曰青山日卓午山曰猶未夢見在師曰木人拈玉線石女度金針山曰從上佛祖不傳之妙子作麼生領會師近前禮拜一拜山曰轉身一句速道將來師拂袖便出山曰放子三十棒師回身曰謝和尚垂慈山曰子雖有滔天之浪且無湛水之波師叉手默然山曰如是如是

中溪隱山昌雲禪師參楚山山問法諱甚麼師曰昌雲曰道號師曰隱山曰雲在山中隱如何又出師曰只因夜來鶴帶過上頭關曰忽被狂風吹散時如何師曰依舊青天白晝山笑之

太原府海雲深禪師楚山問鐘聲問曰子還聞否師

曰聞山曰你道設箇什麼師乃作鐘聲山曰只如鐘聲未發已前響在什麼處師曰未發已前山曰鐘聲絕後響歸何處師曰鐘聲絕後山曰耳是根響是塵知響者是什麼師曰非心不響非響不心山曰心豈有響乎師曰心雖非響響處分明山曰無響之時心在何處師曰心體湛然不逐響生不隨響滅蓋由兩耳處通是以應用無礙

師出世辯慧接人臨終沐浴設偈而逝

唐安湛淵禪師上堂楚山大似遊鱗徑尺不可觸犯唐安偏向毒蛇頭上抓會他絕響無音還有說直至而今拄杖談衆中有聞得的當者麼若的當且道他說箇甚麼良久卓拄杖曰蒼天蒼天

古淪濟川洪禪師問楚山水母飛上色究竟天入摩醯眼裏作舞因什不見山曰多少人向者不見處打失鼻孔師曰如何是摩醯正眼山曰面門兩眼渾無事頂中一點耀乾坤

襄陽府大雲興禪師與楚山外歸因有機緣師曰大衆久立請和尚回寺山曰那裏是寺師曰鐘聲響得

好山笑曰頭角彷彿鼻孔一般

安慶府石經山海珠祖意禪師楚山問趙州道無字意作麼生師曰只爲婆心切肝膽向人傾山曰不涉有無如何體會師曰到者裏無用心處山曰早是用心了也師曰不知山曰誰道不知師曰道者亦非山曰如是師禮拜

長松大心真源禪師楚山問父母未生前試道一句看師曰道不得山曰因什道不得師曰他無口山曰又道無口師曰謝師答話山曰未在師叉手默然而立山曰如是如是

師出世常學末後句勘驗學者

松蘿大慈寺崇善上天智中國師彭縣人住松蘿時番禺叛服不常師撫化莫不投服天順間累封國師楚山遍訪師呈悟錄山曰趙州因甚道特事也無師曰秋夜家家月春來處處花一雙青白眼何處撒塵沙山曰善哉

石經節堂祖裕禪師成都巨氏子從楚山學出世法因山問般若經師詣前竊詰師曰山曰般若智用子

今得矣師禮拜

三池月光常慧禪師簡州李氏子謁楚山契悟山曰佛祖本無言說凡有言說即非真理離四句絕百非試道一句看師良久進前禮三拜依位而立山曰此是諸佛諸祖之所得二十三代之所授言語不可及處觀面相承點首默契子善護持珍重

翠薇悟真空禪師楚山問徹底窮源作麼生會師曰有星皆拱北無水不朝東山曰還假功用也無師曰功用即不得山曰只此不可得處又作麼生師擬開口山震聲一喝師曰恩大難酬山曰善自保任

陝府玉峰如琳禪師參楚山默契山曰子到不疑地耶師曰某甲亦不向者裏住著山曰甚處住師曰有無俱不帶脫體絕思量山曰只者絕思量處正好思量師乃諾諾

天成古音韶禪師掩關次楚山問關中主在麼師曰他不曾出入師遂呈偈曰只此寂默非寂默非寂默中亦非絕渠儼面目已呈師動靜何曾有區別山可之

南京香嚴古溪覺澄禪師高陽張氏子受業於默菴。每於禪寂中覺白水從鼻流出。徧滿堂宇。自意身心輕安。後參楚山針芥相契。

天順五年住高座寺。結制小參。三根椽下坐。堆堆把定身心。若死灰撥出爐中些子火。驚天動地一聲雷。衆中有不惜眉毛底出來道。看良久。曰。眉間拶出金剛。露柱燈籠盡放光。

成化癸巳八月初九日。盥沐端坐而化。衆凄然。師隨開目曰。不須如是。復瞑目。

中 歷 歷 歷

珪菴祖珙侍者侍楚山。了明大事。一日病作有痛苦。聲山曰。主人在甚麼處。師曰。秋風不扇。桂藥飄香山。曰。怎麼則徧界絕遮藏也。師曰。有眼觀不見。山曰。從今別後。再得相見否。師曰。曠劫不違。今何有見。山曰。然則子不曾病耶。師曰。病與不病。總不相干。山執其手曰。是甚麼。師曰。是祖珙之手。山曰。祖珙是誰。師曰。玠故非我。亦不離我。山歎曰。善哉。只箇不即不離。可謂妙契無生。徹證圓常之道。今子見理既明。雖則年茂死亦何憾。師振身端坐而逝。

西禪瑞禪師法嗣

性空覺禪師嘗作顯宗歌曰。達此宗無今古。拶破虛空。還自補聲色。堆頭妙覺場。放去收來無間阻。體中妙夜半。木人臨鏡照。波斯南岸。嚼寒冰。塞北胡兒街市。開用中。立石女。吹笙碧樹。巔趙州。葫蘆挂東壁。村中王老。夜燒錢。立中玄。妙中妙。寶絲網裏闌明珠。須向暗中通一竅。海潮音熾然。說師子筋。琴彈白雪。兩岸青山笑點頭。百年孤兔形摧滅。

湖州東明曉菴昇禪師。關東人。年十九祝髮。參德翁淳頤。旨扣雪峰。得法師出世。僧問。如何是無相道場。師豎拂子曰。會麼。曰。不會。師曰。奈汝不會。僧住思師。便打。

棠城寶文洪印禪師。古淪棠城張氏子。隱雪峰。蓄養有年。因峰遷化。未獲印可。遽扣楚山。值定王薨。世三周除禪。請山陞座。師出問。雷音動地。選佛場開。一會靈山。儼然未散。未審皇恩。佛恩如何。補報。山曰。蕩蕩堯風。清六合。明明佛日照三子。師曰。玉梅破雪。紅葉凋霜。定王金容。即今何在。山豎拂子曰。在山。僧拂子。

頭上成等正覺放大光明。師曰：與麼徧界絕遮藏也。山曰：有眼覩不見，師曰：覩不見處，不隔纖毫。山曰：末是妙。師曰：如何是妙？山曰：二邊俱抹過，始見劫前人。師曰：蒙師點出金剛眼，死去生來更不疑。山曰：俊哉。衲子出語標宗，不添爲西禪之嗣。師曰：人天證明，謝師印可。

出世僧問：如何是祖師西來意？師曰：百不及一。曰：如何是相承底事？師曰：箇裏難容話，機前一笑傳。

無相真禪師在東山，作園頭。楚山入園見師，縛冬瓜架指瓜曰：者箇無口，因甚長如許？大師曰：某甲不曾忘。一時山曰：主人公還替你出力麼？師曰：全靠他。山曰：口出與老僧相見，師禮拜。山曰：猶是奴兒婢子在。師拈幾縛架山，顧侍僧曰：菜園有虫，師後得法雪峰。

太初性圓禪師頌何物最苦曰：風前一曲動離愁，惹得三塗苦未休。回首寒潭空漾碧，夕陽西去水東流。

潔空通禪師法嗣

黔中正法雪光禪師族趙氏歷諸方至靈峰度夏間

舉嚴陽尊者問趙州公案，有省舉似寂照，照日無功用處正好用功，莫認些子光影，有悞平生。復結冬於景德，一日定中聞岩瀑聲觸發，默舉從上佛祖機緣。

一一透得，遂往參潔空，從頭舉似空，曰：不見道，莫謂無心云是道，無心猶隔一重關。道了便入寢室，師自是茫無意緒，懷疑不決。一日見寒山詩：吾心似秋月，之句疑滯頓釋。後菴居古山，臨終書偈而逝。

方湖德嚴悟本禪師參楚山，道業純一。乃白山曰：不涉寒暑，是什麼人？山曰：適來爲汝道什麼？師擬對山，喝曰：擬心即乖。師曰：元來恁麼？那山曰：汝見箇甚麼道理？師曰：面目分明，當機不露。後參潔空得法。

齊安石門山黃荊印空海禪師參潔空，空舉無字令。師下語四十轉不契，師曰：可無方便耶？空舉想中頌師於言下大悟。

八峯潭禪師法嗣

鳳陽府槎山護國無用文全禪師濟南商河劉氏子，年十九投靈岩祝髮，初見月天蒙示法要，次參別傳有省，入傳問虛空粉碎大地平，沉汝在什麼處安身。

立命師曰。昨夜泥牛吞皓月。今朝木馬吐清風。曰。一歸何處。師曰。一自白牛歸雪嶺。直至如今不見踪。傳頌之。復往金山。謁無極禪師。見寶月月。問有草鞋。錢麼。師曰。青山不露頂。曰。如何是應物現形。師曰。孤光明月普天輝。萬象森羅全體現。一日月入室。坐次。師曰。寒寒。師便搬火爐向前。月曰。如何是火爐邊事。師敲火爐。三下。月微笑而出。入室。次月拈拄杖曰。者是拄杖子。且道主在甚麼處。師奪拄杖。擲於地。叉手而立。月曰。看者。漢撞著拄杖子了也。師拂袖便出。後蒙印可。出世槎山上堂。法不孤起。仗境方生。道本無言。因言而顯。今來龍象交參。諸山共處。此非小緣。感皇上之洪恩。賢士大夫之佑護。檀那喜捨。僧衆清修。安立禪期。助斯聖化。命山僧光揚宗眼。令末運得種福田。然雖如是。猶未是禪衣下事。在且道作麼生。是禪衣下事。僧問。三乘卽不問。直指事如何。師曰。雙峰頂上。鵲栖樹。九龍山下。鳥啼花。曰。西來祖意。蒙師指。東土相傳事。若何。師曰。嶺上有風。千古秀澗。邊流水。萬年清。問如何是白水。境師曰。一片荒田。堆四野三

也南的原本  
有一行空處

間。邱屋壯諸山曰。如何是境中人。師曰。白虎頭邊。天子廟。黑龍潭底。帝王基。曰。人境兩忘時。如何。師曰。蘇武不知青羝意。七郎常恨白鴉歸。僧禮拜。師拍案一下。下座。僧參。師問。如何是高峯。宗旨曰。石馬嘶風。居物外。金鷄高唱。御樓前。師曰。有何奇特。曰。不遇知音者。徒勞話歲寒。師曰。祖祖相傳。甚麼。曰。海底泥牛翻巨浪。林中石女播清風。師曰。大地全彰。是甚麼人。受用曰。東村李二哥。師曰。那山如何高。曰。只爲強出頭。師曰。者山如何低。曰。說那不唧唧底。師顯左右。曰。草裏有蛇。曰。照顯狗腿。師曰。阿哪阿哪。南京崇福寺大慧覺華禪師上堂。舉拂子曰。威音那畔。原只是者箇。今日目前也。只是者箇。以拂子上下拂。曰。若喚作拂子。瞎却人天眼目。不喚作拂子。亦瞎却人天眼目。大衆且道。喚作什麼。者裏會得。便知迦葉微笑。二祖覓心了不可得。處紹如來之傳燈。續祖庭之正脉。聯二十八世之英華。接三十四代之骨髓。衆皆默然。師以拂子擊曰。千聖不識。嘉興府天寧寺默堂宣禪師。初謁楚山。願契微旨。後

參入峰。峰舉雲門放洞山三頓棒。師語屈意。路降叱之。師頓忘寢食。一日偶聞隣單僧舉五百羅漢降毒龍師。踴躍下單。僧曰。者漢頭耶。師便與一掌。及見峰。峯曰。開口卽錯。你露箇消息看。師珍重禮三拜。峰深肯。一日付師偈曰。竺國拈花旨。嵩山斷臂宗。人天展付汝。無始亦無終。

出世天寧禪法一味。不許學者看文書。并作偈頌。或有私作查實。指出。臨終衆請遺偈。師曰。老僧平常無一言半句。何蛇足爲也。端坐而逝。

伏牛月天禪師。因昶公參師曰。甚處來。昶曰。少室師曰。達磨隻履西歸。如何見底。昶曰。天接白雲過水。和明月齊。師曰。何不與我傳得境界來。昶近前展兩手曰。請師看看。師謂傍侍曰。此子向後豎臨濟之柱石。挺□山之門庭。有日在昶。乃禮謝。

### 天寧忠禪師法嗣

杭州徑山寂菴潛禪師。頤夏末秋初。曰。寶殿瓊樓鎖玉虛。塔除清碧影蒙糊。頂門瞎却摩醯眼。肘後空懸奪命符。僧問。如何是本來人。師曰。驢前馬後。曰。學

也字更動  
恐世字誤

人不曾。師曰。者出庫奴好惡也不識。

明州用剛宗軟禪師。參孤舟。受三不是話。天順初。參和菴菴。一日上堂。祖師心印。狀似鐵牛之機。去卽印住。住卽印破。不去不住。汝等作麼。生師在傍。得大休歇。住後示衆。大凡做工夫。只要起大疑情。不失正念。千疑萬疑。祇是一疑。纔有間斷。卽落也。見汝等做工夫。未嘗半月一月。打成一片。焉得不走。作果若真疑現前。撼搖不動。自然不怕惑亂。又不得起一念歡喜心。纔有絲毫異念。卽打作兩橛。只管勇猛。忿將去。終日如箇死漢相似。到者般時節。那怕甕中走却鼈。

### 佛跡真禪師法嗣

黃梅廣福天然宗。浩禪師。因僧問。如何是道。師曰。擎茶過盞。曰。如何是道中人。師曰。奴顏婢膝。別峰寶芳藏禪師。辭佛跡住。後荷衣松食二十餘年。致有傍嚴縛箇尖頭屋。折脚床。顏就石支之句。僧參師拈棒作舞。曰。你賊我也。僧長嘯一聲而去。處州白雲無量滄禪師。示衆。二六時中。隨話頭而行。隨話頭而住。隨話頭而坐。隨話頭而臥。心如栗棘蓬。

相似不破一切人我無明五欲三毒之所吞噉施爲動靜通身是箇疑團疑來疑去終日默橋橋地聞聲見色管取因地一聲去在

徑石滴乳集卷之二

徑石滴乳集卷之三

嗣祖沙門江州 眞在 編

嗣法門人齊安 機雲 續

徑山下第九世

太崗寧禪師法嗣

杭州天目寶芳進禪師幼習儒因與同學會文觀芍藥花有省從坦然披剃坦誨以栢樹子話偏扣禪宗自謂諸方無出格錯鍾一晚在天界佛殿經行聞燈花爆如雷震相似尋謁太崗便問如何是西來密密意崗下禪床擒住曰西來無意你道此間是什麼意師無對如是寢食俱忘一日登廁聞隣僧敲鐺作聲忽然大悟乃懷香入室崗一見器之付偈曰祖祖無

法付人人本自有汝受無付法急著傳於後

金明旭舉因緣畢乃曰夷峯錯鍾嚴密門牆固不通風非天目老人亦不能破家蕩產大眾還有知此消息者麼良久卓拄杖下座

徑山進頌曰大地山河薰入官松風水月不相隔滔滔只要源頭活何慮人間滄海乾

石門雲頌曰層巖傑閣觀仙遊觀得飛仙到上頭一脚踏翻生鐵甕春山花放酒盈樓

上堂拈花微笑節外生枝面壁安心畫蛇添足山僧這裏無禪可參無道可學直教一箇箇成佛作祖去汝等還信得及麼良久拍膝云劍號巨闢玉出崑岡上堂截瓊枝寸寸是寶窮秘藏點點是金自出洞來踞虎頭把虎尾千個萬個只知陣後說兵書若龍是門躍過底天目有三十拄杖自領出去

上堂舉天目禮和尚曰季冬極寒萬木短殘惟有梅花十分清韻野橋流水外茅舍催離傍山僧不會東皇意三嗅寒香立晚陽師曰若作佛法會大眾將火把來照照者漢面皮厚多少若作蜩蟲小技會又道

野橋流水外茅舍短籬傍新天目未免狗尾續貂今冬極寒柴炭俱難凍得泥牛腳縮石虎眉攢翻身北斗面南看出頭乾外誰是我般般

示衆舉月溪垂問爲甚鐵牛眠少室師頌曰高名不借金玉宣同子輿懷寶遊諸國其賴安仁君子風僧參師云你道山僧眉毛落却幾莖僧云總不見得師云參學高流眼在甚麼處僧云乾坤大地全在裡許師乃喝出

示衆舉古庭堅因無際問子別我在甚麼處堅曰佛祖行不到處際曰還許人來否堅曰坦然無礙因緣師頌曰水邊林下舊生涯土甕柴床意味佳歸興忽然動昨夜護將客思寄烟霞

正德十四年仲冬廿四日說偈別衆茶毗得五色舍利無數塏於本山

### 天淵源禪師法嗣

金陵祖堂興禪師上堂僧問如何是佛師云靈龜曳尾曰莫便是麼師曰杜撰禪和住長塏示衆長塏既老且病不能傾心吐膽長篇闊

論謙悞汝等亦不要汝等廣知解透公案如本參疑情便要 and 身拶入直向那邊更那邊立地回觀始知世間產業資生皆從自性流出此猶是合頭語古人謂之繫驢橛亦謂之貼肉汗衫在今諸方往往坐在個裡佛法垂秋此其兆也在我長塔門下參要真參悟要實悟唐喪光陰殊爲可痛珍重

金陵棲霞突空昇禪師參天成不契謁太崗崗曰甚處來曰天成曰天成鼻孔多少長曰與和尚一般上堂法華道我爲法王於法自在又道是法住法位世間相常住釋迦老子大似淹耳偷鈴棲霞前是山門後是佛殿左是厨庫右是僧堂且道阿那個是常住底相試出通個消息看良久云萬里片雲飛始盡一輪明月挂烟蘿

### 德山安禪師法嗣

南嶽春山崇景禪師上堂舉臨濟示衆曰汝等諸人赤肉團上有一無位真人常向諸人面門出入汝若不識但問老僧時有僧問如何は無位真人濟便打曰無位真人是什麼乾屎橛師曰臨濟大似一頭驢

要見麼。咄。良久曰。一頭燒火。兩頭烟。兀兀難藏。個白拈。樓碎。窮年山鬼窟。依然華藏水連天。

西竺中天表禪師。鳳翔人。本儒家子。幼歸釋氏。後禮水晶菴無著爲師。謁古心機契。

上堂。個如露地白牛。白頭角。崢嶸赤日。赫走向雪山深處。眠幾回入草尋不獲。忽尋獲。鼻孔依然欠扭捏。

天真善禪師法嗣

太湖法華鏡堂明禪師示衆。舉高沙彌看藥山。山曰。你來也。曰。是。山曰。可煞濕。曰。不打者。鼓笛雲岩曰。皮也。無打什麼。鼓道。吾曰。鼓也。無打什麼。皮彌曰。大好一場曲調。師曰。藥山父子大似丹鳳。冲霄翔翺。六□雲巖鼓上作活道。吾皮上作活。正眼看來。二俱□□。在若是生機之手。別有道理。

洞山惠禪師法嗣

嵩山別傳宗禪師示衆。巖栖澗飲。目雲霄。只有松風伴寂寥。醒眼滄桑多劫夢。看來天地一秋毫。

仰山道禪師法嗣

斷水華桂山能仁秋月澄禪師。僧問。如何是華桂境。

師曰。五葉千燈秀。曰。如何是境中人。師曰。雙眉聳半空。僧問。盡大地是箇火坑。得何三昧不被燒。却。師曰。此去尤河將八里。

八峰聞禪師法嗣

月潭澄禪師天順初住蘇之西禪。晚遷薦福興陽澤。問不落古人窠臼。請師速道。師隨聲便喝。澤曰。此是古人機用。更乞曲施誘。師連喝兩喝。澤曰。祖師立言忘功。絕謂出格。人來如何提携。師曰。木奴雙叉髻。出語不慚惶。澤曰。與麼則相逢不抵。掛各自還家。風師曰。叱退。文殊消息。盡松風韻。罷欲誰彈。

師付無聞鎧。偈曰。蒙山三關八峰漏逗。吾展付汝。永光橋後復囑曰。宜飽研。懃飲。接續吾宗。

末後示衆大機。現前來風自辨扣鑰。衝關垛生招箭。七佛以前消息。諸禪德作麼生。體取良久。奄化。

三祖天然銳禪師。因性空。舉乳源上堂。西來的意。不妨難道。衆中莫有道德者麼。出來試道。看時有僧出禮拜。乳便打。曰。是甚麼時節。出頭來。便歸。方丈。你作麼生。師曰。和尚曾問甚麼。人來空曰。不會。師作掀。

禪床勢空曰。西來的的意。禪師曰。演兄若進方丈。和尚莫說某甲。答不得此話。空曰。這僧有喫棒分。無喫棒分。師拂袖便出。

齊安石門黃荊濟舟演禪師上堂。回頭轉位。直須戴角披毛。喚作水牯牛。千聖萬賢。無出頭處。以拄杖畫一畫云。出得者個不妨。顯些子作略。

石門雲曰。直饒出得更參三十載。

昭覺無礙通禪師初參通無極。白古巖。溪月溪俱不契。後謁八峯峰。誨以有句無句話。參究旬日。有省。住後雲水四至。

上堂。魯祖常年面壁。秘魔終日擎杈。臨機不解通變。驢年未許到家。

上堂。大道無向背。至理絕言詮。要識安身處。泥牛海底眠。

### 古溪澄禪師法嗣

成都西宗祐禪師上堂。橫按拄杖曰。父母未生前也。只明者箇。父母既生後也。只明者箇。豎起拄杖云。大眾看看。箇是甚麼。熟碗鳴聲。遂擲下。歸方丈。

涿州金山寂菴湛禪師示衆。昔靈源謂圓悟曰。禪子雖有見道之資。若不深蓄厚養。發用必峻暴。非特無補教門。將恐有招禍辱。山僧最初在月溪會裡。一十三載。方與個事打作一團。始無間斷。得非深蓄厚養。發用安有今日也。汝等晚學。若不深蓄厚養。得少許自足。欲廓神機。終難極妙。又安有補於叢林哉。

### 龍門悟禪師法嗣

司空碧天朗禪師僧問。如何是祖師西來意。師曰。月穿潭底靜。風過樹頭搖。

示衆。祇箇事不是容易。底昔在大方參見數知。識問他。禪道宗旨。儘有說底。禱子學公案。徵詰差別。亦口吧吧。底山僧將謂佛法止此。反到龍門。遭渠一拶。好像布袋盛菱角。一齊敗露。道流要續佛祖命脉。要明道眼。能識邪正。其餘殺人活人機要。非平日之溫研。一旦對機對境。自然過去不得。

玉峰乾曰。近日學者多恃聰明。不知者般工夫。又不明教理。惜哉。

### 性空悅禪師法嗣

金山東巖亮禪師一日定中聞鷄鳴有省述偈呈空  
曰狗子佛性無有赤脚髻頭亂走社散扶歸鄭三原  
是李二醪酒空笑而肯可

上堂一切法不有一切法不無會得轉身處東壁挂  
葫蘆

### 大雲興禪師法嗣

黃州師子巖玉峰鐵牛堅禪師在大雲處得其洒脫  
隱於桐山辟穀止食蒼木一日別峯過訪密囑同行  
焚其菴請師南巖未幾至白雲訪鑑和尚乃就齊安  
禪師舊基結茅一時禪子雲至遂成伽藍師潛機密  
用人無知者後無疾坐化塋於寺左

### 石徑裕禪師法嗣

萬松曉堂滿禪師久依石經一日偶閱演祖謂郭功  
輔曰人之性情固無常守隨化日遷自古佛法雖隆  
替有數而興衰之理未有不由教化而成昔江西南  
嶽諸祖之利物也屬以淳風節以清淨被道德教以  
禮義使學者收視聽塞邪僻絕嗜欲忘利養所以日  
遷善遠過道成德備而不知今之人不如古之人遠

矣必欲參究此道適石經至師問如何是此道石以  
拳蘸口築之師良久石曰會麼師曰不會石曰好箇  
不會語未卒又築一拳師乃大悟

### 無相真禪師法嗣

金谷巖大華嚴寺南宗勝禪師初依廣恩次謁浮山  
執瓶巾久之一晚禮佛次山問誰師曰某甲山曰作  
麼師曰禮佛來山曰佛向你道甚麼師曰不會道山  
曰你頭不會點地那師曰下下點地山曰又謂不會  
道師於言下豁然開解曰某甲會也山曰你會箇甚  
麼師曰吐露太分明山便喝師擬進語山曰拄杖不  
在手放汝二十棒師便出

上堂若見諸相非相即見如來釋迦老子從兜率天  
拖泥帶水下降皇宮脫珍御服著弊垢衣苦行成道  
地搖六震天雨四花將謂是箇人若是諸相非相即  
見如來太遠生以拂子上下指曰天是天地是地山  
是山水是水且道如來在甚麼處豈不見五天一隻  
蓬蒿箭攪動支那百萬兵不是雲門行正令幾乎錯  
認定盤星

天順甲申間。纂佛祖宗派圖。立碑於嵩山。會善戒壇。大殿前。正續明教大師傳法正宗記。爲天下禪宗萬世祖龍。

### 淨慈休休禪師法嗣

杭州昭慶寺雪庭禪師字幻寄。仁和桂氏子。生於景泰丙子。患痘。風雙目短視。夢中感金神。使令出家。母兄不允。成化間。參休休翁於仙林寺。一見契合。遂出家。受無字話。十七剃染。二十九登具。三十五受休休翁印記。又四年。侍休於淨慈。四十七開法昭慶。

上堂。舉僧問雲門。不起一念。還有過也。無門云。須彌山。幸遇此僧。當機不薦。踰過雲門。直至於今。欄街塞巷。無存放處。此僧若也。下一語。道某甲者。裏安放不得。且請和尚撥過一邊。非唯自己。千古之下。作箇自在快活。問人抑且拶得。雲門忙手忙脚。撒了收不得。收了撒不得。豈不丈夫。然雖幻寄與麼。也是勞人不少。且道還有安放處也。無自代云。看取雲門道底。

### 性空覺禪師法嗣

荊州玉泉能關主。初參祖源海。後依投子。一日問有。

佛處不得住時。如何。子豎起拂子。師曰。無佛處急走過。又作麼。生子放下拂子云。會麼。師曰。不會。子曰。兩頭不著。千聖難窺。這箇且住。古人道。藏身處沒踪跡。沒踪跡處莫藏身。意旨如何。師曰。不即不離。子曰。不即即箇甚麼。不離離箇甚麼。師撥對子。便打。一日因鷄飛。微見投子用處。

示衆。昨夜鬼角起。佛見今日龜毛起。法見一齊貶。向二鐵圍山。肩稜與太虛。相扭大海與須彌。關額其餘。王風主水者。忍氣吞聲。且道能上座。還有罪過也。無吐舌云。拔。

廬山黃龍寺徹空通禪師。示衆拄杖子。穿却釋迦彌勒鼻孔。文殊普賢。運神變現。覩也不敢覩。著黃龍門下。莫有隨後拔楔者麼。咄。屙屎送尿。漢是你錯用心。萬曆間。爲慈聖皇太后祝遐。詔至奉天門。賜大藏供奉。至今存焉。

### 南竺橋禪師法嗣

三河寶鑑無聞明聰禪師。上堂十五日。已前麻纏紙裏十五日。已後拋頭露面。正當十五日夜半。庭前屈。

膝坐毛頭星現。給臨門撞頭。磕額底悄悄看。  
示衆。盡大地是沙門。一隻眼汝等諸人向甚麼處。扇  
示衆。望州亭與汝相見了也。烏石嶺與汝相見了也。  
僧堂前與汝相見了也。山僧今日亦然有相見的。出  
來麼。一僧出。師靠拄杖下座。正德壬申七月朔二日  
入寂。世壽六十有三。

太初忍禪師法嗣

華亭無涯順禪師上堂。龍吟枯木。鐵笛無聲。踏翻船  
舷。將謂別有。順上座。只好捕風捉影。還信麼。二十年  
後有人證明。師後二十年果示寂。

天目秀禪師法嗣

南嶽雪巖清禪師依荆壁扣心法。不敢容易入室。一  
日同澄禪師禮拜。次師問。三不是。復擬開口。壁以手  
掩之。師忽然省。入次。謁天目秀。夾山覺。師知法無二。  
印後結茅于古頭菴側。

示衆。舉斷橋。倫和尚上堂云。叢林冷冷無甚。今時諸  
方老宿。雖則煨燄塊死柴頭。各自煖熱門戶。其奈東  
挑西撥。橫抗豎吹。和自家底一齊。爲了山僧者。理不

開大箇小箇。乾箇濕箇。收拾堆在爐中。火種星兒深  
與埋。待伊時節。自到大衆時節。到也以拂。作撥火  
勢云。噀烟欲逼人。師曰。用盡自己心。笑破他人口。又  
曰。好箇話。端只是國清拈弄不出。清上座。今日與他  
拈出也。拈拄杖云。大衆還見麼。一僧出。師曰。不是龍  
門客。切忌遺點額。以杖約退下座。

印空海禪師法嗣

東滄證果如福禪師。參寶月途中。述偈曰。古徑迢迢  
任縱橫。撥眸跌足可憐生。只知雲傍杖頭起。不覺懸  
泉到頂額。

方湖本禪師法嗣

斗方隱峰高禪師。東巖參令看無字。一日問曰。汝還  
記得活頭麼。巖擬對。師將拳蘸巖口。巖如此有省。  
默堂照禪師法嗣

太虛圓禪師示衆。如未了悟。須向蒲團上冷坐十年。  
二十年三十年。看箇父母未生前面目。

荊山理禪師法嗣

溪山古溪清禪師上堂。衆集。師拈拄杖曰。丹鳳擬飛。

鳬鷺驚群便曳杖下座

龍門淵曰謝公亭子偶登眺無限幽懷望裡生

### 了禪能禪師法嗣

黃梅法幢金禪師頌沙彌傳語因緣曰萬里家山一條鐵機深密固不容泄者僧亦面犯鋒鉞拄杖至今流鮮血

成都昭覺寶藏通禪師示衆舉月圓缺因緣頌曰圓缺持來問作家秋光醉得眼眯瞤白蘋江上紅波湧錯認蘆花作雪花

### 天寧宣禪師法嗣

牛頭吉菴祚禪師聞東林悟道冠南北宗席師與古溪松菴同志參扣因門風孤峻難得入室後至天寧師資道契寧付偈曰心同虛空量法亦徧虛空不住虛空理授受繼吾宗

法舟參受以無字舟一日偶行廊廡間聞佛殿磬聲豁然即趨方丈師見而笑曰子著賊也師曰賊已收下請驗賊師曰賊與舟振坐具曰狼籍狼籍師曰者掠虎漢狼籍箇甚麼舟一喝歸衆

杭州徑山天才英禪師上堂默堂和尚平地上湧起波濤虛空裡敲出木楔中人毒氣回來剛道親見寶月不知瞎却多少人眼啞洎合饒舌

### 東方裕禪師法嗣

南京碧峰寺天通顯禪師玉芝參師上堂徧學古德公案芝曰如何得不落人圈續師掌曰是落不落芝平日所蘊泮然冰釋禮謝歸衆

師遊西湖宗鏡堂陞座曰此處正好說法芝從傍唱曰說法已竟師便下座

### 洞庭潛禪師法嗣

南京碧峯道瑩瑛禪師參洞庭見湖光潏灩有省謂同舟曰佛性天真不生不滅佛性卽自性自性卽佛性有無不計獨露真如

異嚴登禪師僧問學人參求知識或令提箇話頭或令疑箇話頭同也別也師曰纔舉話頭當下便疑豈有二理一念提起疑情卽現覆去翻來精研推究功深力極自得了悟師有釋疑集行世

雲棲株曰此數語最爲精當今人頗有滯此二端

而不決者。蓋未嘗實做工夫故也。

寶峯柔禪師法嗣

育王傑峰定慧禪師。上堂。舉世尊初生頌曰。瞿曇生下。便驚羣爭似雲門。一棒親盡道五更侵早起。誰知更有夜行人。

數菴參師曰。祖師西來意。你作麼生。菴曰。靜夜燒栢子清香到月邊。師然之。

不二際曰。育王好個問端。可惜發不著。所以虎頭蛇尾。反令者僧認個拈香擇火。不知別有奇特。佛嚴當日若作育王待他。與麼祇對便好。把住云。未。在更道。若是伶俐。稍僧如龍得水。變化莫測。倘若站定脚。跟不妨徹底掀倒。要他至今起身不得。洪濟幻頌曰。慈母心同稚子心。愛憐終是困羣陰。當初若解衝關去。掣電驅雷也陸沉。

上堂。衆集師曰。且散去。老僧今日困靠拄杖下座。上堂。古德道我有一機。覷面提持如擊金石。如奏篋。不是知音。誰其知古人提持箇事。如古帝王書雲。物歌大風一等語相似。不特英風逼人。而意在言外。

卽覷面相逢。不錯過者鮮矣。

徑山下第十世

天目進禪師法嗣

嘉興東塢野翁曉禪師。參天目曰。汝本是佛堂堂大度著。甚來由。師曰。生死不明。乞師指示。目曰。本自無瘡。剜肉作麼。師曰。望和尚慈悲。目低頭。師方丈師愕然曰。莫教人斷絕去麼。遂袖香入室。目曰。子已到不疑之地。何生死之懼哉。師於言下豁然。

石門雲頌曰。不識黃金殿。是家洛陽徒。自覓生涯。翻身擊碎蒼龍窟。贏得一番風雨。除。

天目上堂。箭鋒相拄。徒勞話會。啐啄同時。全憑作者。啐啄同時。且置。如何是箭鋒相拄底事。師出禮拜起。便喝。目亦喝。師又喝。兩喝歸衆。目卓拄杖下座。一日。師從外歸。目問甚處去來。師云。佛祖行不到處。目云。適有一人往彼處去。子會麼。師云。不會。目云。爲甚不會。師云。若會。則佛祖行到也。目云。如是如是。卽付師。偈曰。眞性本無性。眞法本無法。了知無法性。何處不通達。

龍珍胤頌曰。撥動冰盤珠。轉轉掣開金鎖。寥寥相逢。說感音話。玉笛橫拈。調自高。

### 巫山松禪師法嗣

建寧府斗峰古音淨琴禪師。禮赤石山主出家。與石論。覺知緣我心起處。石叱之。師曰。我無心也。石曰。是汝知無所知。覺無所覺者。師於言下頓脫身心。後遇靜見禪師。重加闢掃。入蜀過南陽。鷄鳴河有省。示衆。縱遇開示。一時難悟。要假話頭。逼開心慧工夫。

日久百磨千煉。如鷄抱卵。煖氣久蒸。忽然一日。時節到來。或遇因緣。觸發心目。方得開悟。古云。是花各有開時節。春蘭秋菊不同途。凡作工夫。當離喧鬧。截斷衆緣。屏息雜念。單提本參話頭。至於行住坐臥。苦樂逆順。一切時中。不得忘失。念茲在茲。專心正意。切切思。念念自究。返觀自己。這個能追能問。底是箇甚麼人。若能如是。下疑。疑來。疑去。疑到水窮山盡處。樹倒藤枯處。擬議不到處。心忘境絕處。忽然疑團迸散。心花朗發。大悟現前。頓見自己本來佛性。一段風光。非從外得。若得真有此見處。更要求覓高見宗匠。決

擇邪正。不可以此便休。如此纔名入門。纔名得地。古雪詰禮師。增偈曰。青山常獨步。綠水不曾流。欲會西來意。嬰兒盡白頭。

齊安白雲寶明鑑禪師。蜀入參壽堂。得法出峽。徧遊湘湖。於正德間。卓錫黃岡。白雲山巖處。澗飲四方學者。叢集。遂成伽藍。

僧問。如何是學人自己師。曰。有佛處不得住。無佛處急走過。曰。學人不會。師曰。一箇巴掌。五箇指頭。問。如何是白雲山中。人師曰。納結三條篾。縱橫一字關。

指月明舉公案了。乃曰。如此答話者。僧未免在有無處著。脚明上座則不然。待云。學人不會。向他道。汝不會。我更不會。這僧若仍舊死。嫩嫩地。劈脊使棒。何故爲人須爲徹。

嘉靖二年。遊大崎龜峯。諸刹十一月至苑。機訪道弘老宿。甚契。一日叙別。曰。來不上此山。去亦不下此山。畢竟作麼生。言訖而逝。全身塋於殿後。

### 薦福澄禪師法嗣

天成無聞澄禪師。鳳陽冷氏子。初謁薦福。指示以鳥

窠吹布毛公案有省徧叩寶方進無學才慧堂智皆喜其工夫綿密後返薦福詰問鼓山聖箭話始得脫然正德初住天成晚住道林師每接機拈拂子向學者面前問是甚麼學者擬對師便打默菴同古溪參菴欲問話先奪拂子然後致問師撫掌大笑歸方丈

示默菴偈曰語是默默是說語默不到處佛祖心路絕龜毛奪得出高層也落今時第二月千斤重担付伊荷丕振吾宗弘正脈卽令分座襄陽之龍池

石門演禪師法嗣

齊安石門佛勤紹禪師僧問如何是奇特事師曰螺螄吞却鴨僧云還別有麼師云有僧云如何是奇特事師云螺螄吞却鴨

萬峯万禪師法嗣

靈鷲中峰素禪師僧問秋月團圓因什缺却師曰紫霧驚豹變僧佇思師便喝出

金臺覺禪師法嗣

舒州太平建宗振禪師參金臺臺問丹霞燒木佛院

主爲甚墜落鬚眉師曰覓火和烟得擔泉帶月歸臺乃印可師一初終身三伏不浴嚴冬不爐臨終預辭檀越及諸山端坐而逝

杭州徑山萬松慧林禪師郡之仁和沈氏子禮天目平舒老人獲聞心要入京師宿通堂聞僧謂丹霞上堂語大徹時伏牛空幻寓廣德師詣陳解遂得法住徑山一日說偈曰七十六年萍跡何倚本無去來應緣而已便寂

牛頭祚禪師法嗣

嘉興府天寧法舟道濟禪師秀水張氏子參吉菴通徹菴付偈曰法法本無法今付無法法便於此承當卽此是心法

嘉靖初住金陵安隱上堂舉拂子召衆曰見麼又擊一下曰問麼既舉起便見擊著便聞妙真如藏非思非議應用冷冷汝諸人自不丈夫乃傍人門戶求知求解韜晦家珍甘爲寒乞將謂諸聖別有奇特

龍珍胤曰安隱透過銀山鐵壁從大解脫場出來直與諸人覷面相呈諸人總被情封識鎖出頭不

得將謂聖遠乎哉。及被拂子吞却空王寶座。向諸人頂額一拶。諸人還覺痛麼。

因羣鴉鳴有俗士問那一聲好。那一聲不好。師曰。總是觀音入理之門。

陸五臺問畫前原有易否。師曰。若無將甚麼畫。曰。畫後如何。師曰。原無一畫。曰。現有六十四卦。何得言無。師曰。居士莫著文字。好。曰。請師離文字。發一爻看。師召五臺臺應諾。師曰。者一爻從何處起。

普明用曰。畫前畫後。論有論無。總與大易無涉。直饒一喚一諾。爻相分明也。未是。禪僧極則。畫前元有易否。天寧老漢何不當頭便喚。五臺待地應諾。却好云。元有易否。陸公口裡必然別有所入。且免後來許多迴遮。

龍興在曰。諸人不得作怪。龍興與你平實商量。陸公祇問畫前有無消息。你若畫前薦得。許你參見。伏義畫後薦得。許你參見。法舟一爻未發處。薦得。許你參見。陸公一總薦得。畫前畫後皆是一卷大易。自天子以至於庶人。日用不離還薦麼。

玉林琇頌曰。倒垣破屋住幽林。徹後通前不掩門。轉北回南接影響。可憐咫尺隔千層。

一初元頌曰。羲皇殿上話庖氏。夫子庭前謔仲尼。共住都因不相識。却教腦後擊金槌。

熊南沙問。設有人將劍來取師頭。師還躲避否。師曰。若有不眨眼的將軍。便不怕死的和尚。沙作揮劍勢。師放身便倒。沙曰。好箇阿師。死在劍下。師起來呵。呵。大笑曰。作麼作麼。

施靜齋問。一切法從這裏流出。是否。師喝曰。一切法且置。如何是這裏。齋以扇擊椅。師曰。居士曾到這裏麼。齋拂袖便出。即無迴禪師。

精嚴佛開光上堂。南寺佛點眼。北寺佛放光。若作奇特商量。大似白日著鬼咄。且置是事。只如教中道。佛眞法身。猶若虛空。應物現形。如水中月。又云。佛身充滿於法界。且道這光明向甚麼處點。卽是以拄杖作點勢云。今佛放光明。助發實相義。

郭平川指壁間佛問曰。此佛何不放光。師曰。光遍十方。未曾間斷。公曰。我何不見。師曰。又放光也。

石門雲曰法舟被鐘聲塞破耳門頓覺通身靈活  
出世拈提脫略對機生氣逼人

庚申秋寢疾且革或勸起坐或請說偈師曰此皆文  
飭非吾事也以手搖曳而逝年七十有四坐五十二  
夏受教蓋千餘人入室弟子如淵大芹輩茶毗後塏  
其骨於別室中南嚮別室今廣爲禪悅堂而塏如故

伏牛賦禪師法嗣

齊安白虎山興善寺妙中玄禪師成化初重興虎山  
上堂僧問最初威音王末後樓至佛未審參見何人  
師豎拄杖曰會麼僧擬議師便打

碧峯顯禪師法嗣

湖州天池月泉法聚禪師嘉興富氏子讀壇經有省  
浴佛上堂欲知佛性義當觀時節因緣只如孟夏漸  
熱自釋迦老子降生以至今日無纖毫變異之相時  
節既無變異當知巍巍相好亦無絲毫變異無端向  
四十九年說心說性說頓說漸致令後代兒孫啐啄  
不丈夫者總被惡水澆却卽今狹路相逢不妨衆等  
也各各與他一杓不見道得人一牛還人一馬捨身

與受身誰是報恩者擊拂子下座

元旦上堂撒眼流光如箭急今朝又是正月一家家  
門上貼桃符大鬼小鬼都竄匿猶有一箇不順陰陽  
的漢古貌堂堂無朕迹明逾日黑逾漆鬱壘眼瞞瞞  
不及今日被山僧捉敗了也特與諸人報消息咄佛  
殿裏祝讚僧堂前雲集

陸五臺問東土千七百善知識卽今向甚處去了師  
指庭樹鳴蟬曰者裡也有一箇曰聲響□□師曰喚  
作聲響卽錯過也

徑山進曰玉芝與麼爲人不獨貴客看破亦將千  
七百知識埋在庭樹下至今起身不得若問新天  
池向道棒如雨點喝似雷奔陸公須是文章貴客  
知我稍僧別有長處

東林在曰二老扶豎箇賓主句塞海排山奔龍走  
象總出陸公問頭不得東林則不然待問卽今在  
什麼高聲呼曰陸公公應諾向道公若問暇與老  
僧同遊徑山一回公若透聲透色便識席帽下原  
是舊時人

多雲天然慧禪師俗士問如何是道師曰卽今從什處來曰山後師曰什處去曰山後師曰且喜來去分明士禮謝師嘗應機皆曰善或曰善逝

### 廣惠連禪師法嗣

靖安龍門無礙禪師參廣惠受以萬法歸一話疑甚一日聞僧曰透過三汲浪專聽一聲雷又僧曰何不道騎驢踏破洞庭波師忽有省

### 育王慧禪師法嗣

松竹大方寬禪師無礙理參師曰伏牛打七卽不問終南靜室意如何理曰伏牛打七泥團土塊終南靜室放大光明師震威一喝曰卽今光明在甚麼處理□□□師呵呵笑曰如是如是

### 徑山下第十一世

### 東嶺曉禪師法嗣

嘉興敬畏無趣如空禪師秀水施氏子性仁慈留心內典同法舟盤桓八年參野翁於東嶺每呈見解翁與掃却一日謂師曰達磨西來直指人心見性成佛唯在直下體取子若信得及可放下萬緣參個一歸

何處師領旨後聞鷄鳴有省卽薙染

石門雲頌曰夢乘□鷄登金闕一簇仙風生兩脇  
邱店寒鷄纔唱曉金烏啄破琉璃國

金明旭頌曰淺碧漸流春日暖仙鄉泛偏又乘騎  
道途不盡經華眼勒馬歸來月轉西

微塵盛頌曰三番撥透禹門浪身在洪波隔遠道  
纔得春風通一線擎頭戴角直中霄

野翁付師法偈曰非法非法非性非性非心非  
非心付汝心法竟

掩關示衆三十餘年參請宗匠問法皆云無說問佛  
皆云無相幸得無相無說不覺頓空伎倆拘折主杖  
拍雙空手入玄關坐看陰陽消長偈曰窮子還歸長  
者宅善財參遍羅華林大千收拾毫端內推出□空  
掩上門

啓關自結玄關自活埋自吾閉也自吾開一拳打破  
玄關放出從前這漢來

上堂衆集師良久喝一喝曰禪出私門便歸方丈  
上堂今日佳節七月七通身收拾巧來吃絕妙奇能

一併吞盡。盡勿留些影跡。向來弄巧喪天真。從今抱拙守愚。直騰雲駕。霧總成空。百巧不如一老實。如何是老實一句。二便二便。

新晴久雨。初晴人皆喜悅。綠柳舞薰風。黃鶯啼不輟。萬古祖師機。一時都漏泄。直下會得來。依舊沒交涉。何故一朝樹倒。鶯不來。莫把烏龜喚做鸞。

梅雨梅風。拂拂梅雨霏霏。須彌山頭。爛額香水海面。皺眉池塘。蛙鼓響如雷。諸人會取西來意。於斯薦得。方知人人是五祖。處處是黃梅。大解脫門。原無關鑰。實際理地。本是平夷。若也未明。任爾百鍊。薰修徒自辛苦。何也。祇爲他眼邊耳畔。覓黃梅。依然拋却。祖翁田地。

示衆言。前薦得已天涯。句下承當。路轉除一擊鐵團。如粉碎。海天闊。雁行斜。

除夜時。窮何似。日窮好。月若窮。來歲亦然。三十六句。過了東村王老。夜燒錢。老漢並無一物。應個時節。因緣拈拄杖曰。祇有這個。無窮無盡。歷劫經年。今夜隨時送去。免教涉夢。牽擲下曰。歷劫得來。今斷送。

拍雙空手接新年

元宵畫角聲中。薦得觀音。未是作家。彩燈影裏。知歸室利。謾誇好手。恁麼告報。與諸人也。須笑破虛空口。禪流若也未瞥。然再看。鰲山顛倒走參。

示衆。鴻蒙未判。天地未分。先有一物。時人呼爲正法眼藏。亦名涅槃妙心。今在諸人六根門頭。顯現四威儀。內昭彰。拈拂子曰。見麼。若見。通個消息。

講師參師。問經前一句。遍塞虛空。經後一句。充滿天地。包括一句。函蓋乾坤。正恁處時。向什麼處下口。講師無對。

無幻補帳。次師掃地。至問曰。做什麼。幻曰。補帳。師曰。誰帳。要汝補。幻曰。和尚得恁麼。憐亂人。師便打。幻作掃地勢。師持帚而去。

俞居真參師曰。開居士在天心書院。悟得些子氣息。是否。俞曰。是。師曰。氣息。響曰。在和尙開口處。師曰。非干汝事。俞向前。扶手。師曰。這個是書院裏學來底。俞退身就位。師曰。乃見一斑。俞曰。某甲日用。不忘者。個師曰。且得途中受用。俞作滿空雲水。有生涯句。呈師。

曰雲散水枯時生涯在什麼處。擬議師彈指一下曰。在者裡。愈於此有省。

石門雲曰。一座天心書院。多少文章秀士在裡面。光風霽月。弘讚嘉猷。無端遭滿空雲雨。致令昧心者。戀金馬步長安。大似咫尺。望帝鄉千里。若是石門。纔問伊雲散水枯。他若擬議。裏面好掌管。取天心書院底一齊洒脫。

湖邊步月次。無幻至。師曰。明月與清風水天同一色。人人在個中。祇是出不得。幻曰。打草驚蛇。作甚麼。師曰。汝又作麼。生幻曰。看脚下。師大笑。便歸。

師與無幻經行次。聞風撼檣。檣聲。師曰。此樹風來。獅子吼。風寂。便涅槃。幻曰。樹倒風息時。獅子在什麼處。吼師良久。幻曰。大好吼。卽不是獅子。師便掌。

鐵容立頌曰。公子遨遊月滿樓。佳人更調唱伊州。便將席上春風起。直到瀟湘水盡頭。

陸五臺舉僧問夾山。承和尚有言。二千年住此山。未嘗舉著宗門事。至末裝前去。因緣曰。此僧前日掀床。後日潰去。一言無措。和尚可代一轉語得麼。師曰。者。

兩個有頭無尾漢。夾山當此僧問時。卽曰。我向來不曾道著。喚侍者。擯出此僧。不失乎有前無後。賊過張弓者。僧次曰。當夾山舉話處。卽向空中打兩拳。推一推埋了也。亦免陣敗逃回。曰。是師曰。且道者僧埋自己埋。夾山曰。俱埋了也。師曰。仔細切莫累我。陸大笑。師曰。去也。陸曰。妙妙。

龍興在曰。作家宗師。天然猶在廟廊。貴客今日偶逢同心。鼓舞扭結。鴛鴦直得席割蒼梧。樂奏鉤鐺。使當日夾山極力處。有今之陸公。法道不致寂寥。敬畏拔劍相助。却被俗官看破。

萬曆己卯仲冬。付法於無幻。訖。且謂曰。來歲中秋。五六日間。吾欲行。子宜來於期。幻至。師示微恙。說偈曰。生來死去空花。死去生來一夢。皮囊付於丙丁。公白骨斷橋。隨衆呵呵。明月清風吟弄。

佛曰。方曰。皮囊既付丙丁。白骨交歸斷橋。畢竟將什麼吟風弄月。良久云。爲見烟霞生背面。因知星月繞簷楹。

石門雲別佛曰。皮囊付丙丁。白骨歸斷橋。畢竟將

甚麼吟弄良久曰長天秋水孤鷺落霞

晦牧密頌曰自從踏斷板橋霜前店雞聲午夜長

砧杵重敲聲轉切行人始不費商量

師生於弘治辛亥年十月十八日終於萬曆庚辰八月十六日世壽九十塏於本菴

石門海禪師法嗣

隨州七尖峰大休宗隆禪師青州益都賈氏子一日挑水忘行撞壁有省作偈曰大地山河體性空那分行走與西東偶然撞著無私句萬水千山總一同謁無盡於河南乾明寺機契遂蒙印可

室中嘗垂三關語以驗學者

僧問如何是祖師西來意師云黃瓜茄子其僧不薦至一菴菴主問上座從甚處來僧曰七尖峯主曰有何言句僧曰某問西來意和尚相戲主曰試述看僧舉前話菴主設香遙拜曰大休古佛放光也其僧方悟

嘉靖二十一年十一月八日集衆書偈曰三際握來爲主杖十方元是舊袈裟泥牛石虎知消息踏破虛

空便到家置筆端坐而逝塔於本山

斗峯琴禪師法嗣

建寧府斗峰天真道覺禪師看萬法歸一有省述偈曰一手拍兮一手鼓無位真人出格舞口中唱出無腔歌三千諸佛同一母往呈古音音可之

三角喜禪師法嗣

義水高原山二祖南宗印禪師參三角請益趙州置掃帚撫掌大笑因緣角連打二掌師曰莫當得麼角又打師曰金鑰不辨玉石不分角大笑出法堂一日因僧誦風鈴偈曰銅唇鐵舌太尖新樓角懸來不計春言外百千三昧法因風說與箇中人師有省呈似角角可之

龍門性頌曰不是人斑是虎斑兩回牙爪露巔屹而今要見趙州老剝剝麤麤禿禿談護國鐸頌曰荷葉羅裙一樣裁芙蓉笑臉兩邊開直入池心看不見歌聲必定有人來

西林頂禪師法嗣

潞川華桂山能仁濟舟洪禪師九江桑落人禮四祖

解聞爲師一日送亡僧感絕世緣參西林林教看三不是領旨

一日僧參師曰什處來曰黃蘗師曰黃蘗有何言句曰嘗謂衆曰只教汝別求易若教汝休歇最難師曰有幾人會得曰常春大覺師曰上座謂曰某甲不會師曰實不會耶曰實實不會師曰明日速回伊必爲上座說僧稟命返黃蘗果於言下契悟

能仁在曰兩箇黃鸝鳴翠柳一行白鷺上青天

萬曆辛丑年中秋翫月次師指月謂心安曰晦則吾行矣至三十日沐浴坐脫塢於寺西

### 天寧濟禪師法嗣

嘉興胥山雲谷法會禪師嘉善懷氏子參法舟舟令看念佛語一日受食碗忽墮地猛然有省偶閱宗鏡錄大悟舟特著臨濟二十七世源流付之

僧問如何是祖師西來意師曰有水皆含月無山不帶雲曰莫更有奇特否師曰不得將龜作鑑  
慈山清北遊師出衣偈付之囑曰吾之大法在汝肩頭慎勿容易子當珍重山唯唯拜受

師終有大光明垂於後世塢於棲真寺之西碑銘係袁了凡作

云沐髮亦

按牧齋錢公作清師塔銘後語其略曰然我大師之續脉於祖也按師自述得雲谷向上巴鼻深參力究以至築著旋嵐屢嶽之句方疑團沐釋時有鼻孔向下之偈及鐵牛入水之談蓋從是悟入故多別參一無曰獨獨於谷師法威已深尙叙荷法準此師本雲谷無惑當自雲谷傳法舟舟遞推至臨濟大師則師嗣爲二十八世雖然而的法淵旨機用施設實圓洞五宗任運不立絕非死教一家之振何則派發於源莫蓋於曹溪之後五宗過盛則衰於盛昭代之初刻去久矣刻舟而責固克肖之掘殘蛇耳豈能力掄斯道哉  
滴乳曰世之搶行奪市譏者鄙而笑之況宗乘筆削懸命故關乃有確據者如東林悟之八峯潭所出天寧宜宜出吉菴詐詐出天寧濟濟出雲谷會出慈山德清此師師授受祖祖相傳黃重白夏之所共曉近見少林續燈編入大千潤下是欲開天皇天王之靜端於後世也南潤續燈存稿誠禪宗續史法門金鏡亦見編入未詳因少林書出在前存稿流通在後故姑存以待具正法眼者若張無盡點出湛堂金剛眼也其足下見孫因知所自出之祖亦學步邯鄲直令識者鄙而笑之子詳考清公南還會師物化遂建塔院募田以永守塔計清公立師神主不曰明圓寂本師雲谷會禪師之神主乎傍勒得法弟子德清立乎父紫竹林顯恩衡公衆所述淵源錢牧齋作清公塔銘有公嫡嗣雲谷之言何一總抹殺緣清公不即登祖師位塔香拈出致令門外漢妄

下語耳

嘉興精嚴寺冬溪方澤禪師嘉善任氏子參法舟一  
 日舟舉龍潭參天皇語至何處不指示心要有省天  
 寧解制乘拂佛法雖偏一切世間而未嘗有絲毫透  
 露作麼生結雖未嘗有絲毫透露亦未嘗有絲毫囊  
 藏作麼生解故知百丈大師曲引初學爲此方便誑  
 說之辭其實不能結不能解也設有孟八郎漢出來  
 道我能向百丈大師結不得處一結結斷直使天下  
 衲僧忘前失後求出無門亦能向百丈大師解不得  
 處一解解開直使天下衲僧七狼八藉窺身無地却  
 甚奇特諸上座彼既丈夫我寧不徹良久擊拂子一  
 下云呼

薦福愷禪師法嗣

襄陽府龍池寺默菴慧聞禪師語具無師學僧問雲  
 門如何是雲門一曲門曰臘月二十五師頌曰宮商  
 不落調還高千古淳音法帝堯明月清風無價買盡  
 情分付與漁樵

松竹寬禪師法嗣

伏牛無礙明理禪師汾州和氏子參松竹寬大方和  
 尚隨衆打七有一聲虛空碎獨露法中王之句後同  
 月菴大圓入終南一日菴舉高峰銀山鐵壁語師頓  
 悟述偈曰一覺心空疑便消拈來放出自逍遙運水  
 搬柴全體現萬象森羅一性包又曰妙體如如本自  
 空更無一物可追尋須彌頂上波翻浪太陽終不離  
 乾坤過大方求證方付偈曰付汝金襴廣利生空宗  
 一震海河清性包萬象人天仰佛祖門中闡化機

徑石滴乳集卷之三

徑石滴乳集卷之四

清

嗣祖沙門江州 直在 編

嗣法門人齊安 機雲 續

徑山下第十二世

敬畏空禪師法嗣

杭州徑山無幻性冲禪師字古湛秀水張氏子母卜  
 氏誕師之夕夢橋上一鷄飛冲上天因名橋嬰時每

啼不止。唯以供具列於前。卽輟。卽歲率羣兒以瓦石作殿。係羅拜。旣納。內育子。嘗歎塵勞。膠固。曷得出離。聞無趣。乃本色道人。欣然往參。趣誨以教外別傳之旨。有所契入。遂薙染結。菴徑山集。無趣語及見趣。趣曰。曾做什麼。來師曰。買得一段田。收得元本契。請和尚。僉押。趣展閱曰。這個是我的。你的。齋師曰。莫搶奪。行市趣。鄰下集。本師便出。

龍興在曰。一人肘後懸符。一人頂豎摩醯。二俱作家。烜赫古今。若作臨濟兒孫。猶欠在何故。敵勝從中出。須憑師子兒。

龍門性頌曰。相逢各自展家風。祖業兒孫用不窮。大海無涯資躍鯉。長空萬里縱飛鴻。金明旭頌曰。龍門久駐飛騰勢。纔便風雷越晚潮。驚起泥牛穿碧海。轉身一拶直冲霄。石門雲頌曰。借婆衫子拜婆年。體段風流出自然。更有一般純粹處。御街掩袖月明前。拂拂春風搖地軸。沉沉夜雨洗天根。銀潯萬疊資。鱗躍鼓。飄雲端海嶽昏。

無趣問。徹骨徹髓道一句。三玄三要。絕遮護。此二句中。我欲取一句爲法。汝道取那一句。好師曰。和尚適來道那一句。趣瞋目叱曰。汝怎麼無記性。師曰。祇爲和尚徹骨徹髓。趣笑曰。不然。爲子一人。卽得爭奈大衆。何師曰。取卽不辭。恐辜負先代。喪我後人。趣曰。如是如是。趣付偈曰。師傳拈花宗。我示微笑法。親手展付汝。持奉徧塵刹。

金明旭曰。無幻大似一顆走盤珠。愈琢愈輝。趣祖驗得。號段分明。也是勾賊破家。

師燒火次。僧問。如何是自性天真。佛幻云。搬柴來。僧搬柴了。又理前問。師云。奴子好惡。也不知便打。徑山進頌曰。大富須還長者家。天然隨處有生涯。可憐不識囊中寶。錯認眞金作赤沙。牧公謙頌曰。脚下魚行總不知。因憐鷗鷺亦何癡。幾多負義忘恩者。徒有雙雙兩道眉。鐵容玄頌曰。長安年少惜花殘。爭認慈恩紫牡丹。別有冰盤承露冷。無人起就月中看。潛夫峻頌曰。桃源洞口尋春色。野老頻呼在此中。

遊徧園林猶借問不知身在萬花叢

兩客下棋次僧請益師曰若論此事如兩家著棋用心鮮有不克者何則若也未知局面舉必全乖不善權宜觸途遭喪祇爲他意馬散失狂象無鈎兵車不識機關心粗常行險地不惟重重納敗將見皮破血流若是主將威嚴士途平坦如是而炮不虛發發則打破重圍兵不亂行誰肯直前退後天馬而追風八面神車而竟沒遮欄不惟致勝奏功畢竟風行草偃良久曰太平本是將軍定不許將軍見太平

僧問如何是提婆宗師曰一字不著畫曰不問者個師曰圓相不著圈

二祖雲徵曰要會一字不著畫圓相不著圈麼直須倒退三千里

師住車溪二十餘年日與衲子商確大事罔不悅服萬曆三十八年復住徑山上堂大道無向背至理絕言詮迥出三乘高超十地萬法不到處特地光輝生佛未分時靈源獨耀不落見聞不隨聲色直下無一絲毫頭徧界全彰縱饒棒頭取證喝下承當猶是曲

爲今時倘或光景俱忘契心平等亦非的旨所以道向上一路千聖不傳學者勞形如猿捉影到者裏絕行絕解絕照絕用絕理絕事若倚天長劍凜凜神威如鐵牛之機籠羅不住今日明眼人前不敢囊藏被蓋八字打開拈拂子曰諸人還委悉麼耀古騰今祇者是大千世界一閒身

因病僧問和尚百年後向甚麼處去師曰千株松下角彎彎百草頭邊亂踣跳

能仁在日車溪恁般答話知天下後世千燈萬燄當從其足下出者僧若有問殺閻黎价逼殺首座處底手脚待車溪纔擬對便掩耳而出且要老漢立地脫去

萬曆辛亥季冬初四日傳廣首座袞袞偈曰搶前付囑無多子百萬人天那個尋未審是誰成漏泄至今殃禍及兒孫

滴乳曰余嘗傳燈惟南嶽侍曹溪八載只道個說似一物卽不中招得追風馬子南明侍車溪八載止換得個破袈裟且道與古人同也別也參

端坐而逝。闔維塋於徑山壽七十二臘三十。

### 雲谷會禪師法嗣

韶州曹溪慈山德清禪師字澄印。全椒蔡氏子。七歲見叔母生子。又見叔死。即抱生死去來之疑。年十二。禮南京報恩寺西林寧公爲師。時嘉興雲谷會住棲霞報恩。師執侍甚勤。谷開發悟明心地。師即請西林剃落。盡燒所習外學。謁無極受具。聽講華嚴。立談有省。乙丑谷結禪期於天界。舉師入堂。示以向上巴鼻。辛未辭谷。北遊谷曰。吾之大法在汝肩頭。慎勿容易。邸中閱物不遷。論至梵志出家。頓了旋嵐偃岳之句。生死去來之疑。乃作偈曰。生死晝夜水流花謝。今日乃知鼻孔向下。乙亥禮文殊結茅五臺之龍門。匡山徹空雲棲蓮池相繼入山。與師語契。辛巳仲冬。慈聖皇太后爲神廟建祈儲道場於五臺大塋寺。百有二十。十二日師與妙峯主其事。壬午八月光廟誕生。癸未春遁居東海牢山。恢復那羅延窟。慈聖再徵不得。甲申乃得師。輒賜內帑。師儼古矯詔賑饑。事以賑山東民。丙戌慈聖頒藏經布金造寺。賜額海印。丁亥工竣。

卽開爐韞已丑請藏至南京報恩。感寶塋放光乙未。方士流言侵攘。逮赴詔獄。按驗無實。坐以私創寺院。戍雷州衛道出江西。鄒元標迎至鐵佛寺。與師一語投契。頓翻前案。丙申禮六祖。抵戍寓城西坡公亭。雷州饑厲。師收埋骸骨萬計。建孟蘭會。說幽冥戒。天大雨。隨止。戍戌修曹溪通志。戒靈通侍者酒歸。侵田斥就舍屠門酒肆。皆爲寶所大鑑之道。勃焉中興。師舉雲門光不透脫。有兩般病。因緣頌曰。天街花月影珊珊。沉醉東風獨倚欄。朝罷九重人靜後。六宮猶尙整衣冠。

舉僧問雲門不起一念還有過也。無門曰。須彌山頌曰。天寒霜落月沉沉。西清夜迢迢。鶴夢迷海底。日輪紅似火。行人猶聽五更鷄。

舉德山托鉢因緣頌曰。閒看師子護調兒。顧欠嚙呷力盡施。觸著翻身聊一擲。低頭歸去令全提。甲寅夏慈聖賓天。詔至師返僧服。丁巳建法雲寺於廬山五乳峰下。效遠公六時修淨業。天啓壬戌復住曹溪。癸亥十月十一日示微疾沐浴焚香。集衆告別。願曰。今

日截斷葛藤端坐而逝世壽七十八僧臘六十有夢  
遊集經論註解二十餘種乙丑歲龜歸五乳塋而藏  
焉崇禎癸未寧人復奉龜歸曹溪歷年二十端坐如  
生遂金漆塗體升座與六祖肉身相望就天峙岡舊  
塋院地供養名曰鸚山院去南華寺半里許

中溪覺林居士李元陽生而穎悟過目成誦初得方  
士授導引之術以爲神僊必致後因讀楞嚴經大駭  
曰世有如是書乎遂留心內典樂與僧遊自號覺林  
居士在翰時常遊法席見雲谷遂蒙印可與默菴定  
堂二師爲方外契所著有禪源記及中溪類稿等書  
流行於世

龍池開禪師法嗣

天目蘭風真定禪師餘姚陳氏子夙有根器雅慕禪  
宗年二十禮天目璿公爲師未幾往五臺一十三載  
後至徐州鐵佛寺一夜因風吹殿門有省尋參龍池  
菴心印自此遊歷諸方三十餘秋江淮之間聲名大  
著師嘗頌隨緣赴感有盡微塵界菩提坐不動秋毫  
轉法輪之句師著冰壺宗鑑及維摩經註共二十七

卷行世於萬曆壬午正月八日示微疾至十五日跏  
趺而逝

廣信府鵝湖□□禪師郡之上饒朱氏子偶遇戚  
屬會道者談四生之義師於言下洞了物我平等大  
意往洛之太平落髮南歸焦山度臘聞江中推船有  
省偈曰夜靜江空闊推船因因聲不知何所往擔子  
半邊輕謁華山聞山拈一段生涯六不敗話猛提七  
日身心脫然尋歸里中住靈山畫大圓相於壁間曰  
內寫真教塗黑外寫勿使傷曰有人向圈裏圈外下  
得註脚者許你學道無疑不然總是慢囉後住鵝湖  
十年不立座元博山參以趙州無字話相契請居厥  
職贈以偈曰鵝湖十載虛元位一旦元何立少年兩  
箇眉毛八箇纒須知佛祖不容前當置無門鎖置方  
丈壁以驗諸方偈曰上古流傳鎖惡君智鑰開若無  
開鎖法相見不須來萬曆丁□二月晦日上堂說法  
置齋作別示偈曰八十餘年幻夢中鐵牛耕破太虛  
空臨行一句相分付半夜金烏帶日紅端坐而逝

伏牛理禪師法嗣

均州武當佛殿雲菴眞際禪師神宗時爲慈聖皇太后轉大藏詔住靈應寺恩寵甚渥賜號不二大師上堂示衆秘魔叉担雪填井禾山鼓眼裡撒沙饑虛抑勒托鉢法堂鷲拈拂子云者隊守古塚底不知曲了多少今日落在佛殿手裏不穿却鼻孔定是剗却你眼睛何故不入洪波裏爭見弄潮人

徑山下第十三世

徑山冲禪師法嗣

杭州徑山南明惠廣禪師鹽官韓氏子禮興善芥泉剃染志慕禪學恨其宗風不著偏遊講肆復歸掩關於無字話凝然始覺物理一致古湛聞有眞實志乃就關扣問便有師資之契遂啓闢往謁古湛於車溪未幾卽入古湛舊隱之白雲山禁足三載徑山繼峰老宿請湛開法師每開示誨必垂淚刻究一日偶拾片紙有觀方知彼去者不至方之句有省呈湛湛印可卽舉師首衆尋付偈曰得本無所得傳亦無可傳今付無傳法東西共一天

天鐸源頌曰八載巾瓶窮徹骨大千歸向一毫端

可憐家破人亡處猶把封皮當信看

胡機郁頌曰頓絕狐疑遠探玄劫盡空處妙難詮

而今積聚毫端上一鼓雷音徧大千

金明旭頌曰禹貢上承堯舜德盛明猶見漢唐心

此時不必問端拱帝業持盈已到今

雨山越頌曰河出圖洛出書藍田產美玉赤水育

玄珠仙姿不是人間種穀裏藏身供上厨

石門雲頌曰鑊湯踣跳上刀山氣擁眉間海樣寬

回首死過塗毒鼓血漫漫地照人寒

住徑山示衆五峯頭卓朔雙徑尾巔先喝石巖踣跳

明月池傾天此四句一句中有殺人刀無活人劍一

句中有活人劍無殺人刀一句中殺人刀活人劍俱

有一句中殺人刀活人劍俱無伶俐僧簡點得出一

生參學事畢

空諸性曰四句外尙有一句子百味具足不獨殺

活也然雖南明終未能舉出在且道是那一句良

久云觀著則睹

濟北弘曰楚黃紙貴一狀領過

示衆以拂子點。此相云徑山最初祇爲有此一著。遂爾站定脚跟一挨一拶。愈究愈遠。忽一日不究而究。不窮而窮。不究不窮。不覺頓空。伎倆猛地回觀。又畫一此相云。原來只是這箇。纔知者箇復打。○此相云。便是者箇。諸昆仲。且道者箇作麼生理。會這裡具得一隻眼。方許到家。

示衆跳出金剛圈。揣碎虚空骨。剖開秘密藏。放出塵沙佛。大方闊步。妙運寰中。細剪白雲七片。八片。密羅黃菊一叢。兩叢。古佛心祖師意。一齊漏泄。堂堂龍象。有許多眼耳。爲甚不見不聞。驚豔拂子。隨擊禪床云。向者裡一舉。便見一擊。便聞。赤肉團上。無物不有。無物不空。眞俗二諦。於中顯現。十望三賢。於中休息。以無身爲身。將空法作法。其熾也應萬有。而不窮其寂也。覓一法。而不有者。點靈明如珠在盤。以此明心。何心不明。以此顯理。何理不顯。所以道。有意相尋。偏不見。無心覷捕。體全彰。諸人須向脚跟下。究取始得。除夕示衆。前年年鼻孔無半邊。去年年兩眼不能全。今年年三十精骨獻青天。我禪已說了。汝等作麼生。

契會作樂

參

元旦示衆。新年佛法有趙二契村酒。醉倒李麻鬚王三笑破口。新年佛法無水上。按葫蘆海底蓬塵起。堂堂在半途。古人提掇不得底。徑山恁麼舉揚者。裡邊有佛法商量也。無合掌問訊云。元正啓祚。萬物咸新。燈節示衆。舉大慧上堂云。正月十四十五。雙徑槌鑼打鼓。要識祖意。西來看取村歌社舞。師曰。大慧三百六十骨節。八萬四千毛孔。抖得敬掙得聚。可謂烜赫古今。法王座上。人天衆前。爲甚照應不到。徑山今日要與劈石分金。你諸人也須識得祖意。西來看取認定村歌社舞。大似燈影裡行。未覩太陽在。示衆爲石嶺與汝相見了也。望州亭與汝相見了也。僧堂前與汝相見了也。大衆作麼生說個相見的道理。且道相見。見個甚麼。良久云。鑿咬利竿。狗啣燈盞。示衆舉月幻返八峯峯曰。還我照用來。幻曰。若有照用。卽成障礙。峯曰。著。斯著。空佛也。救不得。幻曰。有無俱寂。滅空佛。恁皆非。師曰。月幻氣識超羣。如太阿出匣。八峯鴻門大啓。若海納英流。可謂立寶互叶。照用。

同施雖然還知入峯只解踞虎頭不解把虎尾麼  
示衆昔竹山圭禪師脫路異常一日遊佛殿聞風吹  
殿角鈴聲倚杖脫去茶毗得舍利無數然我衲僧得  
一機半解遞迹林泉久久操持掃盡廉纖末後乃有  
如是作略近時師僧纔得一知半解就要爲人師範  
靜工全無微細未透末後一著未免螭蟠下鍋何也  
一回擲地作金聲九曲黃河清徹底

示衆舉南院啐啄同時因緣師頌曰同時啐啄不同  
時箭鏃飛紅打一鎚無限周遮頭腦裂于戈中立太  
平基下座

示衆舉兩堂首座相見師頌兩岸夾流來滾滾一泓  
活碧去綿綿師兒若解反身躡海底泥牛角指天  
住永慶寺示衆箇般奇特妙難言薦直旱亭跳上天  
帝釋鼻梁遭磕破波斯痛倒海門前

示衆張公乍與李公友欲進李公一盃酒返被李公  
進一盃好手中呈好手大衆要見好手麼第一座  
抽身便出師以拄杖打散師方丈

示衆甚麼物恁麼來石人舞袖笑盈腮泥牛入海無

○口證兄

消息木馬嘶風趣不同忽越回鐵壁銀山盡打開驚  
拈拄杖畫一畫云這裡還有一重

示衆將心求佛墮在毒海離心意識趨向無門諸  
弟果能休去歇去以須彌山作四大海白浪滔天以  
四大海作須彌山紅塵滿地烹虛空之髓而滋味嘗  
新挑劫壺之燈而光明灼大者裡鉤錘不得那畔鞭  
索徒施所以向上一路千聖不傳學者勞形如猿捉  
影開彌勒之樓閣法法全彰入普賢之行門頭頭不  
捨到此只得木童歌白雪石女咏清泉按指則海印  
發光動絃則音聲滿耳接拍既有伯牙座前誰是子  
期

○口字更助

示衆古人喫三頓棒如龍得水似虎靠山羅籠不住  
呼喚不回倒嶽傾湫平沉大地收來盡是馬簸箕簸  
□□若是靈機活脫別展家聲著著該羅步步密運  
到者裡須知日晝雞啼紅塵犬吠是佛是魔三十棒  
管甚船來陸來或饑或飽一頓飯論甚明頭暗頭藏  
身處沒踪跡布袋橫拖沒踪跡處莫藏身拄杖倒卓  
大道祇在目前要且目前難覩不是目前法非耳目

之所到大衆還知此消息麼。良久云。但得春風齊著力。一時吹入我門來。

示衆。舉月溪。漢禪師參東林。悟和尚。呈所見。林不諾。溪以林強抑出不遜語。一日辭林。林負囊送至山門。忽指黃大曰。者畜生。爲甚有業識。無佛性。溪於此大悟。師曰。東林垂手處。大似逆鱗。徑寸大岡。悟去也是好肉剜瘡。雖然如是。者裡別有道理。諸人不得草草承當。

示衆。舉則中上堂云。結制來天陰四十日。今朝晴明好晒。眼雖然臂肘不向外曲。諸人分上也要簡點分明。師曰。平湖結制來四十日。雨淋淋底。辜亭結制來四十日。乾曝曝底。諸人分上亦要檢點分明。無論乾箇。淺箇。拈向一邊。以拄杖卓一卓云。諸人向者裡試說道理看。

示衆。落日如懸鼓。峯前仔細觀。霞光交大地。一片錦山川。汝等若作境話。會辜負平生。不作境話。會亦辜負平生。畢竟作麼生。

慧頂棟曰。我最初讀夾山猿抱子。歸青嶂。裡鳥啣

花落碧巖前。覺意句。冷然及徑山霞光交大地。一片錦山川。始知者個道理。針劑不入水泄不通。若非打破漆桶底。不錯會也大難。

示衆。舉方山寶禪師。因僧問。如何是般若體。師云。八角磨盤。如何是般若用。師云。八角磨盤空裡走。師云。瑞巖只解隨邪。逐惡不解回槽。就岸倚問辜亭。如何是般若體。薦與一掌。如何是般若用。更與兩掌。不特指出般若體用。亦且知我衲僧門下。別有爪牙。

示衆。舉方山和尚。未出家時。偶閱壇經。恍如舊習。乃舉黃梅衣鉢。因緣問曰。既不會佛法。爲甚又紹祖位。鞏曰。不但祖師。大有人不會佛法。亦紹祖位。山曰。和尚還紹祖位否。鞏曰。若紹祖位。卽會佛法。師曰。瑞巖如蟲禦木。偶爾成文。淨慈被伊一拶。便乃平高就下。唱道門中。略較些子。黃梅衣鉢。未夢見在大衆裏。識黃梅衣鉢。落處麼。以拄杖卓一卓。喝一喝。下座。示衆。僧問。三世諸佛。爲甚不知有師。曰。聰明反被聰明誤。進云。鷲嶺白牯。爲甚却知有師。曰。棒打石人頭。曝曝論實事。僧禮拜。師舉斷橋上堂云。雁山雲台嶠。

月或卷或舒或圓或缺兩兩三三朝遊暮往袈裟角  
拄杖頭挑底挑裏底裏不妨自怡自悅若到瑞巖定  
是打教棒折何故而今甚麼時節師曰古人赤心片  
片只要功論蓋代當日若有見義勇爲者待他正與  
麼道從旁走出震威一喝看他做甚麼手脚更喝兩  
喝下去瑞巖卽有定亂之謀管取退身不及

示衆學天目進禪師問夷峯寧和尚如何是西來密  
密意峯下禪床擒住曰西來無意你道此間是甚麼  
意目自此寢食俱忘一日登廁聞僧敲籌作聲忽猛  
省師曰大阿有驅耕奪食之施無電激雷奔之作以  
致天目沉言滯句墮在機境及聞籌聲遭他恠笑若  
是徑山打開潑天門戶一任赤驥追風精金躍冶何  
故青山無數行人少紅雨和烟墜綺羅  
師在龍居首座寮僧問已到車溪更不爲人時如何  
師曰樓上春風時欲歇誰能攬鏡看愁眉僧擬進語  
師喝出

鐵容立頌曰眞珠簾箔掩蘭房明月沉沉客漏長  
瓊佩乍生春草碧嬌容應不復臨妝

雲庵量頌曰玉簫吹徹鳳凰臺古殿深沉曉未開  
滿地落花春已去綠陰空鎖舊莓苔  
僧問一念緣起無生超彼三乘權學等見阿誰緣起  
有生耶師震聲一喝僧禮拜

晦牧密頌曰雲收雨歇海天寬浪激因風起禍端  
識得長江波是水沙鷗夜宿荻蘆灣

聞谷問了卽業障本來空爲甚師子尊者被罰賓國  
王斬却師曰本來空曰爭奈頭何師曰本來空曰爲  
甚罰賓國王一手墮地師曰本來空

微塵盛頌曰柳汀斜對野人臆零落衰條伴曉江  
正是霜風飄斷處寒鷗驚起一雙雙

因檀越飯僧知客行顯維那唱云板首三分執事二  
分散衆一分師問侍者云汝是幾分僧無語師召知  
客曰何不與他僧亦無語師顧視大眾維那問訊出  
堂

雪次侍者推牕云滿山都是雪師云隨聲逐色漢僧  
云請和尚離聲色道一句師云滿山都是雪  
普明用曰者僧身挨白刃活得命來不妨好手徑

山費盡鹽醬。究竟不獲稱心者。裏有向聲色外別。道一句者麼。良久曰。切忌。道滿山都是雪。

東林在曰。者僧與麼。問南祖與麼。答固是一等平。懷普明與麼。批判未免當途栽。棘東林要大膽。道個滿山都是雪。只知龍向葛坡出。不覺風雷舌上生。揮拂子下座。

普請師。攜作具。領衆到山門。適園頭洗菜。磨頭晒巾。師指二人謂衆曰。園有園頭。磨有磨頭。復指自身云。要者漢作麼。衆無語。師拋作具。歸万丈。

雲庵量頌曰。春有百花秋有月。夏有涼風冬有雪。若無閒事挂心頭。便是人間好時節。

師主法十餘年。惟清白約衆。孤潔自居。傍門依戶之徒。畏如湯火。僅駕湖獨親法乳。師志在古道。凡片紙隻字。誠般若之朕膠也。

泰昌改元庚申仲冬念七日辰時。囑後事畢。奄然坐逝。茶毗塋於徑山普同塋。皆從師志。世壽四十五。僧臘二十三。

天目定禪師法嗣

浮渡山華嚴寺。明日本智禪師。曲靖李氏子。禮白齋。薤染謁佛巖不二。及性天輩。後登天目。參蘭風契旨。世稱叢林白眉。一時王公大人。執弟子禮。慈聖皇太后法寶駐錫金谷。表師主其席。萬曆乙巳十二月念四日。以水盥掌。跏趺而逝。訃聞。慈聖震悼。憫卹。遂賜金返靈骨於浮山。塋妙高之南麓。以從師志也。有語錄若干卷。行世。

不二際國師法嗣

太原府臺山妙峯福登禪師。山西平陽徐氏子。從滿州萬固朗出家。有願行。普賢行。始於讚嘆寺。立關三載。遇異僧指示。曰。普賢行。乃潛行密用。調一切心。非勞筋苦骨之謂也。師遂南遊金陵。參雲谷谷拈念佛是誰話。令參同慈山清北遊。參徧融圓。嘯巖寶大千。潤諸公。萬曆初。再參大千於少林。隱居臺山。獲文殊摩頂授記。明神宗爲慈聖皇太后祝遐。詔不二赴京。奉旨於臺。與師盤桓累日。機緣甚契。一日被不二驚地一劄。忽然大悟。如是道望隆重。至有猛虎開路。菩薩送燈之事。神宗夢師像。徵赴京。賜紫衣。師號示寂。

增於臺山勅封眞佛子

黃州白虎山興善寺一然如幻禪師本郡朱氏子世業儒性仁慈常行放生等事因鄉試脫榜師曰吾出家志遂矣特往襄之草店寺隻染入伏牛山火堂結制謁不二得其頓悟不二即可以法萬曆間慈聖皇太后建首楞嚴道場神宗詔入便殿賜紫並洪濟之號表歸隱廬山黃龍同徹空慈山數人復白蓮社戊午年黃州太常官公遊山齋師道風率文學何其祥等請住志公白虎道場不數年還復舊規

上堂釋迦心血達磨眼睛阿誰無分只是不許忘想所謂得之於心伊蘭作旃檀之樹失之於旨甘露乃漢黎之園昔安國問僧一語具得失兩意汝作麼生道僧舉拳曰不可喚作拳頭也安國不肯師亦舉拳別曰祇爲喚者個作拳頭大眾向者裏下一語恰當始知毫釐有差天地懸隔

掩關二十二載崇禎癸未二月十五日無疾坐化茶毗壘淋山河之乾方世壽八十四僧臘四十一嗣法弟子四人

口口口

夔州白馬寺儀峯方衆禪師達州羅氏子參金佛山雲庵和尚令看如何是鬼神口不破之機三年有省出峽遍謁知識結茅雙溪一日午炊聞鍋中作聲忽大悟作偈有白雲青嶂點頭之句嘗遊浙中庵於杭之清平眞寂印公蚤年嘗依之一日舉青峯丙子童子來求火話詰之曰青峯怎麼道法眼怎麼道爲甚麼有悟不悟印曰初以識心湊泊所以不悟後乃直下承當故乃大悟師遽舉拳揮案一下勦聲曰怎麼汝今大悟耶印擬議師便痛罵越出印直汗流浹背於茲憤志力參

萬曆壬辰間歸白馬僧問如何是西來意師曰兩頭燒火一頭烟師手中嘗執鼓一面書蠡子一面書薛字凡應機多舉而搖之示寂塋於龍神山

滴乳曰據永覺賢傳眞寂印公塔銘受記別於師印有語錄乃細門普調行世

徑山下第十四世

徑山廣禪師法嗣

建寧府普明駕湖妙用禪師杭州海寧鄭氏子年口

七禮興善濟舟爲師受業於南明和尚。謁無幻請益參禪之要。一日於徑山禪堂。偶閱思益梵天經。註有省卽呈偈曰。鐵壁銀山誰敢摧。賊身驚地拶將來相看。元是舊相識。當下慚惶笑臉開。呈明明見而呵之。自此誓不作偈。頌單提本參。而自逼拶。南明因病篤。舉香嚴偈問師。纔開口。明便喝。師復擬開口。明又喝。師點頭。

石門雲頌曰。珊瑚盞盛靈龜血。更酌茶蘿西翠香。因憶王喬雙羽健。鬢鬢一醉罄壺觴。

師侍南明明問。斷頭船作麼生。架三脚驢作麼生。騎師低頭下去。明深喜。尋付偈曰。無傳無受。法無傳無受。心付與無手者。掣斷虛空筋。

石門雲頌曰。子陵灘下老漁翁。展轉拋竿力已窮。剛獲赤鱗駁上去。一聲雁落碧波中。

師雖荷大法終不自肯。後因閱羅湖野錄。至白雲提省五祖處。始得脫然無礙。

石門雲頌曰。及盡今時踞虎頭。揭天聲價有誰酬。其中更有深秋意。海上清浮玉一鉤。

上堂。僧問。如何是古佛心。師便打曰。如何是學人心。師曰。欲攫游龍。蜈蚣竟上。曰。畢竟如何。師連棒打出下座。

空諸性頌曰。桃花流水杳然去。別有天地非人間。堪笑漁翁成鈍置。扁舟何處採仙源。提正令觸體。穿吹毛凜凜逼人寒。

師訪湛然和尚。師問。目前無法。意在目前。其旨如何。湛云。聞令師出關。是否。師曰。不是。目前法。非耳目之所到。又作麼生。湛揖云。請出。我要止靜。師便出。徑山進頌曰。狹路相逢一段奇。灼然賓主禮無虧。就中便有些訛處。不是苦心人不知。

牧公謙頌曰。大鵬搏翼蒼龍出。海動弦別調。旁觀色改。相語相攜。自縱橫。明州有個慙布袋。無依雙頌曰。鳳管鸞簫隔米霞。不知牆外是誰家。重門深鎖無尋處。徑有碧桃千樹花。

師訪密雲禪師。雲豎拳曰。見麼。師曰。見雲曰。見個甚麼。師曰。大家在這裏。雲休。師拂袖使出。

石門雲頌曰。平展家風。雨不虧。翱翔九萬各稱奇。

雲犀若解翻身轉白鼻。崑崙笑滿眉。

師與雪嶠大師翫月。次嶠指月曰。者半個在那裡去了。師良久云。會麼。嶠曰。也只得半個。師曰。者半個在那裡去了。嶠亦良久。師曰。也只得半個。相與大笑。徑山進頌曰。眉端掛劍。寒光如電。互換臨時。穿楊之箭。咄。何似秦時轆轤鑽。

圭峰法頌曰。夜夜蟬輪掛碧天。清光何處不周圓。都來弄巧翻成拙。彼此瞞瞞見一邊。

吼山震頌曰。幾眉山月半輪秋。影入平江浸不流。此夕管絃休接拍。風情恐動玉關愁。

聞齋黃廉憲。陞任廣東入山作別。同曰。臨行一句乞師指示。師曰。三千里外逢人。不得錯舉。

醒座若論佛法。普明無下口處。今日偶見新山門。擊我拄杖子。浪蕩遊行。穿過東子嶺。直到火燒橋。失脚一跌落在深溪。幸舊佛殿出手相扶。以致到家穩坐。新山門見拄杖浸亦不曾乾打。又不曾溼。將謂別有奇特。所以叫屈。要山僧剖斷。人天衆前不敢囊藏。新山門三十棒。舊佛殿三十棒。何故法令之初。償罰要。

明下座

中元黃蘇門朱聯岳。二季廉請上堂云。法身流轉於五道。業累繫墜於三途。苦果恒新。輪迴不息。故我大覺世尊。憫物興慈。緣赴感運。般若智渡。迷津而登覺路。導滯現以證無生。汝等諸人。欲乘大願於斯。願略於斯。微證何物。不濟何苦。不離淨土。穢邦不出。臺端慈雲。忍水總在方寸。其或未然。更須一念心清淨。一念心光明。一念心無礙。心清淨是真佛。心光明是真法。心無礙是真。真佛無形。真法無相。真道無體。三即一一。即三。此猶屬名言。未是究竟。真正道流。須向那邊覷。破轉過身來。纖息。騰程直到箇裡。淨裸裸。赤條條。一肩擔荷。三世諸佛。十方菩薩。乃至西天四七東土。二三並天下老和尚。總不出此。向上全提。渾無趣向。且中元普濟一句。又作麼生喝。一喝云。頭頭盡是光明藏。處處無非解脫場。

萬如禪師請上堂。僧出師。薦豎拂子云。會麼。僧云。恁麼則直截當機。舉四衆盡知。恩師打云。獨你不知。僧便喝。師云。者喝落在。又喝。師又打。乃豎拂子。

○口疑南

云大衆會麼者箇親從。明先師處得來先師從車溪移下挂搭。邇自涓涓田黃面瞿曇在靈山會上拈花示衆。惟迦葉破顏微笑。瞿曇曰。吾有正法眼藏。涅槃妙心。實相無相。微妙法門。不立文字。付囑與汝。汝廣流傳。勿令斷絕。自是展轉至二十八祖達磨大師。以震旦多大乘法器航海西來。六傳曹溪法衍二派。曰青原曰南嶽。嶽又四傳而至臨濟。濟十七傳至斷橋橋十三傳至我南明先師。先師付託於病僧。延至今日。恰我如如長老敦請病僧陞座。舉揚向上宗乘。雖是據款結案。也要諸人共知。且道知箇甚麼。良久。瞎驢妄受靈山記。遞代相傳到此時。復舉芭蕉示衆。云。你有拄杖子。我與你拄杖子。你無拄杖子。我奪却你拄杖子。師頌曰。從無客賜雪中炭。確有人添錦上花。損益非干口。與辱世情偏向有錢家。擊拂下座。嘉興諸師同如如微禪師送源流法衣布衲等至。請上堂。菓子嶺頭火燒橋畔。有則莫大因緣。不是倒曳橫拖。亦非順水把篙。大衆會麼。拈法衣云。此是唐朝官中所製。遞相傳遠。無端鈍置病僧。病僧撒向堦

墻堆頭。冷眼亦不相對。蓋有金粟密兄在今日拈來。重新光彩。正是祖禪不了殃及兒孫。拈拂子云。指揮舊靈尾。野干多驚怕。又拈法卷云。惟有這箇無用處。惹得時人添話。欄去年有箇白拈賊。未曾見我先竊。下如今且向靜處收藏。他日有箇踏翻船子。拂袖便行。底定是鑽龜打瓦。諸大德不得觀著。觀著則瞎復拈拄杖云。舊店斯開。衆中還有識貨者麼。僧出禮拜。起師連棒打退。復舉大通智勝佛十劫坐道場。佛法不現前。不得成佛。道師頌云。獨坐幽篁靜理琴。林深花雨晝沉沉。不知春到時多少。祇見簷前翠靄深。石雨禪師同衆護法請陞座。卽心卽佛。猶是諸訛。非心非佛。可無趣向。不是心。不是佛。不是物。穿花蛺蝶深深見。取不得。捨不得。不可得中。恁麼得。點水蜻蜓款款飛。普明恁麼舉揚。拈著靈峰痒處。憶知拋家散宅。闊步大方。峭巍巍孤迥迥。淨裸裸赤洒洒。踏倒諸聖頂。額把住。凡靈要路。雖然有時一任把住。有時一任放行。有時放行中把住。有時把住中放行。還知旃檀林裡。純是旃檀。獅子窟中。無非獅子。麼。衆中或有

○口疑南

箇伶俐漢出來道。普明無端露布。靈峰蘊底山僧。但向伊道。祇因曾與同床睡。是故深知被底穿。

除夕天寒。作九歲殘。須守舉杯拈菓。大家知有大衆。且道有箇甚麼者。裡薦得。不妨拈尾作頭。向三條椽下。七尺單前。撥禪磨。甜忘餐。廢寢然。祇個事。不在動用中。亦非肩膊上。所以趙州凡兒。僧參便問。曾到此間麼。僧云。曾到州云。吃茶去。或云。不曾到。亦云。吃茶去。院主問和尚。爲甚麼。曾到不曾到。俱教吃茶去。州呼院主主應。諸州云。吃茶去。趙州主張箇事。與諸僧平貼商量。院主不識好惡。至遭一杓臭水。普明者。裡不管他吃茶不吃茶。只要伊單刀直入。一僧便出。師喝一喝曳拄杖下座。

元旦上堂。古道修然。回鳳曆。竟歌舜頌樂。無疆雲籠丹桂金莖。秀雨冰瓊林玉葉長。

崇禎壬午十月十一日辰時。索筆書偈曰。生也錯死也錯。鐵網掣斷黃金索。擲下筆云。咄。遂寂。世壽五十有六。僧臘三十有九。茶毗塔靈骨於本山。隨塔興善。順治間。遷骨塔於興善。與隨塔相望。

### 浮山智禪師法嗣

妙峯徹庸周理禪師。雲南人。其家世力農。幼歲出家。質鈍語蹇。因禮觀音號。豁然大悟。十八歲見頓悟要論。維摩經。知所用心處。又以空觀習定。大有得力處。及讀大慧中峯諸書。乃知用無所用。得無所得。處而未敢足也。邂逅密藏和尚。印證四楞。始覺貼地了已。謁天童悟童。一見便問。萬里到此。費却多少草鞋錢。師曰。某甲乘船而來。童曰。來此作甚麼。師曰。有事借問。得否。童曰。你在甚麼處。師曰。和尚還見麼。童取杖師便喝。童打師接住。送一送童曰。你作甚麼。師曰。和尚要杖。便送還童。大喜。師機語往往例此。而氣吞諸方。金陵諸縉紳。增城葉公。修齡楊公等。輩爲方外交。誼座示衆云。大衆還會麼。釋迦老子來也。若也不會。山僧爲汝諸人。饒舌去也。祇如教中道法。性偏在一。切處。一切衆生。及國土三世諸佛。無有餘亦無形相。而可得。又道天上天下。無如佛者。既道無形相。而可得。又謂一切無有如佛者。汝等諸人。作麼生商量。良久云。善來世尊。安然而住。拈拄杖下座。

上堂上前一步不如退後一步上前一步死退後一步亡只如不進不退未免死水浸殺諸人作麼生是出身之路

崇禎丙子年入寂有谷響集行世

白馬家禪師法嗣

黃州西陵天臺聞谷廣印禪師別號掌石嘉善周氏子父珊母趙氏夢禪率甲士護門覺而生師兒時左眼角常有瘡影父命習儒不願乃送杭開元刺染一日指法界圖問其師曰十法界從心生心從何處生師不能對時儀峯結廬清平山師往參理前問峯曰汝要會須從妙悟始得乃令看雲門露字久之閱七賢女遊屍陀林話忽有省見峯峯舉丙丁童子來求火話詰之曰青峯法眼一般怎麼道爲甚有悟不悟師曰初以識心湊泊所以不悟後以直下承當乃大悟也峯舉拳揮案勵聲曰怎麼則汝大悟耶痛罵驅出師直得汗流夾背自是益力參究年二十四會峯還蜀師乃謁無幻單丁法華山禁足白雲峯下於亮座主參馬祖因緣未決一日觀黃瑞香花忽大悟述

偈曰却是虛空講得經碌磚瓦礫正堪聽向來扭捏孃生鼻錯認葫蘆作帝瓶於是首衆坐禪徑山蓮眉永慶諸處萬曆壬子興復真寂戊午退隱楚之黃安天臺次於建寧創寶善晚歸真寂

崇禎丙子臘月十七示寂塋全身於孔青山之陽壽七十一臘五十八

徑石滴乳集卷之四

徑石滴乳集卷之五

清

嗣祖沙門江州 真在 編

嗣法門人齊安 機雲 續

徑山下第十五世

普明用禪師法嗣

建寧府紫雲峯衡石悟鈞禪師錢塘潘氏子幼而穎悟慧性不凡總角時矢志出塵二十受具卽徧歷諸方雖有所契終不自諾復謁佛日方深得洞上微旨佛日與爲湖友善爲晚年多疾以不得其嗣爲已憂

佛日效道苦與夾山故事。遂指師參駕湖於普明洞。微圓常一日駕問化人問幻士谷響答泉響欲識吾宗旨泥牛水上。行意旨如何。師曰夢眼見空花。駕曰臨濟有一句。子你又作麼生。師便喝。駕便打師。又喝。駕又打師。禮拜。駕曰元來是瞎驢。師拂袖便出。駕命學院事。

崇禎辛巳駕湖退居四衆請師開法上堂。僧問昔日無趣老人。今朝衡石和尚。如何是源遠流長。古今不異。師曰開池見明月。揮麈動清風。曰雲峯一滴水。大地盡承恩。師曰會取未來的。乃曰雲生寶樹風敲翠竹。勸破鷄鳴。偏地塗毒者是無趣老人的落處。即今還有知落處的麼。有。即出來通箇消息。良久擊拂子下座。

師住雲峯一時縉素畢集順治乙酉間隆武仰師道風詔至內掖詳問法要。師以本色奏對。隆大悅。賜紫並號及追諡駕湖廣覺大師。增曰妙莊嚴。丙戌四月初四日示寂。世壽三十四。僧納一十五有演義答響等錄十五卷。行世。

空語性曰臨濟一宗自斷橋無趣祖下付授益嚴。追駕湖而三枝競秀。師居其長。當干戈擾攘之餘。目擊流離悲心益切。一時文武大臣薦拔祈禳。敦近無虛日。夫以師法道使天假之年。當必與金明。永正閩浙唱和大爲佛祖輝耀者。運逢草昧雲鉢先零嗚呼惜哉。

嘉興府金明寺介菴悟進禪師字覺先。姓張本郡人。母賀氏夢日輪入懷而誕。幼不從兒嬉。喜遊寺院。見佛像則依依不忍去。及冠習舉子業。常繙內典志慕禪宗。禮龍池微禪師祝髮。因病臥聞匠斧斫大木聲。有省。即呈微徵領之。

師參駕湖纔跨門。駕云是甚麼師。擬對駕震威一喝。師豁然契悟。乃掩耳而出。

三角文曰洪鐘在架。過物必鳴。攜劍臨鋒。方稱作者。當時普明老人雖向毗盧頂上曲開一線。苟不遇鷄眼龍睛。亦未見有今日也。所以云積谷堆金。易求賢得客。雖今日不肯兒孫。恁麼判斷。不是妄拈祖父遺言。只費沙盆扶起。敢問現前大眾還有。

共相證明者麼。以拄杖一卓曰。放出斷橋車溪水。  
一任滔滔滿五湖。

石門雲頌曰。打破鴻濛數。掀翻碧落圖。少林梅產  
玉春色滿皇都。

龍翼在頌曰。敲出金鸞五色。隨撲碎驪龍明月珠。  
天上人間俱結舌。一段風流出鏡湖。

古林如頌。拂拂春風上苑香。游人不禁醉壺觴。等  
閒觀破東君面。勒馬歸來月轉廊。

天柱峻頌。萬疊銀鸞漲禹門。揚髻鼓鬣有鯨鯨。一  
聲霹靂驚天地。直得風雷宇宙昏。

夢堂倪頌曰。狹路相逢驚一拶。根源徹底不知窮。  
迅雷斷送黃昏雨。四海漫漫鼓黑風。

龍門注頌曰。纔承恩命處東宮。不與尋常體段同。  
石火光中明下載。江南江北動悲風。

希覺銳頌曰。醉倚花闌日未斜。却將旅館認爲家。  
陽春一曲堪回首。處處烟村噪暮鴉。

駕湖欠安師侍次。駕命茶問曰。汝字覺先。喚甚麼作  
先師。曰。且喜今日得自在。駕曰。如何是覺後師。曰。請

和尚尊重。駕曰。汝還分得先後麼。師良久。駕便喝。師  
曰。只管吃茶。駕曰。如何是吃茶的事。師曰。柿裏腐。乾  
都在者裏。駕曰。意作麼生。師曰。一口吞盡。駕曰。是甚  
麼滋味。師曰。甜者甜。鹹者鹹。駕曰。未在。更道。師禮拜  
曰。謝茶。駕深肯。

金明旭曰。大丈夫當鑑不避火。迸臨場豈諱截舌。  
機旭是普明四世孫。敢言未。在。若是金明待他道。  
被我一口吞盡。豎竹篋曰。者箇普明若出得。  
者隻手老漢吞了底也。須吐出。

普明上堂。衆集。乃舉拂子曰。世尊拈一枝花。老僧舉  
一枝拂。且道是。同是。別。師出禮三拜。歸位。明付師法。  
偈曰。沿流一段事。竟無頭與尾。付與獅子兒。哮吼滿  
天地。

鐵容立頌曰。琵琶起舞換新聲。總是關山離別情。  
揀亂邊愁聽不盡。高高明月照長城。  
主峰法頌曰。相逢狹路難迴避。腦後一槌便見腮。  
不是虎鬚。倒持至今那得化龍才。  
金明旭頌曰。偶攜枯桐上國遊。動絃別調意悠悠。

當頭驚夢悲風起代代兒孫抱杞憂

僧參師曰你是高峰僧那日是師曰既是高峯爲甚在我腳下僧無話師打出

僧問如何是祖師西來意師曰金風吹繡水桐葉落莓苔

胡機都曰若是英俊禪僧腦門有益自知金匙一夜來階砌梧桐葉我意似秋雲我心如皎月

崇禎癸未冬住徑山結制上堂僧問堯天舜日野老謳歌諸護臨筵欣聞法要師曰天長地久曰一句語中含日月片言自此振宗風師曰却被上座道著乃曰今日諸方結制未免攢花簇錦巧妙尖新縵天布細打鳳羅龍底句子賺誤於人徑山別資一路爲汝諸人鉗口結舌冷冰冰去寒巖枯木去一念萬年去任他機似鐵牛句如雷閃管取崖州萬里

住餘杭廣福上堂學廣福惟尙禪師呈偈覺印印豎拳曰正當恁麼時作麼生尙掀倒禪牀印便喝尙曰賊過後張弓便出師曰覺印如王秉劍當斷不斷惟尙轅門衝擊逞俊不禁若據令而行各與二十拄杖

且道新廣福具甚麼眼

住武康天池上堂舉雪菴示衆曰乍住城隍寺無束又缺西汝纔遠眼看我便放頭低鬚髮白如雪身心爛似泥本來無佛法何處是全提師曰若論全提佛法身心甚處得來天池則不然城市山林總一同聞聲見色不曾覺識得大蟲原是虎玄沙恰似謝三翳住鍾溪太平端節上堂今朝又是五月五大鬼拍手小鬼舞驀然撞著桃符神雙手搥胸叫冤苦大慧恁麼道恰似官債未了被鉤人一拶神頭鬼面一齊現出太平與你些子禁方卓拄杖曰今朝正值五月五不用雄黃并艾虎理能伏豹澤藏山雲散青天日卓午復卓一下

順治戊子住金明上堂婆婆世界以音聲爲佛事香積世界以香飯爲佛事金明者裏以破院爲佛事還見麼破禪堂灰頭土面破佛殿馬額驢腮破山門擎拳持杵破佛閣待月眼雲破鐘樓知音者少令一隊破衲僧居此以破破不破破破不破不破不破底運用無窮直教七通八達若是超宗異日向者裏輕輕

○口口口  
○口口口

抄著拍拍相應呼之以牛自能拖犁拽耙喚之以馬便乃銜鐵負口山僧只得另眼相看將破破底相待衆中有新口開劈不破底磨出來金明與作破破去也良久以拄杖旋風打散歸方丈

上堂問按倚天長劍奮踞地獅威學人上來請師一接師便喝僧曰者是方便門頭句如何是正令全提句師又喝僧擬進語師便打乃舉白雲端曰若端的得一回汗出便向一莖草上現瓊樓玉殿若未端的得一回汗出縱有瓊樓玉殿被一莖草蓋却師曰白雲不是好心金明者裏向不與人枷鎖你諸人端的得一回汗出頭頭玉殿處處瓊樓端的一回汗不出頭頭總玉殿處處亦瓊樓還知落處麼甜瓜徹蒂甜苦瓠連根苦

示衆東熱關西熱關忙忙業識不知老苦他烈燄熾炎炎獨我陶朱靜悄悄夏蟲若解識寒冰鐵牛決不被蚊咬忽被咬驚起楊歧三脚驢百億須彌都踏倒師嘗垂三問勘驗學者一日既是天封室理應絕此絕彼爲甚有迎有送獅子窟中因甚有狗 范蠡

越國大夫因甚居吳地

癸丑九月二十三日沐浴更衣書偈辭衆而逝世壽六十有二僧臘三十有七茶毗骨白如玉牙齒不壞骨塔於隱川大慈菴齒塔於楚黃石門山之黃荆嘉興府永正寺一初悟元禪師姓曹郡之富湖人生而岐嶷端敏喜跌坐十歲乞父教佛經能解妙義十五卽參究宗乘二十豁然大悟禮興善弘遠爲師參普明執侍久之明一日問我心裏不安你還得太平也未師曰蒼天蒼天又一日入室明豎拳曰道一句看師便掌明大笑師禮拜於是機契返興善掩關十有餘載

順治辛卯住永正上堂花笑春風格外真規顯現漁歌曲水就中消息全影向上拈提不礙通人唱和隨宜施設何妨達者商量寒時添襪熱則披襟休云覓火和烟得饑來喫飯倦卽打眠莫道擔泉帶月歸握一拳大千香水海攝盡無餘舒一掌百億須彌盧拈來有據所以道大人得大機大智得大用設或情塵未脫瞋眼猶存

示衆以拄杖卓一下云道得也被他穿却鼻孔道不得也被他穿却鼻孔時有僧問道不得穿却鼻孔卽且止道得因甚也穿却鼻孔師擲拄杖便歸方丈示衆問僧有一句子未打鼓前分付諸人了也若也會得方可商量如或未然豈堪共語拈拄杖一時打散歸方丈

舉六祖曰我有一物無頭無尾無名無字無背無面諸人還識麼時荷澤會出衆曰是諸法之本源乃神會之佛性頌曰橫將玉笛遡風吹不犯官商調自奇最惜能邀仙子曲被人喚作鷓鴣辭

僧參舉雪峰淘米話未了師劈頭打云殘羹餽飯不勞拈出僧罔措師云學語之流直打出

僧參纔展坐具師便打僧云謝和尚慈悲師云山僧今日失利

尼問那箇是學人本來面目師曰一場出醜尼禮拜師曰衆眼難瞞

康熙戊午五月十九日東通諸檀咸集畢師合掌叙別而逝壽六十四臘四十二塔于丈室

### 徑山下第十六世

#### 金明進禪師法嗣

武康栢山資壽寺素弘眞理禪師漳州海澄陳氏子初參玉林諸宿不能洒脫次謁介菴於天池契旨順治庚子住栢山上堂朔風凜凜寒威彌亘六合慧日明明光華普照大千佛祖機關一時漏洩金剛正眼一齊豁開性燥漢達著便行不丈夫的有甚語話分諸佛出世千言萬言與人解粘云縛鼻祖西來橫說豎說只要明心達本且道本作麼生達心作麼生明縛作麼生去粘作麼生解莫巍巍堂堂是明心達本耶洒洒落落是解粘去縛耶若與麼解會只成得個韓獺逐塊□是禪僧行履處大眾要會禪僧行履處□焉拈拄杖卓一卓下座僧參師問三世諸佛歷代□□爲甚麼出者裡不得僧擬議師便打石門雲頌曰飛霆激電龍翻海偃嶽旋嵐總黑風兩岸蘆花吹作雪半隨流水半飄空師隨衆作務嘗爲虎說戒虎不復作祟□是遠近緇素尊其道德以不及見師爲恨

康熙癸卯□□月十六向朱君行家募柴歸謂衆曰  
吾事畢矣。即歸方丈坐化。世壽五十五臘二十八  
永嘉萬年夢堂眞倪禪師上堂。僧問。如何是清淨法  
身。師云。破糞箕上堂。目前無法。獨露眞常。意在目前。  
阿誰搆取。不是目前法。轉換他一句子。不得非耳目  
之所到。聲色難瞞大衆。到這裡也須透過始得。  
上堂。卓拄杖一下。云。大衆會麼。者裏會得。不妨歸家  
穩坐。還會麼。復卓拄杖。

北京安化世高本則禪師順治辛丑住湧泉上堂。遇  
良工逢妙手。端的人前謾哮吼。崑崙倒跨上須彌。直  
得翻身藏北斗。放出南山鱉鼻蛇。八臂那吒遭一口。  
咄者。段風光。誰不知有。諸昆仲。靈雲不知有。見桃花  
而悟道。香嚴不知有。聞擊竹以明心。楊岐不知有。一  
燈明千古寶壽。不知有。幾片生薑辣。萬年忽貓叫。師  
云。猫子上座。又爲□□道破了也。胡餅裏更討甚麼。  
汁擊如意。云。頻呼小玉元無事。只要檀郎認得聲。  
上堂。拈拄杖。云。山僧拄杖子。昨夜忽抽條。今朝剛吐  
蕊。一花五葉開。香透乾坤。隨不假劫外之春風。豈應

今時之律呂。卓一下。云。數聲野鶴驚天至。無限魚龍  
衝浪來。越格風流從此振。大家拍手舞三台。  
嘉興府金明寺東巖璨禪師。姓鮑。徽州人。嘗著樂道  
歌曰。君不見山中樂道。常知足。三條短篋。腰間束歲  
久年深。百念消破。瓦鐺邊上一個。也不榮。也不辱。半  
升三斗。是吾祿。每日支筇。潤上遊。又見牧童驅野犢。  
嘆韶華如轉燭。世事奔波何了局。偷得清閒快活居。  
是佛是仙都莫做。又不見自古夷齊耻。周粟商山□  
四皓。有高躅。竹林茅舍放。宵懷。種菓栽蓮遠。塵俗於  
此樂。是真福。猶勝公侯積金玉。隨緣任性且逍遙。塊  
石枕眠歌一曲。阿呵呵舒兩目。有誰灑洒天地間。笑  
罵從他喚頭禿。僧問。如何是到家底消息。師曰。待汝  
站定脚跟。卽自汝道。

建寧府妙峯益菴素顯鑒禪師。莆田陳氏子。寓普明  
中秋示衆。中秋八月半。桂殿圓。瓊瑤清光何處無。石  
樓尤好玩。君不見。江西馬箴箕。釣賊破家良可歎。供  
養修行物外超。至今流落沒崖岸。昨夜三更月到憲  
嘉州。大象與陝府鐵牛。索鬧爭這舊公案。却要妙峯

爲他判斷山僧向他道有利無利不離行市各打二十棒。越出二俱無著漸惶直去日本國祖款款地擊鼓唱個菩薩蠻好快活。阿汝諸人青天白日向這裡討甚碗以拄杖一齊打散。

康熙癸亥季夏無病而寂茶毗烟燄結緣頂骨牙齒舌頭俱不壞塔於蘿岩。

廬山龍門資教寺古壁文禪師襄陽人姓程氏師卓錫廬山漢蓮院順治丁酉開法潯川之萬壽已亥遷三角。

上堂閉門造車開門合轍孤峯頂上二俱不立連朝雪散長空千山共成一色忽然地爐灰飛燒殺庭前古栢急急□下雲頭救來一天星月仔細檢點打刀原是邪鐵一道清光射斗牛四壁寒林風瑟瑟薰拈拄杖得得攪羹須趁爐烟熟癸卯夏命灌沐拜辭金明老人像入室端坐設偈而逝塔于本山。

嘉興府三塔景德寺主峰圓法禪師徽州人原籍應天沐國公之後裔也仕郎將忽心花發現遂薙髮爲僧參金明明豎拂子師便喝明日從上佛祖盡向這

裏流出你還見麼師曰從上佛祖盡從這裏來

宜林能曰者裏出天衢踴捷驥者裏來監車轆破官街莫恠相逢不下馬也曾拍拍舞三台

宗如昇曰金明據頭三塔據尾父子互換足可觀光若是從上來事只管在語言上卜度者多不錯會者少

石門雲頌曰海客乘槎欲摸源仙都遊遍不知尊一朝花下親回首始信冥冷起化鵬

己酉秋月作書辭秋岳曹司農與衆護法畢施博居士問曰和尚此去還是往天堂下地獄師展兩手示之士禮拜師珍重而逝茶毗得舍利無數塔于本寺之乾

嘉興金明晦巖真爛禪師嘗頌諸可還者自然非汝不汝還者非汝而誰曰仙娥肌骨本風流紅粉慵施下玉樓雲珮霜環零落盡却教無處可遮羞

廬山龍門天峰性禪師黃梅王氏子即仲喧公之後裔生而淡泊幼習青箱喜出世學每讀竺典徹日忘倦及世異飄然四方至浙之苕溪禮金沙智浪

薙染服勤數載。一日思生死事大。往叩石奇于雪竇。令參本來面目。話刻究累日。有省。述偈呈奇。奇乃首肯。後參金明入門。便喝。明亦喝。師又喝。明卽拈棒。師曰。老漢今日敗缺。明便打。師曰。轉見不堪。明便休。次日陞座。師出問。長年爲覓知音。少今日相逢。事若何。明曰。放你三十棒。師震威一喝。明顧衆曰。看取這員戰將。師拂袖歸衆。順治乙未秋。明謂師曰。此事須是箇人方能擔荷。觀汝見地超卓。毋久滯此。是多出世。松江清涼菴丁酉遷小貞種福院。戊戌歸里。衆請重興多雲山。康熙己酉夏三角古和尚謝世。衆請示席。甲寅黃梅紳士請復興。東永福及菩提等處凡師到處卽成伽藍。

上堂。僧問。纔離秀水。便跨雲間。未審第一義如何。舉唱。師曰。突出難辨。曰。入廬垂手。舊日家風。作麼生。是斬新一句。師曰。截流透海。乃曰。道人取則原無定。向動若風行草偃。水到渠成。遇物卽宗。圓音暢美。一句該羅千差。坐斷汝等諸人到者。裏須知轉身一步。拈拄杖卓一卓下座。

師下無傳

翠峰裴公琦禪師

嘉興府金明寺別傳眞化禪師。本郡屠氏子。年十九依介和尚剃染。受具。參三不是話。有省。命掌記。室明一日以衣拂付之。出世秦溪。師性恬淡。凡上堂示衆。隨機開導。不容人錄。

廣陵海月天岩眞啓禪師。如皋冒氏子。從法中出家。小參。孔子不識字。達磨不會禪。人却不信。鳥大如山。魚大如海。人却不信。父少于子。弟長于兄。人却不信。明星午現。紅輪夜照。人却不信。海月與麼說。諸人不信。諸人與麼說。海月不信。諸人不信。海月不信。且道是同是別。顧左右云。畢竟作麼生。復顧左右云。參。

太倉問梅院宦陳永修禪師。武林李氏子。上堂。僧問。如何是繡雪境界。師曰。曲徑幾回苔蘚積。雪堂深處竹風清。僧云。如何是境中人。師云。扶筇揀點間。花落信步移。看碧水澄。僧云。向上事。又作麼生。師便打上堂。山僧有一句。子久欲說。向諸人因世事太忙。不曾啓齒。今日偶間。何妨細說。汝等各宜聽取。使下座示衆。庭畔陰濃。兩久如醉。堤邊楊柳含珠吐。翠池塘蛙鼓。

響如雷林下禪和打盂睡阿呵會不會卓拄杖云  
日高花影重風暖鳥聲碎

師問舜日子近日作麼生舜云上是天下是地師云  
大有人不肯汝舜云要他肯有何益師便打舜云大  
有人不肯和尚師云作麼舜云切莫教壞人家男女  
師云玄沙爲甚不肯雲舜云勸君更進一杯酒西  
出陽關無故人師頷之

癸卯春仍歸老問梅管謂衆曰時光迅速汝等急須  
照顧脚跟孟冬二十七日示微疾至三十晚呼行者  
取湯沐浴跌坐脫去時山鳥哀震林木

南康府雲門既白仁旭禪師參金明以杖畫地曰  
向這裡道一句師以具打圓相明便打師喝明曰亂  
喝作麼師拂袖便出初住廬山五老峯每與衲子盤  
桓無不悅服後遷雲門一日謂衆曰道得個轉身句  
又有懸崖撒手句道得個撒手句又有末後句試通  
個消息看衆罔措師曰不會那老僧自道去也卽端  
坐說偈擲筆而化

泉州承天寺嬾若真曇禪師字時現晉江鄭氏子因

觀奕小參甚逢敵手難敵拙詩到重吟始見工衲僧  
家竿木隨身臨機制勝亦如此局頗手相類靜時棋  
止動則棋行照用同一雙關而並走事理兼至一截  
角而斜飛埋兵挑閫何妨擊此攻彼單刀直入貴在  
破疊先登傍邊作勢豈能侵闌門戶靠角求活錯過  
多少城池三軍失利爲是遲了半刻突圍而出終是  
賊後張弓隨人高下固爲失策縱爾饒半落在第二  
故曰握籌猶屬後輸贏一著先諸人要識者一著先  
的道理除非打破大鐵網踏翻倒垂蓮殺活自由方  
稱國手點檢將來衲僧本分極則猶少一著在如何  
是衲僧極則未分黑白妙難施文彩纔彰一局棋畫  
斷中間十九路方能坐享太平基臨終沐浴說偈而  
逝茶毗隻履不壞至今供奉于清源山  
湖州高峯淨名菴雪子淨禪師上堂學正靜和尚指  
芍藥花問行者不作紅色會不作白色會你作何色  
會曰紅底紅得好白底白得好正曰汝猶被色轉曰  
除却紅白請和尚別道正曰紅底紅白底白師頷曰  
不作紅不作白除却兩般休漏泄杜宇聲聲叫落暉

春風狼藉枝頭血

江州廬山東林興龍寺山鐸真在禪師別字筠菴姓李桑落人生而長知不樂舉子業以先薦襲爲郎將因將犯法斬之師心凜然卽謁匡廬東林薙髮因閱高峰錄疑拖死屍句偏參諸方究其行解相應聞介老人有古人風特造其室一見如有夙契遂折節焉明問不是心不是佛不是物是個甚麼師曰露明曰昨日有人與麼道三十棒越出了也師曰要打便打說甚昨日隨聲便掌明約住曰者瞎驢亂作那師擬進語明便打師復擬進語明又打師豁然契證

天鐸源頌曰行到山窮水盡處鷗搏獅迅太弛張却將三尺龍泉劍捏作還魂導魄香

印宗奇頌曰歷徧千峯與萬峯白雲深處見翔踪翻身直上最高頂激電驅雷縱遠鴻

石門雲頌曰碎出金鸞五色髓沖開碧落萬重杉祇因客不龍門宿霹靂飛騰送遠帆

次早入室明曰昨日公案未圓師打露柱一掌曰又要重說偈言明曰怎奈公案何聲未絕師震威一喝

明亦喝師又喝明曰三喝四喝後又作麼生師連喝兩喝明曰識此一喝恩大難酬師禮三拜明深肯遂出源流付之

印宗奇頌曰鷲地恰逢沽酒店你杯我盞破窮愁相携深入桃花塢那管人間春復秋

金明旭頌曰海天空濶泛輕舟逞盡風流不肯休驚起蒼梧枝上鷺直冲雲際過滄洲

石門雲頌曰壞垣破屋無今古四壁通同渾不週候爾西風撼桂子簷前驚起數聲鴉

康熙甲辰春歸住東林乙巳秋遷楚斬華桂已酉移西陵之碧雲四衆川赴商確佛祖公案無不悅服

上堂及盡去也地幹天旋龍吟霧起虎嘯風生正當恁麼時尋常做手脚底以沙門一隻眼印定森羅萬

象便能口吸西江身藏北斗將三寸龜毛攪斷黃河一葉栗蓬劈開華藏頭頭現法法彰牛溲馬溲耀古

輝今塵塵說利利談白牯狸奴吼雷掣電故先德曰入理深談以無功而會旨又曰明明古路不屬玄微

一念普觀廓然空寂興化汾陽及我爲糊諸祖得此

一著提王庫刀用殺活機克振濟北家聲揭示人天正眼山僧今日亦以此著不惜職私和盤托出敢將雲門餅趙州茶雪峯毯拋向當陽擔得底大好受用倘有出格高流更烹露地牛割蒼梧鳳剖明月珠以千聖不傳向上一著破破的相待何故鐵牛踏破玄關數野老謳歌樂太平

辛亥九月十五日以微疾示衆有記取明年今日日之語一衆駭異時有僧出問和尚尊意如何師曰三百八十四壬子又七月初旬謂徒衆曰吾欲歸里宜速備之衆以爲常往遂買驢一頭以代步師願而唉曰吾行非驢所堪自此諄諄誠衆修潔九月初八日入城辭衆擅越并諸山耆宿至十一歸山十二陞座開導其略曰吾身後不許學哀開孝效世俗所爲及化錢等事不許造塔須將靈骨拋棄江河利生不得故建十五日辰刻沐浴焚香端坐書偈而逝闍維起骨得其精白齒亦不壞數珠分心如故黃安道俗頂禮泣下如喪考妣師生天啓辛酉十一月十九日世壽五十二僧臘二十八

太倉藕菴竹菴眞衍禪師偶閱圓覺經菩薩發問今者四大各離妄身當在何處遂撫几長嘆人生不明個事徒爲僧相於本分中無所益也於是徧參一日聞板聲忽然有省造金明參介和尚執待逾年隱于婁東因疾退隱東關康熙丁巳七月十七日寅時索筆書偈曰生平孤子杜門守拙吾道雖涼仗後昆烈喝一喝擲筆而逝塔于金豎鎮蓮花寺右

圓印尼參師曰世尊拈花迦葉微笑且道唉個甚麼印一喝師曰者一喝落在甚麼處印曰不妨疑著師豎拂子曰者個響印曰不得妄通消息師曰適來山僧道甚麼印曰前言何在師曰山僧年邁印曰年邁卽得便禮拜

嘉興府三埭景德寺妙雲眞雄禪師姓徐金華武義人父仲芳官登州都司誕師署中及襁褓每見佛僧輒生欽悅九歲喪母時世運多艱芳歎曰大丈夫不能定亂莫若入空門趣佛乘乃棄官從華嚴自化雍染師亦依芳祝髮禮靈隱具德受戒領竹篋話參究靡懈偶至北高峯篤疑忘返擡眸見月心境廓然自

爾疑圖頓釋且抵察衆各違規師怡然笑曰若不登高望怎知滄海寬德歷學公案詰之無不了了遂謁木陳祖印費隱箸菴浮石玉林牧雲一初諸老機鋒不讓無可師意嘗聞介和尚門風高峻道重諸方卽造金明明問雲封獅窻向背無門汝從何入師曰從門入者不是家珍明曰汝是行脚僧爲什向驢胎馬腹裏作活計師曰今日親見和尚明曰你看老僧眉毛落了幾莖師曰生也明便打師曰不入洪波裏怎見弄潮人明曰你見何道理怎麼道師拂袖便出尋命茶明拈菓曰者是醍醐是毒藥師曰舌頭在和尙口裏明曰你作麼生會師便喝明置菓師前曰試吞吐看師作禮曰謝和尚茶明卽令參堂遂安維那次遷監院壬子元旦明上堂拈拂子召衆曰世尊說法四十九老僧開堂二十五靈山拈出一枝花金明豎起一柄拂且道是同是別師出衆禮拜曰且喜老漢今日營地明豎拂曰只者個豎窮三際橫徧十方且道承誰恩力師曰粉骨碎身未足酬明打一拂子師禮拜了依位立明卽著從上源流并法偈付之

康熙癸亥出世臨清州大悲寺上堂師喝一喝曰若論第一義諦諸佛列祖口挂壁上雖則官不容針新長老也只得傍開一線拈拄杖卓一卓曰莫有不顧性命底出來與拄杖子相見僧問毗盧頂上草生青金剛脚下死蛇橫卽且置玉殿荅封意旨如何師曰白雲籠碧樹誰識聖堯顏曰天時地利四衆咸和慶祝一句又作麼生師曰山河天子壽世界法王身曰蠡湖滴乳傳芳永舊店重開法化新師曰也要大家出隻手曰一句渾超諸有象千載黃河今又清師曰好個消息曰學人禮拜有分師打曰且莫詐明頭問撥草瞻風瓦礫生光如何是大悲境師曰雲眠斷碣鳥宿迦頭曰人傑地靈素緇駢集如何是境中人師曰眼生眉下耳搭腮邊曰人境已蒙師指示正令全提事若何師劈脊便打僧曰作家宗師天然猶在師曰同道方知乃曰剎竿豎起古店重鋪打開寶藏還出家珍撒向諸人面前一任取足與麼會得猶較些子不與麼會拄杖子別滋一路驚卓一下曰碎波旬窟宅展佛祖家聲須憑者個握金剛王劍懸肘後靈

符要。是其人山僧今日承請檀大命。義不容辭。斬斧披榛。鑿開生佛面目。墾土掘石。露出本地風光。頓教寒灰發燄。枯木生春。石獅哮吼。驚起青山頭卓。朔木馬嘶風踏。斷黃河水倒流。莫有向者裏著得一隻眼底麼。良久卓杖云。手握金鞭。問歸客。夜深誰共御垓行。復舉介菴和尚住金明上堂。破禪堂灰頭土面。破佛殿驢額馬腮。破山門擎拳持杵。破佛閣待月眠雲。破鐘樓知音者。少令一隊破禪僧居此。以破破不破。破破不破。不破不破。底運用無窮。直教七通八達。若是超宗異目。山僧只得另眼相看。將破破底相待。衆中有所不開。劈不破底麼。出來金明與你破破去也。師曰。運壺中日月。用格外鉗錘。號令人天權衡佛祖。不無者老漢扶豎。臨濟綱宗。要且未在山僧當時若在。將坐具展開畫。此相捲作一團。拋向背後。展兩子云。諸看他如何合煞。諸人怎麼會得。然燈佛與你同參。卓拄杖云。換骨洗腸。重整頓通身。是眼更須參。辛未夏嘉禾衆紳士請住三埭龍淵上堂。揮拂子曰。垂鈎四海。祇釣鯨鯢。據座披衣爲求知識。嘉豎拂曰。

過去已過去。未來尚未來。今日正當山僧說法。直須以大圓覺爲伽藍。安住平等一如法。說令現前。經素亦如法得解。然後同聲相應。同氣相和。悉使魔外。絕跡。生佛普該入一微塵。現無邊身。相坐毫端。內轉大法輪。山河大地。明暗色空。情與無情。總在個裏。頭出頭沒。喝一喝曰。天上有星。皆拱北人。間無水不潮。東僧問。如何是不動尊。師曰。卯生曰。戌生月。

其右法頌曰。銀缸倒漢。大浸稽天。晴開海日。夢覺心懸。可惜孤雁一聲。聲休驚他獨宿眠。

處林光頌曰。樽桑將曉。陽鳥動晚。翠千峯玉兔生。淨洗銀河渾一事。滿天碧落散瑤晶。

晦岳旭頌曰。金烏急玉兔。速東復西。如轉軸。赫奕難擬。清光可掬。飛上若木兮。喚醒人間春夢。踏碎珊瑚兮。影搖千江水。綠暑運推移。念四門宮。春到三十六。

天乳哺頌曰。一對菱花。遞互彰佳。人晝夜巧梳粧。人間天上無相似。傾國傾城世莫雙。天癡善頌曰。鴛鴦繡出。頗稱奇。一個東飛。一個西。

縱使同眠只獨宿金針從不把君知

天顰顰頌曰不待火而熱不待水而涼朝夕不停  
機洞然括八荒智者應無昧迷流徒自喪借陰惟  
大禹片片皆文章

僧問如何是三類化身師曰閣黎會殺人麼曰我王  
庫內無如是刀師打曰不是我同流□僧問如何是  
不退地師曰官憑文書私憑契約□僧問如何是祖  
師西來意師曰戶外風敲竹曰明甚麼邊事師曰庭  
前蝶舞花曰學人不會師曰滿園桃李綻風送落萼  
苦僧無對師便打

師在金明時一初和尚至明命師領衆出迎初問范  
蠡湖海月光天你爲什被斷貫索絆倒師曰被和尚  
帶累初舉杖曰識得者個麼師奪得擲于地初曰者  
無禮漢教我師兄打你去師曰不得倚勢欺人便與  
一掌初擬取棒師便行初見明曰者漢惱亂人不少  
明曰師弟莫著賊耶初曰煩師兄替我出場氣明顧  
師師作禮云老和尚請坐就奉茶來抽身便出初  
顧明相與大笑曰俊哉禪子

僧問色身敗壞卽不問如何是堅固法身師曰八臂  
那吒撲帝鍾曰請師明示師曰石人推倒五須彌  
建寧府浦城友可山鐵容玄禪師別字寄翳上堂三  
十餘年獨穴居堵寒不禁草絮禪心已作三冬雪  
一任他生作馬驢爲甚如此坐久腰痛

上堂衆纔集師便下座知事把住問和尚因什不示  
一言便下座師曰早晨喫了兩碗冷粥肚裏有些  
不停當少待圓去來爲汝等說衆問措師便歸方丈  
上堂半窓圖畫梅花月莫作等閒看一枕波濤松樹  
風不可糊亂聽大眾要知此事大煞難逗  
上堂山僧昨日赴個村齋咬著一粒黑光沙直到今  
朝牙痛不止不能與諸兄弟說黃道白便下座  
僧辭師問甚處去曰有住處卽來向和尚道師曰你  
是持戒人爲什不清規曰和尚莫以罪罪人好師  
曰我不以罪罪你古人道喫粥了洗鉢去意作麼生  
曰昨夜夢裏有人問此話恰值某愛睡不曾答他師  
休去□僧問如何是妙體師曰坑坎堆阜瓦礫荆棘  
如何是妙用師曰敲空作響擊木無聲

鎮江府甘露寺逾祖覺禪師姓張揚州人從南京清涼劍門剃落歷參諸老無不嘉歎晚謁金明明問諸方參得底拈向一邊道得也打道不得也打師便喝明日除却者喝更道看師曰特來親近和尚明拈拂打曰是實是謂師禮拜明又打師豁然悟入乃曰將此身心奉塵刹明度拂子師接得打傍僧云是則名為報佛恩明曰子當珍重

和碩額附石將軍元旦請上堂僧問凍雲乍展千山露化日高昇宇宙清如何是新年頭佛法師曰春風繡一陣何處不花開曰今日安南將軍請師陞座祝延一句又作麼生師曰百年三萬六千日惟有今年最吉祥云法界恩光普乾坤色轉新如何是甘露境師曰金輪調御三千界如何是甘露人師曰玉曆鴻宣萬國春云怎麼則法化弘敷四衆均沾去也師曰裂破關黎舌頭乃卓拄杖曰水銀落地個個皆圓古鏡臨臺塵塵煥彩春風繡度萬物咸新一人有慶兆民賴之立地成佛將軍殺人不眨眼殺人不眨眼將軍立地成佛如珠走盤盤走珠驚豔拄杖曰天生

玉葉金花秀奕奕芳芳不計年

康熙己巳住京都開化寺壬申孟夏示疾脚膝說傷而遊搶于甘露寺右龍世壽六十一僧臘□□□諸錄若干卷行世

北京牧園企賈廣清禪師山陰金氏子世業儒幼而敏慧偶遊梵刹志樂出塵從雲門剃度依三宜孟習教參林野於天童林問世尊良久外道因何悟去師曰知音不在頻頻舉林打曰還知者一棒落處麼師曰苦瓠連根苦甜瓜徹蒂甜林曰牛過葱欄爲什尾巴過不得師曰和尚今日却被某甲捉敗林曰者掠虛漢師拂袖便出最後謁金明明問大事未明如喪考妣且置因什大事已明亦如喪考妣師曰愁人莫向愁人說明曰你向什麼處用心師曰泥裏何必洗土塊明伸一足曰我脚何似驢脚師禮拜曰不因夜來雁怎見海門秋明打一拂子印以偈曰教綱重重透禪源脉脈通更明心法法努力振綱宗上堂僧問法揚帝闕道關盡湖向上提持作麼生道師曰一棒一條痕曰華頂風規隨處建立祖師心印

如何指示師曰火爐飛出鐵烏龜曰大機大用正令當行過量人來將何接待師便打僧一喝師連棒打退迺曰五十餘年牧一牛登山涉水未曾休於今高挂鞭繩也掉尾擎頭性已柔只是隨分納些些山悠悠更水悠悠說甚拈花微笑斷臂安心那效慈明貼榜僧堂洞山撥退菓桌者隊老古雖無風興浪播揚家醜自不丈夫牧園者裏把定封疆更不畫蛇添足爾等眉生眼上耳搭腮邊又來者裏覓甚麼碗卓拄杖云各請歸堂喫茶

康熙庚申孟春師示疾至四月十二日門人圓淨領衆詣方丈求垂示師曰山僧素來不涉迷悟癘疾三月累得通身骨露若人如是會得管取超越祖復謂衆云古人道法身病色身即是法身色身病法身即是色身今蒙大眾問我病源山僧徧觀法界覓病根起處了不可得故曰病入膏肓神醫拱手復說偈大喝一聲便吉祥而寂世壽六十二僧臘四十一興化竺山吼菴證禪師示衆學僧問首山如何是學人親切處山曰五九盡日又逢春日畢竟事如何山

日冬到寒食一百五師頌曰春暖平川鶯語清笙歌從此悅行人反嗟策馬擁寒者孤負東君用意深平湖青蓮寺夢菴覺禪師別字一味嘉興范氏子禮金明披緇命掌記室有年深入丈室後住青蓮參扣無虛日示衆舉世尊於自恣曰因文殊三處過夏迦葉欲白椎撥出纔拈椎乃見百千萬億文殊盡其神力椎不能舉世尊遂問汝擬撥那個文殊迦葉無對師曰文殊三處度夏撥亂清規迦葉白椎欲撥驚羣動衆世尊問處因循使人厮鬪若是正令而行三人喫棒有分何故青蓮門下

西陵報恩松岫源禪師上堂舉龐居士語未竟王公華出問既是已成的佛用選作麼師曰拖犁拽耙太平素嚴智禪師麻城人上堂彩雲影裏神仙現手把紅羅扇遮面急須著眼看仙文莫看仙人手中扇舉扇云者個是扇子且道仙人在甚麼處擲扇躬身云者個是仙人扇子在甚麼處汝等諸人向者裏著得一隻眼不妨水邊林下任性逍遙倘或未然咬定牙關拚命做去自然水到渠成

舉洞山麻三斤話頌曰如何是佛三斤麻槎根繩子  
縛烟霞等閒識得鈎頭意笑殺東村王大媽著有金  
剛決疑行世

玄暉性禪師

建寧普明雲菴眞量禪師臨寧謝氏子上堂麻三斤  
乾矢橛且置一邊德山棒臨濟喝放過一著諸人還  
知獅子爪牙獐龍頭角麼脫身一色坐遺影不落同  
風顯大功

小參饑來喫飯困來打眠諸僧門下不費鑽研祇如  
古德道五臺山上雲蒸飯佛殿堦前狗尿天是明什  
麼邊事向道莫行山下路果聞猿叫斷腸聲

秀州蓮花可度尼淮安田氏季子也父官以指揮坐  
□而死尼年七歲見父屍感嘆曰人生如此何益便  
有出塵志但不自由四十往扣三宜禪師于梵受復  
謁介菴和尚于金明遂求落髮明再三弗許尼即憂  
憤驅血盈盆明憫其誠乃爲剃染命看萬法歸一話  
寢食都忘不著年而氣幾絕一日見明明問一歸何  
處尼訴所以明曰日本自現成用許多氣力作麼尼覺

心意平貼

尼呈偈曰脫體風流意莫窮堂堂獨露主人公朝來  
換水焚香課盡在尋常日用中明可之

樵李明心佛音尼姓葉潞鎮人幼喪母延僧誦經見  
地獄畫相卽心動不茹葷矢志出家父爲締姻尼死  
誓不從遂投庵落髮苦行數載禮金明圓具明命看  
父母未生前話刻死久之一日登樓踏板作聲有省  
乃呈明明愈加煅煉至育從今識得娘生面自是出  
羣一丈夫之句尼一日在羅廣文家補衲羅問如何  
是日用得力句尼以針作割勢適歲暮羅問汝將甚  
麼度歲尼豎拳羅曰還別有麼尼曰來朝向居士道  
甲寅菊月旣望沐浴端坐說偈而化

廣文羅開麟居士號空諸樵李人幼歲讀書便能琢  
磨孔頭落處故受用不與人同一日隨父衡陽公過  
敬畏菴值石車禪師上堂不信有宗門事乃忽之順  
治丙戌間父母繼歿險阻備常內兄施約菴每於失  
意中啓發謁東塔林野禪師次參無熱首座及費隱  
禪師費展兩手云會麼士茫然費云當面錯過士於

此信入戊子參金明介和尚深造井曰一晚落堂舉香板命衆下語士近前奪香板曰和尚把柄已在弟子手裡介顧衆曰這一期祇得個俗漢士擲香板介肯之士著有華嚴疏鈔金剛摸像家門拈頌共若干卷行世

別駕頂謙居士號芙蓉裏毅公七世孫大金吾俊卿子也未致仕時參博山來余集生皆有機語及解綬與古南門天界盛等爲方外交最後謁介和尚於金明因緣甚契乃呈偈曰聊聞舉著便承當好肉無端已剗瘡著眼機先看端的頂門誰不帶扶桑介印可士嘗學郁山主過橋喫撲公案曰衆兄弟一眼觀天兩腳踏地且道明珠在甚麼處良久云春在草頭上王孫幾箇知有死心錄行世

陸煥居士號調羹旁水人幼失怙恃無干於世喜遊叢席與知識燈炬不忍捨順治丁酉造金明明命看萬法歸一經三載偶閱三頌棒話如貧得寶述偈呈明明曰此是意識所作猶在半途未是到家消息士服膺庚子再參明指座上古瓶士作頌甚恰明意一

日有僧乞錢士如數封定曰道得卽與僧曰我年老矣士曰四大有老這箇豈有老耶僧似手點臂士曰試拈出看僧進前士便掌

文學陸肅居士字玄度性恬淡嘗閱竺典猶如夙肄乃謁明菴天童平陽二隱諸宿有機語刻載行錄壬辰參金明明問曾見知識否士曰六七位明曰那一位得意士曰若得意卽不來也明笑曰莫瞞老僧士請開示明曰此事不從外得要明心地須看話頭士唯唯而退一日因行折足頓了厥旨偈曰十字街頭親隨著一回白汗頂門通石人扶起呵呵笑伸脚原來縮脚中呈明明深肯

文學朱燮憲居士字欽臣因鼎革有出世志而未果辛卯間患血症乃謁金明請益參死法要明曰居士看一念未生以前這病根從甚處得來如此頻頻看去亦莫嫌閑取寂亦莫厭凡求聖昔蘇黃得力處不越此也士如教命病果愈一夜擡頭見月光皎潔乃悟入蓮逝數偈其略曰五色雲開萬象清一輪心月徹天明虛空落地無消息世界何勞用一塵呈明明

曰汝骨氣猛利志性果敢可名真毅焉

明經李潛字蛟門好浮屠學嘗繙內典年二十二遇  
膚淺禪師示不思善不思惡那個是本來面目之話  
參之往謁樓寧斯瑞二公機語甚契丙午與空諸羅  
子盤桓遂造金明參介和尚適鐘鳴介問鐘鳴耶耳  
鳴耶士曰一串穿却介喝曰還穿得者箇麼士禮拜  
曰恩大難酬茶次介曰百丈野狐話你作麼生會士  
乃覆却茶杯介曰只如不落不昧又作麼生士以茶  
杯仰上而立介曰除却者些伎倆試道一句看士便  
喝介曰亂喝作麼士曰和尚莫作恁介便打士禮拜  
一日侍次介問臺山婆子趙明如何勘破士曰趙老  
舌頭無骨介頷之即示偈曰趙州街口疾走婆子減  
竈添兵太平日定輸贏勦勞到處標青史撒手長安  
莫問程遂命名真弘

文學許振聲居士字無聲自幼敬信三寶最喜楞嚴  
莊老等書聞介和尚道風仰歸信願話頭精勤體究  
累年一日入室請益介舉扇一拍士豁然有投機偈  
介可之囑令操履然務實而不務虛辛酉孟冬感微

慈臨終說偈曰我名振聲從何來法名真馨今  
何往人道我佛法中人直是冤枉曾讀孔孟幾行書  
且喜也不入者黨阿呵呵亭午天空月朗朗遂悠然  
脫去

諸乳曰真字一輩按金明進祖親筆聯芳所錄近有數  
席妄稱進祖法嗣雲詳致語錄諸書該無實據未便收  
入集內

### 永正元禪師法嗣

秀水報本冲默真開禪師湖廣人參永正問甚處來  
師曰新城正曰未發足以前好與一頓師以坐具一  
拂正便打師少頃呈頌正接了更索師曰和尚將謂  
別有那正深肯

示衆舉石霜參汾陽知臨濟道出常情因緣師頌曰  
倒腹傾腸舉似人其如不薦屈難伸一朝捉敗非輕  
處眼蓋乾坤氣宇新

東溪退菴斷愚真智禪師嘉興人參永正問靈雲道  
自從一見桃花後直至如今更不疑因什玄沙却道  
未徹在正曰直不藏曲師曰未審徹底人如何受用  
正曰饑則喫飯倦即打眠師禮拜執侍二十載

示衆。舉香巖上樹。因緣師頌曰。一等全提。向上機無。錐地。漢做來。奇當場。不畏傍觀。眼別有威聲。動四維。康熙乙卯。住永正丁巳季秋二十日。命搥鼓集衆。師豎拳曰。生死事大。無常迅速。各各努力。莫作等閒。復曰。生平懶開口。別衆無他語。端坐歛雙眸。逢人莫錯舉。且道畢竟如何。喝一喝。遂寂。塋于方丈。

耿惟真藏禪師參永正。正問諸佛未出世。人人鼻孔。捺天出世後。因甚杳無消息。師曰。坐斷天下舌頭。正曰。未。在。師即呈頌曰。塗毒聲前未解。聞藏鋒袖裏得。堪爭當陽突出。無巴鼻打失摩醯。正眼睛。正目之至。晚落堂拈師頌問者。是有巴鼻底。作麼是無巴鼻底。意旨師便喝。正曰。還別有麼。師曰。有。即有不堪舉。似正曰。因甚不堪舉。似師曰。恐嚇殺天下人。正拈拂子。便打師禮拜。正又打。

法兩行洪禪師參永正。正問何處來。師曰。崇得正。曰。曾親近阿誰。師曰。天童報恩。福嚴。正曰。更見何人。師曰。兩眼對正豎拳。曰。向者裏。道句看。師曰。道破。即不堪。正曰。未。在。師曰。和尚要重說。偈曰。那正便打。師曰。

恩大難酬。正又打師禮拜。後再參。正問風雨淋漓。遠涉不易脚。跟下曾打溼也。未。師震聲一喝。正曰。猶帶泥水。在。師曰。只爲和尚老婆心切。正便打師禮拜。正可之。



寓庸禪師參永正。依止數載。一日。正問子一向在此。如何行履。師曰。著衣喫飯。正曰。此外更有事麼。師曰。有。則辜負和尚。正曰。若道無。亦辜負老僧。師珍重。禮拜三。三拜。正便打。

永正通濟上座。再參。正舉拂子云。諸佛未出世。祖師不西來。還有者。個消息麼。師便喝。正曰。祇如諸佛出世。祖師西來。又且如何。師曰。衆生度盡。正曰。座主見解。師曰。和尚又如何。正便喝。師豁然曰。謝師慈悲。便禮拜。正便打。

杲如證菴主。再參。永正問。向在什麼處。跟主曰。從來不覆藏。正曰。如何是你不覆藏。底主曰。山青水綠。雀噪鴉鳴。正曰。莫是舊時面目麼。主曰。溪山雖異。雲月是同。正曰。未。在。更道主便喝。正打一如意云。向者裏道一句看。主禮拜。正然之。

# 宗統編年

清・紀蔭  
撰





宗統編年進

呈奏疏

江南常州府武進縣祥符寺臣僧紹鑑謹

奏

恭惟

皇帝陛下道涵天地德貫古今

睿智寬聰謨訓蔚虞周之盛

皇猷允塞文章煥義禹之隆兩儀之內無物不仰

賴生成三教之中無人不欽承化育洋洋光輝

盛大之日蕩蕩名教興揚之時竊臣曾數澤蜎

微山林樗廢幼習鄰魯既識字以無多長慕禪

宗復究心而未盡百凡荒昧俯仰愧慚祇於世

道人心每切攸同之念時手宗傳慧脉實深從

上之思不揣顛愚輒相探者會儒釋之淵源參

聖賢之壺域仿史例以編年垂宗統於後世燃

松滴露既兀兀以成書持鉢沿門遂孜孜而付

梓茲蓋伏遇

皇帝陛下聖化熏陶仁風漸被裁成無外統中天調

御之

君師纖鉅不遺現盛世慈祥之

佛祖筆削心承願就

至尊之袞鉞流通念切希同藏典以施行但瞻

九重萬里末由蒲伏以謁丹墀何幸一日千秋得聆

警欬而親函丈不避狂妄之誅徑申冒昧之謂

茲因法叔玉泉和尚入

覲之次謹陳

皇清一統萬年頌一章敬申草野傾向化日之葵忱

併所纂宗統編年一部懇求法叔代呈

御前伏乞

陛下萬幾之暇俯賜電覽倘蒙

日月光燭幽微不責謬略之愆疵大施蕩平之教

訓寵錫冠序敕許頒行庶

王言穆穆示大道之康衢

聖誨皇皇寶

鴻章於法苑臣僧誓將泉壑餘生炳香額手而祝

無疆更矢利塵微願瀝膽捐軀以圖上報臣僧

誠惶誠恐稽首頓首不勝瞻

天仰

聖激切屏營之至謹奏

康熙三十二年三月十一日

宗統編年序

經明道之書也。史記事之書也。經通則人心之義理  
斯見。史達則古今之得失有徵。合而兼之者。其唯春  
秋乎。孔子當周室衰微。乾綱解紐之際。慨然以斯文  
爲己任。就魯史而寓王法。敘倫敦典。褒德貶罪。而善  
以勸惡。以懲其志。存乎經。世一筆一削。功等於抑洪  
水。驅猛獸。而其大意則主乎正人心術。此春秋之經  
兼史而爲聖賢傳心明道之要典也。吾道一以貫之  
大要。不出忠恕。能盡己之心。推己之心。以及人而大  
道不行。天下不治者。未之有也。一貫之旨。吾夫子實  
於洙泗杏壇。一花拈出。而西方聖人之教。吾夫子亦  
未嘗不先返其機也。列子述商太宰問聖於孔子。孔  
子以博學多識自居。而不居於聖。於三王五帝。以任

23

仁義智勇稱之。而弗知其聖。及宰駭問。乃動容曰。西  
方之人有聖者焉。不治而不亂。不言而自信。不化而  
自行。蕩蕩乎。民無能名焉。以今觀之。西方聖人之教。  
吾夫子蓋嘗先返其機也。天地民物之間。古今升降  
之際。必有厥終厥始。而究極指歸。世教存而不謫。蓋  
人道參天位地。而不可語於範圍之外者也。然朝聞  
夕可之言。夫子深切歎之。而夫子之言性與天道。如  
子貢者。尙且歎爲不可得聞。則今之凡得聞於吾夫  
子者。皆夫子之文章而已矣。嗚呼。世愈後。道愈微。而  
一貫之旨。幾何其不悖謬也。西方聖人之教。該攝恒  
沙。詳周法界。慈雲旦聚。廣被無方。慧日晨躋。光明亘  
遠。蓮河葱嶺。曷勝象質之書。鹿苑竹林。未罄龍藏之  
典。自祖衣東。被繼佛履。西遊。粵潮淵源之人。豈無紀  
載之傳。然而各述宗風。譜系或淆。近遠並垂。語錄流  
行。莫識後先。所以學海波瀾。遊之者罔臻闢奧。宗門  
關鍵。探之者罕辨脩途。自非心源泉湧。智辯雲飛。何  
以尙論千秋提衡兩端者矣。夫椒祥符和尚。德齊龍  
樹才。擬馬鳴。鬚髻遊刃於儒門。肯綮奏刀於法苑。神

應不窮。辨濟鹿馳羊之小學。智通無累。按雞園猿沼之真燈。發廣大心。示眞實語。拈微妙理。開方便門。會佛祖以成書。作吾宗之信史。續慧燈於迦葉。以火傳薪。結法集於阿難。持瓶瀉水。因時記事。實一部十七史之菁華。紀月編年。昉二百四十年之筆削。信矣法門龍象。良哉方外春秋。道洽大千。使聞未聞者。忽省雷音之旨。化均百億。俾見未見者。欣瞻滿月之文。具葉翻風。甘露彌於識種。寶華注雨。慧水溢於身田。闡教脂那。接引之方無量。疏源身毒。利濟之益靡涯。豈特從上諸方。驚王標其髓液。將使九流百氏。列派盡以朝宗。儒釋不肯而相資。理事各適以爲用。人心既正。大道自明。其與六經諸史。互相表章。當來之金筵末法之寶炬也。恭惟

今上皇帝陛下聖學天縱。置作君師。

皇極懋昭。彰同文於千古。

宸猷允塞。垂至化於萬年。金輿玉軸。一統輯告成之書。華宸威。鉄羣賢纂前朝之典。洋洋乎光輝盛大之日。濟濟乎名教興隆之時。而宗統編年。際斯成就。就文

章黼黻於以藻飾。太平心法。宗風將來綿亘。治運寧唯紙皮筆骨。藏名山而俟後起。行見刻木鑄金。布國門而質大方矣。不避衰悰。歡喜敬序。皈依

三寶弟子七十八老人許之漸法名濟常頓首謹譔

序

癸亥五月渡湖。訪祥符湖公和尚。留宿藏雲舊室。時公有編修僧史之願。卽事漫成二詩。其一曰。破浪乘風。得得來湖山。高臥許追陪。曠懷欲發古人秘。薄俗每令中念灰。鼓吹詞壇嗟末學。棟梁法苑望奇才。他年僧史編成後。先寄須教老眼開。其二曰。歎息吾衰入夢鄉。唯餘蝴蝶滿匡牀。孤燈綿歷歲月古。千偈翻窗頰。香石上苔紋。留馬蹟。天邊星彩射龍光。禪流波靡今尤甚。猶幸僧中有此郎。蓋志喜也已已。夏公手扎函宗統編年來蓮峰山舫曰。和尚不斬一言序之。青炷香展卷曰。斯誠千古闕典。亦千古盛事。佛祖紀綱宗師血脉。藉以永傳。其有功於法苑。豈啻一縷千鈞。第草草勞人。何能發揚大意。表白深心。然念和

尙數年心。血幾爲枯瘁。不惜身命。然大法炬爲最後末劫。照耀人天。敢不贊歎申明。昭告天下後世。夫著述難事也。而況於持論宗門。持論宗門不易也。而況於編定宗統。繫之歲年。斯誠難之又難矣。無徵見今古之明眼。無大公無我之直心。而不出之以真才達識。亦何能洞闡精微。張皇要眇。使單傳直指之道。彰明較著於目前。佛祖宗師之機。輝煌歷落於後日。而且會儒釋之淵源。明聖凡之極致。提一心宗。統攝百氏。寶網帝珠。燦交光之涉入。香河獅乳。拈一味以密融。不綦難中之難歟。所以自古及今。未有人曾及之者。況乎時風澆薄。知見日漓。不念苦心。唯存私見者。往往有之。今編年。擴大同之道域。徹一貫之藩籬。哲人奧旨。久而愈彰。古德真風。聞斯興起。大書特筆。不遺提挈。宣明條目。綱領具見。隱微嚴謹。唯和尙之才識。足以激揚鏗鏘。而眼明心公。無絲毫隔礙。故取二千餘年佛心祖髓。向筆尖上流注。眞常作未來金鏡。羅程嬰杵白之用。心不是過也。讀是編者。循年核實。舉法知時。千秋文獻。足徵一會靈山未散。從此人

登般若之航。家達菩提之路矣。先師退翁老人嘗有是志而未遑。寶雲月兄和尙嘗欲成法苑春秋及僧寶翼徵等書而未就。今公克承先志。丕著宗猷。舉其所甚難者而易爲之成。

昭代蔚然之鉅典。展從上未敷之鴻緒。青以衰颯頽光。猶幸躬逢其盛。甯不亟爲前後千古稱慶乎。在昔有宋哲后尊尙祖道。吳中道原禪師輯傳燈錄。成上之詔詞。臣楊億等討論頒入大藏。鐫津契嵩禪師著傳法正宗記。獻之闕下。宰相韓琦翰林歐陽修諸公鄭重歎美。亦詔入大藏。

今上聖天子崇文重法。度越前皇。將見此書上達宸聰。石渠天祿之間。當有補袞調羹。扶起正法輪者。則茲編流通黼黻。太平助揚盛化。又不止法苑增華。緇門藉重已也。

皇清康熙二十九年歲次庚午春二月穀旦華山沙門晚青槃譚譔

宗統編年目錄

卷之一

佛紀上

釋迦牟尼佛

卷之二

佛紀下

釋迦牟尼佛

卷之三

祖紀西天祖師

一祖迦葉尊者

二祖阿難尊者

三祖商那和脩尊者

四祖優波毼多尊者

五祖提多迦尊者

六祖彌遮迦尊者

卷之四

七祖婆須密尊者

八祖佛陀難提尊者

九祖伏獸密多尊者

十祖脇尊者

十一祖富那夜奢尊者

十二祖馬鳴大士

卷之五

卷之六

十三祖迦毗摩羅尊者 十四祖龍樹尊者

十五祖迦那提婆尊者 十六祖羅睺羅多尊者

十七祖僧伽難提尊者 十八祖伽耶舍多尊者

十九祖鳩摩羅多尊者

二十祖闍夜多尊者 廿一祖婆修盤頭尊者

二十二祖摩拏羅尊者 二十三祖鶴勒那尊者

二十四祖師子尊者

卷之七

二十五祖婆舍斯多尊者

二十六祖不如蜜多尊者

二十七祖般若多羅尊者

卷之八

祖紀東土祖師

西天二十八  
東震旦第一世少林菩提達磨祖師

卷之九

第二世鄴都可祖師 第三世羅浮際祖師

第四世新春信祖師

卷之十

第五世東山忍祖師

第六世曹溪能祖師

卷之十一

第七世南嶽讓祖師

第七世青原思祖師

第八世江西一祖師

第八世石頭遷祖師

卷之十二

第九世百丈海祖師

第八世石頭遷祖師

第十世黃檗運祖師

第九世藥山儼祖師

鴻仰開宗第一世鴻山祐祖師

卷之十三

第十世黃檗運祖師

第九世藥山儼祖師

第十世雲巖晟祖師

鴻仰開宗第一世鴻山祐祖師

曹洞開宗第一世曹洞山寂祖師

卷之十四

五宗紀

臨濟開宗第一世臨濟玄祖師

曹洞開宗第一世曹洞山寂祖師

鴻仰開宗第一世鴻山祐祖師

卷之十五

臨濟開宗第一世臨濟玄祖師

曹洞開宗第一世曹洞山寂祖師

卷之十六

臨濟宗第二世興化獎祖師

曹洞開宗第一世曹洞山寂祖師

曹洞宗第二世雲居膺祖師

卷之十七

臨濟宗第三世南院顒祖師

曹洞宗第二世雲居膺祖師

曹洞宗第三世同安丕祖師

雲門開宗第一世雲門偃祖師

卷之十八

臨濟宗第三世南院顒祖師

臨濟宗第四世風穴沼祖師

曹洞宗第三世同安丕祖師

曹洞宗第四世鳳棲志祖師

曹洞宗第五世梁山觀祖師

雲門開宗第一世雲門偃祖師

法眼開宗第一世清涼益祖師

卷之十九

臨濟宗第五世百山念祖師

臨濟宗第六世汾州昭祖師

曹洞宗第五世梁山觀祖師

曹洞宗第六世太陽玄祖師

卷之二十

臨濟宗第七世石霜圓祖師

臨濟宗第八世楊岐會祖師

臨濟宗第九世白雲端祖師

曹洞宗第六世太陽玄祖師

曹洞宗第七世投子青祖師

卷之二十一

臨濟宗第十世五祖演祖師

曹洞宗第七世投子青祖師

曹洞宗第八世芙蓉楷祖師

卷之二十二

臨濟宗第十世五祖演祖師

曹洞宗第八世芙蓉楷祖師

卷之二十三

臨濟宗第十一世昭覺勤祖師

臨濟宗第十二世虎邱隆祖師

曹洞宗第八世芙蓉楷祖師

曹洞宗第九世丹霞淳祖師

曹洞宗第十世長蘆了祖師

卷之二十四

臨濟宗第十三世歸宗華祖師

臨濟宗第十四世華藏傑祖師

曹洞宗第十世長蘆了祖師

曹洞宗第十一世天童珙祖師

曹洞宗第十二世雪竇鑑祖師

曹洞宗第十三世天童淨祖師

曹洞宗第十四世鹿門覺祖師

曹洞宗第十五世普照辨祖師

曹洞宗第十六世大明寶祖師

曹洞宗第十七世王山體祖師

曹洞宗第十八世雪巖滿祖師

卷之二十五

臨濟宗第十五世臥龍先祖師

臨濟宗第十六世徑山範祖師

曹洞宗第十八世雪巖滿祖師

曹洞宗第十九世萬松秀祖師

曹洞宗第二十世雪庭裕祖師

卷之二十六

臨濟宗第十七世仰山欽祖師

臨濟宗第十八世高峰妙祖師

曹洞宗第二十世雪庭裕祖師

曹洞宗第二十一世少室泰祖師

曹洞宗第二十二世寶印遇祖師

卷之二十七

臨濟宗第十九世中峰本祖師

臨濟宗第二十世聖壽長祖師

曹洞宗第二十二世寶印遇祖師

曹洞宗第二十三世香巖才祖師

曹洞宗第二十四世萬安嚴祖師

卷之二十八

曹洞宗第二十一世萬峰蔚祖師

臨濟宗第二十二世聖恩持祖師

臨濟宗第二十三世東明昱祖師

曹洞宗第二十四世萬安嚴祖師

曹洞宗第二十五世少室收祖師

曹洞宗第二十六世嵩山斌祖師

卷之二十九

臨濟宗第二十四世翼善慈祖師

臨濟宗第二十五世高峰瑄祖師

臨濟宗第二十六世金陵瑞祖師

臨濟宗第二十七世龍泉聰祖師

曹洞宗第二十七世定國從祖師

曹洞宗第二十八世嵩少載祖師

曹洞宗第二十九世宗鏡書祖師

卷之三十

臨濟宗第二十八世圓通寶祖師

臨濟宗第二十九世禹門傳祖師

曹洞宗第二十九世宗鏡書祖師

卷之三十一

諸方略紀上

卷之三十二

諸方略紀下

宗統編年目錄終

佛祖宗統畢傳世系之圖

釋迦文佛

二祖阿難

四祖優波毼多

六祖彌遮迦

八祖佛陀難提

十祖脇尊者

十二祖馬鳴

西竺初祖迦葉

三祖商那和修

五祖提多迦

七祖婆須蜜

九祖伏獸蜜多

十一祖富那夜奢

十三祖迦毗摩羅

十四祖龍樹

十六祖羅喉羅多

十八祖伽耶舍多

二十祖闍夜多

二十二祖摩拏羅

二十四祖師子比丘

二十六祖不如蜜多

西天二十八祖菩提達磨  
東晉第一祖

三祖羅浮燦

五祖東山忍

七祖南岳願  
青原思

九祖百丈海  
藥山儼

單傳十一祖  
開宗第一祖  
洞山价  
臨濟玄  
仰山寂

三祖南院願  
同安丕  
單傳十三祖  
開宗二世  
雲門偃

五祖普山念  
梁山觀  
單傳十五祖  
開宗三世  
法眼益

七祖石霜圓  
投子青

十五祖迦那提婆

十七祖僧伽難提

十九祖鳩摩羅多

二十一祖婆修盤頭

二十三祖鶴勒那

二十五祖婆舍斯多

二十七祖般若多羅

東二祖鄴都可  
震

四祖靳春信

六祖曹溪能

八祖馬祖一  
石頭遷

十祖黃檗遷  
雲品晟  
首建湧仰宗  
獨山祐

二祖興化獎  
雲居膺

四祖風穴沼  
鳳棲志

六祖汾州昭  
太極玄

八祖楊岐會  
英睿權



註正變一本紫陽綱目他如五經孔子家語諸子通鑑左傳國語戰國策史記漢書唐鑑新舊唐書五代史十九史諸史詳節讀史管見續通鑑皇明通紀諸書法門文字如釋迦譜古今佛道論衡弘明廣集大唐內典神州塔寺三寶感通錄開元釋教錄大唐高僧傳內法傳宋高僧傳歷代三寶記景德傳燈錄傳法正宗記佛祖統記佛祖歷代通載佛祖綱目聖胄集五燈會元指月錄總傳燈錄諸家語錄及甄正辨偽等錄皆詳論道教中事者皆詳考合訂不敢一字私涉臆見

一是編單紀宗統凡正傳宗統者大書其嗣統示寂之年昭法化也支流旁出者皆不具書其間參佐宗化年月有徵者倣先經終義之例書出處顧末於其寂之年以彰輔化諸方拈頌論議因時闡明宗旨切要者書之否則不書

一全提密證不涉語言大道眞宗豈存功蹟然有係於法化有關乎宗統者皆大書焉講律並書儒道兼攝昭宗統無外也國政時事有關宗統須參考

者亦附書之非關宗統者雖彪炳史傳皆不具書凡正傳宗統者書某宗第幾世某處祖示寂而不書名有證加證非正傳宗統者講書法師律書律師禪則方書禪師不敢濫也書寂書名有證加證應化聖賢難以格定者不在此例來往參承或稱禪師或單書名者皆有深意微義具存非輕率也有隱而須發者夾註發明之

一文獻俱闕地異時遠無從稽定者曰闕文文獻並徵因時因事不能無礙未敢據定者曰闕疑自昔互有異同至今確實考證者曰考定諸子百家別集中參合可證者曰別證文闕獻徵據實准定以俟後稽者曰存考

一迦文開宗垂統爲佛紀迦葉以至黃髮雲巖諸祖紹統傳宗爲祖紀五宗而後承宗繼統爲宗紀臨濟禹門曹洞宗鏡兩祖之下諸方法化正在繁衍宗統未敢遂定諸方之出處大略隨年編至今康熙已已爲諸方略紀以俟後來補定  
一法門廣大知見淺近茲編聊爲草創擁轡豈能遂

稱成書蒐討未周當從補人大綱細目不全不合者仰祈

大方宗匠垂教刪定以永真傳

皇清康熙二十八年歲次己巳

佛誕日臨濟三十四世後學新安沙門釋紀蔭槃譚謹述於夫椒祥符之大中堂

宗統編年總論

祥符紀蔭曰蓋聞聖王之治天下也本乎格致誠正施之修齊治平盡性踐形事天立命是以首出庶物建極秉乾一人有道萬國咸甯唐虞之化於變時雍夏商之間政刑並用爰及周衰道微政弛人心懷亂篤生孔孟明道德以敘彝倫行仁義而正風俗漢唐以降教化不興法度是守漸騫於外失其本心又以諸家龐雜大道支離程朱出而闡明約束之聖學雖顯然以爲章句致身之塗鮮見成已成物之士斯文將喪叔世何堪蚩蚩者氓固不可使之知而坦坦者道亦何可不使之由也夫

語大莫載六合之外豈可存而不論語小莫破聖人豈真有不知能然而洪荒以前渾沌先是何狀九州之際溟渤終於何底滄桑見見生死歷然將來世數何終人物何止藉曰方圓一氣一氣之始何以彌綸太極兩儀無極之初是何境象性本於天而天之所以爲天則曰無聲無臭至矣得之有命而命之所以爲命則曰莫之致而致焉是豈原始要終聖賢有所未盡抑亦察倫明物變化示於幾微與天地合其德與日月合其明與四時合其序與鬼神合其吉凶先天而天弗違後天而奉天時參贊位育終日乾乾大人之所以爲大人也同聲相應同氣相求各從其類可與知能民物之所以爲民物也父子有親君臣有義夫婦有別長幼有序朋友有信各正性命保合太和斯天下之達道也思修身不可以不事親思事親不可以不知人思知人不可以不知天天人之極致性命之本源達大道之體而無殊盡一心之量而不變者非智超劫外行徧寰中其孰能與於斯乎惟法王之

出三界也。洞徹一心了明。萬有真心本性。一切圓融。天人由行業以分途。善惡從真妄而異趣。心有真妄。善惡而性則純真。至善真善之名。亦無以加焉。唯心有真妄。善惡是以悟心之真而善者有四。聖焉。謂佛與菩薩緣覺聲聞是也。迷心之真而善惡雜緣者有六凡焉。謂人天鬼神三道地獄餓鬼畜生三塗是也。人可不言天。則匪一居須彌山治四部洲。為四天王天。居人間頂。超日月明為忉利天。有三十二天并帝釋為三十三天此之二天未離地居上之於虛空中。朗然安住。身有光明。日月不及如是一類名欲摩。天上昇精微不接下界。乃至劫壞三災不及名兜率陀天。更上有樂變化。天他化自在天。如是等天未離乎欲通名欲界上之有三梵天。梵梵梵名初禪天上之有少光天。無量光天。光音天。名二禪天上之有少淨天。無量淨天。遍淨天。名三禪天上之復有福生天。福愛天。廣果天。無想天。名四禪天。其間復有五不還天。無煩天。無熱天。善見天。善見天。色究竟天。以上諸天未離形色通名色。

界上之復有空處天。識處天。無所有處天。非想非非想處天。如是等天。無業果。色名無色界。天之次復攝十種仙。一地行仙。二飛行仙。三遊行仙。四空行仙。五天行仙。六通行仙。七道行仙。八照行仙。九精行仙。十絕行仙。仙之與天迥然不同。仙以人身而戀長生處海山島。天則福德化生自在。無礙上品之仙不能及下品之天。是皆不了真心。隨業妄報。不值佛化沉溺長途者也。鬼神多門。各以業報受生。其中因為善而夾雜妄緣。正直聰明之士。忠孝節義之流。未證真常。皆為業苦。復有修羅四趣。所攝謂天人鬼畜因多嗔業。致感斯倫。三塗則隨三業。貪瞋癡輕重以受報。杳杳昏昏。誰從拯救。匪佛垂慈。少能脫苦。此之六凡皆迷一心。致趨多報。天之與人以福德殊。非真謂蒼蒼茫茫。高而無極。不識不知也。聲聞因修四諦。苦集滅道見道緣覺。謂覺十二因緣。無明緣行等證道此二聖流。自了生死。不能利他。菩薩則修六度。布施持戒忍辱萬行。廣度衆生。名為大乘圓滿行。解具證三身。法報化盡妙覺性。成無上。

道斯名爲佛。佛者覺也。先知先覺。徧滿十方。非一非異。不可思議。釋迦文佛。則此娑婆之化身也。通一化土。總攝世界。則三千大千通一壽量。點盡塵墨。尙無窮無盡。閻浮洲乃大千界之一。八十年適因滅劫之時。此界爲南閻浮洲。佛世壽七十九年。降生兜率。示道成也。見處王宮。示尊勝也。脫屣世榮。示世苦也。因親生老病死等事。出家。示世無常也。出家苦行。示眞修實證也。降魔。示正能摧邪也。成道。示證本有也。三七思維。示妙法難喻也。漸說三乘。曲垂方便也。五戒十善。以接人天。隨其欲樂也。彈偏斥小。歎大褒圓。開發大機。廣相成就也。四攝法。慈攝無遺也。四悉檀。三根等度也。四十九年說法。十二部隨機接引也。末後拈花付囑。密傳心印也。佛之出世。唯欲人人共了此心心之知見。萬別千差。非以正法印印之。則不契圓宗。皆非了悟。此正法印。離言說相。唯證乃知。此教外別傳。不立文字也。如來說法。一則教通。一則宗通。教乃言詮。宗則大意的。的大意。直指人心。見性忘言。當下成佛。此宗傳自迦葉。

以及阿難。西天二十八世歷歷傳持。光昭正眼。列皆法身大士。應世宣化。傳達摩氏。以般若智光。運照東震。遂躬航海。達於梁朝。由梁歷魏。止於少林。面壁九年。直接二祖。傳至曹溪。分爲南岳。青原。南岳青原。後復分爲臨濟。曹洞。沩仰。雲門。法眼。五宗一華。五葉二桂。昌鴻仰雲。門法眼三宗。不數傳而止。唯臨濟曹洞傳。至於今。闡佛眞宗。宣揚法化。單提向上。不涉功勳。以心印心。初無剽迹。眞傳正脉。遞代相承。宗統昭然。歷年可按。用是遠邇迦文。降神之年。當此土周昭王甲寅之歲。以及於今二千餘年。正續大法。方來未艾。謂之宗統編年。以見佛法大意。不離時節。因緣世出世間。皆與時爲消長。約而論之。如春夏秋冬。互相成就。造化之妙。無能名焉。是知佛與聖人。設化不同。其歸則一。悟心之士。各各契眞。觸途之流。往往成滯。是自遇各於佛何。尤又以宗門施設。戲捕無從。鐵壁銀山。攀仰莫及。棒喝交加。賓主歷然。黑白未分。正偏宛爾。眞符密印。唯眞子得之。不在常山大吼。雄威非獅兒。

當之鮮不腦裂纖毫不隔天地懸殊入此門中莫存知解順行逆用一一皆我真機聖見凡情彼彼誰能測識非此宗眼難瞞豈不渾同魔異宗苟通也千途異轍入密室以消融妙藥神針起膏肓於瞑眩依時垂範逐類行慈功孰大焉用斯偉矣合而言之佛之所謂自覺儒之所謂明明德也佛之所謂覺他儒之所謂親民也佛之覺行圓滿儒之在止於至善也佛儒之修證同也佛之清淨法身即天命之性也佛之圓滿報身即率性之道也佛之千百億化身即修道之教也其體用同也但淺深大小在造其極與未盡其量耳施之治世治不離世故吾儒之道不外庶物之間而聖人就易就近以裁成乎過與不及而適於時中聖人之所以爲聖也施之出世出不離世故我佛之教不出一心之外而宗師當前當處以指示其本所固有而歸於無得宗師之所以爲宗也不離世而治世道無在而無不在也不離世而出世道無不在而無在也故曰時也明乎時而權實通焉明乎時而本

末貫焉矣

# 宗統編年別問

問曰洪荒以前渾沌先是何狀九州之際溟渤終於何底世數何終人物何止也祥符曰虛空無邊却數無量世界無盡不可思維詎能擬議劫之長短界之勝劣皆隨心所見心所種種成就今就一劫一世界而言劫之爲言時數也即世也界之爲言方位也衆生爲情界正報也方位爲器界依報也凡界總成住壞空爲一大劫謂之世界二十小劫成二十小劫住二十小劫壞二十小劫空一增一減而成小劫積八十小劫而成一大劫劫初人壽皆八萬四千歲身有神光日月未出人壽減至二萬歲時迦葉佛出世人失神光日月出照四天下今世史所稱盤古洪荒三皇各一萬八千歲考其時乃迦葉佛之後第九小劫之末滅矣所云混沌者乃身光初失日月未出之時非眞天地開闢也詳見佛紀中世界無盡佛智乃知今就娑婆世界而言此世界在華藏莊嚴世界海中華藏海中

央有香水海名無邊妙華光出一蓮華持一世界種名普照十方熾然寶光明中列二十重佛刹即界其第十三重爲娑婆世界毗盧遮那佛之報土釋迦文佛其身娑婆世界僅當一世界種十九分之一釋迦化土有百億須彌百億四天下僅當娑婆界微塵數之一然華藏莊嚴世界海特微塵數世界海之一海耳此無盡世界海悉依虛空虛空在大覺中一浮漚耳故楞嚴經曰空生大覺中如海一漚發有漏微塵國皆依空所生又曰十方虛空生汝心內猶如片雲點於太虛世界如此廣大心量如是包容故曰法界量同太虛衆生心智自小人第知肉團之心藏於方寸腔中而抑知性體之心圓攝無盡邊際乎須彌梵語此山深入大海八萬四千由旬梵語此云限量也高出大海八萬四千由旬四方面各爲一天下謂一大部洲四方爲四天下四大部洲各一天王統攝爲四王天人失神光之後世間黑暗日月天子從四天出見繞須彌山腰周行照一四天下諸星宿佐之

便有晝夜須彌山頂爲忉利三十三天以次而上有夜摩天兜率天變化天他化自在天梵世天此名一世界帝釋爲忉利天主今道教所稱玉皇是也如此一千世界一千日月一千須彌山一千四天下一千四天王天一千三十三天一千夜摩天一千兜率天一千樂變化天一千他化自在天一千梵世天總爲第二禪天所覆名小千世界一千箇小千世界百萬日月百萬須彌山百萬四天下乃至百萬梵世天一千二禪天總爲第三禪天所覆名中千世界一千箇中千世界百億日月百億須彌山百億四天下乃至百億梵世天百萬二禪天一千三禪天總爲第四禪天所覆名大千世界億有四等一以十萬爲億二以百萬爲億三以千萬爲億四以萬萬爲億今言百億者以千萬爲億也此大千世界爲一化佛世界當娑婆界微塵數之一大海之下爲金輪堅八萬四千由旬金輪之下復水輪深六十八百千由旬水輪之下爲風輪所攝持其風輪量廣六萬八十俱胝梵語此云百億風輪之下乃依空輪而凝然靜住空無所依結業成熟世

界前後左右上下十方次第安住圍繞周匝四大部洲爲南閻浮提洲又云瞻部卽此土是人壽減後增至二萬歲時有鐵輪王出治一南洲東弗于逮此云勝身洲人壽增至四萬歲時有銅輪王出治東南二洲西瞿耶尼此云牛貨洲人壽增至六萬歲時有銀輪王出治東西南三洲北鬱單越此云勝處洲此洲人與長壽天報等人壽增至八萬四千歲時有金輪王出治東西南北四大部洲皆有大威力十善治世地居天子治一國爲粟散王九州溟渤此一國土界也此世界之略也詳具華嚴經中佛住正覺世間爲法界圓周太虛無欠無餘法界參合世界爲四法界謂事法界理法界理事無礙法界事事無礙法界如來法身居常寂光爲法性淨土亦徧微塵依於山河大地色相之土凡聖同居事理交互不卽不離入四種法界而攝化衆生應觀法界性一切惟心造豈曲士之可談凡夫之能信哉積利那呼吸而成時積時成日積日成月積月成歲積歲成劫爲增漸損爲減劫減壞時有大小三

災劫減時有小三災人壽減至三十歲時天不降雨地大亢旱草菜不生思欲見水尙不可得何況飲食人民饑饉而死殆盡爲饑饉災人壽減至二十歲時疾疫大行種種諸病染者皆死亡殆盡爲疾疫災人壽減至一十歲時人懷鬪諍見卽相戕手執草木卽成兵仗殺害無遺爲刀兵災大三災者劫欲壞時有七日出見大地山裂四海水消千世界及初禪天皆悉火熾洞然無餘爲火災初禪天已下七番火災之後世界復成又於壞劫之時降霖大雨滴如車軸地下水輪湧沸上騰大千世界至二禪天水皆漂蕩如水消鹽壞盡無餘爲水災二禪天已下七番水災之後又經七番火災世界復成又於壞劫之時從下風輪有猛風起名毗嵐風三千大千世界上至三禪天悉皆飄散如空颺塵爲風災此大三災世數人物之終始也問曰儒釋之體用修證旣同所以造極而未盡其量者可得聞乎祥符曰法界皆一心所見儒釋之修證體用不出一心此心無二豈得不同大同之原

在於無我。凡夫執我不達本心。聖人無我能盡此性。此性盡處。即淺可以資深。無小而不具。大實無極之可造。量之可盡。佛教攝化十方。融通三世。十方三世。一念全該。如來智入三世。而無來往。身於十萬成等正覺。修行三大阿僧祇劫。誓度一切衆生。盡法界性。佛圓證焉。儒教聖人。以道治世。適可而止。致位育於中和。能參贊乎天地平常之理。只在時中。喜怒哀樂未發之時。中體原無十方三世之隔。子臣弟友皆道之際。和氣豈有我人衆生之分。儒教聖人。蓋世間之佛也。佛蓋出世間之聖人也。人在世間。盡聖人之道。尙何處而非佛哉。人出世間。盡佛之道。尙何處而非聖人哉。此心原一體也。此道斯一貫焉。造極而未盡量。悟徹此心。當自知之耳。問曰。世間三教並稱。然乎否乎。祥符曰。率性之謂道。道也者。吾性體之一條。通暢大路也。此通暢大路。一任東西南北。各適其適。而歸家者。自罷問程。老聃莊列諸子。皆已騰身千仞之上。徘徊瞻顧。此大路欲人不昧。南北東西。而自尙不能不

滯迹於南北東西焉者也。大士攝化多密。乘權老聃莊列諸子。當世相紛爭。人心轆轤之際。而以清淨曠達之言。蕩滌之。亦如人病熱惱。而醫者下一服清涼散也。其有功於世教。人心孰大焉。讀其書得其大意。俱可就路還家。守其言。執其知。解只自迷。万小歇。若也蕩平南北東西。豁然一條通暢大路。彌貫十虛。見前無隔。則步步踏佛階梯。時時誕登道岸。何教之有三然之與否乎。問曰。西竺九十六種外道。及此土諸異端。何也。祥符曰。心外有法。謂之外道。心外有法。則不達本心。諸見橫生。謂斷見。世間一切皆歸斷滅也。常見。世間一切長久不滅也。亦斷亦常見。世間一切亦斷滅亦恒常也。非斷非常。見世間一切亦非斷滅亦非恒常也。此四種見。單複參錯之。有六十四種。西天竺修道者。不悟自心。妄自窺測。各執一見。與道相背。所以謂之外道。如南北東西各爭一路。而不達通暢十虛之當前大路也。此種外道。一經點撥。多有當下知歸者。至於異端。遠離道路。別尋蹊徑。多以小術小數。

策惑於人有墮其雲霧而不知非者。由不識本心。不逢良導故也。世尊初學道時。亦先歷試邪法。然知非。卽捨。乃證菩提。廣以大乘而爲度脫。若執悞不悔。將來難於救度。如來說爲可憐憫者。問曰。卽以佛教言。有講有律。今皆並行。何以稱宗統。而編年也。祥符曰。道之在人心。如水然。水散流爲四瀆百川。而朝宗於海。四瀆百川之水。歸海而成一味。海者。四瀆百川之宗也。故言海而四瀆百川之水統之矣。今夫道一也。而弘道之迹不一。曲順機宜。隨時施設。其立法也。必有所宗。久而日淪於迹。漸失其宗。如水汎濫橫行。而以鄰國爲壑者有之矣。此宗之不明。無以統之也。宗統創述。必徵乎時。因時明宗。大統斯在。是以釋迦文佛雪山成道之時。卽欲一切衆生同證此道。而觀機垂慈。遂有四十九年之教。其教也。一音演說。一音宗。而衆生隨類得解。失佛本懷。故於靈山一花拈出。全體付授。迦葉四十九年之大宗。昭然揭日月而中天之統。垂於後。唯法身大士能契此宗。傳持密護。具體而

徵者。有演佛之經。以爲教焉。有奉佛之儀。以爲律焉。其始也。皆宗之所攝。而其漸也。究妙失宗。遂支離之。教忘其爲詮宗之言。律忘其爲表宗之行。飲水分河。統斯渙矣。時移世異。隱顯微茫。甚而清濁涇渭。溟洋河漢。統斯淆矣。此皆宗統不明。年歷無徵。以致考信無從。滔滔天下。徒深望洋之歎也。佛祖聖賢。以及諸子百家之道。不外一心。心之全體圓澄如海。性海湛然。支流遍注。圓湛性海。妙極一心。遍注支流。散周法界。今之畫佛祖聖賢。及諸子百家。而區別之者。是不曾體究此心量之到極。則處處瞻觀水者。只觀其瀾。而未遡其源。若體究此心量之到極。則處處則佛祖聖賢。諸子百家。歸源又豈有二手。誠能遡源於海。而萬派千波之迴瀾。自消釋矣。今以性海之大宗。統心源之流。注灌四瀆百川。而循流知源。一滴全潮。初無二水杯。益溝洿江淮。濟泗水無不在。卽海無不在。也在明宗。法統攝編。年考實質之今古。而無疑。百世以俟。後起而不惑。甯有教律之不融。儒釋之不合哉。問曰。

從上說法不說心。言道不言性。宗門中事不實說。破今論列。疊疊豈不令人目爲知解宗徒乎。祥符曰。從上無所謂法也。所說之法。因時而已。佛初說華嚴時。豈非稱性而談。直示心體。無如衆生之不能領會也。乃不動覺場而遊鹿苑。因而說四諦法。說十二因緣法。設種種六波羅蜜法。四十九年之間。所說之法。豈有他哉。皆欲衆生了悟此心。修證此心而已。悟證此心。方復本性。末後拈花曰。吾有正法眼藏。涅槃妙心。實相無明。微妙法門。又付法偈曰。法本法無法。無法亦非法。今付無法時。佛法何曾法。是佛不但不說心。亦併不說法也。文殊請佛再轉法輪。佛咄曰。文殊謂吾曾轉法輪耶。心是根法。是塵。兩種猶如鏡上痕痕。盡垢除光始見心。法雙亡性。卽眞祖師西來直指人心。見性成佛。二祖覓心了不可得。與安心竟。後來三拜依位而立。得祖之髓。佛佛祖祖。道豈有二乎哉。六祖從無住生心得悟。於五祖言下。見自本性。開東山法門。大闡般若。未嘗不直示人明心見性也。心性無染。本

自圓成。但離妄緣。卽如如佛。衆生妄緣夾雜。知見橫生。知見立知。卽無明本。未能洞徹心性。先於心性上。想念紛馳。意識卜度。是以祖師爲之直截根源。全提向上。曹溪拈出一相三昧。一行三昧。南岳融爲無相三昧。五宗建立。設大法藥。以治方來。名言斷理路。絕欲人於擬議思量。聖凡情不到處。命根大死一回。然後却活轉來。有自由分。重著精彩。深入宗旨堂奧。方可入泥入水。爲人解粘去縛。使一切人得大受用。一切法得大自在。否則坐在繫淨地上。鑿石火閃電光。久久只成得個自了漢。以不透從上大法。單明空劫。不明目前頭尾。不得相稱也。傳至今日。依稀彷彿者。掠得些小光影。倚一棒一喝爲躲身計。將麻三觔。乾矢橛等。古德機緣。扭捏扯合。聊略成語。謂之爲法。機昧終始。而瞞肝膽。伺者正自不少也。指迷途者。引之歸家。救飄墮者。令其到岸。今何時哉。從上來事。將草昧矣。而不明揭之以性體心宗。表繫之以法脉綱要。將來大事。因緣荒沉。墜於地矣。區區幾句長語。閒言能





遺梵釋之香薰人天而普利七願消融諸見法性  
波瀾誰謂涅槃易曉識情畛域方知差別難明魔  
子披縑每每獅蟲自食明眼落井往往蛙沸爭鳴  
各立藩籬時分牆壘儒指佛老爲異端釋藐天人  
爲凡界道流昧昧妄指青牛度關釋氏區區欲與  
立門角勝甚至一室之內矛盾互施太虛之中塗  
割交受此皆一時之見偶有差殊因而多種之門  
謬開同異豈知佛身充滿法界無非赴感隨緣心  
體圓攝十方總是分光散影三清乃覺皇示見老  
君是迦葉東來大士利生由淨土而肇誕義農聖  
人教世隱儒童而應生孔孟世人豈能遂信古佛  
豈其我欺卽老卽釋卽儒卽道並行而不悖法  
並化以相資兩掌何嫌於十指闔戶原屬乎一家  
到極歸宗一切平等諸方旂鼓毋閃爍以崩騰大  
匠斧斤貴引繩而正直貶剝提持楔出空中之楔  
慎弗槩繫枯樁稱揚贊歎空印鏡裏之空何須泥  
摹死迹額手斯時會心千古八願樹立眞宗眞宗  
淡薄無五味鹽醬之可染指沾脣而希取一餐者

望崖退矣所以面壁老人折齒受毒古德云若欲  
舉揚宗旨法堂前草深一丈今之浩浩不道無禪  
然謂之樹立眞宗則太遠在從今稽首仰祝眞師  
說眞法行眞道毋徇世緣而乘從上仰山乘願不  
遺風穴以涕零大慧秉公直指楊岐之正脉九鼎  
單絲大地含靈命脉所繫萬年一念千秋凡聖統  
緒斯存九願

帝道遐昌

聖皇統馭

當今天子卽如來盛世昌期見在太平眞樂土仁風  
蕩蕩盡率土以同文至治巍巍攝三教而無外振  
古之化未若茲也居今之時不其盛歟無疆有慶  
歷劫石而難窮不朽無爲數塵墨而何限永爲衆  
生長延覆幬十願法輪常轉法住法位世相常住  
天地位萬物育中和霽霽以周流爲臣忠爲子孝  
君父安樂而悅豫各安其生各遂其所世間之法  
輪常轉也法無定相遇緣起宗三世熾然說無間  
歇微塵毫端小大見量出世間之法輪以常轉也



室爲劫今見住賢劫釋迦牟尼第四尊佛也釋迦譜曰劫初王曰民

主生子名珍寶珍寶生好味好味生靜衰靜衰

生頂生乃至師子頰生子名淨飯佛之父王從民主

以來皆利利種姓王種姓也王閻浮洲閻浮此云勝

樹得名南樹部洲也

祥符紀陰曰世典所載太極生兩儀兩儀生四象

太陽少陽四象變化而庶類繁相傳首出御世者

曰盤古氏又曰渾敦氏夫曰太極生兩儀而太極

生於無極又曰盤古生於太荒莫知其始渾敦者

未昭晰之謂也此蓋闕疑存而不論非原始要終

之論也厥後三皇天開於子爲天皇地闢於丑繼

御兄弟各一萬八千歲夫一萬八千歲當滅劫迦

棄佛出世之後矣則所云盤古渾敦者乃人失神

光日月初分晝夜之時也此世界中成就一切皆

屬日月光明日月未有以前自應茫昧莫考增劫

時人皆行十善道佛可不出劫漸滅則善漸少惡

漸多故佛出世慈悲垂化今釋迦佛當滅劫百年

之後化迦婆娑釋迦乃化身佛也娑婆華言堪忍此世界名故爲十方

佛所讚歎有謂三皇一萬八千歲當作一萬八百

歲以當一元自有一元有十二會一元有十二

萬八百年子會生天丑會生地寅會生人至戌會則

閉物而消天亥會則消天而消地子會則又生天而

循環之數非真有一萬八千歲之理者此蓋以千

支陰陽歲時消長之見妄自窺測又烏知人壽最

初皆八萬四千歲乎八萬四千歲由於行十善道

十善道法開之有八萬四千門乃唯心之所感召

也又甯知一念普觀無量劫無去無來亦無住佛

與一切衆生當前一念圓攝無盡乎不了本心沉

淪諸見此我佛所以出世也有謂佛之言多劫者

誕也世固積月而成歲積歲而成世又安知其不

積世而成劫耶苟謂耳目不接而謂之不然上古

之時今亦未嘗親視之也謂之爲誕可乎

大覺璉曰妙道之理聖人嘗寓之於易至周衰先

王之法壞禮義亡然後奇言異術間出而亂俗逮

我釋迦入中土醇以第一義示人而始末設爲慈

悲以化衆生亦所以趨於時也自生民以來淳朴

未散則三皇之教簡而素春也及情竇日鑿五帝

之教詳而文夏也時與世異情隨日遷故三王之教密而嚴秋也昔商周之誥寄後世學者故有不能曉比當時之民聽之而不違則俗與今如何也及其弊而為秦漢也則無所不至矣故天下有不忍願聞者於是我佛如來一推之以性命之理冬也天有四時循環以生成萬物聖人設教迭相扶持以化成天下亦猶是而已矣

周古公亶父所居之地武王因以為有天下之號其先祖后稷為堯農師有功封於邰別姓姬氏傳至文王為西伯仁聖化民于發立為武王伐商而有天下都鎬京

昭王康王子名瑕在位五十一年按證法儀容恭美曰昭

周昭王甲寅二十六年

世尊釋迦牟尼佛降生中天竺淨飯王宮

天竺又作身篤宜云

印度印度者日月之別名也其土賢聖導物如日月明照故名印度天竺有五中天竺居五竺之中東至震旦五萬八千里夏至之日日正中時表晷無影居一四天下之中佛從中道故降生中天竺

佛歷劫修行修三大值然燈佛授記於此劫作佛

於迦葉此云飲光佛世位登補處上生兜率陀此云知足天

名護明大士及應運時至即觀五事一者觀諸衆生熟與未熟

二者觀時至與未至三者觀諸國土何處居中四者觀諸種族何族貴盛五者觀過去因緣誰最真止堪

母為父廣利天人衆已廣如經載乘六牙白象發兜率宮

無量諸天燒香散花隨從侍衛滿虛空中放大光

明普照十方摩耶此云夫人淨飯於眠寤之際見大幻王后

菩薩乘六牙白象騰虛而來從右脇人身見於外

如處瑠璃夫人體安如服甘露願見自身如日月

照心大歡喜菩薩於母胎中處旃檀樓閣廣博妙

嚴如虛空等為諸天人廣作法事具如普曜經言

當此土周昭王二十六年甲寅四月初八日自摩

耶夫人右脇誕生夫人遊藍毗尼園見無憂樹花芳茂舉手攀之菩薩從右脇出生時放大智光明照十方世界地湧金蓮花自然捧雙足一手指天一手指地周行七步目顧四方

曰天上天下唯吾獨尊時兜釋諸天子見菩薩下

生各各願為眷屬聽法供養多有下生王舍城及

諸國土者種種瑞應具如經說

祥符蔭曰佛與衆生同一體性佛既上下獨尊衆

生亦然獨則萬物皆備於我尊則不被物物之所

蒸覆衆生以此廣大性體故不能隨處作主遇緣

即宗受一切蓋覆而不能蓋覆一切佛纔降生便

揭出獨尊二字以示性體之量雪山道成歎曰一切衆生具有如來智慧德相圓證此獨尊也末後靈山會上一花拈出全提密付此獨尊也獨尊之旨全體證得斯佛出世一期事畢矣

考定 先賢紀佛生年互有不同依法顯傳推佛生時則當殷世武乙二十六年甲午依沙門法上答問則當周昭王二十四年甲寅依像正紀當周紀及石柱銘則當周桓王五年乙丑依梁趙伯休於盧山遇弘度律師得佛滅後衆生點記推則當周貞定王二年甲戌依隋經學士費長房歷代三寶記准教律及經史推則當周莊王九年癸巳景德傳燈錄佛祖通載佛祖綱目俱作二十六年甲寅傳法正宗記作周昭王九年甲寅按周昭王元年己丑則甲寅合是二十六年癸巳評法顯傳垂珠河漢未可據法琳翻像正記罕見依憑又謂道安與什造次移陳傳述之過費氏但據莊王時恒星爲驗而云佛生未知恒星別由他事今以初祖入定難足之年當周孝王五年丙寅至孝王丙辰共一百二十六年甲寅以昭王五十三年壬申去孝王五年丙辰初祖入定於穆王五十四年與傳燈通載綱目合徵而可信穆王元年庚辰至壬申合五十三年有作三十六年并五十二年者皆誤唐貞觀十三年勅遣刑部尙書劉德威等問法琳法師何故佛生傳述乖無的可依法琳列陳真妄定昭王甲寅歲生穆王壬申歲滅南山宣律師問天人曰此土互說佛誕不同如何定指天人答曰皆有所以弟子夏傑時生天具見佛之垂化且佛有三身法報二身則非人所能見唯法身大士見之唯有化身普被三千大千世界則有百億釋迦隨人所感前後不定俱在大千之中殷周隨機感化各別法報二身常白湛然不足疑也

別證 周書記昭王卽位二十六年甲寅歲四月八日江河水忽然泛漲井水溢出山川震動有五色光入貫太微亘於西方盡作青紅色太史蘇由占之曰有大聖人生於西方一千年外降教及此昭王卽教鑄石記之埋於南郊天祠前

祥符陰曰佛具三身清淨法身猶若太虛體無來去圓滿報身如望夜月徧界澄輝千百億化身猶水中月應物見形其生也爲度有情出生死海其滅也一期化畢示有涅槃非同幻質之留礙豈合世相以拘墟念證眞常者佛無一時而不生生實無生心融空有者佛無一時而不滅滅豈斷滅於諸說之不一見感應之無方合元後之攸同定古今之一致以西天諸祖年數及達摩來梁之年合推當從周昭王二十六年甲寅四月初八日佛降生爲是周正建子

天龍浴太子身

佛既生已時四天王卽以天繒接太子身置寶几上釋提桓因初利手執寶蓋大梵天王手執白拂侍立左右難陀龍王等於虛空中雨清淨水一溫一涼灌太子身身黃金色三十二相一足安平二

三手指纖長四手足柔軟五手足縵網六足腿滿足七足跌高好八腕如鹿王九手過膝十馬陰藏十一身縱廣十二毛孔生青色十三身毛上靡十四身金滿十八兩腋滿十九身如師子二十身端直二十一牙白淨二十五頰車如師子二十六咽中津液得上味二十七廣長舌二十八梵音深遠二十九眼色如金精三十眼睫如牛王三十一放大光明普照三眉間白毫三十二頂上肉髻

千大千世界 一日月照一四天下爲一世界一千千日月照一千四天下爲一小千世界一千千世界爲一大千世界曰三千大千世界者語互也爲一化佛國土 天龍八部 天列三界欲界天色界卵生胎生濕生化生夜叉勇健神有三種地行夜叉在空中夜叉天夜叉乾闥婆天樂神阿修羅此云非天似天而非天也四趣所攝迦樓羅金翅鳥緊那羅天伎神摩睺羅伽大蟒神八部皆翺衛侍從於佛於虛空中伎樂讚歎不可稱數

發明 佛之出世爲度衆生故放光明感觸有情

淨飯王將太子往詣天寺天像起立禮太子足

宮侍往白淨飯王生太子種種瑞相王即嚴儀仗入藍毗尼園見太子身相好殊異歡喜踴躍前抱太子置於七寶象輦之上與諸臣從隨侍入城經梵天寺時王未識三寶奉事梵天即將太子往詣天寺梵天形像皆從座起禮太子足而語王言大

王當知今此太子天人中尊虛空天神皆悉敬禮云何而令來此禮我王及臣從皆驚異 發明 出佛

三界一切中尊一切天人皆蒙度脫梵天位在初禪未離生死以天視佛皆郡邑長之視天子且天衆多因佛力而得脫障生天亦猶郡邑之尊有不承王命者乎世人不達大道佛天無別是鄰里之氓只知郡邑之尊而罔識九五之貴其分然也

名太子爲薩婆悉達 華言 頓吉

王還宮已集臣衆議定太子名諸婆羅門 此云譯

即共論議而白王言太子生時所有諸瑞莫非吉祥當名太子爲薩婆悉達

阿私陀 此云 仙瞻敬太子相好決定當成佛

淨飯王普勅羣臣令訪多聞有智者占相太子時

有仙人阿私陀以神通力騰空而來見王曰知生

太子見種種瑞相願得瞻見王即抱太子出欲令

禮仙人阿私陀仙急止王曰此是三界天人中尊

云何而令禮於我耶仙人即起合掌禮太子足具

見三十二種相好已忽然悲泣不能自勝王大怪

之仙人歡歡答言太子相好具足若在家者年一

十九爲轉輪王若出家者成等正覺廣度天人然

太子諸相明顯。必當學道。成無上尊。以法利生。廣

度天人。爲世間眼。但恨我今年壽將盡。生無想天。

不觀佛。與不聞經。法故自悲耳。無想天。精研捨定。心身灰凝。屬四禪。

摩耶夫人命終。生忉利天。太子姨。母摩訶波提。乳養太子。如母無異。

太子生滿七日。母摩耶夫人命終。以生太子功德。

上生忉利天。發明太子在兜率天時。自知福德。威重。無有女人堪受禮者。因

觀察摩耶夫人壽命。將終。餘有十月七日。之期。故托之生。是善權方便。諸佛無異。

乙卯二十七年

太子年二歲處王宮

丙辰二十八年

太子年三歲處王宮

淨飯王爲辦童子玩好之具。無不珍備。時舉國人

民。皆行仁惠。五穀豐熟。風雨以時。皆是太子福德

所致

丁巳二十九年

太子年四歲處王宮

戊午三十年

太子年五歲處王宮

淨飯王勅車匿等五百青衣。給侍太子

已未三十一年

太子年六歲處王宮

庚申三十二年

太子年七歲就學。具無師智

凡諸典籍。技藝。天文。地理。皆悉自然。知之不由師

授。發明五地菩薩。一切世間。有學皆悉修習。無不明達。況佛已滿圓覺。成無上智耶。

辛酉三十三年

太子年八歲處王宮

壬戌三十四年

太子年九歲處王宮

癸亥三十五年

太子年十歲處王宮校試

與從弟提婆達多。此云難陀。此云等試。力校射。一

切無與等者。莫不歎服恭敬。

淨飯王集會羣臣。灌太子頂。立爲太子

甲子三十六年

太子年十一歲處王宮

乙丑三十七年

太子年十二歲處王宮

丙寅三十八年

太子年十三歲處王宮

丁卯三十九年

太子年十四歲處王宮出遊觀化

太子啓王出遊觀化到諸城門有所見感歎而回

戊辰四十年

太子年十五歲處王宮

己巳四十一年

太子年十六歲處王宮

庚午四十二年

太子年十七歲處王宮納妃

淨飯王爲太子擇妃有女名耶輸陀羅此云華色顏容

端正智慧才德超過一切王爲納之更增伎樂晝

夜娛侍太子太子納妃不相接近王深疑恐不能

男

辛未四十三年

太子年十八歲處王宮復納妃

淨飯王以太子不近耶輸復廣求賢女乃得瞿曇

明此云太子雖納亦不接近太子默念恐父王以種

嗣爲礙乃以手指妃腹曰却後六年爾當生男妃

遂有娠發明菩薩無欲所以示見妻息不繫世

母合會而生又是本願所致世人毋以俗念懷疑也

壬申四十四年

太子年十九歲二月八日出家

太子欲求出家而自念言當何所遇即復啓王出

遊於四門見生老病死等事復遇見淨居天人所

化作沙門披法服者悲喜交集而作思惟此老病

死終可厭離於是夜子時有淨居天人於窗牖中

叉手白言出家時至可去矣於是諸天捧所乘馬

足超然凌虛逾城而去發大誓願曰不斷八苦老生

病死愛別離冤憎會窮貧困求不得八苦道終不還

也淨飯王思甚遣大臣勸諭還宮者萬計確然不

回廣如發明道可以隨處修佛必從僧中成千

不了家爲苦聚一切業障由之而生出家眞因一切

道柔由之成就世間夢幻轉眼即空思愛會當別離

富貴何能長久。聰明受累。愚蒙無知。生死海中。誰能度脫。佛示出家。斷一切愛。離一切妄。超出天人。決了生死。始從一念。經至成佛。故曰出家。乃大丈夫事。非將相之所能爲。又曰。脚頭只有些兒路。千劫還君一行度。

或謂祥符曰。出家之法。以余觀之。何其悖也。何者。身體髮膚。受之父母。今則髡其顙。刈其鬚。斯不爲毀傷乎。父母者。生我者也。男女居室。人之大倫。不孝以無後爲大。今則背棄其親。動之千里。生絕甘旨。死無蒸嘗。於孝何居。長幼之節。不可廢也。出家則君臣之義。邈然遠之。何以爲忠。斷絕人倫。不顧似續。使舉世而出家。不幾世界空虛乎。欲正人君子。不非之。且求其信。何可得也。祥符曰。子言是也。山僧三十年前。亦嘗言之。今將明以告子。身體髮膚。受之父母。不敢毀傷。固所以爲孝也。今孝如大舜。能保父母不死乎。能保父母死而身體髮膚不毀傷乎。父母死而不能救。父母死而身體滅壞。髮膚毀盡。漠然不以爲念。顧鰥鰥恤一己之身體髮膚。吾未見其所以爲孝也。且所云不虧其體。不辱其親。非僅形骸之謂也。能守其身。克全乎。所以爲

身者。方可謂之不毀傷。出家之法。何爭於鬚髮而必去之。髡其頂者。示已脫俗。不復同於世相。顧形思義務所當務也。子知出家何所爲乎。爲了生死也。生死不學。佛道不能了。佛道非棄捨世緣不能學。故不從淺近起見。而惟深遠是圖。暫違其親。終欲度脫其親也。終欲進親於道。俾吾親得免幻軀報謝之苦。共證眞常淨樂之域也。口體之養。晨昏之奉。孝之小者也。以道事親。度脫其親。孝之大者也。舉世間之孝。又孰有大於出家者乎。子以爲遠君臣之義。是不忠也。而抑知山林中人。晨香夕鐘。祝延北闕。兢兢焉無日不以國王水土之恩爲念。乎且五戒十善。清嚴攝物。所以默扶王化者。又豈子之所得而知者耶。至謂舉世出家。則有世界空虛之慮。何其抱杞人之憂。若是岌岌也。舉世沉淪貪愛。耽著利名。如何得能出家。若能出家。則梵行清白。福德同天。純善無惡。皆爲賢聖。天人豈藉穢欲而生。賢聖則各正性命。子未知夫人天凡聖之由。死生幽明之故。吾又何能一一爲子饒舌哉。從

古至今正人君子不知其幾幾也未之知者自不能不議之疑之已知之者信之尊之而莫能窺測其極致恨知之晚悔不身先之者亦復何限何子言之易易也

太子自以所佩劍斷除鬚髮以七寶衣易纊布僧伽

黎此云割合服之佛僧伽黎表法同也發明世

特書昭佛佛道同不離世相而不即世相也

菩薩入檀特山修道習定以後稱菩薩成

於阿藍迦藍處習不用處定廣如發明佛已歷

斯以然者調攝衆生也故經云以無心意無受行而悉摧伏諸外道先歷試邪法示諸方便發諸異見令

提

癸酉四十五年

菩薩在檀特山修道未出家以前太子書年出家以後菩薩不書年

甲戌四十六年

菩薩在檀特山修道發明正人修邪法邪法亦成正故書修道

初至檀特山習不用處定三年知非便捨

乙亥四十七年

菩薩復至鬱頭藍弗處修道習非非想定

丙子四十八年

菩薩修道習定

丁丑四十九年

菩薩修道習定知非便捨

戊寅五十年

菩薩入象頭山修道行苦行

昭王已卯五十一年

菩薩同諸外道苦行日食麻麥

穆王

昭王子名滿在位五十五年按證法布德就義曰穆

穆王庚辰元年

菩薩修道行苦行

辛巳二年

菩薩修道行苦行

壬午三年

菩薩修道行苦行

癸未四年

景德傳燈錄作三年者誤

菩薩苦行滿沐浴於尼連河受天化女所獻乳糜

降魔發明

菩薩觀察十種義故示見降魔乃至菩薩從兜率降生以及涅槃一一具有十

種深義示見如華嚴離世間品所明

菩薩詣畢鉢樹下天帝化人擷瑞草以藉坐景雲祥風四起紛披天魔念菩薩道成且受折抑率衆作難窮見可怖可欲諸境菩薩泊然不動以指指地地大震魔皆顛仆於是降之

祥符蔭曰魔佛不二只在一心不善用心佛即是魔善用其心魔即是佛魔佛無體唯在當人佛之與魔間不容髮且佛非魔不成一一順逆境界皆爲增上因緣魔非佛不伏可怖可欲諸境伎倆皆窮而定慧慈威何所不攝學道人能入佛入魔佛魔不異卽魔卽佛魔佛兩忘至竟魔佛無依入卽何有其於道也斯庶幾乎

### 菩薩入定成道

菩薩於二月周正建子卽今十二月七日之夕入正三昧至

八日明星出時廓然大悟成等正覺乃歎曰奇哉一切衆生具有如來智慧德相但以妄想執著而不能證得

祥符蔭曰道也者如大王路不離當處初無隔礙

衆生與佛體用俱同觸途成滯乃成衆生行解圓

滿遂成佛果解圓行滿只能如道之量而於道不增毫釐觸途成滯亦只背道之量而道未嘗因之滅失是以佛成道也無所不成而實無所成斯以謂之根本不動智衆生觸途成滯究可就路還家一舉步間便與道體不隔斯以謂之差別妙慧智佛具此智方乘大乘而成正覺若無此智設修於道只證二乘及生淨土而不成佛佛道圓成不離當前一念衆生念念可以成道一念純眞十方坐斷涅槃生死猶若空華聖見凡情俱爲夢幻若來祖師門下正好買草鞋行脚在

阿難陀生梵語阿難陀華言慶喜以世尊成道日生故名

甲申五年

佛初轉法輪度憍陳如等五人

佛成道已思惟已所得法甚深難解唯佛與佛乃能知之今此衆生邪欲所障迷惑不信反生誹謗當墮惡道甚可悲憫大梵天王及諸天等申禮勸請佛受其請曲垂方便遂詣波羅奈國此云江鹿

野苑中爲五人

一阿若憍陳如。此言無知佛之舅氏二。類類此云馬勝佛之家族三。

跋提此云小賢佛之家族四十力迦葉亦名婆數亦佛之舅五拘利太子解飯王之長子乃佛從兄弟也。

宣說四諦苦集三智佛法乃成佛爲佛寶四諦爲法寶五人爲僧寶

也五人證果得法眼淨發明巨夜長寢無人能

前見陳如等初受法味初入法流初登真諦初入聖證在一切人天羅漢之前故具書之

受四天王所奉鉢梵語鉢多羅華言應量器

時有五百商主以蜜麝奉供於佛。佛念過去諸佛

受食儀式用鉢多羅時。四方天王知佛心念。各持

其一鉢奉佛。佛受四王之鉢。累置掌上。按令成一

使四際相見。呪願受食已。即援商人三歸令歸依佛法僧

寶三

乙酉六年

佛在象頭山爲龍鬼等說法

發明佛處聚會爲衆說法難以具書

今書其始初凡近一二以舉一切

或問牟子漢初平時人名曰夫至實不華至辭不

飾言約而至者麗事寡而達者明故珠玉少而實

瓦礫多而賤聖人制七經之本不過三萬言衆事

備焉今佛經卷以萬計言之億數非一人力所能

堪也。僕以爲煩而不要矣。牟子曰。江海所以異於

行潦者。以其深廣也。五嶽所以別於邱陵者。以其

高大也。若高不絕山阜。跛羊凌其巔。深不絕涓流。

孺子浴其淵。麒麟不處苑囿之中。吞舟之魚不遊

數仞之谿。剖三寸之蚌。求明月之珠。探枳棘之巢。

求鳳凰之雛。必難獲也。何者。小不能容大也。佛經

前說億載之事。道萬世之要。太素未起。太始未生。

乾坤肇興。其微不可握。其纖不可入。佛悉彌綸其

廣大之外。剖析其窈妙之內。靡不紀之。故其經卷

以萬計。言以億數。多多益具。衆衆益富。何不要之

有。雖非一人所堪。譬若臨河飲水。飽而自足。焉知

其餘哉。問曰。佛經衆多。欲得其要。而棄其餘。直說

其實。而除其華。牟子曰。否。夫日月俱明。各有所照。

二十八宿。各有所主。百藥並生。各有所愈。狐裘備

寒。絺綌御暑。舟輿異路。俱致行旅。孔子不以五經

之備。復作春秋。孝經者。欲明道德。正人心耳。佛經

雖多。其歸一也。何棄之有哉。

佛爲優婁頻螺迦葉兄弟三人說法并度其弟子一千人

發明佛度弟子無量無數難以盡書今依經說書上首一二以舉其餘

丙戌七年

佛度舍利弗此云目連來救等

舍利弗初師梵志沙然有一百五十弟子於路逢類賴比邱威儀庠序因問師法類賴爲舉諸法從緣生偈一聞卽得初果來至佛所七日達一切法證阿羅漢因同目連歸佛目連聞法經十五日乃得四果二人爲佛左右而弟子舍利弗智慧第一目連神通第一

丁亥八年

佛定出家沙門同稱爲釋

佛告諸比丘有四大河同入海已無復本名同名爲海四族出家學佛道者並稱釋迦弟子以從佛生育法身成就道力也四河東恒伽南新頭西婆叉北私陀四族西竺四姓

戊子九年

佛度摩訶迦葉證阿羅漢果梵語摩訶迦葉此云飲光氏以身光蔽衆得名

佛在拘耶尼國爲婆陀和等說般若長者須達與太子祇陀共作精舍供佛發明經實重佛

故書

舍衛國有大臣曰須達巨富好施賑給貧獨時號給孤長者因娶兒婦到王舍城護彌長者家見其驢驢辦具大設供養躬自執勞經理事務將以請佛及比丘僧須達聞佛僧名歡然起敬心悅豫問護彌言何名佛僧具答所以須達感念敬企即求見佛一瞻相好及聞妙法身心開朗成須陀洹也初果長跪問佛舍衛城中聞法易度更有人否佛言人多信邪難染正教須達白佛唯願垂慈屈臨舍衛使彼衆生除邪就正佛告須達出家之法與俗應別彼無精舍云何棲息須達白言弟子能起願見聽許但不知法式願得偕一弟子共往勸示佛默然允可命舍利弗同往到舍衛城案行諸地無可意處唯太子祇陀有園其地平正其樹鬱茂不遠不近正得處所須達謹白太子具陳其意太子云我此園林用以遊觀何所乏少須以相買須達再三殷勤敬以禮懇太子以其情摯難却謂呼價高當不能買語須達言汝若能以黃金布地令間無空者便當相與須達曰諾敬依價命太子言

我戲卿耳。須達白言。太子不應戲言。乃以象負金。滿八十頃。太子念言。佛必大有道德。能使斯人輕寶。乃爾乃捨園中樹木。并起門樓。共以奉佛。須達與舍利弗。圖度起立精舍。以妙旃檀。為泥塗。佛房地十二浮圖。七十二講堂。三千六百間房。五百樓閣。佛告阿難。今此園地。須達所買。林樹門樓。祇陀所施。當號曰祇樹給孤獨園。長者後生兜率陀天

已丑十年

佛在柳山為純貞陀羅王等說法

庚寅十一年

佛在穢澤為阿拙摩說法

佛昇忉利天為母說法

留夏九十日。優填王。思甚命匠。以上妙旃檀。雕佛形像。事之。及佛從忉利天下。像亦出迎。佛三呼像。三應。佛曰。汝於當來。作大法事。然無為真佛。實在已躬波斯匿王。聞優填王雕旃檀像。乃召巧匠。寫紫磨金。成如來像。佛記之曰。若有衆生。於佛滅後。造立形像。種種供養。與佛無異。是人來世。必得念

佛清淨三昧以至成佛

謹按旃檀佛像在西土一千二百八十五年。來東土

龜茲六十八年。涼州十四年。長安一十七年。江南一百七十三年。淮南三百六十七年。復至江南二十一年。汴梁一百七十七年。北至燕京。居聖安寺。十二年。北至上海。大儲慶寺。二十年。南還燕宮。內殿居五十四年。元丁丑歲三月。燕宮火。尚書石抹公迎還聖安寺。居五十九年。至元十二年乙亥。遣大臣孛羅等四衆。備法駕。仗衛。晉伐奉迎。萬壽山仁智殿。丁丑。建大聖萬安寺。二十六六年己丑。自仁智殿奉迎於寺之後殿。計自優填王造像之歲。至元延祐三年丙辰。凡二千三百有七年。至

皇清  
今上康熙二十八年己巳見供  
大內月二千六百八十年十

祥符蔭曰。此像教之緣起也。及今二千餘年。而衆生親相莊嚴。利益無邊。不可思議。謂非佛之無緣慈攝。悲願深重。能如是乎。若能瞻仰。取足證得。已躬無為真佛。清淨三昧。方信佛身充滿。普見不動。而衆生與佛。不作兩概。不隔纖毫矣。

辛卯十二年

佛還摩竭國為弗沙王等說法

壬辰十三年

佛為彌勒說修行本起經

癸巳十四年

佛歸王宮爲父王說法王大信證令宮人受齋戒法  
佛成道十年父淨飯王思一相見遣梵志優陀耶  
往迎還宮優陀禮佛具白王意見佛威德爲天龍  
四衆所尊遂求出家聞法便證羅漢佛告優陀佛  
本出家誓得成道還度父母今已道成必當還國  
但於國人有所感動方堪信化汝今已得神足可  
先歸見神變却後七日佛當還宮優陀受勅從空  
而還往到本國見種種神變王及臣民莫不驚喜  
知佛當來卽勅國中嚴潔道塗盛陳儀仗如轉輪  
王千乘萬騎出破四十里奉迎世尊佛及弟子整  
衣持鉢發來王城釋梵四天聞佛遠國皆來侍送  
四天前導梵天侍右帝釋侍左諸比邱衆皆隨佛  
後八部天龍香華幢幡布滿空際諸天伎樂節奏  
熙和佛適進路三千國土六反震動百歲枯樹皆  
生華實久涸溪澗自湧甘泉王遙見佛於大衆中  
如星中月如日初出相好嚴身晃如金山悲喜禮  
佛共相慰問大臣百官皆稽首禮擁迎入城足蹈  
門闕地爲大動天雨衆華樂器皆鳴國中人民所

有疾苦一切皆息婦女珠環相樣作聲地中寶藏  
自然發見懷異心者皆共和同懷妊母人身心安  
樂產端正子百鳥異獸相和欣鳴蒙其光潤皆脫  
業障地獄休息餓鬼飽滿一切衆生皆沾利益佛  
入王宮爲父說法王得證道耶輸瞿曇禮佛受戒  
羅雲佛之子也稽首禮佛奉佛印環佛語父王及諸臣  
曰此吾之子緣吾化生無復懷疑也宮人大小咸  
受戒法及八關齋

明教嵩曰聖人之道以善爲用聖人之善以孝爲  
端爲善而不先其端無善也爲道而不在其用無  
道也用所以驗道也端所以行善也行善而其善  
未行乎父母能溥善乎驗道而不見其道之溥能  
爲道乎是故聖人之爲道也無所不善聖人之爲  
善也未始遺親親也者形生之大本也人道之大  
恩也唯大聖人爲能重其大本報其大恩故方其  
成道之初登天先以道諭其母氏應命還其故國  
爲父說法而其國皆化聖人可謂與人道而大順  
也養不足以報父母以德報之德不足以達父母

以道達之嗚呼可謂至矣

靈巖儲刻孝經序或曰孝經爲儒家開宗明義之書沙門釋子自有五千四十八卷百韋陀典何取於越俎爲也弗也世出世間舍孝無從矣我沙門嘗遭滅物絕倫之謗蓋沙門或舍來耜或舍舟車負販兒童時或一字不到眼或長而茫失卽天資近古懵無證據其舍丹鉛服三事禱者始不過舉鄒魯之聖經爲富貴之先導經云愛親者不敢惡於人敬親者不敢慢於人又云言滿天下無口過行滿天下無怨惡不體聖心則章句而已矣我沙門半月半月誦梵網心地品一則曰慈悲心孝順心二則曰孝順心慈悲心非慈悲孝順則非正語正見自非正語正見安能生一切衆生正語正見哉世尊道成先度父母古人生五十方知四十九年之非弘儲明年甲辰六十較古人十年而孔子七十二制孝經告備於天假我數年庶幾言立則弘儲不敢自必也

王遣其族五百貴子從佛出家

佛從弟阿難白佛願垂剃度佛令著袈裟衣成僧

寶已次第禮諸沙門至優波離心自念言是我家

僕不能爲禮佛告之曰學道唯論前後不問尊卑

佛法猶如大海悉受萬川四流不避汙淨宜棄自

大折驕慢幢阿難受誨心淨如空稽首作禮天地

大震衆會同歎善哉善哉爲道等心除自高意

佛往摩竭提國

佛爲摩竭提國瓶沙王說法王以竹園精舍供佛

佛勅竹林住持舍利弗統之靈山住持大迦葉統之

佛勅目連取羅雲出家即羅睺羅佛之子也

甲午十五年

乙未十六年

佛復還王城

爲釋種說法八萬四千人皆證初果

丙申十七年 丁酉十八年

戊戌十九年

佛還王宮省父病四天王等赴喪

淨飯王臥病思見佛及羅雲等佛在靈鷲山天耳

遙聞知父命將終。告勅阿難羅雲等。父王淨飯。今得重病。應往覲省。卽放光明。光照一切。及王身。王蒙光觸。如旃檀風吹。悅身心。患苦頓息。知佛當來。見斯光瑞。王見佛來。敬意踴躍。不覺起坐。佛告父王。莫復愁悵。父王道德純備。無有缺減。命雖欲終。當生淨域。時佛出金色臂。伸手舒光。著王心上。王合掌心。禮於佛。便爾命終。諸釋衆臣。以衆香汁。沐浴王身。飾以白氎。及諸繒帛。斂以金棺。奉置七寶莊校獅子座上。燒香散華。垂覆眞珠羅網。佛共難陀於座之前。肅恭而立。阿難羅雲居棺之後。卽時三千大千世界。六種震動。欲界一切諸天。與無數百千眷屬。俱來赴喪。四方天王。統諸鬼神龍衆。百千萬億伎樂。如雲俱來。赴喪。皆共發哀。舉聲啼哭。時難陀等。白佛長跪。願欲擔棺。佛念當來世人。兇暴不孝。父母不報育養之恩。爲是之故。躬行法化。自欲擔於父王之棺。時四天王。竊共思議。佛爲三界中尊。一切之父。雖躬行化。云何擔棺。俱共長跪。同白佛言。我等是佛弟子。從佛聞法。成須陀洹。

我曹宜代世尊。擔父王之棺。佛聽許之。四王肩棺。舉國悲仰。佛執香爐。在棺前導。威光益顯。如萬日照。臨詣於墓所。靈鷲山中有千羅漢。乘空而來。稽首白佛。欲勅何事。佛勅往大海渚。取妙旃檀。以爲香薪。香薪積已。金棺置上。舉火焚之。佛爲四衆說法。令出生死。遠離欲火。悟世無常。發心求道者。不可勝計。爾時諸王各持五百乳瓶。以用滅之。競共敗骨盛置金函。以起塔廟。而供養之。淨飯王生淨居天明教嵩終孝章曰。父母之喪。沙門服衰經則非所宜。當服大布。過斂則以時往。其家送葬。或扶或導。三年必心喪。靜居修行。以贊父母之冥。遇喪期忌日。伏臘必營供祀。誦居師之喪。必如喪其父母。稟戒十師之喪。則有降殺。觀佛泥洹之時。大衆撫膺泣血。吾徒臨喪。可不哀乎。

宗統編年卷之一

宗統編年卷之二

佛紀下

穆王己亥二十年

佛在六欲天說大集經

如來成佛十六年知諸菩薩堪能住持大乘法藏

即於欲色二界中間大寶坊內說大集經

祥符蔭曰四十九年三轉法輪五時八教總不出

剎那際三昧中如說法華六十小劫時會聽者謂

如食頃佛佛道同今古不異又豈可以世間時數

情量測定之耶諸所說法本不局於時難盡以年

推就經傳所載者紀之以槩其餘學者當默識心

通思過半矣

庚子二十一年

佛住世說法度生

發明佛住世四十九年無非說法度生其間竺乾遠隔時代渺茫難以定稽年次之下通書說法度生以槩之其有關於宗統者總於末後書列

辛丑二十二年

佛住世說法度生

仁王般若三十八年說摩訶般若靈山八觀說

法華經

佛始制戒律命優波離綱紀大眾

佛命阿難爲侍者發明慶持法得人也

壬寅二十三年 癸卯二十四年 甲辰二十五年

乙巳二十六年 丙午二十七年 丁未二十八年

戊申二十九年 己酉三十年 庚戌三十一年

辛亥三十二年

佛姨母大愛道即摩訶波提求出家

佛還迦維衛國大愛道稽首曰佛言我聞女人精

進亦可得道今我敬信願得出家受持法律以學

於道佛止之曰無以女人入我法律而出家也若

如此者清淨梵行當必不久正法住世即易衰微

大愛道再三哀求佛不聽許阿難見而憫之稽首

代懇且曰大愛道多有善意佛初生時躬侍養育

今求出家何不聽許佛曰我非不知大愛道於我

有恩今我成佛於大愛道恩亦不淺以從於佛得

受五戒歸依三寶信道見諦此之恩德非世可比

但聽女人出家則於佛法有所障礙譬如稻田莠  
稗叢雜必敗良苗女人出家清淨大法不久衰弱  
假使必求出家者須令盡壽奉行八敬之法譬如  
防水善治堤塘勿令漏失其能如是可入律法大  
愛道恭喜奉行遂度出家後證阿羅漢果 佛記正  
法當千  
歲興盛以度女人故  
至五百歲而漸衰微

壬子三十三年	癸丑三十四年	甲寅三十五年
乙卯三十六年	丙辰三十七年	丁巳三十八年
戊午三十九年	己未四十年	庚申四十一年
辛酉四十二年	壬戌四十三年	癸亥四十四年
甲子四十五年	乙丑四十六年	丙寅四十七年
丁卯四十八年	戊辰四十九年	己巳五十年
庚午五十一年		
辛未五十二年		

佛付囑摩訶迦葉傳持宗統并勅阿難副貳傳化

佛在靈山會上有大梵王以金色波羅花獻佛佛  
陞座拈起示衆是時衆皆默然摩訶迦葉破顏微  
笑佛顧而命之曰吾有正法眼藏涅槃妙心實相

無相微妙法門不立文字教外別傳付囑摩訶迦  
葉復至多子塔前命摩訶迦葉分座令坐以僧伽  
黎付之并勅阿難副貳傳化無令斷絕而說偈曰  
法本法無法無法亦法今付無法時法法何曾  
法復告之曰此金縷僧伽黎衣傳付於汝轉授補  
處至慈氏佛出世迦葉承勅稽首敬受

安隱忍曰道大同而弘道之迹不能同道絕同而  
合道之符不能異不能同也故先聖之建立有差  
不能異也雖變變化化而不出從上相承之法眼  
所謂宗旨也佛不云乎吾有正法眼藏涅槃妙心  
實相無相微妙法門付囑摩訶迦葉夫涅槃妙心  
即吾人本具之廣大心體也正法眼藏即雙明雙  
暗同死同生之金剛眼也心即眼眼即心實相而  
無相者也如國之印璽然無前際無後際無中際  
一印而文理備焉世尊非此眼不能辨迦葉之一  
笑迦葉非此眼不能契世尊之拈花乃至四七二  
三授受之際非此眼不能驗其淺深偏全之候所  
謂降詠同時人境俱奪名言斷理路絕壁立萬仞

而從上佛祖要人於此壁立萬仞。聞見智識所不到處。豁開向上。故終日言而未嘗言也。非無言也。言之中無言也。及其弊也。知解橫生。故不得不變。而爲機鋒。爲棒喝。又其弊也。不得不變而定宗旨。宗旨定。若三代之禮樂備焉。雖千聖繼出。不能易矣。夫言論之弊也。弊於知解。而棒喝之弊也。弊於亂統。故從棒喝悟者。知亂統之病。而建同喝。四喝料簡立要。函蓋截流等綱宗。臨濟雲門是也。從機語悟者。知知解之病。而建四禁五位六相種種三昧門等綱宗。曹洞潯仰法眼是也。以要言之。不出實相無相無相實相之法。印所謂變變化化而合道之符。不能異者。此也是故符合雖三祖之惡疾。不得不以衣鉢付之。而符之未合。雖首座之脫化。洛浦之聖簡。猶在點額之例。正法眼藏果易言哉。惟其不易言也。故先聖秘之。而聽其悟耳。祥符陰曰。四十九年。隨機設化。方便接引。四衆純熟。末後一花拈出。大事了畢。亘古亘今。徹頭徹尾。一會靈山。儼然未散。豈虛語哉。

佛付囑國王大臣護持正法

祥符陰曰。佛法廣大如太虛空。攝受成就一切。非一切之所能攝受。成就國王大臣。有一不從佛法。因緣中來者乎。有一非佛法之所攝受。成就者乎。則佛法之能護持國王大臣。國王大臣之不能護持佛法也明矣。若然。靈山會上。佛何以付囑國王大臣護持正法乎。佛付囑國王大臣護持正法者。攝受成就國王大臣也。爲國王大臣計也。蓋國王大臣宿植善根。今乘權位。護持正法。則近善知識。邪僻不興。民知正道。聖化自端。上行下效。而天下不治者。未之有也。是佛因其地位而接引之。使不致於善根退失。福壽淪墜也。國王大臣能體佛心。融通大道。不離一心。修十善業。制御天下。顯正摧邪。斯真不負靈山付囑者也。若不達大道。邀福營爲。藉以資培善果。則可謂能得佛當日付囑之旨。則未也。人能弘道。國王大臣當自護持其正法。而佛法自在其中。若謂興隆三寶。折伏魔外。是護持邊事。是以世諦測正。徧知淺之乎。視護持佛法矣。

佛法何事不深明佛法而能護持佛法者未之有也。凡爲國王大臣者其審思之。

穆王壬申五十二年景德傳燈錄作五十二年者誤

佛示涅槃梵語涅槃發明華嚴經云如來應正等

故示教涅槃所謂示一切行實無常故示一切有爲非安隱故示大涅槃是安隱處無怖畏故以諸人天樂著色身爲見色身是無常法令其願住淨法身故示無常力不可轉故示一切有爲不隨心住不自在故示一切三有皆如幻化不堅牢故示涅槃性究竟堅牢不可壞故示一切法無生無起而有聚散壞相故諸佛世尊作佛事已所願滿已轉法輪已應化度者皆化度已應受記前成記前已法應如是入於涅槃

佛至拘尸那城此云角城告諸大衆吾今欲入涅槃以

手摩胸告衆曰汝等善觀吾紫磨金色之身各各

瞻仰取足勿令後悔若謂吾滅度非我弟子若謂

吾不滅度亦非我弟子時百萬億衆悉皆契悟文

殊請佛再轉法輪佛咄曰文殊吾四十九年住世

未曾說一字汝請吾再轉法輪是吾曾轉法輪耶

遂往黑連河側娑羅雙樹下從其面門放大光明

徧照三千大千世界十方六趣一切衆生遇斯光

者罪垢消除種成佛因爰及天人龍神羅漢大士

情與無情俱來勸請求莫涅槃佛受純陀最後之供已說偈曰諸行無常是生滅法生滅滅已寂滅爲樂乃右脇累足泊然宴寂摩耶夫人從忉利天來佛復起爲說法特示雙足化婆耆摩訶迦葉最後至出雙趺示之

祥符蔭曰如來不出世亦無有涅槃譬澄空月影臨萬水水清月見水濁月隱衆生心淨佛即出世衆生心垢佛即涅槃又如日月照四天下東方出時西方隱沒非日月遂隱沒也如來於此土衆生化緣已畢示見涅槃於他方世界隨緣度生未嘗涅槃也局於凡情聖見均之不見如來故佛以紫磨金色之身炳示大衆令其不離當前了悟真際一衆機熟悉契無生斯又衆生心垢佛乃降生衆生心淨便涅槃也故曰佛不住佛名眞涅槃

佛三昧此云正定火闍維梵化金色身天人分請舍利起

塔供養梵語舍利此云骨身舍利者佛從最初發

凝望而成其色不定小大圓直如露如雲如珠如散又因禪定行道願力三者所薰故有定動及隨願所見之異堅固如金剛水火不能焚溺代代高僧凡三學闡揚者皆有之俱曰堅固子非若佛之光明靈變

也

佛示寂已。天人弟子。競以香薪茶毗。火化也之香薪

燼後。今棺如故。爾時大眾。即於佛前。以偈頌曰。凡

俗諸猛獸。何能致棺。熱請尊三昧火。開維金色身。

於時金棺從座而舉。高七多羅樹。多羅又云貝多。此云岸葉。可書

十九尺。往反空中。化火三昧。火三昧者。須與灰

生得舍利。此云堅固子八斛。四斗迦維衛等八大國王。

嚴整四兵。各求舍利。天龍亦來求分。供養乃分爲

三分。一分與諸天。一分與龍王。一分復分爲八分。

與八國王。俱起七寶塔。供養後。阿育王以阿闍世

王所供塔中舍利。分造八萬四千寶塔。散布閻浮

洲。經傳有作佛壽八十癸酉年十二月十五日。涅槃今從祖錄考定。王申年二月十五日。

別證。周書記穆王五十二年。王申二月十五日。平旦暴風。忽起。損舍折木。地動天陰。西方白虹

十二道。太史歷多占曰。西方聖人卒矣。又穆王之世。數見西方光氣。亘天

祥符蔭曰。至道絕迹。妙法離言。眞佛無爲。不墮諸

數。圓周法界。豈直誕於王宮。普見羣心。甯眞謝乎

雙樹。但以羣萌長寢。爰施無緣之慈。百億分身。乃

應婆娑之界。重願弘慈。憫茲忍土。十方諸佛。所共

讚揚。是以降神天竺。示域中之尊。標號釋迦。爲四

生之父。脫屣儲宮。捨金輪如擲芥。修行苦行。攝邪

外以歸眞。道既大成。功斯普利。三千界內。無不被

其光明。十法界中。皆盡蒙其教化。天龍攝受。神鬼

歸依。情與無情。俱承度脫。未來過見。一念了知。謗

毀稱揚。平等普攝。非天中極。天聖中至聖。何以至

於斯焉。然此一佛化儀。尙屬千燈影見。若也圓尋

覺海。則眞湛寂。無邊無邊性海。佛與羣生。分量不

殊。常住眞心。羣生於佛。絲毫靡間。若能就體而求

自然。當下具足。眞俗不異。凡聖一如。其在孔氏之

言曰。在明明德。卽佛之所謂自覺也。在新民則覺

他也在。止於至善。則覺行圓滿也。深淺雖殊。其致

則一。故曰。佛非有他。但盡此心量耳。

五臺居士陸光祖曰。佛道廣大。不獨尊而敬之者

生大福。卽輕之詆之。侮之讐之者。亦終將得益焉。

如入栴檀之林。或躡蹴焉。或斬伐焉。皆染香氣以

出也。又曰。余世業儒。誦孔子之言甚謹。嘗檢國朝

故事。竊見太祖高皇帝。太宗文皇帝。所以尊崇佛典。特

異既刻大藏經板貯兩京又數出內帑金印造數千部頒天下郡邑名藍延高僧講演而屬四民共聽焉余始認譏然疑佛氏之教有出吾儒上哉不然聰明聖智莫如我二祖何信之之篤如是試取內典觀之則廣大無際如望溟渤而莫得其涯溪山久之稍窺端倪則如昏衢之覩日月而仰其燭照也又久之會文歸已稍獲其用則如布帛菽粟不可一日闕也然後知二祖之見淵哉遠矣夫自儒道而下九流百氏之興禮樂德藝之徵性命之精事物之粗方內方外世出世間之法大藏靡不具焉凡至理密義諸家累千萬言而不能發者以一言發之瞭如也佛法之淺淺勝他教之深深詎不信夫

幻寄瞿汝稷曰世之誕佛者皆比於范縝之神滅者也而神滅非聖人所立教也夫神也者妙萬物而爲言者也卽心也卽道也範圍天地曲成萬物聖人所以參贊化育者也是豈形之所及也惟聖人爲能窮神而庸愚固未嘗亡特不知其卽道耳

故曰百姓日用而不知不知則一徇於形於是遺範圍天地之廣大而自狹棄曲成萬物之微妙而自穢終日役役不過耳目口腹聖人愍焉故諭之曰形而上者謂之道形而下者謂之器謂之道復慮人之自畫而高遠之謂非已所及也故曰利用出入民咸用之謂之神終身由之而不知其道堯之所以堯窮此神也桀之所以桀昧此神也是神者溯之無始推之無終豈形生而始生形滅而隨滅哉形有盡而神無窮故曰原始反終故知死生之說精氣爲物遊魂爲變是故知鬼神之情狀而縝之言曰形卽神也神卽形也形生而神生形滅而神滅藉如縝言操則存者形存歟舍則亡者是亡歟出入無時莫知其鄉百骸九竅六臟誰能然歟心不在焉視而不見夢說築巖豈目所矚處今而憶昔在吳而知越何形之能然縝亦不思甚矣履帝武敏而生棄杜伯關弓伯有爲厲墳典所載未易悉舉是皆迦文之所倡乎故縝之言形卽神也形滅神滅非聖人所立教也君子之所棄也是

使人重形而遺神。淪胥以溺者也。何以言之。謂形卽神。則舍形無我。舍形無我。則凡形之所欲。皆我之所欲。而以禮義維之。是強也。是外鑠也。神不滅而謂滅。則堯桀均盡。顏跖均生。均生則縱佚者自適。均盡則好修者徒勞。於是示之以餘慶。惑之以百殃。則見以爲茫昧而難徵也。揭之以仁義。則以爲仁義。撓人心。揭之以性善。則以爲性惡。則以爲善惡混。幾何其能信之。於是聿皇得喪。微纖貪毒。惡積而不可掩。罪大而不可解。沉淪昏衢。莫能自出。旋復流浪爲苦。無已如來。智入三世。圓應衆機。五時說法。海墨不可勝紀。其流入震旦者。纔海墨之一滴。其語報則徵之三世。其語性則盡之妙覺。知三世之報。則堯桀不均。盡知性覺之妙。則性善無所疑。故下焉者得其說。必惕於三世之報。惡不俟懲而革。善不俟勸而行矣。上焉者得其說。則妙契性善之真。居仁由義。若耳聽目視。何有撓吾心哉。是以聖賢之教。得如來而大暢。惜哉。續之不講。謂神滅形滅。而誕佛也。惟如來之教。能窮此神之

廣大微妙。語其大。則天地者無盡。大海之一漚耳。元會運世者無盡。時劫之一瞬耳。語其妙。則無聲無臭。此之空諦也。精一執中。此之尸波羅蜜也。一言演爲無量義。竟古今而推之。莫能竟也。儒墨之是非。黃老之祕密。與夫百家之雄辯。一言而蔽之。而有餘也。佐堯而堯佐舜。而舜父以之。而慈子以之。而孝護世以之。而護諸衆。生帝釋以之。而離愛梵天以之。而勝慧二乘以之。而迴向眞乘。菩薩以之。而證入妙覺。四聖六凡。無根不被。故其言必至於海墨也。河沙妙德。罔越窮神。故其要必歸於一乘也。世出世法。莫不竭盡而無餘矣。是以世之興王。莫不尊尙列代名卿宿儒。或行峻一世。或文雄百代。龍翰鳳雛。之彥。蘭薰雪白之賢。歸命法流。願眞靈後者。數之更僕。未易終也。考其人之操履。事業。皆彪炳史冊。故未嘗以嗜此而懷世間法也。使道德之蘊。不出於六藝性命之微。無過於諸儒。則彼固皆含六藝之腴。入諸儒之室。何肯悅諛辭。而釋微言。就僻行。而鑿大道乎。是棄紹紆而求短褐。

之類也。非人情矣。嗟乎。四大假合也。百年日暮也。昔之所歷於今。奚存。今之所存。又何可恃。至愛終

離大業終。棄神之未窮。茫茫安託。適百里而不得其所。託則皇皇焉。浩劫之適何翅。百里七趣紛還。所託非定。徂百年之得喪。而輕浩劫之流浪。可不謂大哀耶。故濟我於一時者。不及濟我於一世者。也。俾我一世得所安者。不如使我浩劫得所安者。也。求濟我於浩劫者。非如來之教。而何姑未敢論。受果登地。第能沉瀾覺海。少漑餘潤。則契根根塵。靡不周徧。法界故不獨可以窮神。亦可以窮形色之原矣。於是纏蓋不能縻。陰陽不能控。修兮其翔泊兮。其集得固如也。喪亦如也。未遊焉者。不獨喪之爲喪。既遊焉者。不獨得之爲得。念念滅盡。而非斷古今。不異而非常。畢化沙界。而壹無事。默然宴坐。而萬行嚴。往來生死。未嘗生死。出入淨穢。初無淨穢。豈將來而後證。審於今而不誣。是以究曠劫於刹。那拔九類於半偈。莫尚如來之教矣。

佛說諸經宗旨

發明

一代時教。難以周知。而偏舉也。其有當於宗統者。節書之。

而諸家拈頌中稍平易者。書一二以附焉。

經題八字

僧問地藏。琛以字不成。八字不足。未審是甚麼字。或曰。看取下註脚。幻寄曰。有以滙和二字釋此者。是以柏樹子話爲三界。唯心同一鼻孔。座主見也。

徑山杲頌曰。以字不成。八字非。樂迦羅眼。不能窺。一毛頭上。重拈出。憤怒那吒。失却威。

金剛經云。無我相。無人相。

南嶽諸頌曰。我相。人相。恁底模樣。鼻直眉橫。何曾錯向。

圓覺經云。居一切時。不起妄念。於諸妄心。亦不息滅。

住妄想境。不加了知。於無了知。不辨眞實。

徑山杲頌曰。荷葉團團。似鏡菱角。尖尖尖。似鐘風吹。柳絮毛毳。走雨打梨花。蛺蝶飛。

一切障礙。即究竟覺。

雪堂行頌曰。枯樹雲充。葉凋梅雪。作花聲。柯成木響。無雪。喚冬瓜。長天秋水。孤鷺落霞。

南嶽諸頌曰。握則爲拳。開則成掌。放下手來。是一是兩。

楞嚴經佛謂阿難。見見之時。見非是見。見猶離見。見不能及。

不能及。

海印信頌曰。見不及處。江山滿目。不覩纖毫。花紅柳綠。白雲出沒。本無心。流水滔滔。登盈縮。

一人發眞歸元。此十方空。皆悉銷隕。

尼無著頌曰。一人發眞歸元。十方虛空。銷隕。試問楊岐。栗逢何似雲門。餽餅。

諸可還者自然非汝不汝還者非汝而誰

天目蓮頌曰不汝還兮復是誰殘紅落滿釣魚磯日斜風動無人掃燕子銜將水際飛咄咄是無等等呪

阿難復白佛言若此妙明眞淨妙心本來徧圓如是

乃至大地草木蠕動含靈本元眞如卽是如來成

佛眞體佛體眞實云何復有地獄鬼畜生

南嶽儲頌曰開田一畝贏來日久種麻得麻種豆得豆

佛告阿難吾不見時何不見吾不見之處若見不見

自然非彼不見之相若不見吾不見之地自然非

物云何非汝

雪竇顯頌曰全象全牛譬不殊從來作者共名模如今要見瞿曇老剎剎塵塵在半途

天童悟頌曰空山不見人但聞人語響返景入深林復照青苔上

若能轉物卽同如來

白雲端頌曰若能轉物卽如來春至山花處處開自有一雙窮相手不曾容易舞三臺

法華經云是法住法位世間相常住

朴翁銛頌曰世間相常住黃鸝啼綠樹眞個可憐生動著便飛去

諸法從本來常自寂滅相

有僧誦此忽有疑曰夕不置偶聞鶯聲頓然開悟遂續前語爲偈曰諸法從本來常自寂滅相春至百花開黃鸝啼樹上

如來如實知見三界之相無有生死若退若出亦無

在世及滅度者非實非虛非如非異不如三界見

於三界如斯之事如來明見無有錯謬

圓極峯頌曰峽嶺峰前神禹碑字青石赤形模奇無目仙人機一見便應撫掌笑嘻嘻雲暗蒼龍化萬般就中一句是正頌有人檢點得出許你具一隻眼

諸經公案凡聖之所同然曰公案

發明如來說法皆方便隨機顯

密善攝其間有現面全提因事直指不落言詮不涉意解者節書之爲公案諸家拈頌附焉

佛一日陞座大衆集定文殊白椎曰諦觀法王法法

王法如是佛便下座

芭蕉微拈曰忙忙者市地普天二三峰藏拈曰人人都向世尊求陞座前會取孟已歸了也

雪竇顯頌曰列聖叢中作者知法王法令不如此斯會中若有仙陀客何必文殊下一椎

佛因黑氏梵志獻合歡梧桐花佛召梵志放下著梵

志放下左手一株花佛又召梵志放下著梵志又

放下右手一株花佛又召梵志放下著梵志曰吾

今兩手俱空更教放下個甚麼佛曰吾非教汝放

捨其花汝當放捨外六塵內六根中六識一時捨

却無可捨處是汝放身命處梵志於言下悟無生

忍法

佛拈隨色摩尼此云如意珠問五方天王此珠而作何色

時五方天王互說異色佛藏珠復舉手曰此珠作何色天王曰佛手中無珠何處有色佛曰汝何迷倒之甚吾將世珠示之便強說有青黃赤白色吾將真珠示之便總不知時五方天王悉自省悟

佛因五通仙人問佛有六通我有五通如何是那

一通佛召五通仙人仙人應諾佛曰那一通你問我

翠巖芝曰五通如是問佛如是答要且不會那一通徑山杲曰今時有一種弄泥團漢往往在那一通處錯認定盤星

●答經

佛因菩眼菩薩欲見普賢不可得乃至三度入定偏

觀三千大千世界覓普賢不可得而來白佛佛曰汝但於靜三昧中起一念便見普賢於是普眼菩薩纔起一念便見普賢向空中乘六牙白象

佛一日勅阿難食時將至汝當入城持鉢阿難應諾

佛曰汝能持鉢須依過去七佛儀式阿難便問如

何是七佛儀式佛召阿難阿難應諾佛曰持鉢去

葉庵謙頌曰迦葉父子情步步隨流水他日問師兄利竿扶不起

佛因自恣日文殊二度過夏迦葉欲白椎擯出纔拈

椎乃見百千萬億文殊迦葉盡其神力椎不能舉佛遂問迦葉你擬擯那個文殊迦葉無對

城東有一老母與佛同生不欲見佛每見佛來即便迴避雖然如此回顧東西總皆是佛遂以手掩面乃至十指掌中皆是佛

佛因文殊至諸佛集處值諸佛各還本處唯有一女人近於佛坐而入三昧文殊乃白佛云何此人得近佛而我不得佛告文殊汝但覺此女令從三昧起汝自問之文殊繞女人三匝鳴指一下乃托至梵天盡其神力而不能出佛曰假使百千文殊亦出此女人定不得下方過四十二恒河沙國土有罔明菩薩能出此女人定須與罔明大士從地涌出作禮佛佛勅罔明出罔明却至女子前鳴指一下女子於是從定而出

五雲遙日不惟文殊不能出此定但恐如來也出此定不得圓悟勤頌曰大定等虛空廓然誰辨的女子與雲靈鑪令何修直師子奮迅兮搖蕩乾坤象玉同旋兮不資餘力執勝執負誰出誰入雨散雲收青天白日君不見馬駒踏殺天下人臨濟未是白拈賊佛照光頌曰一畝之田三蛇九鼠仔細看來是何面嘴

佛因外道問不問有言不問無言佛良久外道歎曰  
佛大悲開我迷雲令我得入作禮而去阿難  
白佛外道得何道理稱歎而去佛曰如世良馬見  
鞭影而行

佛因外道問昨日說何法佛曰說定法外道曰今日  
說何法曰不定法外道曰昨日說定法今日何說  
不定法佛曰昨日定今日不定

潏山結拈曰佛大似看樓打樓大潏即不然待  
問昨日說定今日何說不定但云非汝境界

佛因有異學問諸法是常耶佛不答又問諸法是無  
常耶佛亦不對異學曰佛具一切智何不對我佛  
曰汝之所問皆爲戲論

佛因長爪梵志索論義預約曰我義若墮當斬首以  
謝佛曰汝義以何爲宗志曰我以一切不受爲宗  
佛曰是見受否志拂袖而去行至中路有省乃歎  
曰我義兩處負墮是見若受負門處粗是見不受  
負門處細一切神天二乘不知我義墮處惟有佛  
諸大菩薩知我義墮處回至佛前曰我義兩處負  
墮故當斬首以謝佛曰我法中無如是事汝當回

心向道於是五百徒衆一時投佛出家證阿羅漢  
天衣懷遠曰是見若受破家門是見不受共  
誰論區撥蕪折兩頭脫一毫頭上見乾坤

佛因波斯匿王問勝義諦中有世俗諦否若言無智  
不應二若言有智不應一一二之義其義云何佛  
言大王汝於過去龍光佛時曾問斯義我今無說  
汝今無聽無說無聽是爲一義二義

薦福懷曰波斯匿王分明問佛分明答實  
主歷然作麼生說個無說無聞底道理

佛因文殊忽起佛見法見威神攝向二鐵圍山

佛一日陞座默然而坐阿難白椎曰請佛說法佛云  
會中有二比丘犯律行故我不說法阿難以他心  
通觀是比丘遂乃遣出佛還復默然阿難又白通  
來爲二比丘犯律是二比丘已遣出佛何不說法  
佛云吾誓不爲二乘人說法便下座

詳符蔭曰佛以雅思淵才文中之王舌覆大千而  
其觀面提持處乃如此何待靈山拈花乃爲密付  
哉故曰五宗建立只完得個拈花公案靈山拈花  
只完得個降生公案上下稱尊只完得個衆生公  
案

佛法住世

末法九千八百五十二年後楞嚴殺丹三昧先滅餘經次第滅唯彌陀經在後滅

佛法住世記云正法

正証也謂開法修行即能證果

住世一千年由

女人出家滅五百年據善見論云後爲此邱尼說

八敬還得一千年又天人答宣律師曰佛錫杖住

龍宮中鎮伏惡魔復令正法增住四百年是則正

法住世總一千四百年像法

像者似也開法修行不能證果僅似正法

時住世一千年又由錫杖在龍宮中因緣復令像

法增住一千五百年是則像法住世總二千五百

年末法

謂人雖聞法不能修行證果爲末法時也

住世一萬年又由錫

杖在龍宮中因緣復令末法增住二萬年是則末

法住世總三萬年

歷年表曰粵惟浩劫難窮比洪荒而無始大千等

見如朗月以臨空一念普觀三際詎有今古之分

法身圓攝十虛豈有去來之迹然即所示見者以

窺端倪就化儀中而徵實際一期法化可得稽焉

降神當此土周昭王甲寅之年至壬申歲一十九

年佛爲太子處王宮示從人道中尊處極榮貴之

位而不貪居至恩愛之中而不染所以警世無常

務登道岸眞出世間之大雄超三界之丈夫也從

昭王癸酉至穆王四年癸未佛出家修行降魔成

道示離世間入法界無法不證無道不成成等正

覺超出一切所以見身修證爲物作則洵正徧知

之調御兩足

福足慧足

尊之導師也從甲申五年至壬

申穆王五十三年其間四十九年三轉法輪度無

量衆一音演唱

佛以一音爲說法衆生隨類各得解

五時華嚴阿含

法華涅槃

宣敷八教領漸秘密不定

被機大事了畢

示佛道圓成一切衆生咸令開示悟入也末後緣

熟化周拈花密付示心法無盡眞宗綿互也佛應

世處王宮一十九年出家修道十二年說法度生

四十九年共示世壽七十九年涅槃於周穆王五

十三年壬申至東漢孝明皇帝辛酉金身入夢共

一千一十年至梁武帝大通元年丁未達磨氏西

來共一千四百八十二年至今

皇清康熙二十八年己巳共二千六百三十八年

祥符陰曰佛道無上佛境難思唯佛與佛乃能知

之茲所編者譬湛海中一滴之涓潤太虛際毫端

之微芒。然即毫微以融攝太虛。太虛不別就涓滴而朝宗。湛海湛海。攸同山河大地。全露法王。之身萬象森羅。不出一法所印。佛不出世而出世。佛不度生而度生。擬議思量。覲面千里矣。

宗統編年卷之二

宗統編年卷之三

震澤祥符寺沙門釋 紀蔭 編纂

參學門人 秉岳 秉密 同校錄

常州天甯寺沙門釋 清如 重校

祖紀

祖具二義。曰本曰述。本其道而述之也。達摩氏曰。亦不觀惡而生。嫌亦不觀善而勤措。亦不捨智而近愚。亦不拋迷而就悟。達大道兮。過量通佛心兮。出度不與凡聖同躋。超然名之曰祖。

西天祖師

西天竺國也。諸祖乘願利生。傳持宗統。託跡西竺。至二十八傳。般若智光。運照東土。大乘荷法者。方

乃應運  
迭興

安隱忍曰。西天諸祖。生而神悟。皆法身大士。應世繼統。當時被其化者。動至千萬。而於授受之際。卒皆一人可見。正法眼藏之不易。透而佛祖心印之不易。合也。觀夫臨機勘辨。以道合道之言。若谷響空。音不留朕。迹即甘蠅之射。不能喻其準。石火之光。不能喻其捷。裴將軍之舞劍。不能喻其盤礴。變化非大死却活。功照俱絕。其孰至此哉。後之人以心性道理。依憑之迹。用相彷彿。獅乳驢乳。固同一色。要在具眼英傑。辨之。

第一世祖

摩訶迦葉尊者。摩竭陀國人。姓婆羅門。父號飲澤母。號香至梵。語迦葉。此云飲光。蓋以身光得名。摩訶云大。以別於三迦葉也。清淨自居。修杜多行。禮佛於竹林精舍。佛於衆中。稱歎行業第一。後因拈花因緣。付法如佛。紀所載。

穆王癸酉五十四年

第一世祖摩訶迦葉尊者。嗣宗統四十四年。



祖付囑阿難傳持正法

阿難一日問祖曰。佛傳金縷袈裟。外別傳個甚麼。祖召阿難。阿難應諾。祖曰。倒却門前刹竿著。乃告阿難曰。今將正法付囑於汝。汝善守護。聽吾偈曰。法法本來法。無法無非法。何於一法中。有法有非法。阿難作禮奉命。

祖入定雞足山以待彌勒

祖念既傳法。已當遵佛勅。念佛舍利諸塔。皆在諸天。乃凌虛徧禮。已復以夙約辭阿闍世王。遂入雞足山。自念我今持僧伽黎。經五十七俱胝。六十大千歲。至彌勒出世。終不致壞。乃以禪定持身。語山神曰。若阿闍世王及阿難來山。當爲開開已。復合祥符。陰曰。初祖紹統住世四十四年。當世尊大法。廣化之後。機緣純熟。護持密嚴無迹。可見且竺乾隔別。無從廣稽如來一代大教。首宣結集。誠不忝佛勅。紹隆慧命者矣。乃以禪定持身。俟見慈氏。非眞如來。使擔荷大法者。曷克能之。

第二世祖

阿難尊者王舍城人。姓利帝。父斛飯王。實如來從弟也。多聞無礙。世尊以爲總持第一。

丁巳六年

第二世祖阿難尊者嗣宗統三十七年

戊午七年

祖住世傳法

己未八年

庚申九年

辛酉十年

壬戌十一年

癸亥十二年

甲子十三年

乙丑十四年

孝王丙寅十五年

彝王名愛孝王子在位十六年按證法安心好靜曰彝

彝王丁卯元年

戊辰二年

己巳三年

庚午四年

辛未五年

壬申六年

癸酉七年

甲戌八年

乙亥九年

丙子十年

丁丑十一年

戊寅十二年

己卯十三年

庚辰十四年

辛巳十五年

彝王壬午十六年

厲王名胡彝王子在位十七年并共和三十四年按證法殺戮無辜曰厲

厲王癸未元年

甲申二年

乙酉三年

丙戌四年

丁亥五年

戊子六年

己丑七年

庚寅八年

辛卯九年

壬辰十年

癸巳十一年

景德傳燈錄作十二年誤

祖住世傳法

祖付囑商那和修正法 示涅槃

祖將入涅槃於恒河中流跏趺而坐。阿闍世王毗舍離王皆在河側說偈勸請莫般涅槃。祖答偈曰。二王善哉。住勿爲苦悲戀涅槃。當我靜而無諸有。故復念我若向一國則諸國或爭應以平等度。諸有情遂於恒河中流將入寂滅。是時山河大地六種震動。雪山有五百仙人觀茲瑞應。飛空而至。禮祖足而白言。我當於長者而證佛法。願垂大慈。度脫我等。祖默然受請。即變梵伽河悉爲金地。爲其仙衆說諸大法。復念先所度脫弟子。應當來集。須臾五百羅漢從空而下。爲諸仙人出家受具。其仙衆中有二羅漢一名商那和修。二名末田底迦。祖知是法器而告之曰。如來以正法眼付迦葉迦葉。

必有疑在

入定而付於我。我今將滅復付於汝。汝受吾教當聽。偈言本來付有法付了言無法。各各須自悟。悟了無無法說。偈已復以正法眼囑累商那和修。而命末田底迦於闍賓國敷演大法。言已。跏身虛空。見十八變入風輪。奮迅三昧而分身四分一分惠初利天。一分惠娑竭羅龍宮。一分惠阿闍世王。一分惠毗舍離王。各造寶塔而供養之。

祥符陰曰。祖侍佛傳法結集大藏厥功懋矣。紹統之後傳法利生化行平等要之去佛未久正法凝然羣機未渙水老鶴之言特一時愚擬之偶然者耳。未可以參祖化也。故削而不書。

### 第三世祖

商那和修尊者亦名舍那婆斯。姓毗舍多。父林勝母憍奢耶。摩突羅國人。也有胎六年而生。梵云商諾迦。此云自然服。乃西域九枝秀草名。出則聖人降生尊者生。而此草出昔如來行化至摩突羅國。見一青林枝葉茂盛。語阿難曰。此林地名優留荼。吾滅後一百年有比丘名商那和。

修於此轉妙法輪後百歲果誕和修出家證道  
受慶喜尊者法眼至此林遂降二火龍龍受三  
歸遂施其地以建梵宮

厲王甲午十二年

第三世祖商那和修尊者嗣宗統二十年

乙未十三年

祖住世傳法

丙申十四年

丁酉十五年

戊戌十六年

己亥十七年

是年民以王虐畔襲王王出奔二相周召相與協和共輔太子故稱共和

共和庚子元年

辛丑二年

壬寅三年

癸卯四年

甲辰五年

乙巳六年

丙午七年

丁未八年

戊申九年

己酉十年

庚戌十一年

辛亥十二年

佛入滅一百年

自此百年之後源同派別分爲上座大衆二部三百年後復分爲九

部十一部絲麻相素水乳相溶各執一端具體而微矣

壬子十三年

癸丑十四年

祖住世傳法

阿育王造塔供佛舍利

發明造塔建利

不書此供養莊嚴之始故書之

佛昔與諸比丘行乞有一童子心念世尊相好手

捧細沙著佛鉢內歡喜合掌而發願言以惠施善

根令得一天下一繖蓋王卽於此處生得供養諸

佛爾時佛授記曰佛滅度百年之後此童子於巴

連弗邑統領一天下轉輪王姓孔雀名阿育正法

治化又復廣布我舍利當造八萬四千塔後童子

生於巴連弗邑日月護王宮爲太子父王崩鐵輪

飛降王閻浮提後因此邱化導遂發宿世善根乃

至王舍城取阿闍世王佛塔中舍利作八萬四千

金銀琉璃玻璃瓔盛佛舍利又作八萬四千寶瓶

以盛此篋役使諸鬼神勅令於閻浮提城邑聚落

滿一億家立一寶塔震旦凡十九處洛陽長千鄧山臨淄成都五處最顯著

甲寅十五年

乙卯十六年

丙辰十七年

丁巳十八年

戊午十九年

己未二十年

庚申二十一年

辛酉二十二年

壬戌二十三年

癸亥二十四年

甲子二十五年

乙丑二十六年

丙寅二十七年

丁卯二十八年

戊辰二十九年

己巳三十年 庚午三十一年 辛未三十二年

壬申三十三年 癸酉三十四年

共和甲戌三十五年 是年爲宣王元年

宣王 各辭厲王子在位四十六年按證法聖善周問曰宣

宣王乙亥二年 丙子三年 丁丑四年

戊寅五年 己卯六年 庚辰七年

辛巳八年 壬午九年 癸未十年

甲申十一年 乙酉十二年 丙戌十三年

丁亥十四年 戊子十五年 己丑十六年

庚寅十七年 辛卯十八年 壬辰十九年

癸巳二十年 甲午二十一年

乙未二十二年 景德傳燈錄作二十三年者誤

祖付囑優婆塞多正法 入三昧見十八變化火自

焚

祖化緣既久思付法者尋於毗利國得優婆塞多以爲給侍因問龜多曰汝年幾耶答曰我年十七祖曰汝身十七性十七耶答曰師髮已白爲髮白耶心白耶祖曰我但髮白非心白龜多曰我身十

七非性十七祖知是法器後三載遂爲落髮受具而以法眼付囑之付法偈曰非法亦非心無心亦無法說是心法時是法非心法付法已卽隱於闍賓國南象白山中後於三昧中見龜多徒衆多懈慢乃往彼正之龜多見師至頂禮次祖以右手手指卽有香乳自空而注問龜多曰汝識之乎龜多不測遂入三昧觀察亦不能測乃請曰是果何三昧耶祖曰是謂龍奮迅三昧如是五百三昧汝皆未知之復曰如來三昧辟支不識辟支三昧阿羅漢不識吾師阿羅漢三昧而我不識今我三昧汝豈識乎是三昧者心不生滅住大慈力遞相恭敬其至此者乃可識之於是龜多弟子皆伏而悔謝祖復爲說偈曰通達非彼此至聖無長短汝除輕慢意疾得阿羅漢五百比丘聞偈已依教奉行皆獲無漏祖乃見十八變火光三昧用焚其身龜多收舍利建塔於梵迦羅山

祥符陰曰香乳空注疾除輕慢心不生滅住大慈力迭相恭敬乃可識之後世傳法利生者可深長

思矣

### 第四世祖

優波毼多尊者亦名優波幅多又名鄔波毼多。叱利國人也。姓首陀。父善意。十七出家。二十證果。紹祖行化。時號無相好佛。前此傳法者皆具禪法律三藏。自後律教別行。橫分五部。傳法者唯整律之大綱而已。

宣王丙申二十三年

第四世祖優波毼多尊者嗣宗統

六十五年

丁酉二十四年

祖住世傳法

戊戌二十五年 己亥二十六年

庚子二十七年

祖應阿育王請

發明受請不書此祖師應供之始故書之

阿育王建寶塔。已經四十年。白耶舍上座言。可有比丘。爲佛受記。當作佛事否。我當往詣彼所。供養恭敬。上座答曰。佛涅槃時。告阿難言。我般涅槃百歲之後。有長者子。名優波毼多。當出家學道。號無

相好佛。王問。今已出世否。答曰。已證果。傳法。今住優留蔓茶山中。王勅羣臣。嚴駕欲往。祖遙知之。思惟若彼王來。將無量衆。驚擾山谷。殺害微蟲。誠爲不便。即將一萬八千阿羅漢衆。徑至巴連弗邑。阿育王見祖自來。大喜踴躍。設種種供養。作諸佛事。

如傳所載

辛丑二十八年 壬寅二十九年 癸卯三十年

甲辰三十一年

乙巳三十二年

祖入定降魔

祖行化至拏突羅國。得度者甚衆。由是魔宮震動。波旬愁怖。遂竭其魔力。以害正法。尊者即入三昧。觀其所由。波旬復伺便。持瓔珞摩祖頸。祖出定。取人狗蛇三尸。化爲華鬘。更言論波旬曰。吾此華鬘。酬汝瓔珞。波旬大喜。引頸受之。即復三尸蟲蛆。臭壞盡其神通。莫能去之。乃升六欲天。告諸天主。詣梵王求其解免。彼各告言。十力弟子所作神變。我輩凡陋。何能去之。波旬曰。然則奈何。梵王曰。汝

可歸心尊者即能除斷復示偈曰若因地倒還因地起離地求起終無其理波旬聞已即下天宮至祖所禮足哀懺祖曰汝自今而往於佛法更不相繞乎波旬曰誓向佛道祖曰汝可自唱皈依三寶波旬合掌三唱而三尸悉除踴躍作禮而去

丙午三十三年 丁未三十四年 戊申三十五年  
己酉三十六年 庚戌三十七年 辛亥三十八年  
壬子三十九年 癸丑四十年 甲寅四十一年  
乙卯四十二年 丙辰四十三年 丁巳四十四年  
戊午四十五年 宣王己未四十六年

幽王名宮涅在位十一年按證法動靜亂常曰幽

幽王庚申元年 辛酉二年 壬戌三年  
癸亥四年 甲子五年 乙丑六年  
丙寅七年 丁卯八年 戊辰九年  
己巳十年 幽王庚午十一年  
平王名宜曰在位五十一年按證法執事有制曰平  
平王辛未元年 壬申二年 諸侯寢盛  
癸酉三年 甲戌四年 政出方伯  
乙亥五年

丙子六年 丁丑七年 戊寅八年  
己卯九年 庚辰十年 辛巳十一年  
壬午十二年 癸未十三年 甲申十四年  
乙酉十五年 丙戌十六年 丁亥十七年  
戊子十八年 己丑十九年 庚寅二十年  
辛卯二十一年  
佛滅後二百年

壬辰二十二年 癸巳二十三年 甲午二十四年  
乙未二十五年 丙申二十六年 丁酉二十七年  
戊戌二十八年 己亥二十九年

庚子三十年景德傳燈錄作三十一一年者誤

祖住世傳法

祖付囑提多迦正法眼藏

祖在世化導證果最多每度一人以一籌置於石室其室縱十八肘廣十二肘充滿其間最後有一長者子名曰香衆來禮祖求出家祖問曰汝身出家心出家答曰我求出家非爲身心祖曰不爲身心復誰出家答曰夫出家者無我我故無我我故

卽心不生滅心不生滅卽是常道諸佛亦常心無形相其體亦然祖曰汝當大悟心自通達宜依佛法僧紹隆聖種卽爲剃度授具足戒仍告之曰汝父夢金日而生汝可名提多迦如來以大法眼藏次第傳授以至於我今以付汝聽吾偈言心自本來心本心非有法有法有本心非心非本法

祖示涅槃

付法已祖乃躡身虛空見十八變却復本座跏趺而逝提多迦以石室內籌茶毗之敕舍利建塔供養

祥符蔭曰宗門凡聖等忘不尙通力然祖滅皆示神變者定慧力深自然成見非有心強爲也

第五世祖

提多迦尊者摩伽陀國人也初名香衆父夢金日自屋而出照耀天地前有大山諸寶嚴飾山頂泉湧滂沱四流後遇穗多尊者爲解之曰寶山者吾身也泉湧者法無盡也日從屋出者汝今人道之相也照耀天地者汝智慧超越也因

爲更今名梵云提多迦此云通眞量尊者聞已踴躍述偈云巍巍七寶山常出智慧泉回爲眞法味能度諸有緣穗多尊者亦說偈曰我法傳於汝當見大智慧金日從屋出照耀於天地祖禮謝

平王辛丑三十一年

第五世祖提多迦尊者嗣宗統四十年

壬寅三十二年

祖住世傳法

癸卯三十三年 甲辰三十四年 乙巳三十五年

丙午三十六年 丁未三十七年 戊申三十八年

己酉三十九年 庚戌四十年 辛亥四十一年

壬子四十二年 癸丑四十三年 甲寅四十四年

乙卯四十五年 丙辰四十六年 丁巳四十七年

戊午四十八年

己未四十九年 魯隱公元年 孔子春秋編年始此

庚申五十年 辛酉五十一年

桓王 諱林平王孫在位二十三年按證法克敬勤民曰桓

桓王壬戌元年 癸亥二年 甲子三年

乙丑四年 丙寅五年 丁卯六年

戊辰七年 己巳八年 庚午九年

辛未十年 壬申十一年 癸酉十二年

甲戌十三年 乙亥十四年 丙子十五年

丁丑十六年 戊寅十七年 己卯十八年

庚辰十九年 辛巳二十年 壬午二十一年

癸未二十二年 甲申二十三年

莊王 桓王子諱佗在位十五年 按證法武而不遂曰莊

莊王乙酉元年 丙戌二年 丁亥三年

戊子四年

己丑五年 景德傳燈錄 作七年者誤

祖住世傳法

祖度仙人彌遮迦付正法眼

祖至中印度彼國有八千大仙彌遮迦爲首聞祖至率衆瞻禮謂祖曰昔與師同生梵天我遇阿私陀仙授我仙法師逢十力弟子修習禪那自此報分殊途已經六劫祖曰支離累劫誠哉不虛今可

捨邪歸正以入佛乘彌遮迦曰昔阿私陀仙授我記云汝到後六劫當遇同學獲無漏果今也相遇非夙緣耶願師慈悲令我解脫祖卽度出家命諸聖授戒其餘仙衆始生我慢祖示大神通於是俱發菩提心一時出家祖乃告彌遮迦曰昔如來以正法眼藏密付迦葉展轉相授而至於我我今付汝當護念之乃說偈曰通達本法心無法無非法悟了同未悟無心亦無法

祖示涅槃

說偈已踴身虛空作十八變火光三昧自焚其軀彌遮迦與八千比丘同收舍利於班荼山中起塔供養

祥符陰曰世人不知仙佛之分往往煉形養氣貪戀仙術冀圖長生不達大道枉用工夫棄金擗草誠爲可惜譬如遠客思歸於路多涉邱園祇增旅夢迴環家鄉迢遞耳復有就迷喪失以致孤露伶俜將來不知何所底止夫人於茫茫生死海中生一脫離之念豈非背塵合覺之時乃以不遇良師

空遭困頓一時受誤累劫支離觀於尊者可以冷

然矣

第六世祖

彌遮迦尊者中印度人

莊王庚寅六年

第六世祖彌遮迦尊者嗣宗統五十五年

辛卯七年

祖住世傳法

壬辰八年

癸巳九年

甲午十年

乙未十一年

丙申十二年

丁酉十三年

戊戌十四年

己亥十五年

釐王諱胡莊王子在位五年按諡法有罰而還曰釐

釐王庚子元年

五霸次興

辛丑二年

壬寅三年

癸卯四年

甲辰五年

惠王諱闕釐王子在位二十六年按諡法柔質慈民曰惠

惠王乙巳元年

丙午二年

丁未三年

戊申四年

己酉五年

庚戌六年

辛亥七年

壬子八年

癸丑九年

甲寅十年

乙卯十一年

丙辰十二年

丁巳十三年

戊午十四年

己未十五年

庚申十六年

辛酉十七年

壬戌十八年

癸亥十九年

甲子二十年

乙丑二十一年

丙寅二十二年

丁卯二十三年

戊辰二十四年

己巳二十五年

庚午二十六年

襄王諱鄒惠王子在位三十二年按諡法辟地有德曰襄

襄王辛未元年

佛滅後三百年此後龍猛菩薩遺中論提婆諸大論師造百論

壬申二年

癸酉三年

甲戌四年

乙亥五年

丙子六年

丁丑七年

戊寅八年

己卯九年

庚辰十年

辛巳十一年

壬午十二年

癸未十三年

甲申十四年景德傳燈錄作十七年者誤

祖住世傳法

祖付婆須密正法示涅槃

祖遊化至北天竺國見維摩之上有金色祥雲歎

曰斯道人氣也。必有士爲吾嗣。乃入城於闐闐。間有一人手持酒器。逆而問曰。師何方來。欲往何所。祖曰。從自性來。欲往無處。曰。識我手中物否。祖曰。此是觸器而負。淨者曰。師識我否。祖曰。我卽不識。識卽非我。復謂之曰。汝試自稱名。氏。吾當後示。本因彼說。偈曰。我從無量劫。至於生此國。本姓頗羅墮。名字婆須蜜。祖曰。我師提多迦。說世尊昔遊北印度。語阿難言。此國中吾滅度後三百年。有一聖人姓頗羅墮。名婆須蜜。而於禪祖當獲第七世。世尊記汝。汝應出家。彼乃置器禮祖。側立而言曰。我思往劫。嘗作檀那。獻一如來寶座。彼佛記我曰。汝於賢劫。釋迦法中。宣傳至教。今符師說。願加度脫。祖卽與披剃。復圓戒相。乃告之曰。正法眼藏。今付於汝。勿令斷絕。乃說偈曰。無心無可得。說得。不名法。若了心。非心。始解心。心法。祖說偈已。入師子奮迅三昧。踰身虛空。高七多羅樹。却復本座。化火自焚。婆須蜜收靈骨。貯七寶函。建浮圖。置於上級。

宗統編年卷之三

宗統編年卷之四

第七世祖

婆須蜜尊者北天竺國人也

襄王乙酉十五年

第七世祖婆須蜜尊者嗣宗統四十七年

丙戌十六年

祖住世傳法

丁亥十七年

戊子十八年

己丑十九年

庚寅二十年

辛卯二十一年

壬辰二十二年

癸巳二十三年

甲午二十四年

乙未二十五年

丙申二十六年

丁酉二十七年

戊戌二十八年

己亥二十九年

庚子三十年

辛丑三十一年

壬寅三十二年

頃王諱壬臣。襄王子。在位六年。按證法。覲心動懼。曰頃。

頃王癸卯元年

甲辰二年

乙巳三年

丙午四年

丁未五年

戊申六年

匡王諱班。頃王子。在位六年。按證法。貞心大度。曰匡。

匡王己酉元年 庚戌二年 辛亥三年

壬子四年 癸丑五年 甲寅六年

定王 諱瑜匡王弟在位二十一年按諡法安民法古曰定

定王乙卯元年 丙辰二年

丁巳三年

道教聖人老子生於楚

九月十四日生于楚國陳郡苦縣賴鄉曲仁里父姓諱名

乾字元舉母曰精數孕八十年而生于李樹下因以爲姓名耳字伯陽身長四尺六寸顧凸眉鬚反唇齶耳擊頭謚曰聃

祥符蔭曰三教之道用處不同孔氏之教倫理道

德無過不及遵而行之時中聖人也老子之教清

淨無爲澹泊守玄遵而行之清修善人也達秉彝

之原盡心性之量則非佛道孰從哉三代而後人

根不一儒釋而外自應有老子之教介於二者之

間收攝流品昔吳尚書令闕澤對孫權曰若將孔

老之教比校佛法遠之遠矣所以然者孔老設教

法天制用不敢違天如來說法諸天奉行不敢違

佛以此言之實非比對明矣老子生於周定王三

年佛滅於穆王五十三年相去三百四十五年

定王戊午四年 己未五年 庚申六年

辛酉七年 壬戌八年 癸亥九年

甲子十年 乙丑十一年 丙寅十二年

丁卯十三年 戊辰十四年 己巳十五年

庚午十六年

辛未十七年 景德傳燈錄作十九年者誤

祖住世傳法

祖付佛陀難提正法 入慈心三昧示寂

祖行化至迦摩羅國廣興佛事於法座前有智者

自稱我名佛陀難提今與師論義祖曰仁者論即

不義義即不論若擬論義終非義論難提知師義

勝心即欽服曰我願求道需甘露味祖遂與剎度

而授具戒復告之曰如來正法眼藏我今付汝汝

當護持乃說偈曰心同虛空界示等虛空法證得

虛空時無是非非法即入慈心三昧時梵王帝釋

及諸天衆俱來作禮而說偈言賢劫衆聖祖而當

第七位尊者哀念我請爲宣佛地祖從三昧起示

衆曰我所得法而非有故若識佛地離有無故語

已還入三昧示涅槃相難提即於本座起七寶塔以供全身

第八世祖

佛陀難提尊者迦摩羅國人也姓瞿曇氏頂有肉髻辯才無礙

定王壬申十八年

第八世祖佛陀難提尊者嗣宗統五十年

癸酉十九年

祖住世傳法

甲戌二十年 乙亥二十一年

簡王諱葬定王子在位十四年按諡法平葬不謚曰簡

簡王丙子元年 丁丑二年 戊寅三年

己卯四年 庚辰五年 辛巳六年

壬午七年 癸未八年 甲申九年

乙酉十年 丙戌十一年 丁亥十二年

戊子十三年

己丑十四年

祖住世傳法

靈王諱泄心簡王子在位二十七

靈王庚寅元年 辛卯二年 壬辰三年

癸巳四年 甲午五年 乙未六年

丙申七年 丁酉八年 戊戌九年

己亥十年 庚子十一年 辛丑十二年

壬寅十三年 癸卯十四年 甲辰十五年

乙巳十六年 丙午十七年 丁未十八年

戊申十九年 己酉二十年

庚戌二十一年

儒教聖人孔子生於魯十一月初四日生於魯國

本紀孔子父姓叔梁名紇為鄒邑縣宰先娶鄒氏女生子孟皮不才後娶顏氏女曰徵在禱于尼邱山神而生孔子生而有髮身長九尺六寸腰帶十圍垂手過膝河脾海口龍顏方頤鳳順燕頤虬髯虎視有中和之德衣莊而嚴色溫而厲有七十二表自易姓曰孔名丘字仲尼先祖殷之後裔顏考叔弗何至乾移居魯易姓叔梁孔子追昔殷宋之後以子配一更姓孔氏

辛亥二十二年

佛滅後四百年時彌羅國五百羅漢依法智論造毗婆沙論

祥符陰曰佛教之有論猶儒書之有註疏也聖賢之言垂教後世非註疏而理不詳明如來之教廣

度衆生。非諸法身大士。闡論發明。則久而執法相  
生。諸見難融。朱程集註。乃孔孟之羽翼。大士造論  
實法苑之功臣也。

壬子二十三年 癸丑二十四年 甲寅二十五年  
乙卯二十六年 丙辰二十七年

景王諱貴靈王子在位二十五年按證法出義而濟曰景

景王丁巳元年 戊午二年 己未三年

庚申四年 辛酉五年 壬戌六年

癸亥七年 甲子八年 乙丑九年

丙寅十年景德傳燈錄作十二年者誤

祖付囑伏獸蜜多正法 示寂

祖行化至迦提國毗舍離家見舍上有白光上騰  
謂其徒曰。此家有聖。人口無言。說真大乘。器長者  
出致禮。問何所須。曰。我求侍者。長者曰。我有一子  
名伏獸蜜多。年已五十口。未曾言足。未曾履。祖曰。  
如汝所說。真吾弟子。伏獸聞之。遽起禮拜。以偈問。  
曰。父母非我親。誰是最親者。諸佛非我道。誰是最  
道者。祖以偈答曰。汝言與心親。父母非可比。汝行

◆按證法

◆傳字原本  
不明

與道合。諸佛心。卽是外求有相佛。與汝不相似。欲  
識汝本心。非合亦非離。伏獸聞偈。已便行七步。祖  
曰。此子昔曾值佛。悲願廣大。慮父母愛情難捨。故  
不言不履耳。長者遂捨令出家。祖尋投具戒付法。  
說偈曰。虛空無內外。心法亦如此。若了虛空。故是  
達真如理。伏獸承祖付囑。卽超身虛空。散衆寶華。  
說偈讚曰。我師禪祖中。當得爲第八。法化衆無量。  
悉獲阿羅漢。爾時祖卽起本座。見大禪變。却復本  
座。儼然寂滅。衆卽其所建塔。以闕全身。  
存考伏獸聞之景德傳燈錄作尋者見之謂祖便許其見也傳法正宗記作其父母卽持其子而與其子形父母持而出見祖也

第九世祖

伏獸蜜多尊者迦提國人也。姓毗舍離。

景王丁卯十一年

第九世祖伏獸蜜多尊者嗣宗統四年

戊辰十二年

祖住世傳法

己巳十三年

庚午十四年

辛未十五年

壬申十六年 癸酉十七年 甲戌十八年  
乙亥十九年 丙子二十年 丁丑二十一年

戊寅二十二年

己卯二十三年

老聃卒

庚辰二十四年 辛巳二十五

敬王諱丐景王子在位四十五年按諡法合善典法曰敬

敬王壬午元年 癸未二年 甲申三年

乙酉四年 丙戌五年 丁亥六年

戊子七年 己丑八年 庚寅九年

辛卯十年 壬辰十一年 癸巳十二年

甲午十三年 乙未十四年 丙申十五年

丁酉十六年 戊戌十七年 己亥十八年

庚子十九年 辛丑二十年 壬寅二十一年

癸卯二十二年

祖至中印度

甲辰二十三年 乙巳二十四年 丙午二十五年

丁未二十六年 戊申二十七年 己酉二十八年

庚戌二十九年  
祖攝化異論

中印國王信邪祖躬持赤旛化諸異論改邪歸正

辛亥三十年 壬子三十一年 癸丑三十二年

甲寅三十三年景德傳燈錄作三十五年者誤

祖付囑脇尊者正法 入三昧涅槃

祖行化於中印度有長者香蓋携一子而來瞻禮

曰此子處胎六十年嘗有一仙謂此兒骨相非常

今遇尊者可令出家祖即與落髮羯磨之際祥光

燭座感舍利三七粒見前自此精進忘疲祖遂付

法說偈曰眞理本無名因名顯眞理受得眞實法

非眞亦非僞僞已即入滅盡三昧而般涅槃收舍

利建塔於那蘭陀寺

第十世祖

脇尊者中印度人性氏未詳精進不眠脇不至

席遂稱脇尊者本名難生以處胎六十年將誕

之夕母夢白象載一寶座座置一明珠入門乃

生生而神光燭室體有奇香及長雖穀食絕無

穢萍

敬王乙卯三十四年

第十世祖協尊者嗣宗統四十年

丙辰三十五年

祖住世傳法

丁巳三十六年 戊午三十七年 己未三十八年

庚申三十九年 辛酉四十年

壬戌四十一年

孔子本於魯

時年七十三歲四月己丑孔子蚤作負手而曳杖逍遙於門歌曰泰山其頽乎

梁木其頽乎哲人其萎乎既歌而入當戶而坐子貢聞之曰泰山其頽則吾將安仰梁木其頽哲人其萎則吾將安放夫子殆將病也遂趨而入孔子曰賜子能宗予予殆將死也寢疾七日而沒塋魯城北泗水上門弟子集魯論語凡二十篇

祥符蔭曰三皇以前淳風沕穆五帝之始伏羲畫

八卦造書契而治世之道始肇其端神農藝五穀

辨藥石而民免饑虛天札黃帝作制度立星官定

氣運聿爲文明之漸非復樸野之初矣唐堯之時

風氣漸開人文漸著帝德光被四表而黎民於變

時雍克明峻德實發聖學之源中庸九經亦始於

此開後世聖人之教者堯也虞舜重華上協蒸已無爲而天下治明明德於天下舜則有之堯之命舜者曰允執厥中舜之命禹則益以人心惟危道心惟微惟精惟一此十六字之傳爲治世心學之大要禹無間然德盛神化而其功爲不可及也湯武順天應人與時偕行文質損益變化適中堯舜性之全體是道湯武身之修道設教三代之季春秋之際岑岌乎難言之矣孔子聖德天生而好古敏求祖述堯舜憲章文武不得其位以道教天下後世如春風之行萬物日月之貫四時三皇五帝以來之道至孔子集厥大成治世之教無以加焉者也及孔子之門者顏回曾參端木賜閔損等爲最顏子生知近道竭才卓立不幸蚤卒孔子傷之有喪子之慟曾子克已省察盡心忠恕以一唯傳一貫之道釋明德新民修齊治平之要而孔子之聖學以傳孔子生鯉伯魚亦蚤卒鯉生伋字子思子思子作中庸發明孔子之道本於天性成於人道誠明參贊極之無聲無臭而與天地合其德矣

孔子之道傳於子。子闢於子思。子思後傳孟子。聖脉淵源。澤流後世。孔子作春秋。絕筆於西狩獲麟。以天道終此西方聖人之教。將化行震旦之祥也。自三皇建極以來。至春秋西狩獲麟庚申之歲。凡歷三百二十六萬七千年。迦文佛滅後。凡四百七十年。

或謂祥符曰。天地死生之故。孔子非不知之。蓋不欲明言耳。祥符曰。聖人無隱。曰。若然。則孔子未之知乎。祥符曰。聖人無所不知。曰。何以不明言也。祥符曰。聖人嘗繫易矣。繫之辭曰。仰以觀於天文。俯以察於地理。是故知幽明之故。原始反終。故知死生之說。精氣爲物。遊魂爲變。是故知鬼神之情狀。與天地相似。故不違。知周乎萬物。而道濟天下。故不過。旁行而不流。樂天知命。故不憂。安土敦乎仁。故能愛。範圍天地之化而不過。曲成萬物而不遺。通乎晝夜之道而知。故神無方而易無體。又曰。天生神物。聖人則之。天地變化。聖人效之。天垂象。見吉凶。聖人象之。河出圖。洛出書。聖人則之。又曰。過

此以往未之或知。窮神知化。德之盛也。孔子之言如此。而謂之不知可乎。然孔子聖人。猶是人也。擬之於天。則有間矣。而曰天生德於予。天之於佛。夫何如哉。孔子五十而知天命。佛則一念普觀無量劫。無去無來。亦無住。孔子曰。寂然不動。感而遂通天下之故。又曰。不逆詐。不億不信。抑亦先覺者是賢乎。又子絕四。毋意必固我。從心所欲。不逾矩焉。非天下之至神。其孰能與於此。孔子蓋天地間之聖人也。天地間之聖人。而何必求之以天地之外哉。佛蓋出世之大聖人也。知見廣大。具六神通。唯其具宿命通。則一念超入無際。唯其具天眼通。則一瞬徧周太虛。是故天地死生之極。致非佛孰能了了宣揚。如指諸掌乎。非佛法孰能一念圓證。頓離真妄乎。同歸而殊途。一致而百慮。仁者見之謂之仁。智者見之謂之智。神而明之存乎其人。苟非其人。道不虛行。故曰。百姓日用而不知。君子之道民鮮能也久矣。或曰。易之所謂精氣爲物者。以陰精陽氣聚而成。

物神之伸謂人之生也。遊魂爲變者以魂遊魄降散而爲變鬼之歸謂人之死也。此原始反終故知死生之說也。其義何居。祥符曰：此其所以未了。生死之本也。生死之本本於一心。非陰陽二氣聚散之謂也。其曰聚而成物。物何以聚。其曰以死爲歸。歸於何所。不可茫茫造化無自而聚。杳杳無知歸於斷滅也。知生死本乎一心。陰陽魂魄之說皆一念圓攝而無遺。其詳晰楞嚴言之矣。覽之自當洞若觀火。宋儒之言似也。而非孔子之旨。孔子曰：易與天地準。故能彌綸天地之道。非天地之道不出此心乎。思之則自得矣。

或曰：易之所謂仰以觀於天文。俯以察於地理者。謂在天成象。在地成形。聖人則之理而已矣。非真有所謂天也。祥符曰：理固可以則天。而不可謂天爲理。卽以詩書孔子之言證之。如曰：天降下民。不可謂理降下民也。如曰：天視自我民視。不可謂理視自我民視也。如曰：文王陟降在帝左右。不可謂在理左右也。如曰：上帝既命。不可謂上理既命也。

如曰：天生德於予。不可謂理生德於予也。如今九五之尊稱天子。不可謂理子也。儒之言天。亦彰明較著矣。但居人境而未能上徹乎天界。故極而稱之曰上帝。仰而望之曰彼蒼者天。蓋其視天固已高高而不可逾矣。抑知天地之大。亦自我一心而建立哉。

或曰：易有云：一陰一陽之謂道。繼之者善也。成之者性也。願聞其說。祥符曰：此一陰一陽。宜作體用看。繼宜作發用看。孟子曰：乃若其情。則可以爲善也。成宜作體具看。我固有之矣。非由外鑠我者也。故曰：成性存存道義之門。

問曰：治世之教。儒宗尙矣。儒宗道統孟子而後可得聞乎。今學士經生皆宗朱子而象山議論知見及良知良能之說。可參合乎祥符。陰曰：儒宗道統至孟子而大綱未墜。秦漢之間紛然龐雜。既未可語夫聖學之醇。卽唐昌黎振起斯文。推尊聖學。其功未爲不鉅然。亦未可語夫大道之要。至宋濂溪周子博學力行。著易說易通。上接洙泗。下逮河洛。

明道伊川兩程子承其學發孔孟心傳之秘蘊爲後世理學之淵藪秦漢而後實稱周程新安朱子經書集註會諸儒之全而得治世之要講學尊經使後世學者確然有畫一之章程可行可守朱子誠有功於聖學者矣橫渠張子見二程後深明易理而有意復三代之治故今之學者皆曰周程張朱謝上蔡游定夫楊龜山等皆遊二程之門上蔡之說一轉而爲張子詔再轉而爲陸子靜象山陸子幼時問其父曰天地何所窮際父笑而不答遂深思之至忘寢食後因讀書至宇宙二字解者曰四方上下曰宇往古來今日宙忽大省曰元來無窮乃援筆書曰宇宙內事乃已分內事已分內事乃宇宙內事又曰東海有聖人出焉此心同也此理同也西海有聖人出焉此心同也此理同也千百世之上有聖人出焉此心同也此理同也千百世之下有聖人出焉此心同也此理同也象山蓋已豁然貫通而明吾心之全體大用會萬物之表裏精粗矣明陽明龍溪兩王氏良知良能之說近

於象山合而論之朱子之格物致知是會用歸體下學上達博學於文約之以禮而可以弗畔也陸子之知致格物而曰六經皆我註脚卽周子之無極而太極無極而太極非謂太極之前有個無極無極生出那太極來無極而太極蓋欲人之不執太極以爲極不執太極以爲極而易之體用千變萬化不可端倪格物致知知致物格初非兩樣大學先言知止而后有定後言致知在格物條目亦自了然中庸言自誠明天之道自明誠人之道誠則明明則誠始終何嘗二致但修道立教主乎中庸陸子之言高明者德性可尊而朱子之言中庸之道不離問學也尊德性而道問學可分乎不可分乎教化雖有經權道體初無隔礙苟志於道河庸分門別徑於其間哉

問曰宋時理學諸儒究心禪宗潛有師承證悟者

未一如茂叔之於晦堂東林

周敦頤字茂叔春陵人初見晦堂心問教

外別傳之旨心諭之曰只消向你自己家裏打點孔子謂朝聞道夕死可矣畢竟以何爲道夕死可耶顏子不改其樂所樂何事但於此究竟久自然有箇契合處又扣東林總總曰吾佛謂實際理地卽真實

無妄誠也大哉乾元萬物資始資此實理乾道變化  
各正性命正此實理天地聖人之道至誠而已必  
著一路實地工夫直至於一旦豁然悟入不可只在  
言語上會又嘗與總論性及理法界事法界至於理  
事交徹冷然獨會遂著太極圖說語意出自東林口  
訣一日忽見窗前草生乃曰與自家意思一般作偈  
曰昔本不迷今不悟心融境會豁幽潛草深窗外松  
當道盡日令人看不厭嘗曰吾此妙心非東林啓迪  
無由表南軒拭之於菴菴頤張南軒拭字敬夫問  
裏洞然南軒拭之於菴菴頤張南軒拭字敬夫問  
似虛空藏碧落曾無少刺一毫芒後方疾革定更求  
教試曰謹絕人欲之私春伯淳答儒佛之問程顥  
融天理之妙語訖而逝伯淳曰公本處還有儒佛否  
異類曰公本處還有儒佛否定夫審同異之辯  
游辭字定夫官監察御史師事二程居仁問曰定  
夫既從二程學又從禪遊則儒釋兩家必無齟齬  
敢問所以不同何也醉答曰佛書所說世儒亦未深  
考嘗見伊川云吾之所攻者迹也然迹安所從出哉  
此事須親到此地方能辨其同異前輩往往不曾看  
佛書故誣之如此而其所破佛者乃佛書正不爲  
然者龜山亦有所得於東林楊時字中立世稱龜  
也論形色天性有所得和陳瑩中絕句曰畫前有易方  
知易歷上求玄恐未玄白首紛紛如成底事龜徒自  
老青晦菴之於妙喜開善烹字元晦號晦菴婺源  
編閱大慧語悟昭昭靈靈一著嘗致書開善謙曰向蒙  
妙喜開示從前記持文字心識計較不得置絲毫許  
在胸中但以狗子話時時提撕願投一語警所不達  
謙答曰某二十年不能到無疑之地後忽知非勇猛  
直前便是一刀兩段把這一念提撕狗子話頭不要  
商量不要穿鑿不要去知見不要強承當於言下  
有省有齋居誦經詩曰端居獨無事聊披釋氏書暫  
息塵勞累超然與道居門掩竹林幽禽鳴山雨餘了

此無爲法身心同晏如又曰佛氏之學與吾儒蓋相  
似如云有物先天地無形本寂寥能爲萬象主不遷  
四時調撥落非他物縱橫不是塵山河大地全露  
法王身看他甚是甚麼見識又曰佛家有二門曰教  
律曰禪禪皆不立文字直下識心見性律法甚嚴  
教延壽教亦只是講解吾儒若見得道理透就自己心  
上理會得本領便是兼得禪的講說解訂便是兼得  
教的動靜規矩便是兼得律的看來今人多言爲事  
所奪有妨講學此皆是不能使船離溪曲耳遇富貴  
就富貴上做工夫遇貧賤就貧賤上做工夫語有之  
還妄就嗜嗜著無一不是戲劇真不堪著眼也瑞巖  
和尚每日問常自問主人公惺惺否皆於禪學實  
有徹證師承俱秘而不言何也祥符蔭曰名教有  
儒釋之分道心無異同之別孟子曰君子深造之  
以道欲其自得之也自得之則居之安資之深取  
之左右逢其源詩云左之左之無不宜之右之右  
之無不有之唯其有之是以似之儒門君子不欲  
深造以道思自得之則已如欲深造以道思自得  
之而不究心禪宗證悟助發而能居之安資之深  
取之左右逢源者未之有也元公晦菴等諸子皆  
確有證悟唯其有之是以似之所以著述闡明聖  
人從上相承之道要而心傳無間理事交徹表裏

洞然爲後學之模楷。作治世之章程。良有以也。但儒釋門庭天然各別。治世出世之教不可相涉。如晝夜之不相到。如陰陽之不同用。迦文說法不及儒宗。豈佛塵刹分身有遺迹哉。誠以有可使由而不必使知者。顯密之機所宜然也。迦文之教未至。知迦文者孔子而已。孔子所謂西方之人有聖者焉。迦文是也。西狩獲麟。教流此土之象。麟者聖人之瑞。西者迦文之方。孔子書之喜其道之將至也。元公晦菴諸子主持儒宗。何獨不然。易地皆同。歸源無二。大凡造詣貴醇。而教化主一一。則使人趨向有定志。醇則使人踐履不分馳。儒門不顯言禪學者。欲以醇一之教正人心也。人心正則大道自明。資深逢源。如人飲水。冷暖自知。法身大士。豈分城壘於其間。哉。世間工巧伎藝。尙資助發。方臻其妙。矧學道者而可有所不造。其極乎夫死生之際。孔聖非絕而不言也。其所以爲教與宗門之機用。有相似處。而曰朝聞道夕死可矣者。深見道之不可不聞而死之不可以昧昧焉已也。又其朝聞之

道決非所謂仁義忠信也明矣。學佛知儒又何嫌焉。

或問孟子闢異端。距楊墨。世人不察。以異端爲佛老。願明其說。祥符陰曰。異端者非聖人之道。而別爲異端者也。聖人之道。自其身心而言。身欲修而心欲正。自其家國而言。家欲齊而國欲治。修身正心之道。在誠意致知格物。以明其明德也。齊家治國之道。在於孝事君弟事長。而明其明德於天下也。楊氏爲我是無君也。墨氏兼愛是無父也。無君無父。異於聖人之道矣。孟子闢之。距之以其異於聖人之道也。我佛設教。首重君親。而孝與忠實務乎其深且遠者。佛制戒律一則曰。孝順心。再則曰。孝順父母。出家學道。志在先報君親之恩。而非棄倫絕物。以背馳名教也。惻隱之心。仁之端也。佛之慈悲。則擴乎仁之全體。羞惡之心。義之端也。佛之禁戒。則充類至義之盡。辭讓之心。禮之端也。佛之清淨威儀。則盡天理節文。而極人事之儀。則是非之心。智之端也。佛之光明通達。則智周內外。而見

徹古今孟子之所謂仁義禮智皆聖道之大端而  
 佛教實統大端之全無以異也孟子道性善而曰  
 人皆可以為堯舜佛之言曰一切含靈皆有佛性  
 而各具如來智慧德相孟子之言曰盡其心者知  
 其性也知其性則知天矣佛直示人明心見性而  
 曰在天同天在人同人其言其教無以異也無以  
 異而何以曰異端聖人之道用處不同此猶就其  
 形迹言之若究其指歸審其精要則用處實無不  
 同也使孔子孟子之時而佛教已入此士孔子孟  
 子亦必信其道同而不以為異觀孔子之答商太  
 宰問聖可知矣而孔子豈過為推許哉又豈非孔  
 子之言而列子妄相稱述者哉孟子之言實與佛  
 教暗合而韓文公既未深入佛教又未詳觀楊墨  
 之所以異於聖道處及佛教之所以始終不異於  
 聖道處而槩以孟子之距楊墨為異端即以異端  
 目佛氏之徒加以以無父無君棄倫絕物之罪嗚  
 呼其亦未深求夫聖人之道而審思其同異也誠  
 深求夫聖人之道而審思其同異孔孟與佛豈有

一乎哉即以形迹言孔子棲棲四方孟子周遊列  
 國又豈區區以家室為念晨昏拜跪為急哉其與  
 學佛氏之徒相去蓋亦不甚遠也則佛老非異端  
 亦甚明矣何疑於孟子闢楊墨而有妨於佛教乎  
 莊列諸子南華等篇世多以為放又以為寓言初  
 非放也亦非寓言也思之當自得矣

敬王癸亥四十二年

甲子四十三年

乙丑四十四年

丙寅四十五年  
是年元王立政元  
又為元王元年

元王  
諱仁敬王子在位六年  
按諡法行義說民曰元

元王丁卯二年

戊辰三年

己巳四年

庚午五年

辛未六年

貞定王  
諱介元王子在位二十八年按諡  
法清白守節曰貞紀行不爽曰定  
貞定王壬申元年癸酉二年

甲戌三年

乙亥四年

丙子五年

丁丑六年

戊寅七年

己卯八年

庚辰九年

辛巳十年

壬午十一年

癸未十二年

甲申十三年

乙酉十四年

丙戌十五年

丁亥十六年

戊子十七年

己丑十八年

庚寅十九年 辛卯二十年

佛滅後五百年

壬辰二十一年 癸巳二十二年 甲午二十三年

乙未二十四年 丙申二十五年 丁酉二十六年

戊戌二十七年

己亥二十八年

祖付富那夜奢正法 入寂

祖至華氏國憩一樹下右手指地而告衆曰此地變金色當有聖人入會言訖即變金色時有長者子富那夜奢合掌前立祖問曰汝從何來曰我心非往祖曰汝何處住曰我心非止祖曰汝不定耶曰諸佛亦然祖曰汝非諸佛曰諸佛亦非祖因說偈曰此地變金色預知有聖至當坐菩提樹覺華而成已夜奢復說偈曰師坐金色地常說眞實義回光而照我令入三摩諦祖即度出家復具戒品而付法說偈曰眞體自然眞因眞說有理領得眞眞法無行亦無止祖付法已即見神變而入涅槃化火自焚舍利自空而下不可勝數四衆盛以衣

祇隨處建塔供養

第十一世祖

富那夜奢尊者華氏國人姓瞿曇氏父寶身有子七人祖最少幼與諸兄異尙嘗曰若遇大士坐於道場我則詣彼親近隨喜及遇脇尊者受法傳化

考王諱寔貞定王子在位十六年按證法德行有成曰考

考王庚子元年

第十一世祖富那夜奢尊者嗣宗統五十九年

辛丑二年

祖住世傳法

壬寅三年 癸卯四年 甲辰五年

乙巳六年 丙午七年 丁未八年

戊申九年 己酉十年 庚戌十一年

辛亥十二年 壬子十三年 癸丑十四年

甲寅十五年 乙卯十六年

威烈王諱午考王子在位二十四年按證法疆毅統正曰威乘德尊樂曰烈

威烈王丙辰元年丁巳二年 戊午三年

己未四年

庚申五年

辛酉六年

壬戌七年

癸亥八年

甲子九年

乙丑十年

丙寅十一年

丁卯十二年

戊辰十三年

己巳十四年

庚午十五年

辛未十六年

壬申十七年

癸酉十八年

甲戌十九年

乙亥二十年

丙子二十一年

丁丑二十二年

宋司馬光樂通鑑始於此年

戊寅二十三年

己卯二十四年

安王壽麟威烈王子在位二十六年按禮法好和不爭曰安

安王庚辰元年

辛巳二年

壬午三年

癸未四年

甲申五年

乙酉六年

丙戌七年

丁亥八年

戊子九年

己丑十年

庚寅十一年

辛卯十二年

壬辰十三年

癸巳十四年

甲午十五年

乙未十六年

丙申十七年

丁酉十八年

戊戌十九年景德傳燈錄作十四年者誤

祖付馬鳴正法 圓寂

祖教被無量得果者且五百矣因至波羅奈國有

一長者來趣其會祖謂衆曰汝等識此來者耶佛記聖者馬鳴紹吾法者也於是馬鳴致禮問曰我欲識佛何者卽是祖曰汝欲識佛不識者是馬鳴曰佛旣不識焉知是乎祖曰旣不識佛焉知不是曰此是鋸義祖曰彼是木義祖却問鋸義者何曰與師平出馬鳴因問木義者何祖曰汝被我解馬鳴豁然省悟遂求剃度祖謂衆曰此大士者昔爲毗舍利國王以其國有一類裸人如馬裸露王運神通令蠶以衣之後生中印度馬人感戀悲鳴故號馬鳴如來懸記滅度後六百年馬鳴當於波羅奈國摧伏異道度人無量今正是時遂付法偈曰迷悟如隱顯明暗不相離今付隱顯法非一亦非二付法已卽見神變湛然圓寂衆興寶塔以闍全身

第十二世祖

馬鳴大士波羅奈國人也又謂大士鳴琴馬感悲鳴故稱馬鳴大士亦名功勝善能開誘感導羣心造甘蔗論十萬偈

安王己亥二十年

第十二世祖馬鳴大士嗣宗統五十六年

祖作起信論

佛滅後六百年來弘法大士依三界唯心立性宗。依萬法唯識立相宗。各立門庭不能融通。互相是非。祖乃作起信論。以一之會相。歸性依一心法立。真如生滅二門。真如顯真心不迷之體。性不礙相也。生滅顯一心隨緣染淨之用。相不礙性也。人能識破妄相。會歸一心。所謂歸源無二。斯為一路涅槃門也。

庚子二十一年

祖住世傳法

辛丑二十二年

壬寅二十三年

癸卯二十四年

甲辰二十五年

乙巳二十六年

烈王諱喜安王子在位七年按證法乘德尊業曰烈

烈王丙午元年

丁未二年

戊申三年

己酉四年

庚戌五年

辛亥六年

壬子七年

顯王諱扁烈王弟在位四十八年證法未詳

顯王癸丑元年

甲寅二年

乙卯三年

丙辰四年

丁巳五年

戊午六年

己未七年

庚申八年

辛酉九年

壬戌十年

癸亥十一年

甲子十二年

乙丑十三年

丙寅十四年

丁卯十五年

戊辰十六年

己巳十七年

庚午十八年

辛未十九年

佛滅後六百年

壬申二十年

癸酉二十一年

甲戌二十二年

乙亥二十三年

丙子二十四年

丁丑二十五年

戊寅二十六年

己卯二十七年

庚辰二十八年

辛巳二十九年

壬午三十年

癸未三十一年

甲申三十二年

乙酉三十三年

丙戌三十四年

丁亥三十五年

戊子三十六年

己丑三十七年

庚寅三十八年

辛卯三十九年

壬辰四十年

癸巳四十一年

甲午四十二年景德傳燈錄作三十七年者誤

祖付迦毗摩羅大法眼藏 入定示滅

祖行化至華氏國說法之次忽有老人座前仆地。祖謂衆曰此非庸流當有異相言說不見俄從地湧出一金色人復化爲女子右手指祖而說偈曰。稽首長老尊當受如來記今於此地上宣通第一義說偈已瞥然不見祖曰將有魔來與吾校力有頃風雨暴至天地晦冥祖曰魔之來信矣吾除當之卽指空中見一大金龍奮發威神震動山嶽祖儼然於座魔事隨滅經七日有小蟲大若蟪蛄潛形座下祖以手取之示衆曰斯乃魔之所變盜聽吾法耳放之令去魔不能動祖告之曰汝但歸依三寶卽得神通遂復本形作禮懺悔祖問曰汝名誰耶眷屬多少曰我名迦毗摩羅有三千眷屬祖曰盡汝神力變化若何曰我化巨海極爲小事祖曰汝化性海得否曰何爲性海我未嘗知祖卽爲說性海曰山河大地皆依建立三昧六通由茲發見迦毗摩羅聞言遂發信心與徒衆三千俱求剃度祖乃召五百羅漢與授具戒復告之曰如來大

法眼藏今當付汝汝聽偈言隱顯卽本法明暗元不二今付悟了法非取亦非離付囑已卽入龍奮迅三昧挺身空中如日輪相然後示滅四衆藏眞體於龍龕

祥符蔭曰祖師未聞正法時多皆外道魔羅纔聞性海便成正覺洵乎至理一言轉凡成聖也放下屠刀千佛一數人亦何多自畫乎

宗統編年卷之四

宗統編年卷之五

第十三世祖

迦毗摩羅尊者華氏國人也初爲外道有徒三千通諸異論後於馬鳴尊者得法造無我論一百偈此論至處無魔不摧

顯王乙未四十三年

第十三世祖迦毗摩羅尊者嗣宗統

五十八年

丙申四十四年

祖住世傳法

丁酉四十五年 戊戌四十六年 己亥四十七年

庚子四十八年

慎觀王諱定顯王子在位六年證法未詳

慎觀王辛丑元年壬寅二年 癸卯三年

甲辰四年 乙巳五年 丙午六年

赧王諱延慎觀王子在位五十九年按證法喪國心懷曰赧

赧王丁未元年 戊申二年 己酉三年

庚戌四年 辛亥五年 壬子六年

癸丑七年 甲寅八年 乙卯九年

丙辰十年 丁巳十一年 戊午十二年

己未十三年 庚申十四年 辛酉十五年

壬戌十六年 癸亥十七年 甲子十八年

乙丑十九年 丙寅二十年 丁卯二十一年

戊辰二十二年 己巳二十三年 庚午二十四年

辛未二十五年 壬申二十六年 癸酉二十七年

甲戌二十八年 乙亥二十九年 丙子三十年

護髮度

丁丑三十一年 戊寅三十二年 己卯三十三年

庚辰三十四年 辛巳三十五年 壬午三十六年

癸未三十七年 甲申三十八年 乙酉三十九年

丙戌四十年 丁亥四十一年 戊子四十二年

己丑四十三年 庚寅四十四年 辛卯四十五年

壬辰四十六年景德傳燈錄作四十一一年者誤

祖付囑龍樹大法 示寂

祖領徒至西印度彼有太子名雲自在仰尊者名請於宮中供養祖曰如來有教沙門不得親近國王大臣有勢之家太子曰今我國城之北有大山焉山有一石窟可禪寂於此否祖曰諸郎入彼山行數里逢一大蟒祖直前不顧盤繞祖身祖因與授三歸依蟒聽訖而去祖將至石窟復有一老人素服而出合掌問訊祖曰汝何所止答曰我昔嘗爲比丘多樂寂靜有初學比丘數來請益而我煩於應答起嗔恨想命終墮爲蟒身住是窟中今已千載適遇尊者護聞戒法故來謝爾祖問曰此山更有何人居止曰此去十里有大樹陰覆五百大

龍其樹王名龍樹常爲龍衆說法我亦聽受耳祖遂與徒衆詣彼龍樹出迎曰深山孤寂龍蟠所居大德至尊何枉神足祖曰我非至尊來訪賢者龍樹默念曰此師能決定性明道眼否是大聖繼真乘否祖曰汝雖心語我已意知但辦出家何慮吾之不聖龍樹聞已悔謝祖卽與度脫及五百龍衆俱授具戒復告之曰今以如來大法眼藏付囑於汝諦聽偈言非隱非顯法說是眞實際悟此隱顯法非愚亦非智付法已卽見神變化火焚身龍樹收五色舍利建塔

#### 第十四世祖

龍樹尊者亦名龍勝豪貴家生少能誦四韋陀典善知衆藝才辯神明因作妖術敗出家誦盡閻浮經論自謂一切智人大龍愍之接入龍宮廣閱法藏遂爲龍衆所歸過摩羅尊者付法所化國王外道無數造大智度論中論十二門論等數十部性宗祖述於此

癸巳四十七年

第十四世祖龍樹尊者嗣宗統五十年  
甲午四十八年

#### 祖住世傳法

祖入龍宮閱藏傳華嚴經下本歸發明華嚴經乃法身大士所說非化佛及應化聖賢所說故不入前時教之列○龍宮閱藏在未付祖入龍宮看藏見華嚴經有三本上本十三世界微塵數偈一四天下微塵數品中本四十九萬八千八百偈一千二百品下本十萬偈四十八品上本非佛不能知中本惟住地菩薩乃能知之遂記下本回歸西土傳至東震僅八十卷三十九品乃前分三萬六千偈尙有六萬四千偈九品在西土雲棲宏曰宋儒有言讀一部華嚴經不如看一良卦此說高明者自知其謬庸劣者遂信不疑開邪見門塞圓乘路言不可不慎也假令說讀一部易經不如看一良卦然且不可況佛法耶況佛法之華嚴耶華嚴具無量門諸大乘經猶是華嚴無量門中之一門耳華嚴天王也諸大乘經侯封也諸小乘經侯封之附庸也餘可知矣

乙未四十九年 丙申五十年 丁酉五十一年  
 戊戌五十二年 己亥五十三年 庚子五十四年  
 辛丑五十五年 壬寅五十六年  
 祖至南印度化諸外道

祖行化至南印度彼有外道五千與大幻術王與國人靡然從之不知向佛祖感慨憫之易其威儀白衣持旛每俟王出則趨其前或隱或顯如是者七載王一日忽異之問曰汝何者而前吾行追之不得縱之不去祖曰吾是智人知一切法王曰汝知諸天今何所爲祖曰天今與修羅方戰王曰何以明之祖曰頃則徵矣俄有戈戟手足自空紛然而下王遂大敬信命諸外道皆歸禮祖祖悉化之令歸三寶

癸卯五十七年 甲辰五十八年  
 乙巳五十九年 是年西周亡  
 東周君惠公 立七年  
 惠公丙午元年 丁未二年 戊申三年

己酉四年 庚戌五年 辛亥六年  
 佛滅後七百年

壬子七年 是年周亡戰國七雄相次歸秦

秦 都咸陽今西安府其先柏翳佐舜有功賜姓嬴後有非子封于秦秦仲始大莊襄并周而有天下國號秦

莊襄王 諱楚孝文王子在位三年按禮法武而不遂曰莊辟地有德曰襄

秦莊襄王癸丑二年 前壬子年改元

甲寅三年

始皇帝 諱政實姓呂氏在位及并天下即位共三十七年

秦王政乙卯元年丙辰二年 丁巳三年

戊午四年 己未五年 庚申六年

辛酉七年 壬戌八年 癸亥九年

甲子十年 乙丑十一年 丙寅十二年

丁卯十三年 戊辰十四年 己巳十五年

庚午十六年 辛未十七年 壬申十八年

癸酉十九年 甲戌二十年 乙亥二十一年

丙子二十二年 丁丑二十三年 戊寅二十四年

己卯二十五年 庚辰二十六年 是年秦并六國自立爲始皇帝

始皇辛巳二十七年

壬午二十八年

癸未二十九年

沙門室利昉等一十八人來自西域帝惡其異俗以付獄俄有金剛

神碎獄門而出帝懼印厚禮遣之

甲申三十年

乙酉三十一年

丙戌三十二年

丁亥三十三年

是年築長城

戊子三十四年

是年秦燒詩書諸子百家語

寶雲潛曰震旦聖人之徒其在震旦者讀震旦聖

人之書則不能見震旦聖人之書之真也西方聖

人之徒其在震旦者讀西方聖人之書則實能見

西方聖人之書之真也夫震旦中西方聖人之徒

之於西方聖人地之相去如此其遠也其風氣習

俗不能無殊越也而震旦中西方聖人之徒實能

見西方聖人之書之真震旦中震旦聖人之徒讀

震旦聖人之書萬不及震旦中西方聖人之徒者

此其故何也嬴秦氏則震旦之一大界限也震旦

國自秦焚書已前則猶之大河已北也自秦焚書

已後則猶之大河已南也震旦歷代聖人之書非

不詳且備也李斯作載籍一空至漢始除挾書

西方疑震旦

之律而名書間出夾雜真僞後來唐宋諸家各釋

其說以爲震旦聖人之書而聖人之大經大法往

往雲埋霧塞而不可問而西方聖人之書自白馬

駝經已來雖音言傳譯而聖人之旨未有改也故

震旦中震旦聖人之徒不能見西方聖人之書之

真而震旦西方聖人之徒能見西方聖人之書也

真也

己丑三十五年

祖付法於迦那提婆 入月輪三昧示寂

南印度人多信福業祖爲說法通相謂曰人有福

業世間第一徒言佛性誰能觀之祖曰欲見佛性

先除我慢彼曰佛性大小祖曰非大非小非廣非

狹無福無報不死不生彼聞理勝悉回初心祖於

座上見自在身如滿月輪一切衆惟聞法音不觀

祖相彼衆中有長者子名迦那提婆謂衆曰識此

相否衆曰目所未親安以知之提婆曰此是尊者

見佛性體相以示我等蓋以無相三昧形如滿月

佛性之義廓然虛明言訖輪相即隱復居本座而

說偈言身見圓月相以表諸佛體說法無其形用  
辨非聲色彼衆聞偈頓悟無生咸願出家以求解  
脫祖卽爲剃髮命諸聖授具乃付法於迦那提婆  
而說偈曰爲明隱顯法方說解脫理於法心不證  
無瞋亦無喜付法已入月輪三昧廣見神變復座  
凝然入寂及七日天雨舍利尊者復於座指空語  
衆曰昔拘那含佛弟子摩訶迦尊者有三願一爲  
佛時凡有聖士化度則天澍雨及其身皆爲舍利  
二大地所生皆堪爲藥療衆生病三凡有智者皆  
得所知微妙以通宿命今雨舍利摩訶迦神力也  
言已復寂迦那提婆與衆建塔闍其全身  
祥符蔭曰祖證實相般若才辯無礙故於座上見  
滿月輪使一切衆唯聞法音而不覩相復住月輪  
三昧凝然入寂蓋定慧等持達佛體性者矣  
祥符蔭曰別傳之道不立文字非棄文字也昔尹  
焯問朱晦菴曰易乾坤二卦斯可矣晦菴曰聖人  
設六十四卦三百八十四爻後世尙不能了坤乾  
二卦豈能盡也旣而曰子以爲何人分上事對曰

聖人分上事曰若是聖人分上事乾坤二卦亦不  
須況六十四卦乎是知道非語言文字詳明辨別  
孰從卽會其真而領其全乎馬鳴龍樹諸祖豈非  
傳佛心印而悟正法眼藏者乎各著論辯摧邪顯  
正非不能忘言也救世之心切也今之昧味固陋  
者謬扯不立文字之名以蓋已之粗鄙而且不識  
語言文字爲何等樂以一言蔽之曰文字禪噫文  
字禪豈易言哉是猶貧兒傭丐欲博一餐之利且  
無從而詫笑大富長者之揮金濟衆爲虛費則亦  
不自知其量也已

#### 第十五世祖

迦那提婆尊者南天竺國人也姓毗舍羅初求  
福業兼樂辯論後謁龍樹祖將及門祖知是智  
人先遣侍者以滿鉢水置於座前尊者觀之卽  
以一針投之而進欣然契會祖卽爲說法不起  
於座見月輪相語具龍樹祖章

秦始皇庚寅三十六年

第十五世祖迦那提婆尊者嗣宗統五十年

辛卯三十七年

祖住世傳法

二世諱胡亥始皇子在位三年

二世壬辰元年 癸巳二年

甲午三年 是年二世爲趙高所殺

漢都長安姓劉氏

高帝諱邦字季以布衣起兵破秦滅楚而成帝業在位十二年

漢高帝乙未元年 丙申二年 十月五星聚東井

丁酉三年 戊戌四年 己亥五年

庚子六年 辛丑七年 壬寅八年

癸卯九年

甲辰十年

祖折伏外道

祖至巴蓮弗城聞諸外道欲障佛法計之既久祖乃執長旛入彼衆中彼問祖曰汝何不前祖曰汝何不後彼曰汝似賤人祖曰汝似良人彼曰汝解何法祖曰汝百不解彼曰我欲得佛祖曰我灼然得佛彼曰汝不合得祖曰元道我得汝實不得彼

曰汝既不得云何言得祖曰汝有我故所以不得我無我我故自當得彼辭既屈乃問祖曰汝名何等祖曰我名迦那提婆彼既夙聞祖名乃悔過致謝時衆中猶互與問難祖折以無礙之辯由是歸伏

乙巳十一年 丙午十二年

惠帝諱盈高帝子在位七年

惠帝丁未元年 戊申二年 己酉三年

庚戌四年 辛亥五年 壬子六年

癸丑七年

少帝呂高后臨朝稱制共八年

少帝甲寅元年 乙卯二年 是年少帝廢

高后丙辰三年 丁巳四年 戊午五年

己未六年 庚申七年 辛酉八年

文帝諱恒高帝中子在位二十三年慈惠愛人曰文

文帝壬戌元年 癸亥二年 甲子三年

乙丑四年 丙寅五年 丁卯六年

戊辰七年 己巳八年 庚午九年

辛未十年 壬申十一年 癸酉十二年

甲戌十三年 乙亥十四年 丙子十五年

丁丑十六年 戊寅後元元年 己卯二年

庚辰三年

祖付羅喉羅多正法 示寂

祖至迦毗羅國。彼有長者曰梵摩淨德。一日園樹生耳如菌。味甚美。唯長者與第二子羅喉羅多取而食之。取已隨長。盡而復生。自餘親屬皆不能見。祖知其宿因。遂至其家長者。乃問其故。祖曰。汝家昔曾供養一比邱。然此比邱道眼未明。以虛語信。施故報為木菌。惟汝與子精勤供養。得以享之又問長者年多少。曰七十有九。祖乃說偈曰。入道不遁理。復身還信。施汝年八十一。此樹不生耳。長者聞偈已。彌加歎伏。曰。弟子衰老。不能事師。願捨次子。隨師出家。祖曰。昔如來記此子當第二五百年為大教主。今之相遇。蓋符宿因。即與剃髮而付法。眼偈曰。本對傳法人。為說解脫理。於法實無證。無終亦無始。付法已入奮迅。定身放八光而歸寂滅。

學衆興塔供養

第十六世

羅喉羅多尊者迦毗羅國人也

辛巳後元五年

第十六世祖羅喉羅多尊者嗣宗統四十

壬午五年

祖住世傳法

癸未六年 甲申七年

景帝諱啓文帝子在位十六年布義行剛曰景

景帝乙酉元年 丙戌二年 丁亥三年

戊子四年 己丑五年 庚寅六年

辛卯七年

佛滅後八百年

壬辰中元元年 癸巳二年 甲午三年

乙未四年 丙申五年 丁酉六年

戊戌後元元年 己亥二年 庚子三年

武帝諱徹景帝子在位五十四年威靈睿德曰武

武帝辛丑建武元年始建 壬寅二年

癸卯三年

甲辰四年

乙巳五年

丙午六年

丁未元光元年

戊申二年

己酉三年

庚戌四年

辛亥五年

壬子六年

癸丑元朔元年

甲寅二年

乙卯三年

丙辰四年

丁巳五年

戊午六年

己未元狩元年

驃騎將軍霍去病討休屠王獲

其金人率長丈餘帝以爲大神列于甘泉宮不祭祀但令燒香禮拜

庚申二年

辛酉三年

壬戌四年

癸亥五年

甲子六年

乙丑元鼎元年

丙寅二年

丁卯三年

戊辰四年

祖付僧伽難提法眼 示寂

祖行化至室羅筏城有河名曰金水其味殊美中

流復見五佛影祖告衆曰此河之源凡五百里有

聖者僧伽難提居於彼處佛志一千年後當紹聖

位語已傾諸學衆迦流而上至彼見僧伽難提安

坐入定祖與衆伺之經三七日方從定起祖問曰

汝心定耶身定耶提曰身心俱定祖曰身心俱定

何有出入提曰雖有出入不失定相如金在井金

體常寂祖曰若金在井若金出井金無動靜何物

出入提曰言金動靜何物出入言金出入金非動

靜祖曰若金在井出者何金若金出井在者何物

提曰金若出井在者非金若金在井出者非物祖

曰此法不然提曰彼義非著祖曰此義當墮提曰

彼義不成祖曰彼義不成我義成矣提曰我義雖

成法非我故祖曰我義已成我無我故提曰我無

我故復成何義祖曰我無我故故成汝義提曰仁

者師誰得是無我祖曰我師迦那提婆證是無我

難提以偈讚曰稽首提婆師而出於仁者仁者無

我故我欲師仁者祖以偈答曰我已無我故汝須

見我我汝若師我故知我非我我難提心意豁然

即求度脫祖曰汝心自在非我所繫語已即以右

手擎鉢舉至梵宮取彼香飯將齋大衆而大衆

忽生厭惡之心祖曰非我之咎汝等自業即命難

提分座同食衆復訝之祖曰汝不得食皆由此故

當知與吾分座者即過去娑羅樹王如來也啓物

跡汝輩亦莊嚴劫中已至三果而未證無漏者也。衆曰：我師神力斯可信矣。彼云：過去佛者，卽竊疑焉。難提知衆生慢，乃曰：世尊在日世界，平正無有邱陵江河溝洫水悉甘美，草木滋茂，國土豐盈，無八苦行十善，自變樹示滅八百餘年。世界邱墟草木枯瘁，人無至信，正念輕微，不信真如，惟愛神力，言訖以右手漸展入地，至金剛輪際，取甘露水，以琉璃器持至會所，大衆見之，卽時欽慕，悔過作禮。於是祖命僧伽難提而付法，眼偈曰：於法實無證不取，亦不離法，非有無相，內外云何？起難提聞命，敬奉勤至，復說偈讚曰：善哉大聖者，心明逾日月，一光照世界，暗魔無不拔。祖付法已，安坐歸寂，四衆建塔。

第十七世祖

僧伽難提尊者，室羅筏城寶莊嚴王之子也。生而能言，常讚佛事。七歲卽厭世榮，以偈告父母曰：稽首大慈父和南骨血母，我今欲出家，幸願哀愍。故父母固止之，遂終日不食，乃許其在家。

出家號僧伽難提，命沙門禪利多爲之師。積十九載，未嘗疲倦。每自念言：身居王宮，何爲出家？一夕天光下，矚見一路坦平，不覺徐行約十里，許至大巖前有石窟焉，乃燕寂於中。經十年，值羅睺羅多尊者得法受記。

武帝己巳元鼎五年

第十七世祖僧伽難提尊者嗣宗統

三十  
九年

庚午六年

祖住世傳法

辛未元封元年 壬申二年 癸酉三年

甲戌四年 乙亥五年 丙子六年

丁丑太初元年 戊寅二年 己卯三年

庚辰四年 辛巳天漢元年 壬午二年

癸未三年 甲申四年 乙酉太始元年

丙戌二年 丁亥三年 戊子四年

己丑征和元年 庚寅二年 辛卯三年

壬辰四年 癸巳後元元年 甲午二年

昭帝諱弗陵武帝子在位十二年  
改元者三聖聞周達曰昭

昭帝乙未始元元年

丙申二年

丁酉二年

戊戌四年

己亥五年

庚子六年

辛丑元鳳元年

壬寅二年

癸卯三年

甲辰四年

乙巳五年

丙午六年

丁未元平元年

祖付伽舍耶多法 立化

祖行化至摩提國忽有涼風襲衆身心悅適非常而不知其然祖曰此道德之風也當有聖者出世嗣續祖燈乎言訖以神力攝諸大衆遊歷山谷食頃至一峯下謂衆曰此峯頂有紫雲如蓋聖人居此矣卽與大衆徘徊久之見山舍一童子持圓鑑直造祖前祖問汝幾歲耶曰百歲祖曰汝年尙幼何言百歲曰我不會理正百歲耳祖曰汝善機耶曰佛言若人生百歲不會諸佛機不如生一日而得決了之祖曰汝手中者當何所表曰諸佛大圓鑑內外無瑕翳兩人同得見心眼皆相似彼父母聞子語卽捨令出家祖携至本處受具戒訖名伽

耶舍多他時聞風吹殿鈴聲祖問曰鈴鳴耶風鳴耶舍多曰非風鈴鳴我心鳴耳祖曰心復誰乎舍多曰俱寂靜故祖曰善哉善哉繼吾道者非子而誰卽付法眼偈曰心地本無生因地從緣起緣種不相妨華果亦復爾祖付法已右手攀樹而化大衆議曰尊者樹下歸寂其垂蔭後裔乎將奉全身於高原建塔衆力不能舉卽樹下起塔

第十八世祖

伽耶舍多尊者摩提國人也姓鬱頭藍父天蓋母方聖嘗夢天神持鑑因而有娠凡七日而誕肌體瑩如琉璃未嘗洗沐自然香潔幼好閒靜語非常童持鑑出遊遇難提尊者得法

宣帝初名病已更名詢武帝曾孫在位二十五年改元者七聖善周聞曰宣

宣帝戊申本始元年

第十八世祖伽耶舍多尊者嗣宗統六十年

己酉二年

祖住世傳法

庚戌三年

辛亥四年

壬子地節元年

癸丑二年	甲寅三年	乙卯四年
丙辰元康元年	丁巳二年	戊午三年
己未四年	庚申神爵元年	辛酉二年
壬戌三年	癸亥四年	甲子五鳳元年
乙丑二年	丙寅三年	丁卯四年
戊辰甘露元年	己巳二年	庚午三年
辛未四年		
佛滅後九百年	北天竺天親無著 造瑜伽唯識等論	
壬申黃龍元年		
元帝 <small>諱爽宣帝子在位十六年 改元者四行義悅民曰元</small>		
元帝癸酉初元元年	甲戌二年	
乙亥三年	丙子四年	丁丑五年
戊寅永光元年	己卯二年	庚辰三年
辛巳四年	壬午五年	癸未建昭元年
甲申二年	乙酉三年	丙戌四年
丁亥五年	戊子竟寧元年	
成帝 <small>諱驁元帝子在位二十六年 改元者七安民立政曰成</small>		
成帝己丑建始元年		庚寅二年

辛卯三年	壬辰四年	癸巳河平元年
甲午二年	乙未三年	丙申四年
丁酉陽朔元年	戊戌二年	己亥三年
庚子四年	辛丑鴻嘉元年	壬寅二年
癸卯三年	甲辰四年	乙巳永始元年
丙午二年	丁未三年	
戊申四年		

祖付鳩摩羅多法 示寂

祖領徒至大月氏國見一婆羅門舍有異氣祖將入彼舍舍主鳩摩羅多問曰是何徒衆祖曰是佛弟子彼聞佛號心神竦然卽時閉戶祖良久扣其門羅多云此舍無人祖曰答無者誰羅多聞語知是異人遽開關延接祖曰昔世尊記曰吾滅後一千年有大士出見於月氏國紹隆玄化今汝值吾應斯嘉運於是鳩摩羅多發宿命智投誠出家授具訖付法偈曰有種有心地因緣能發萌於緣不相礙當生生不生祖付法已躡身虛空見十八變化火三昧自焚其身衆以舍利建塔

第十九世祖

鳩摩羅多尊者大月氏國婆羅門之子也昔爲

自在天人見菩薩瓔珞忽起愛心墮生忉利聞

憍尸迦說般若波羅蜜多以法故升梵天以根

利故善說法要諸天尊爲導師以繼祖時至降

月氏國受舍多尊者記

成帝己酉元延元年

第十九世祖鳩摩羅多尊者嗣宗統四十

庚戌二年

祖住世傳法

辛亥三年

壬子四年

癸丑綏和元年

鄒水使者劉向集列仙傳檢藏得梵本佛經六十餘卷編入仙傳

甲寅二年

哀帝 諱欣元帝庶孫在位六年改元者二恭仁短折曰哀

哀帝乙卯建平元年

丙辰二年

丁巳三年

戊午四年

己未元壽元年

庚申二年

平帝 諱衍元帝庶孫在位五年改元者一布綱治紀曰平

平帝辛酉元始元年

壬戌二年

癸亥三年

甲子四年

乙丑五年

孺子嬰 宣帝玄孫立三年

丙寅居攝元年

丁卯二年

戊辰初始元年

己巳 新莽始建國

元年庚午二年

辛未三年

壬申四年

癸酉五年

甲戌天鳳元年

乙亥二年

丙子三年

丁丑四年

戊寅五年

己卯六年

庚辰地皇元年

辛巳二年

壬午三年

是年漢立春陵戴侯之曾孫玄改元更始後詔封爲淮陽王

祖付閭夜多法 示神變入寂

祖至中天竺國有大士名閭夜多問曰我家父母素信三寶而常縈疾瘵凡所營作皆不如意而我鄰家久爲旃陀羅行而身常勇健所作和合彼何幸而我何辜祖曰何足疑乎且善惡之報有三時焉凡人但見仁天暴壽逆吉義凶便謂亡因果虛罪福殊不知影響相隨毫釐靡忒縱經百千萬劫亦不磨滅時閭夜多聞是語已頓釋所疑祖曰汝

雖已信三業而未明業從惑生惑依識有識依不覺不覺依心心本清淨無生滅無造作無報應無勝負寂寂然靈靈然汝若入此法門可與諸佛同矣一切善惡有爲無爲皆如夢幻闇夜多承言領旨卽發宿慧懇求出家既受具祖告曰吾今寂滅時至汝當紹行化跡付法眼偈曰性上本無生爲對求人說於法既無得何懷決不決又云此是妙音如來見性清淨之句汝宜傳布後學言訖卽於座上以指爪撈面如紅蓮開出大光明照耀四衆而入寂滅闇夜多建塔以奉全身

祥符蔭曰大道不言禍福至理自有休咎吉凶影響善慶惡殃書傳亦明言之矣但三時交互毫釐靡貳非智眼周知不能洞悉觀祖之言世有疑者可燎然矣若能了知業識依心心本清淨則盡心知性立命知天一切自由又豈有心外之惑乎

宗統編年卷之五

宗統編年卷之六

第二十世祖

闇夜多尊者北天竺國人也智慧淵冲化導無量

癸未更始元年

第二十世祖闇夜多尊者嗣宗統二十年

甲申二年

祖住世傳法

東漢

光武皇帝諱秀復興漢室在位三十三年改元者二能紹前業曰光克定禍亂曰武

光武乙酉建武元年

丙戌二年

丁亥三年

戊子四年

己丑五年

庚寅六年

辛卯七年

壬辰八年

癸巳九年

甲午十年

乙未十一年

丙申十二年

丁酉十三年

戊戌十四年

己亥十五年

庚子十六年

辛丑十七年

壬寅十八年

癸卯十九年

甲辰二十年

乙巳二十一年 丙午二十二年 丁未二十三年

戊申二十四年 己酉二十五年 庚戌二十六年

辛亥二十七年

佛滅後一千年 此後東土應化諸聖賢相次造論明道

壬子二十八年 癸丑二十九年 甲寅三十年

乙卯中元元年 丙辰二年 京師禮泉出飲者疾愈

丁巳三年

明帝 諱莊光武帝子在位十八年收元者一照臨四方曰明

明帝戊午永平元年 己未二年

庚申三年

辛酉四年

帝感夢金身光臨殿廷命使西行尋求佛經 發明

嘗帝感夢見時至緣應也如來滅度已千餘年大法東漸羣機啓迪然後禪宗應運直接上根無上法利

自帝肇之謂非靈山會上親承付囑而能然乎

帝夢神人金身丈六頂有日光飛行殿廷欣然悅

之博問羣臣通人傅毅對曰臣聞天竺有得道者

號曰佛飛行虚空身有神光帝之所夢將毋是乎

帝恍然遣中郎將蔡愔博士王遵秦憬等一十八

人往大月氏中天竺國尋求佛法

別證 梓潼帝君云予受業報為叩池龍驪于積水之下連年旱虐水復為泥身既廣大無穴可容烈日上臨內外熱惱諸鱗甲中各生小蟲啣噬困苦一日晨涼天光忽開五色雲氣浮光而過中有瑞相紺髮螺旋念容月瑩山靈河伯萬眾稽首讚歎歡喜聲動天地天香繚繞隨處生春予乃仰首哀號乞垂教度萬靈諸聖咸謂予曰此西方大聖正覺世尊釋迦文佛也今以教法流行東土隨教化身將往中國爾既遭逢宿業可脫予乃身自踰躍入天光中具陳往昔報應之理世尊答言善哉帝子汝于向來孝家忠國又復憫世生護持心因果未周譬敵相爭以人我相肆與殘忍還怒于物業債當償今復自悔欲求解脫汝于此時復有冤親之想與夫瞋患愚癡念否予聞至理心地開明內外豁然如虛空住自顧其身隨念消滅復為男子得灌頂智予歸依焉

祥符蔭曰詳夫佛氏之為教也本乎一心成於萬行不住於相不滯於空見天人之原明死生之致於世有益於人無損乃徒執其形迹而不究其指歸謂之為空謂之為棄倫遺世謂之為不耕而食不織而衣是亦未曾就常人之身心生死而切實思之者也夫今此身生何以生死何以死不可茫茫無著也此心之量何所際何以能盡其量不可出入無時莫知其鄉也佛教非空也以不執著萬行為相猶如世之大功不宰也佛非棄倫遺世也

行不住於相不滯於空見天人之原明死生之致於世有益於人無損乃徒執其形迹而不究其指歸謂之為空謂之為棄倫遺世謂之為不耕而食不織而衣是亦未曾就常人之身心生死而切實思之者也夫今此身生何以生死何以死不可茫茫無著也此心之量何所際何以能盡其量不可出入無時莫知其鄉也佛教非空也以不執著萬行為相猶如世之大功不宰也佛非棄倫遺世也

正思以道報夫君親四重之恩而思以道脫此愛憎牽纏之苦也。至於不耕不織亦復何限。何尊梓匠輪輿而輕於爲道也。佛未嘗強人之不欲也。道未嘗不可以隨地而求也。今之不信佛而并棄絕夫道也。謂之何哉。

或問祥符曰。禪宗何以不徑來此土而先之以夢感經像何也。且佛何以不見化此土而化之以像法又何也。祥符曰。佛雖大慈不應無緣。道雖本有必須機感。佛生西竺。尙然說法四十九年。曲引羣生。漸令純熟。各各諦信。知有不疑而後拈花微笑。始暢出世本懷。況此土衆生心思剛強。根器不一。驟以無上大道直指示之。夫孰從而信之行之哉。以故像法先來。示夢感動亦猶四十九年之垂慈也。歷年四百六十餘年。經律廣演。人人知有然後達摩於梁大通元年傳佛心印而來。直接上根廣設法藥。亦猶佛之末後拈花也。此土衆生未嘗有緣感佛。此佛所以不見化此土也。此土衆生雖未嘗於佛有緣而佛運無緣慈廣度衆生。此以像法

化之而信者疑者讚之謗之俱沾其法化也。故曰謗佛是成佛。因謗之之久則自信矣。唯并不知謗則猶遠之遠矣。奈之何哉。

壬戌五年

癸亥六年

甲子七年

乙丑八年

丙寅九年

丁卯十年

戊辰十一年

使奉像經還

惜等從天竺求得優填王所畫佛像及四十二章經。並請沙門摩騰竺法蘭同歸。十二月三十日至洛陽。帝問騰曰。法王出世何以化不及此。騰對曰。迦毗羅衛國者三千大千世界百億日月之中心也。三世諸佛皆在彼生。乃至天龍鬼神有願行者皆生於彼。受佛正化。咸得悟道。餘處衆生無緣感佛。佛不往也。佛雖不往。光明及處或五百年或一千年外皆有聖人傳佛聲教而化導之。帝信重之。詔立寺於西雍門外。額曰白馬。奉供佛像。壁畫千乘萬騎莊嚴圍繞。又於南宮清涼臺及開陽城門上圖佛儀像以示臣民。

按唐沙門道宣後漢傳譯佛經錄序曰。教流源起實

本姬周秦政殄之遠蹤問出劉向校書天祿閣往往見有佛經及向刪列仙傳云七十四人已見佛經據此則經法之來及應化之士不自漢明之世但以自此已後教乃大顯三寶昭然故肇列之

己巳十二年

庚午十三年

沙門竺法蘭譯出本行經并十地斷結四十二章經

此譯經之始故書

辛未十四年

五嶽諸山表請焚經驗法 道士呂惠通等感化出

家此震旦出家之始

正月一日五嶽道士上表曰五嶽十八山觀太上三洞弟子褚善信等一千三百一十人死罪上言臣聞太上無形無名無極無上虛無自然大道出於造化之前上士同遵百王不易今陛下道邁羲皇德高堯舜竊承陛下棄不逐末求教西域所事乃是胡神所說不參華夏願陛下恕臣等罪聽與試驗臣等諸山道士多有徹視遠聽博通經典從元皇已來太上羣錄太虛符呪無不綜練達其涯極或策使鬼神吞霞飲氣或入火不燒履水不溺

法亂正更勘  
小口註邪

或白日昇天隱形不測至於方術無所不能願與其比校一則聖上意安二則得辨真僞三則大道有歸四則不亂華俗臣等若此對不如任聽重決如其有勝乞除虎妄勅遣尙書令宋均引入長樂宮以今月十五日可集白馬寺道士等便置三壇壇別開二十四門南嶽道士褚善信華嶽道士劉正念恒嶽道士桓文度岱嶽道士焦德心嵩嶽道士呂惠通霍山天目山五臺山白鹿等八山道士祁文信等都合六百九十人各持靈寶真文太上玉訣三元符籙等五百九卷置於西壇茅成子許成子黃子老子等二十七家子書有三百三十五卷置於中壇饌食奠祀百神置於東壇帝時御行殿在寺南門以佛舍利經像置於道西十五日齋訖道士等以柴荻和檀沉香爲炬繞經而泣曰臣等上啓太極大道元始天尊衆仙百靈今胡口口人主信口正教失蹤玄風墜緒臣等敢置經壇上以火取驗欲使開示羣心得辨真僞使縱火焚經經從火化悉成灰燼道士等相顧失色大生怖

懼將欲昇天隱形者無力可能禁効鬼神者呼策不應各懷報愧南嶽道士費叔才自感而死太傅張衍語諸善信曰卿等所試無驗即是虛妄宜就西來眞法善信曰茅成子云太上者靈寶天尊是也造化之初謂之太素斯豈妄乎衍曰太素有貴德之名無言教之稱今子說有言教卽爲妄也信便默然次將梵本火然赫奕不燬時佛舍利光明五色直上空中旋環如蓋遍覆大衆映蔽日光摩騰法師踴身高飛坐臥在空廣見神變於時天雨寶華在佛僧上又聞天樂感動人情大衆咸悅歎未曾有皆繞法蘭請說法要蘭乃出大梵音歎佛功德亦令大衆稱三寶說善惡諸業皆有果報六道三乘諸相不一以說出家功德其福最高初立佛寺同梵福量時有司空陽成候劉峻與諸士庶等千餘人出家及四嶽諸山道士呂惠通等六百二十人出家徐夫人王婕妤等與諸宮人婦女等二百三十人出家至月末以來日日供設種種行施法衣瓶器並出所司便立十寺七寺安僧在城

邑外三寺安尼在雒城內唐太宗焚經臺時門徑蕭蕭長綠苔一回登此非憑烈欲要分眞僞築高臺春風也解嫌狼藉吹滅當年道教灰

祥符蔭曰凡人習常見近不有生疑孰能啓信焚經角法焉知非乘權示見以顯大法之正眞她羣生之信向乎顯宗之朝躬幸辟雍養老問難王侯子弟莫不受經殊方遣子入學洋洋濟濟蓋文明盛大之廷也使佛法果有一毫虛僞邪僻彼桓榮李躬之倫見識甯遂不逮今時之人而昧昧無言乎至其威德光明昭示一切使目擊者心歸抗衡者意伏決非有術而能使之然也後起者可以思矣

壬申十五年 癸酉十六年

甲戌十七年

祖付婆修盤頭正法眼藏 示神變入滅

月支國王躬詣問法祖曰大王來時好道今去亦如來時王歎服後至羅閱城敷揚頓教彼有學衆惟尙辯論爲之首者名婆修盤頭此云常一食不徧行

臥六時禮佛清淨無欲爲衆所歸。祖將欲度之。先問彼衆曰。此偏行頭陀。能行梵行。可得佛道乎。衆曰。我師精進。何故不可。祖曰。汝師與道遠矣。設苦行歷於塵劫。皆虛妄之本也。衆曰。尊者蘊何德行。而譏我師。祖曰。我不求道。亦不顛倒。我不禮佛。亦不輕慢。我不長坐。亦不懈怠。我不一食。亦不雜食。我不知足。亦不貪慾。心無所希。名之曰道。時偏行聞已。發無漏智。歡喜讚歎。祖又語彼衆曰。會吾語否。吾所以然者。爲其求道心切。夫絃急卽斷。故吾不贊令其安住樂地。入諸佛智。復告偏行曰。吾適對衆挫抑。仁者得無惱於衷乎。偏行曰。我憶念七劫前生。常安樂國。師於智者。月淨記我。非久當證斯陀含果。時有大光明菩薩出世。我以老故。策杖禮謁師。叱我曰。重子輕父。一何鄙哉。時我自謂無過。請師示之。師曰。汝禮大光明菩薩。以杖倚壁畫佛面。以此過慢。遂失二果。我責躬悔過以來。聞諸惡言。如風如響。況今獲聞無上甘露。而反生熱惱耶。惟願大慈。以妙道垂誨。祖曰。汝久植衆德。當繼

吾宗聽吾偈曰。言下合無生。同於法界性。若能如是解。通達事理。竟祖付法。已於其座上。以首倒植象婆羅樹枝。奄然而化。衆欲闍維。百千人舉之。不能乃至。諸羅漢以神力舉之。亦不能動。衆乃炷香祝之。遂頽然委地。闍維收舍利建塔。

### 第二十一世祖

婆修盤頭尊者。羅閱城人。姓毗舍佉。父光蓋母嚴。一家富無子。禱於佛塔。夢吞明珠。二珠因孕。經七日有羅漢名賢衆至。其家光蓋設禮賢衆。端坐受之。嚴一出拜賢衆。避席云。回禮法身大士。光蓋疑之。賢衆曰。汝婦懷聖子。當爲世慧燈。日故吾避之。然當一乳而生二子。一名婆修盤頭。則吾所尊者也。二名芻尼。昔如來雪山修道。芻尼巢於頂上。佛旣成道。芻尼受報爲那提國王。佛記云。汝至第二五百年。生羅閱城。毗舍佉家。與聖同胞。今無爽矣。後果誕二子。尊者婆修盤頭。年十五。禮光度羅漢出家。感毗婆訶菩薩與之授戒。後於闍夜多尊者得法。

明帝乙亥永平十八年

第二十一世祖婆修盤頭尊者嗣宗統三十年

章帝諱炁明帝子在位十三年  
改元者三溫克令儀曰章

章帝丙子建初元年

祖住世傳法

丁丑二年

戊寅三年

己卯四年

庚辰五年

辛巳六年

壬午七年

癸未八年

甲申元和元年

乙酉二年

丙戌三年

丁亥章和元年

戊子二年

和帝諱肇章帝子在位十七年  
改元者二不剛不柔曰和

和帝己丑永元元年

庚寅二年

辛卯三年

壬辰四年

癸巳五年

甲午六年

乙未七年

丙申八年

丁酉九年

戊戌十年

己亥十一年

庚子十二年

辛丑十三年

壬寅十四年

癸卯十五年

甲辰十六年

和帝乙巳元興元年

殤帝諱懿和帝少  
子在位一年

丙午延平元年

安帝諱祐章帝曾孫在位十九年  
改元者五寬容和平曰安

安帝丁未永初元年

戊申二年

己酉三年

庚戌四年

辛亥五年

壬子六年

癸丑七年

甲寅元初元年

己卯二年

丙辰三年

丁巳四年

景德傳燈錄作癸  
帝十二年者誤

祖付摩拏羅正法 示教

祖行化至那提國彼王名常自在有二子長名摩訶羅次名摩拏羅王問祖曰羅閱城土風與此何異祖曰彼曾三佛出世今王國有二師化導王曰二師者誰祖曰佛記第二百五百年有二神力大士出家繼聖一即王之次子摩拏羅吾雖德薄亦當其一初那提國有惡象為害拏羅生而象息至是三十年矣人尚不知其所以息王方同祖語忽使者報有衆巨萬逼城王憂之祖曰拏羅出患解矣王試命拏羅出拏羅遂出城南向象撫腹大囑城為震動羣象顛仆頃皆離散至是人始知三十年

之安以拏羅也王大敬信命拏羅依祖出家祖即與授具付法偈曰泡幻同無礙如何不了悟達法在其中非今亦非古付法已踴身高半由旬屹然而住四衆告曰願尊者無爲神通我輩欲收舍利遂復座入寂闍維舍利建塔

第二十二世祖

摩拏羅尊者姓刹帝利父常自在王命依盤頭尊者出家傳法

安帝戊午年初五年

第二十二世祖摩拏羅尊者嗣宗統四十八年

己未六年

祖住世傳法

庚申永甯元年

辛酉建光元年

壬戌延光元年

癸亥二年

甲子三年

乙丑四年

順帝諱保安帝子在位十九年改元者五慈和偏服曰順

順帝丙寅永建元年

丁卯二年

戊辰三年

己巳四年

庚午五年

辛未六年

壬申陽嘉元年

癸酉二年

甲戌三年

乙亥四年

丙子永和元年

丁丑二年

戊寅三年

己卯四年

庚辰五年

辛巳六年

時有張陵在蜀自號天師作道書二十四卷論章醮之法章醮起此

壬午漢安元年

癸未二年

甲申建康元年

冲帝諱炳順帝子在位一年

乙酉永嘉元年

質帝諱續章帝玄孫在位一年

丙戌本初元年

桓帝諱志章帝曾孫在位二十一年改元者七克敵服遠曰桓

桓帝丁亥建和元年

沙門支婁迦讖譯經譯者翻譯也謂翻譯西竺之語轉成東震之言又譯之言易也

謂以此方之言易顯彼土之法也周禮掌四方之語各有其官東方曰寄南方曰象西方曰狄獫狁北方曰譯今通西言而云譯者蓋漢世多事北方而譯官兼善西語故摩騰始至譯四十二章經後遂因之也佛經東來歷朝設立譯場命官分職各有專司合而翻譯錯綜經文乃成一譯主明練顯密通貫華梵者主之次筆受通明竺乾字學者主之次綴文學通三藏義博羣書者主之次度語詳核言音者主之次證禪明洞竺乾事理知華語不失梵義者主之次證禪旨者主之次證義考證文義辨對明審者主之次校勘次監護以上諸員漢唐歷代上自帝王公卿鴻儒

碩士方充是任。蓋重慎之至也。陳思王曹植每讀佛經。留連嗟玩。以爲至道之宗。轉讀七聲。升降曲折。清和婉因。做演之以爲梵唱。

識月支國人。以是年來洛陽。同河南清信士孟福

張蓮等。共譯出經二十一部。合六十三卷。至中平

年訖。

發明。大法東來。宣譯者廣難。以具書書其大者。以槩其餘焉。欲詳檢者。有歷代三寶記及大唐內典等書可考也。

戊子二年

己丑三年

沙門安清來洛邑等處譯經

清安息國王太子名清字世高。讓位出家。以是年

振錫來儀。至於洛邑。廣事宣譯。到靈帝時。二十餘

年。共譯出經一百七十六部。合一百九十七卷。

桓帝庚寅和平元年

辛卯元嘉元年

佛滅後一千一百年

此後西竺東震諸賢聖相次譯經弘法

壬辰二年

癸巳永興元年

甲午二年

乙未永壽元年

丙申二年

丁酉三年

戊戌延熹元年

己亥二年

庚子三年

辛丑四年

壬寅五年

癸卯六年

甲辰七年

乙巳八年

祖化度西印土王出家證果

祖付鶴勒那正法示寂

祖至西印土。彼國王名得度。瞿曇種族。事佛精進。

一日於行道處。忽見一塔。高尺四寸。欲舉以供養。

竭衆力莫能舉。王大會四衆。問所由。衆莫能知。祖

曰。此阿育王塔。感王精進。故見耳。王曰。敢問法要。

祖曰。佛法能具七事。去三物。乃可學。王問三物七

事。爲何。祖曰。所去三物。貪。瞋。癡。所具七事。大慈。歡

喜。無我。勇猛。饒益。降魔。無證人。所以明了。不明了

以此耳。王聞已。曰。至聖難逢。世樂非久。卽傳位太

子出家。七日而證四果。祖深加慰誨。曰。汝居此國。

善自度。入今異域。有大法器。吾當往化。得度曰。師

應跡十方。動念當至。甯勞往耶。祖曰。然。於是焚香

遙語。月支國鶴勒那比邱曰。汝教道。鶴衆道果。將

證。宜自知之時。鶴勒那爲彼國王。寶印說修多羅。

偈忽觀異香成穗王曰是何祥也曰西印土摩拏羅尊者將至此信香也王與鶴勒那俱西嚮作禮祖亦以手東向三點於地答之即辭得度與其具通衆凌虛趣月支國鶴勒那與寶印迎祖至王宮供養異日鶴勒那問祖曰我止林間已經九白印土印以一年有弟子龍子者幼而聰慧我於三世推窮莫知其本祖曰此子於第五劫中生妙喜國婆羅門家曾以栴檀施於佛宇作槌撞鐘受報聰敏爲衆欽仰又問我有何緣而感鶴衆祖曰於第四劫中嘗爲比丘當赴會罷宮汝諸弟子咸欲隨從汝觀五百衆中無有一人堪任妙供時諸弟子曰師嘗說法於食等者於法亦等今旣不然何望之有汝即令赴會坐是盞食報爲羽族師弟夙緣故今相隨鶴勒那曰以何方便令彼解脫祖曰吾有無上法寶汝當聽受化未來際乃說偈曰心隨萬境轉轉處實能幽隨流認得性無喜亦無憂鶴衆聞偈飛鳴而去祖即跏趺空中呈十八變返座指地發一神泉復說偈曰心地清淨泉能潤於一切從

地而湧出徧濟十方世宗境作徧滿十方際偈已泊然寂滅鶴勒那與寶印王建塔以奉全身

### 第二十三世祖

鶴勒那尊者月支國人姓婆羅門父千勝母金光以求子禱於七佛金幢夢須彌頂有神童持金環云我來及誕而天雨華國王以其有神徵乳於宮中宮嬪育之即分身各爲其子有千許王曰我無儲嗣將育爾爲太子今者千身孰爲正子哉言已一子放光忽皆不見而見於其父母家王莫能如何七歲觀民間淫祀怒其宰殺入廟叱之廟貌遂壞鄉黨稱之爲聖子至年十二出家棲一林間九白誦大般若感鶴衆相隨三十得法於摩拏羅尊者

桓帝丙午延熹九年

第二十三世祖鶴勒那尊者嗣宗統四十年

丁未永康元年

佛教至東土一百年

祖住世傳法

靈帝諱宏章帝玄孫在位二十二年改元者四

靈帝戊申建寧元年

己酉二年

庚戌三年

辛亥四年

壬子熹平元年

癸丑二年

甲寅三年

乙卯四年

丙辰五年

丁巳六年

戊午光和元年

己未二年

庚申三年

辛酉四年

壬戌五年

癸亥六年

甲子中平元年

黃巾作亂

乙丑二年

丙寅三年

丁卯四年

戊辰五年

獻帝諱協靈帝子在位三十一年改元者三聰明睿智曰獻

獻帝己巳初平元年牟子作理惑論牟子未詳名字漢初平中

邈世求志篇曰梁律師僧祐收載弘明集篇極其明白

庚午二年

辛未三年

壬申四年

癸酉興元元年

甲戌二年

乙亥三年

丙子建安元年

丁丑二年

戊寅三年

己卯四年

庚辰五年

辛巳六年

壬午七年

癸未八年

甲申九年

乙酉十年

丙戌十一年

丁亥十二年

戊子十三年

己丑十四年

祖爲中印土無畏王說法

祖付師子比丘法眼示寂

祖行化至中印土爲其王無畏海說法感日月天子禮拜其前王目見之乃問祖日月國土總有多少祖曰千釋迦所化世界各有百億迷盧日月我若廣說卽不能盡王聞忻然時祖演無上道度有緣衆有上足龍子早夭其兄師子博通強記事婆羅門將葬龍子而衆力舉其柩不能動祖謂師子曰昔汝弟欲冥福汝而塑一佛像汝方信婆羅門投於地今汝弟雖謝世猶欲感悟汝故示斯異汝亟供像柩斯舉矣師子奉命而柩舉未幾婆羅門師死師子乃歸依尊者問曰我欲求道當何用心祖曰汝欲求道無所用心曰既無用心誰作佛事祖曰汝若有用卽非功德汝若無作卽是佛事經云我所作功德而無我所故師子聞是語已卽入佛慧時祖忽指東北問曰是何氣象師子曰我見

氣如白虹貫乎天地。復有黑氣五道橫亘其中。祖曰其兆云何。曰莫可知矣。祖曰吾滅後五十年。北天竺國當有難起。嬰在汝身。吾將滅已。今以法眼付囑於汝。善自護持。乃說偈曰。認得心性時。可說不思議。了了無可得。時不說知。師子比邱聞偈。欣愜然。未曉將羅何難。祖乃密示之言。訖見十八變而歸。寂閣維畢。分舍利各欲興塔。祖復見形空中而說偈曰。一法一切法。一切一法。攝吾身非有。無何分一切塔。大眾聞偈。遂不復分。就獻都場而建塔。

第二十四世祖

師子比邱尊者。中印度人。姓婆羅門。

獻帝庚寅建安十五年

第二十四世祖師子比邱尊者。嗣宗統<sub>五十</sub>年

辛卯十六年

祖住世傳法

壬辰十七年

乙未二十年

癸巳十八年

甲午十九年

丙申二十一年

丁酉二十二年

戊戌二十三年 己亥二十四年

庚子二十五年

是年十月魏曹丕廢帝爲山陽公。稱魏黃初元年。

後漢

昭烈皇帝

諱備。卽帝位於蜀。在位三年。改元者一。明德有勞。曰昭。有功安民。曰烈。

昭烈皇帝辛丑章武元年。魏黃初二年

壬寅二年

吳黃武元年。孫權稱大帝於吳。

優婆塞

此云近事男。

支謙譯維摩等經

謙字恭明。月支國人。漢末遊洛。受業於支亮。亮字紀明。受業於支謙。時稱天下博知。不出三支。謙細長黑瘦。眼多白而睛黃。時人爲之語曰。支郎眼中黃形軀。雖細是智囊。避亂歸吳。孫權聞其才。慧拜爲博士。使輔導東宮。謙以大教雖行。而華梵未盡翻譯之美。既妙善方言。乃廣收衆經。舊本從黃武元年迄建興末年。其間首尾三十餘載。共譯經一百二十九部。一百五十二卷。備得聖義。詞旨文雅。

癸卯三年

帝禪建興元年。

後皇帝

諱諱。昭烈帝子在位四十一年。改元者四。

後皇帝甲辰建興二年

乙巳三年

丙午四年

丁未五年魏明帝數泰和元年

戊申六年

己酉七年

庚戌八年

辛亥九年

壬子十年吳黃龍元年

癸丑十一年魏青龍元年

甲寅十二年

乙卯十三年

丙辰十四年

丁巳十五年魏景初元年

戊午延熙元年吳赤烏元年

己未二年

庚申三年魏少正始元年

辛酉四年

壬戌五年

癸亥六年

甲子七年

乙丑八年

丙寅九年

丁卯十年吳赤烏十年

沙門康僧會感得舍利放光吳主信禮造建初寺建寺

不書此書以康僧威化故也

康僧會康居國大丞相長子世居天竺事親孝出家勵行甚峻為人弘雅有識量篤志好學明達三

藏博覽六經天文圖緯多所綜涉杖錫東遊以吳

赤烏十年初達建業營立茅茨設像行道時吳初

觀沙門未知其道疑為矯異有司奏聞權乃召會

問有何靈驗曾曰如來遷迹忽已千年道骨舍利

神曜無方昔阿育王起塔八萬四千夫塔寺之興

以表遺化也權以為誇誕乃謂會曰若得舍利當

為造塔如其虛妄國有常刑會乃三七精誠果獲

舍利舉朝集觀五色光炎照耀上騰權大肅然驚

禮曰希有之瑞也乃即為建塔以始有佛寺號建

初寺因名其地為佛陀里由是江左大法遂興

戊辰延熙十一年 己巳十二年魏嘉平元年

律師曇摩迦羅此云譯僧伽戒本發明如來滅後

震旦戒法始此故書

佛教初來未知戒律比丘出家剪髮而已曇摩迦

羅及曇無德等精善律宗乃立羯磨此云作法儀悔受具

足也謂戒法具足中夏戒律始此

庚午十三年 辛未十四年吳太元元年

佛滅後一千二百年

壬申十五年吳元鳳元年 癸酉十六年吳亮立改元建興

甲戌十七年魏廢帝髦正元元年 吳五鳳元年

乙亥十八年 丙子十九年魏甘露元年 吳泰平元年

丁丑二十年

戊寅景耀元年

吳主亮薨休  
立改元永安

己卯二年

祖付婆舍斯多正法 示償宿業

祖遊化至罽賓國有沙門波利迦或云波泰迦本習小

乘禪觀其學徒有五曰禪定曰知見曰執相曰捨

相曰不語祖謂持不語者曰佛教勤行般若孰爲

不語而反佛說耶謂捨相者曰佛教威儀具足梵

行清白豈捨相耶謂執相者曰佛土清淨自在無

著何執相耶謂知見者曰諸佛知見無所得故此

法微妙覺聞不及無爲無相何知見耶四衆皆服

從惟禪定師達摩達者聞四衆義屈憤憤而來祖

曰仁者習定何當來此既至於此何云習定彼曰

我雖來此心亦不亂定隨人習豈在處所祖曰仁

者既來其習亦至既無處所豈在人習彼曰定習

人故非人習定我當來此其定常習祖曰人非習

定定習人故當自來時其定誰習彼曰如淨明珠

內外無翳定若通達必當如此祖曰定若通達一

似明珠今見仁者非珠之徒彼曰其珠明徹內外

悉定我心不亂猶若此淨祖曰其珠無內外仁者  
何能定穢物非動搖此定不是淨達摩達聞已遂  
作禮曰我於學道蓋虛勞耳尊者幸有以教我慙  
慙哀請祖曰諸佛禪定無有所得諸佛覺道無有  
所證是真解脫時因答果世之業報於此法中悉  
不如是達摩達曰蒙祖開悟心地朗然祖既攝五  
衆名聞遐邇方求法嗣遇一長者引一子問祖曰  
此子名斯多當生便拳左手年二十矣終未能舒  
願尊者示其宿因祖觀之卽以手接曰可還我珠  
童子遽開手奉珠衆皆驚異祖曰吾前報爲僧有  
童子名婆舍吾嘗赴西海齋受臘珠付之今還吾  
珠理固然矣長者遂令出家祖會衆聖與授具以  
前緣故名婆舍斯多祖卽謂之曰吾師密有懸記  
罹難非久如來正法眼藏今當付汝汝應保護普  
潤來際偈曰正說知見時知見俱是心當心卽知  
見知見卽於今祖說偈已以僧伽黎密付斯多俾  
之他國隨機演化斯多受教直抵南天祖謂難不  
可以苟免獨留罽賓時本國有外道二人一名摩

日多二名都落遮學諸幻法欲共謀亂詭為種子。潛入王宮其王彌羅崛遂滅毀釋教秉劍至尊者所問曰師得蘊空否祖曰已得蘊空王曰離生死否祖曰已離生死王曰既離生死可施我頭祖曰身非吾有何憾於頭王即揮刃斷尊者首白乳湧高數尺王之右臂旋亦墮地七日而終太子光首歎曰吾父何故自取其禍延衆懺悔時象白山有仙人深明因果言師子與羅崛往世皆爲白衣以嫉法勝故陰戕於崛乃今償焉遂以祖報體建塔祥符蔭曰佛祖俱償定業非定業不可逃也大人境界順逆等觀刀割香塗施受平等業既定矣佛祖尙不可逃衆生豈可恬然日造而不知懼乎且世間矯矯自好者尙且恩怨分明況佛祖出世導師宿業不償而以通力免乎醉因答果世之業報於此法中悉不如是祖蓋明言之矣業性本空夢幻何有又豈可徒以世間情見測之耶至付法藏傳等諸書之謬妄教家謂師子尊者償業相傳法人於此便絕云前賢已詳證之茲不復論

考定 東山契嵩傳法正宗論云祖償宿業以甲辰計之當在丁卯爲魏少帝芳正始八年吳赤烏十年今以鶴勒那祖明示吾滅後五十年北天竺有維要在汝身之言考之祖寂于前漢獻帝己丑建安十四年至後漢己卯景耀二年正當五十年定祖償業於是年與寶林傳等書相合爲不謬東山蓋一時之說也

### 宗統編年卷之六

### 宗統編年卷之七

### 第二十五世祖

婆舍斯多尊者。罽賓國人。姓婆羅門。父寂行母常安樂。初母夢得神劍。因而有妊。既誕。舉左手後遇師子尊者付法。

後帝庚辰景曜二年魏景元元年

第二十五世祖婆舍斯多尊者。嗣宗統六十七年

辛巳四年

祖化伏外道潛隱南天

祖至中印度國王迦勝設禮供養有外道無我尊

先為王禮重。乃於王前論義。冀勝祖自重。謂祖曰。我解默論。不假言說。祖曰。孰知勝負。彼曰。不爭勝負。但取其義。祖曰。汝以何為義。彼曰。無心為義。祖曰。汝既無心。豈得義乎。彼曰。我說無心。當名非義。祖曰。汝說無心。當名非義。我說非心。當義非名。彼曰。當義非名。誰能辨義。祖曰。汝名非義。此名何名。彼曰。為辨非義。是名無名。祖曰。名既非名。義亦非義。辨者是名。當辨何物。如是往返五十九番。外道杜口。信伏。祖念師子尊者。遇難。即辭王南邁。至南天潛隱山谷。王天德迎請供養。王有二子。長曰德勝。凶暴而色力充盛。次曰不如蜜多。和柔而常嬰疾苦。王以問祖。為陳因果。王敬信受。有呪術。師忌祖置毒食中。祖知而食之。彼反受毒。遂投出家。

沙門朱士衡於洛講道行般若經東震講經之始

壬午五年

癸未災興元年是歲漢亡

甲申魏咸熙元年

乙酉魏咸熙二年即晉太始元年

沙門曇摩羅奈譯經

沙門曇摩羅奈晉言法護本姓支月支國人歷西

域解三十六國語及書從天竺國貴梵冊來因唐燉煌遂稱竺氏後詣洛陽江左起太始元年迄永嘉二年譯出般若法華等經共二百一十部合三百九十四卷

晉都洛陽司馬氏

武帝諱炎廢魏主奐為陳留王稱帝為世祖武帝在位二十五年改元者三

武帝丙戌太始二年吳寶鼎元年

丁亥三年

佛教來東土二百年

戊子四年

己丑五年

庚寅六年吳建衡元年

辛卯七年

壬辰八年吳鳳皇元年

癸巳九年

甲午十年

乙未咸寧元年

丙申二年吳天璽元年

丁酉三年吳天紀元年

戊戌四年

己亥五年

沙門僧會寂舊僧寂始此

武帝庚子太康元年

是歲吳亡

辛丑二年

會稽鄞縣舍利塔從地感見發明塔寺不書此書以感異也

并州離石人劉薩訶生畋家戈獵爲業得病死甦

見一梵僧語曰汝罪重應入地獄吾愍汝無知且

放汝今洛下齊城丹陽會稽並有古塔及浮江石

像悉阿育王所造可勤求禮懺罪得消滅醒後改

革前習出家學道更名慧達如言南行至會稽海

畔山澤處處求覓莫識基緒悲塞煩惋投告無地

忽於中夜聞土下鐘聲即遷記其處剡木爲刹三

日間忽寶塔及舍利從地湧出靈塔相狀青色似

石而非高一尺四寸方七寸五層露盤似西域于

闐所造面開窗宇四周天全中懸金磬繞塔身上

並是諸佛菩薩金剛聖僧等像狀極微細瞬目注

睛乃有百千像見面目手足咸具備焉神力聖迹

非人智所及也今在大銅塔內

壬寅三年 癸卯四年 甲辰五年

乙巳六年 丙午七年 丁未八年

戊申九年 己酉十年

惠帝諱衷武帝子 在位十七年

惠帝庚戌永熙元年 辛亥元康元年

壬子二年

沙門法炬等譯經

炬等前後譯出樓炭等經共一百四十二卷

癸丑三年 甲寅四年 乙卯五年

丙辰六年 丁巳七年 戊午八年

己未九年 庚申永康元年

辛酉永甯元年自永嘉之後所在十六國五涼四燕二趙三秦大夏并蜀爲十六國雜晉魏間

壬戌大安元年 癸亥二年

甲子永興元年漢高祖劉淵元熙元年 成都王李雄建興元年

乙丑二年 丙寅光熙元年成都晏平元年

懷帝諱熾惠帝弟在位六年改元者一仁惠短折曰懷

懷帝丁卯永嘉元年 戊辰二年漢永鳳元年

己巳三年

庚午四年漢烈宗劉聰光興元年

沙門佛圖澄自西竺至洛陽神異不測呪錄生青蓮華石勒石虎多所感化

辛未五年漢嘉平元年 是年帝爲劉曜所篡遷于平陽

壬申六年帝遷平陽書六年存正統也

愍帝

諱梁武帝孫在位四年改元者一在國遭憂曰愍

愍帝癸酉建興元年

石佛像浮海至吳郡迎供通立寺

發明佛事雲興塔廣鼎建

神踪異蹟不可枚舉昭垂來哲載有典章故不具書此書表異也

吳郡吳縣松江滬瀆口漁者遙見海中有二人見浮遊水上疑為海神延巫祝備牲牢迎之風濤彌盛駭懼而返有奉佛居士吳縣華里朱膺聞之曰

將非大覺之降靈乎乃潔齋共東靈寺尼及信佛者數人至瀆口稽首迎之風波遂靜浮遊二人隨潮入浦漸近漸明乃知石像將欲捧接人力未展

飄然就起便昇還通立寺看像背銘一名維衛一名迦葉莫測時代而書迹分明以事表聞朝廷勅聽留吳郡供養

今蘇州開元寺石像是

甲戌二年

乙亥三年 漢建元元年

丙子四年

帝降漢西晉亡

西晉二京建寺一百八十所譯經一十三人共七

十三部

東晉

元帝

諱睿姓牛胃司馬氏在位六年始建國都曰元

元帝丁丑建武元年

戊寅大興元年 漢光初元年

己卯二年 漢改號趙後趙石勒建元

庚辰三年

辛巳四年

壬午永昌元年

明帝

諱紹元帝子在位三年改元者一讚翊不行曰明

明帝癸未大甯元年

甲申二年

乙酉三年 趙光初八年後趙七年

祖付不如蜜多正法 示寂

六年前德勝即位惑外道說因詰祖曰師子尊者已遇罽賓國王難何緣付法祖出師子尊者所付僧伽黎示勝勝命焚之衣出五色光薪盡如故勝乃追悔致禮初勝欲抑尊者不如蜜多往諫因囚之至是立出蜜多蜜多遂求出家祖問曰汝欲出家當為何事蜜多曰我若出家不為其事祖曰不為何事蜜多曰不為俗事祖曰當為何事蜜多曰當為佛事祖曰王子智慧天至必諸聖降迹即度出家侍祖六年後於王宮受具羯磨之際大地震動乃付法偈曰聖人說知見當境無是非我今悟

眞性無道亦無理不如蜜多受傷已問衣可傳乎  
祖曰此衣爲難故假以證明汝身無難化被十方  
何假傳衣不如蜜多作禮祖見神變化三昧火自  
焚平地舍利可高一尺德勝王建浮圖闕之

成帝諱衍明帝子在位十七年  
改元者二安民立政曰成

### 第二十六世祖

不如蜜多尊者姓利帝利南印度王子

成帝丙戌咸和元年

第二十六世祖不如蜜多尊者嗣宗統六十三年

法師西竺惠理至杭州發明杭州建利信  
法之始故書

理自西竺來初至杭見一山巖秀麗曰此吾中天

竺靈鷲山之小嶺也不知何年飛來佛在世時多

爲仙靈所隱洞中舊有白猿遂呼之應聲而出因

名其峯爲飛來卽其地建兩刹曰靈鷲靈隱杭州

佛法始此

丁亥二年

祖住世傳法

戊子二年後趙太和元年己丑四年

是年薨  
趙亡

庚寅五年後趙建平元年辛卯六年 壬辰七年

癸巳八年 甲午九年趙石弘延熙元年

乙未咸康元年趙石虎建武元年丙申二年

丁酉三年 戊戌四年 己亥五年

庚子六年 辛丑七年

壬寅八年

廷議沙門敬禮應否尙書令何充等詳議不應致拜

庾冰議僧應致拜王者尙書令何充等奏曰不變

其修善之法所以通天下之志也冰復謂矯形違

度抗俗傲禮非所以示名教也充等復奏曰潛操

冥修實有裨於王化忘身抱一未嘗見其貢高直

以出世之法超出情表歷代明聖不爲之制無虧

王度冰猶以爲不可復下制謂國體憲章尊卑宜

陳略其禮敬二之則亂充等三上章執奏曰漢魏

逮晉不聞異議尊卑憲度無或暫虧沙門守戒專

一不以形骸而慢禮敬國家待以師法出於自然

禮儀之外不令致拜是令專一守法也冰議遂寢

康帝諱岳成帝弟在位二年改元者一溫柔好樂曰康

康帝癸卯建元元年

甲辰二年

穆帝

諱聃康帝子在位十七年  
改元者二布德義日穆

穆帝乙巳永和元年

丙午二年

丁未三年

戊申四年

己酉五年

庚戌六年

辛亥七年

佛滅後一千三百年

壬子八年

癸丑九年

甲寅十年

符秦健皇始  
元年都長安

乙卯十一年

秦主生壽  
光元年

丙辰十二年

丁巳升平元年

秦王符堅  
永興元年

戊午二年

己未三年

秦甘肅  
元年

庚申四年

辛酉五年

哀帝

諱丕初封瑯琊王在  
位四年改元者二

哀帝壬戌隆和元年

癸亥興甯元年

甲子二年

乙丑三年

秦建元  
元年

帝奕

即位五年  
改元者一

帝奕丙寅太和元年

法師劉沃州山道林支遁寂

遁字道林陳留關氏子或曰河東林慮人聰明秀

微太原王濛陳郡殷融甚雅重之家世事佛蚤悟  
真乘隱餘杭山沉思卓立涉講肆善標大意而章  
句或脫略謝安聞而喜之曰此乃九方歎之相馬  
也王洽劉恢殷浩許詢郗超孫綽桓彥表王敬仁  
何次道王文度謝長遐袁彥伯等並一代名流皆  
深塵外之契還吳華山立支山寺今號支硎晚欲  
入剡時謝安爲吳興守貽書曰人生如寄風流得  
意之事頃爲都盡終日憾憾觸事惆悵唯遲君來  
以晤言消之一日當千載耳王羲之時在會稽素  
聞遁名未之信聞遁還剡詣之歎服不能已請住  
靈嘉寺俄於沃州小嶺立寺慮衆怠惰著座右銘  
以勗之晚移石城山又立棲光寺木食澗飲多所  
撰述講維摩於山陰許詢爲都講名流咸集遁豎  
一義衆謂詢無以措詢設一難亦謂遁不復能通  
至竟兩家辨論精晰不窮凡在聽者無不心折哀  
帝頻遣使徵請出都止東安寺涉三載上書皇帝  
許還東山資給發遣事事豐厚一時名流並餞送  
焉時蔡子叔先至近遁而坐謝安後至值蔡暫起

謝便移就其處。蔡還舉謝席擲地。謝不以介意。其爲時賢所慕如此。嘗有遺遁馬者。受而養之。或問之曰。愛其神駿耳。後有餉鶴者。遁曰。爾冲霄之物。甯爲耳目之玩乎。遂放之。以太和元年閏四月四日。終於剡春秋五十有三。遁善草隸。臨寂著切悟章落筆而逝。發明像法東垂以後。摩騰入漢。以如雲難以悉書。書其道韻。冷然風標。可見者。數人以藥之。若廣尋高踪。有列傳可考也。

詳符陰曰。年來春秋之際。每登支硎流覽。林麓坐放鶴亭。撫馬蹟坡。未嘗不追懷高風。逸韻於千載之下也。嘗與品松道者。從北峯瞻禮石塔。嵯峨秀出於古松流泉之間。制度精緻。摩挲久之。傳中載寔於餘姚塢。此或公之衣鉢塔也。明末清初。高松汰如中峯蒼雪。二法師相次說法於其地。二楞堂在焉。趙高士凡夫勒支硎澗中石曰。明月松間照。清泉石上流。可爲公千秋寫照。而汰蒼二公抑遁潛之流亞歟。

丁卯二年

佛教來東土三百年

戊辰三年

己巳四年

庚午五年

簡文帝諱昱在位二年

簡文帝辛未咸安元年

壬申二年

孝武帝諱曜簡文帝子在位二十四年改元者二

孝武帝癸酉寧康元年

甲戌二年

法師剡岬山道潛寂

潛字法深。瑯琊王氏丞相武昌郡公敦之弟也。年十八出家。二十四講法華大品。聽衆恒滿五百。永嘉初避亂渡江。中宗元皇及肅宗明帝丞相王茂弘太尉庾元規並欽風德。尋隱剡山。哀帝再詔暫起應之時。簡文爲相。彌敬潛。常於簡文座中遇沛國劉恢。恢嘲之曰。道者何以遊朱門。潛曰。君自視其朱門。我無分於蓬戶。潛素懷不樂。乃啓還山。時支公道林遣使求買岬山之側沃州小嶺。欲爲幽棲之處。潛答曰。欲來輒給。未聞巢由買山而隱。春秋八十九寂於山館。烈宗詔曰。潛法師理悟虛遠。風鑒清貞。棄宰相之榮。襲染衣之素。山居人外。篇

勤匪懈方賴宣道以濟蒼生奄然遷化用痛於懷  
可賻錢十萬馳驛送葬孫綽以潛遠大之量似劉  
伯倫而高深之致劉所不及也

沙門救葬  
自潛始

乙亥三年

丙子太元元年

旃檀佛像到長安

丁丑二年

太史奏有德星見外國  
分野當有聖人入輔

戊寅三年

己卯四年

庚辰五年

王晞出家答楊氏荅華書

書何訓  
俗也

晞東莞名家子天姿秀發事親以孝聞年十六聘  
同郡楊德慎女字荅華姿容絕代墳籍淹通比玉  
臨風鄉鄰譽羨將欲成禮晞忽感念世相無常捨  
俗出家更名僧度荅華聞之乃貽度書謂髮膚不  
可傷毀宗祀不可頓廢何不顧世名教顯自襟期  
曜翹燦之姿於盛明之世遠休祖考之靈近慰人  
神之願并贈詩五章其一曰大道自無窮天地長  
且久巨石故叵消芥子亦難數人生一世間飄若

風過牖榮華豈不茂日夕就彫朽川上有餘味日  
斜思鼓缶清音可娛耳滋味可適口羅紈可飾軀  
華冠可曜首安事自剪削就空以害有不道妄區  
區但令君恤後晞答書曰夫事君以治一國未若  
弘道以濟萬邦事親以成一家未若弘道以濟三  
界髮膚不毀俗中之近言耳但吾德不及遠未能  
兼被以此爲愧然積實成山亦冀從微之著也且  
披袈裟振錫杖飲清流詠般若雖王公之服八珍  
之饌鏗鏘之聲煒曄之色不與易也若能懸契則  
同期於泥洹矣且人心各異有若其面卿之不樂  
道猶我之不慕俗矣長當與卿別離矣萬世因緣  
於今絕矣歲聿云暮時不我與學道者當以日損  
爲志處世者當以時爲務卿年德並茂願勿以  
道人爲念而坐失盛年也又報詩五章其一曰機  
運無停住倏忽歲時過巨石會當竭芥子豈云多  
良由去不息故令川上嗟不聞榮啓期皓首發清  
歌布衣可煖身誰論飾綺羅今世雖云樂富奈後  
生何罪福良由己甯云遑恤他荅華得書感悟亦

畢身矢志學道。諦專精佛法。不知所終。

祥符蔭曰。世人狃於習俗。狎於宴私。貪營室家。暫時之歡。忘生死長夜之苦。觀諦公此書。亦可以少知梗槩矣。出世大人法喜。以爲妻。禪悅以爲樂。視世之沾沾聲色者。不啻天人之視蟻。慕羶趨穢也。故書以風世焉。

孝武帝辛巳六年

帝初奉佛法。建精舍於殿內。引諸沙門居之。發明

奉佛立寺。不書此書。以帝能尊道。而不知所以尊也。

祥符蔭曰。帝王事佛。當推大道。以廣仁風。體一心而周萬事。區區崇奉。莊嚴此有爲功德。梁武之所以見絕於達摩氏也。又況建精舍於殿內。引諸沙門居之乎。帝固不知佛法之大端。而當時無僧能以第一義示之者。此達摩氏西來之所以不容已也。

壬午七年

癸未八年 秦建元十九年

秦遣符丕攻晉襄陽。釋道安入秦。

發明 國事不書。此書以釋。

道安故也。

祥符蔭曰。沙門之法。固以弘化爲務。然須風規絕俗。與世相忘。道安雖能弘法化。傾動時流。乃至世主勞師勤民。啓端鼓鼻。亦可謂不善養晦之機。而於法華四安樂行。曾亦未之深思也。已。

釋道安姓衛。常山扶柳人。世業儒。性聰而貌寢。年十二出家。馳役於田。啓師求受經。師與經可五千言。貴入田執勞如常。因息就覽。暮歸更求受他經。師曰。昨經未讀。今復求耶。答曰。已闇誦。師雖異之。而未信。復與經減一萬言。貴還如初。師執經覆之。不差一字。驚嗟而敬異之。遣遊學至鄴。師佛圖澄與語。嗟歎衆以其形輕怪之。澄曰。此人遠識非爾儔也。澄講安每覆述。衆難鋒起。挫銳解紛。一衆折伏。爲之語曰。漆道人驚四鄰。避石氏。亂渡河。登陸渾山。棲隱俄慕。容俊逼陸渾。遂南投襄陽。宣通佛法。四方學士競往師之時。習鑿齒以才自負。藉安高名。先書通好。及是聞安至。造之稱。四海習鑿齒安應之曰。彌天釋道安鑿齒與謝安書云。來此見。

釋道安故是遠勝無變化技術可以惑人之耳目。無重威大勢可以整羣心之參差而肅肅洋洋自相尊敬。懷足下不同日而見之。其爲時賢所重類如此。晉孝武皇帝承風欽德。遣使通問。詔曰。安法師居道訓俗。豈直規濟當今。方乃陶津來世。俾給一同王公。時符堅素聞安名。每欲致之。遣符丕攻襄陽。獲之。謂僕射權翼曰。朕以數十萬之師。臨襄陽。唯得一人。半謂安一人。習鑿齒半人也。既至長安。大弘法化。初沙門各依師姓。安以爲宜。以釋命氏。後見阿含四河入海之言。遂爲定式。安外涉羣書。善文辭。長安中衣冠子弟多依師之。著僧尼軌範。佛法憲章等。天下則之。

甲申九年

姚萇自稱秦王是爲後王

乙酉十年

秦王丕大

丙戌十一年

秦王登大初元年

丁亥十二年

法師江東瓦官寺竺法汰寂

汰東莞人。與道安同學。才辯不逮。而儀範過之。與安分化。南北沿江東下。時桓溫鎮荊州。遣使迎供。

至都止瓦官寺。太宗簡文皇帝深相敬重。王侯公卿莫不信向。講席之下。名士如堵。黑白墳門。領軍王洽。東亭王珣。太傅謝安。尤加欽敬。春秋六十有八。訃聞。烈宗詔曰。汰法師。遐播八方。澤流後裔。奄爾喪逝。痛貫於懷。可賻錢十萬。曇壹慧遠。皆從學於汰。

戊子太元十三年

祖至東印度度梵志 什般若多羅正法 示寂

祖行化至東印度。其王堅固奉外道。師長爪梵志。祖至。王問曰。師來何爲。曰。將度衆生。曰。以何法度。曰。各以其類度之。梵志卽化一大山於祖頂上。勢且下壓。祖指之山。遽移在彼衆頂上。復以手按地。地動五百外道。皆不能立。梵志怖懼。禮祖。復按地。地靜。指山。山滅。王異曰。大治齋集諸外道。懇祖預會。祖初不欲行。而知所會地將陷。乃往。王曰。師肯來耶。祖曰。吾非應供來救死耳。此地已爲龍窟。須臾當下陷。王恐與其衆如高原。反顧其地。已淵然成坎矣。王益敬信祖。爲演法。且曰。王國有聖人。

當繼我法。先是東印有婆羅門子年二十幼失父。母不知名氏。或自言瓔珞人。遂名曰瓔珞童子。丐行閭里有問汝行何急。卽曰汝行何緩。問何姓。卽曰與汝同姓。人莫測之一日。王與祖同車而出。瓔珞稽首於前。祖曰汝憶往事否。珞曰我念往劫中與師同居。師演摩訶般若。我演甚深修多羅。今日之事。蓋契昔因。祖顧王曰。此大勢至菩薩也。繼後出二人。一人化南印度。一人緣在震旦。九年却返。此方卽以昔因故名爲般若多羅。付法偈曰。眞性心地藏。無頭亦無尾。應緣而化物。方便呼爲智。付法已。卽辭王曰。化緣已終。將歸寂滅。願王於最上乘。無忘外護。卽還本座。見形如日。少頃復呈十八變。出三昧火。自焚。雨金色舍利。王以金塔闕之。

### 第二十七世祖

般若多羅尊者東印度人

己丑太元十四年

第二十七世祖般若多羅尊者嗣宗統六十九年  
法師道安寂

正月二十七日。有一異僧出入安室。手指西北。卽時雲開。見樓閣如幻。出曰。彼兜率天也。二月八日。跏趺而逝。安每疏經義。必求聖證。一日感龐眉尊者。降安出所製似之尊者。欽歎以爲盡契佛心。仍許以密助。弘通安識其爲賓頭盧。因設日供。門弟子通其業者數十人。有法遇者。傳教長沙。徒衆數百。中有一人私飲。遇縱而不舉。安廉知之。卽封荊以寄。遇抱荊泣曰。董衆無狀。遠遺師憂。於是俯伏受譴。安左臂有一肉串隆起。如印。持可上下。而不出腕。時號印手菩薩。

祥符陰日。弘願度生之士。非上生內院親覲慈氏。卽往生安養樓神蓮胎者。蓋覲慈氏則當來輔贊。躬承化儀。而西方位登不退。再來娑婆克從本願。也。其他奉利奉慶。雖各密行難思。然兜率西方二途。實當前道岸之捷徑。安遠二公。開方便涅槃門於直指禪宗。未來之日。可謂善治般若舟航之先導者矣。

庚寅十五年

祖住世傳法

祖因東印度國王請齋次王乃問諸人盡轉經師獨爲何不轉祖曰貧道出息不隨衆緣入息不居蘊界常轉如是經百千萬億卷非但一卷兩卷法師慧遠結念佛蓮社

遠雁門樓煩賈氏子幼隨舅令狐氏遊學許洛博綜六經宿儒英達莫不服其深致師事道安法師豁然而悟曰儒氏九流皆糠粃也與弟慧持投簪受業以大法爲己任安公歎曰使道流東震其在遠乎屆潯陽見廬峯清勝足以息心始住龍泉精舍繼就法師慧永之招居西林刺史桓伊尋構東林禪苑延居之背負香爐傍臨瀑布泉壑清幽遊者神肅感阿育王像自寒溪寺移至時晋室式微天下奇才絕俗之士多隱居不仕彭城劉程之豫章雷次宗雁門周續之新蔡畢穎之南陽宗炳張萊民張季碩等並依之遠勵衆精修淨業共結蓮社一心念佛刻志安養程之著發願文王喬之等爲念佛三昧詩以見志

祥符蔭曰東林淨業普攝三根蓮漏芳聲於今振響是蓋表裏禪宗廣敷法化者也然念非口誦佛豈持名念卽佛而自性彌陀不隔西方佛卽念而唯心淨土非從外覓其於禪也又豈有阡陌之分水乳之別乎況慈願深重不可思議今之粗粒兒童井白婦女一稱南無皆決定當來成佛蓮胎可期世之浪擲時光妄營黑業茫茫苦海臨溺思援者其速於念佛一門作救急上策哉

辛卯十六年

壬辰十七年

癸巳十八年

旃檀佛像至江南

甲午十九年

秦符崇延初元年崇爲涼滅後秦姚興皇初元年

乙未二十年

丙申二十一年

後魏皇始元年

安帝

諱德孝武帝子在位二十二年改元者三

安帝丁酉隆安元年

戊戌二年

魏天興元年

己亥三年

秦弘始元年

庚子四年

律僧曇翼感阿育王所造聖像見於長沙寺

沙門曇翼事道安以律行見稱令分化江楚締構  
長沙寺取材巴陵君山感山靈見夢丹誠祈請感  
舍利降於金瓶頂誓之間光采五色照滿一室寺  
成歎曰寺立僧集而聖像未嚴昔阿育王所造容  
儀神瑞皆多布在諸方何其無感不能招致乃專  
精懇惻請求誠應忽有一像見於城北光相衝天  
時白馬寺僧先往迎接不能令動翼乃往禮請捧  
接飄然而起迎歸長沙寺見像光上有梵字曰阿  
育王造

祥符陰曰精誠所感無有不通況大慈弘應神瑞  
無方者乎此之像見實以翼之願力而然校之石  
像浮海時節因緣異矣書之以示世之崇願行者

辛丑五年秦弘始三年

鳩摩羅什至秦長安譯經

鳩摩羅什此云天竺國人以後秦弘始三年入長

安共譯經九十八部合四百二十五卷

壬寅元興元年

癸卯二年

法師東林慧遠著沙門不禮王者論

太尉桓玄軍經廬山要遠出虎溪遠稱疾玄自入  
山見之退謂人曰實乃生所未見俄而玄欲沙汰  
衆僧教僚屬曰沙門有能伸述經誥暢說義理或  
禁行循整足以宣寄大化其有違於此者悉皆罷  
道唯廬山道德所居不在搜簡之列遠與玄書曰  
佛教陵遲穢雜日久每一尋至慨惋盈懷常恐運  
出非意淪胥將及竊見清澄諸道人教實應其本  
心夫逕以渭分則清濁殊勢枉以直正則不仁自  
遠此命既行必二理斯得然後令飾僞者絕假通  
之路懷真者無負俗之嫌道世交與三寶復隆矣  
因廣立條制玄從之昔成帝幼冲庾冰輔政以爲  
沙門應禮王者尙書令何充等奏不應敬禮官議  
悉同充等門下承冰旨爲駁同異紛然竟莫能定  
玄欲申前議乃與遠書令述所以不敬意遠答書  
謂沙門方將以兼忘之道與天下同往袈裟非朝  
宗之服鉢盂非廊廟之器沙門塵外之法不應致  
敬王者玄意遂寢及篡位卽下書曰佛法弘大所

不能測諸道人勿致禮也。遠乃著沙門不敬王者論五篇。謂在家奉法則是順化之民情。未變俗迹同方內。故有天屬之愛。奉主之禮出。家者遁世以求其志。變俗以達其道。變俗則服章不得與世典同。遁世則宜高尚其迹。故能拯溺俗於沉流。拔玄根於重劫。遠通三乘之津。近開人天之路。如令一夫全德。則道洽六親。澤流天下。雖不處王侯之位。固已協契皇極。在有生民矣。是故內乖天屬之重。而不違其孝。外闕奉主之恭。而不失其敬也。云云。

沙門竺法曠寂

曠下邳臯氏子。事後母以孝聞。躬耕力養。喪闋出家。事沙門曇印。爲師。印有道行。曠竭誠事之。印嘗疾。爲曠。七日夜至誠禮禱。至第七日。忽五色光發。振印體。所苦頓愈。止於潛青山石室。棲風立操。卓爾不遷。謝安爲吳興守。步訪展敬。坐林樾間。烹泉論道。移日。謝灑然歎服。簡文帝遣堂邑太守曲安遠詔問起居。并諮以妖星。曠答詔曰。昔齊景修福。妖星移次。陛下唯當勤德政以塞天譴。有頃災滅。

輿甯中東遊禹穴若耶郡超謝慶緒並結塵外之

交時方疫疾曠以慈善願力遊行村里所至疾除

百姓德之沙門道鄰造無量壽佛殿伐木值旱不

能運材曠呪之水發溪漲孝武皇帝欽風詔至京

事以師禮止於長干寺遂寂散騎常侍顧愷之爲

傳讚發明神僧異蹟載傳記者多不勝書書曠德行昭然以爲世則

甲辰三年魏天錫元年

乙巳義熙元年

沙門法顯還自天竺

顯以安帝隆安三年發長安遊歷天竺遠尋靈跡

求晉所無經律經涉諸國學梵書語抄寫僧祇尼

戒本阿毗曇心論等共二十四卷以是年泛海達

於揚都居道場寺譯經

丙午二年 丁未三年 戊申四年

己酉五年魏永興元年秦弘始十一年

三藏法師鳩摩羅什寂於長安

什神情靈徹篤性仁厚應機領會鮮有其匹道生

僧肇道融僧叡等皆從什學姚主以伎女十人侍

之寂後火焚舌根不壞

祥符陰曰佛教東來大法草昧沙門自西竺至者多以神迹顯化啓信羣機譯經詮法者尙華梵隔礙未盡其美迨什廣宣法義二乘教典始治淵源什之功大矣特以宿障之累未罄所蘊惜哉

秦以道碧爲僧正資侍中

立僧統衆始于此

發明立僧制衆始于

秦爲僧受秩始于  
碧故書法如此

時關中出家者衆頗多德濫秦主患之乃以道碧戒律精嚴遂置僧正詔碧爲之資侍中給侍吏

祥符陰曰僧置統制非法也梵網經曰凡國王大臣好心受佛戒者勿作是統官制衆安籍記僧破壞三寶之罪蓋僧學出世法自有佛法戒律治之佛法戒律自有其宗師主之國王大臣但加意護持宗師而佛法自治必假王法資秩是以世間法加於出世間法倒置甚矣秦主固一時權宜而道碧遂安受侍中之秩致使後來碩德高流多加卿寺之銜末法比邱悉行膜拜稱臣之禮作俑之罪碧其難以懺哉百丈大智祖定清規只立法堂而

不立佛殿表當代主法爲尊其尊法重僧爲何如也凡主法與爲僧者其當知所以自尊自重而毋爲獅蟲自食可也

庚戌六年

辛亥七年

壬子八年

癸丑九年

甲寅十年

魏神瑞元年

法師慧永往生淨土

發明往生淨土者多難悉書一二以槩其餘

永住西林三十年絕志塵囂一心安養鎮南將軍何無忌至虎溪慧遠從徒數百人高言華論學止可觀而永衲衣半脛荷錫持鉢松下飄然而來神氣自若無忌歎曰永公清散之風乃多於遠公也義熙十年示微疾忽斂衣合掌求趺欲起如有所見衆咸驚問永曰佛來迎我言訖而化異香七日乃歆

乙卯十一年

丙辰十二年

秦永和元年  
魏太常元年

法師廬山東林慧遠示生淨土

遠往廬山三十年影不出山尅志西方三觀聖相

沉厚不言。七月晦夕。於般若臺。前方從定起。見阿彌陀佛。身滿虛空。圓光之中。有諸化佛。觀音勢至。左右侍立。又見水流光明。分十四支流。注上下。演說妙法。佛告遠曰。我以本願力。故來安慰汝。七日後當生我國。又見佛陀耶舍。慧持。慧永。劉遺民。在佛之側。前揖遠曰。師志在先。何來遲耶。遠乃謂弟子曰。吾始居此三觀聖相。今復再見吾生淨土。必矣。至八月六日。乃端坐入寂。壽八十四。從遠遊者。僧。濟。道。敬。曇。順。皆先後生淨土。遠神蹟嚴肅。凡接近者。莫不斂慄。懷才負氣者。每欲發問。輒心悸汗流。至竟不敢出一語。其伏物益衆。如此羅什入關。遣書通好。什答書以護法菩薩易之。秦主姚興。欽仰德風。致書道殷。勤請作大智度論序。安帝自江陵旋京。師輔國。何無忌。勸遠候迎。遠稱疾。帝遣使勞問。遠致書。帝復詔答。謝靈運。貢才傲俗。一見肅然。心服。所著文集十卷。行世。

祥符陰曰。淨土之教。肇自遠公。續其芳者。永明壽禪師。而後雲棲宏大。師實續東林之緒。一時士夫

信向不滅。宗劉之儔。公與持公。稱難兄弟。而公高風碩德。遠近尊信。上下感孚。蓋道德精嚴。內外無間者也。當時陶元亮。實預其會。聞鐘攢眉。此正其曠達處。至沽酒延之。決無是事。後世往往以之藉口。故削而不書。

丁巳十三年 是歲姚秦亡 戊午十四年

恭帝 諱德文在位二年 改元者一

恭帝己未元熙元年 庚申二年 宋永初 晉亡

東晉立寺一千七百六十八所。譯經二十七人。共二百六十三部。

宋 姓劉氏 都建康

武帝 諱裕在位三年 改元者一

武帝辛酉永初二年 壬戌三年

少帝 諱義符在位一年

少帝癸亥景平元年 魏主祚始 光元年

文帝 諱義隆在位三年 改元者一

文帝甲子元嘉元年

三藏法師求那跋摩。譯出沙彌威儀經。律分異記七。

部合三十八卷 戒法至此始備

乙丑二年

丙寅三年

道人杯渡寂

渡神化莫測。嘗浮大杯以渡。故呼杯渡。跳足荷一蘆圖。遊吳。擲圖於地。盡力移之。不能動。有窺見。四小兒者。坐圖中。眉目如四天王。見網師從乞魚。網師怒。不與渡。乃拾兩小石投水中。俄有兩牛鬪。觸其網。碎不復見。牛吳人朱靈期自高麗還。阻風至一洲。見一寶寺。拜其僧。乞速還鄉。其僧問曰。識杯渡道人否。曰。識之。其僧取北壁一囊。一錫及鉢。并書著函中。曰。寄杯渡。并授青竹杖。令置舫前。三日。便至石頭。渡忽至。開書大笑。取鉢。擲空。復接曰。不見此鉢四千年矣。遂作一鉢歌。廣陵村舍有李姓者。事之甚謹。一日。忽索袈裟。李辦未至。渡曰。暫出。至暮不歸。合境聞有異香。跡之。見渡敷一敗袈裟於地。晏然而寂。頭前脚後。皆生蓮花。鮮香逼人。數日後。有人從北來。云見渡負蘆圖。行向彭城。彭城

有貧家延麥飯。渡甘之如飴。發明 杯渡蓋應化聖賢也。本無

生死何以書寂書寂。聊示化迹也。如渡者多。難以悉書。書一二以存密化之顯著者。

丁卯四年

戊辰五年 魏神麤元年 魏境十月十三日昏星見竟日

己巳六年 庚午七年 辛未八年

壬申九年 癸酉十年 魏延和元年

甲戌十一年

法師竺道生寂於廬山法座

生鉅鹿人。姓魏。家世仕族。穎悟異常。事汰公為師。解義奇拔。志學之年。便登講席。宿學名流。莫敢抗其詞。辯入廬山。幽棲七年。鑽仰大法。不憚勤苦。與叡嚴二公同遊。長安從什公受業。還都止青園寺。太祖文皇深加歎重。常設會。帝親同衆僧。午飯咸疑。日向晚。帝曰。始可中耳。生曰。白日麗天。天言始中。何得非中。遂取鉢便食。一衆從之。歎其樞機得衷。王弘范泰顏延之並從問道。生剖析經旨。得意忘筌。守文之徒。多相與競。時涅槃經先至京都。止六卷。生覽其幽微。乃說一闡提人。皆得成佛。衆未

能信譏擯之切。生於大眾中正容誓曰。若我所說。反於經義者。請於見身。即招瘡疾。若與實相不相違背者。願捨壽之時。據獅子座。拂衣遊吳。登虎邱山。旬日之中。學徒麇至。尋返廬山。後涅槃。大本至果稱闡提。悉有佛性。與生所說合。生乃陞法座。講說經旨。神色開朗。德音駿發。聽者莫不悅悟。法席將畢。忽見塵尾飄然而墜。端坐正容。隱几而寂。顏色不異。宛似入定。葬廬山之阜。

祥符蔭曰。世傳生公入虎邱。聚石講法。頑石爲之點頭。今點頭石在焉。而本傳不載。同時有肇叡二公。皆講筵義虎。姚興稱叡公乃四海之標。領非獨鄴衛之松柏。肇公著般若無知論。遠公撫几稱歎。又著不真空論。物不遷論。般若無名論。皆妙達真宗。詞義圓徹。什公之門一時蔚盛。可謂得天下英才而教育之矣。

乙亥十二年 魏太延元年

丁丑十四年 戊寅十五年

庚辰十七年 魏太平真君元年

丙子十三年

己卯十六年

辛巳十八年

壬午十九年 癸未二十年 甲申二十一年 乙酉二十二年

丙戌二十三年 魏太平真君七年

魏主燾謬信崔浩毀像法沙門。惠始杖錫至魏庭。

發明像法之興廢者。迹也。無關宗統。曷爲書此。書之以垂戒後世也。

燾先奉佛。因崔浩與道士寇謙之善。謀傾佛法。時太子晃被讒。見疑。晃事沙門玄高爲師。令太子懇誠懺罪。崔寇遂譖太子。并及高。收高縊殺之。後燾偶入僧寺。見有兵器。燾怒。誅寺僧。浩因進說。盡毀沙門。焚經毀像。寇謙之不從。苦與浩爭。曰。卿從今受戮滅門矣。沙門惠始甚有神異。跣行泥塗。初不汚足。而色鮮白。世號白足。在山入定。知燾毀法。乃杖錫宮門。有司奏云。有一道人。足白於面。云欲入見。屢依軍法。斬而不傷。遂至殿庭。燾大怒。自以所佩劍斬之。體無餘異。取北園虎投之。虎皆潛伏。不敢視。燾方禮悔。迎上殿。頂禮懺愆。始爲說法。明辨因果。燾大生愧懼。遂感痼疾。通身發瘡。痛苦難忍。崔寇二人。次發惡疾。崔後滅族。

祥符陰曰佛法之在人心如月之於水然水清月見水濁月隱人心無妄佛法全彰人心不明佛法不顯非佛法有隱顯之殊由人心有明暗之別也水雖有清濁澄空之朗月何虧人自造孽殃其於佛法也何損況以法眼觀之順逆無非佛事喪廢總屬空花茫茫生死苦趣中不知何因而得報爲人又不知何因而得爲國王爲大臣乃不究明眞心扶植正道一念謬信造孽無端亦可悲矣故書之以示儆焉

丁亥二十四年

戊子二十五年

己丑二十六年

庚寅二十七年

魏太平興君十一年

六月魏崔浩伏誅滅族

辛卯二十八年

佛滅後一千四百年

壬辰二十九年

魏主肅爲中常侍宗愛所弑

癸巳三十年

魏興安二年

魏主成帝濬佛隆奉佛法

孝武帝

諱駿文帝子在位十一年改元者二

孝武帝甲午孝建元年

魏興光元年

乙未二年

魏太安元年

丙申三年

丁酉大明元年

祖付菩提達摩正法眼藏 示寂

祖至南印度先是彼王名香至尊重供餘度越倫等又施無價寶珠時王有三子曰月淨多羅曰功德多羅曰菩提多羅其季開士也祖欲試其所得乃以所施珠問三王子曰此珠圓明有能及否月淨功德皆曰此珠七寶中尊固無踰也菩提曰此是世寶未足爲上於諸寶中法寶爲上此是世光未足爲上於諸光中智光爲上此是世明未足爲上於諸明中心明爲上此珠光明不能自照要假智光光辨於此既辨此已卽知是珠既知自珠卽名其寶若明其寶寶不自寶若辨其珠珠不自珠珠不自珠者要假智珠而辨世珠賢不自寶者要假智寶以明法寶然則師有其道其寶卽見衆生有道心寶亦然祖歎其辯慧乃復問曰於諸物中何物無相曰於諸物中不起無相又問於諸物中

何物最高曰於諸物中人我最高又問於諸物中何物最大曰於諸物中法性最大祖知是法器以時尚未至且默而混之及香至王厭世衆皆號絕菩提多羅獨於極前入定經七日而出遂依祖求出家既受具祖告曰如來以正法眼付大迦葉如是展轉乃至於我我今囑汝聽吾偈曰心地生諸種因事復生理果滿菩提圓花開世界起祖付法已卽於座上起立舒左右手各放光明二十七道五色晃曜又踴身虛空高七多羅樹化火自焚空中舍利如雨大衆建塔收供

祥符蔭曰靈丹一粒點鐵成金至理一言轉凡成聖歷觀諸祖未承大法之前種種示見知見不一經法化如空水相融初無剩迹傳佛密印以紹眞宗授受得人能事告畢師資相待間不容髮時節因緣固有自在故曰苟非其人道不虛行

宗統編年卷之七

宗統編年卷之八

祖紀

東土祖師

西天二十八世祖  
東震旦第一世祖

諱菩提達磨南天竺國香至王第三子也得法於般若多羅尊者尊者謂曰汝於諸法已得通量達磨者通大之義也更今名祖問當往何國作佛事尊者曰汝雖得法未可遠遊且止南天待吾滅後六十七載當往震旦設大法藥直接上根慎勿速行衰於日下又問彼有大士堪爲法器否千載之下有留難否尊者曰汝所化之方廣菩提者不可勝數吾滅後六十餘年彼國有難水中文布自善降之汝至南方勿住彼惟好有爲功業不見佛理汝傳法印不可久留聽吾偈曰路行跨水復逢羊獨自棲棲暗渡江日下可憐雙象馬二株嫩桂久昌昌又問此後更有何事尊者曰從是已去一百五十年而有小

難隱吾識。偈曰：心中雖吉外頭凶。川下僧房名不中。爲遇毒龍生武子。忽逢小鼠寂無窮。又問此後如何。曰：却後二百二十年。林下一人當得道。果聽吾識。曰：震旦國中無別路。要假兒一作姪孫。脚下行金雞。解銜一粒粟。供養十方羅漢僧。復演諸偈皆預識佛教隆替事。具實林傳及聖胄集。祖恭稟教義服勤左。右迨尊者順世。遂演化本國。

宋孝武帝戊戌大明二年魏太安四年

西天二十八東震旦第一世少林祖嗣宗統在西竺六十七年來震旦九年航海三年

通共七十九年發明西天稱名處難稽也此土稱處不敢名也

己亥三年

祖留化本國度攝六宗

時有二師一名佛大先二名佛大勝多本與祖同學。佛陀跋陀小乘禪觀。佛大先既遇般若多羅尊者。捨小趣大與祖並化。時號爲二甘露門矣。而佛大勝多更分徒而爲六宗。第一有相宗。第二無相宗。第三定慧宗。第四戒行宗。第五無得宗。第六寂靜宗。各封已解。別展化源。祖喟然歎曰：彼之一師。

已陷牛跡。況復支離而分六宗。我若不除承纏。邪見言已微見神力。至有相宗所問曰：一切諸法何名實相。彼衆中有一尊長薩婆羅答曰：於諸相中不五諸相。是名實相。祖曰：一切諸相而不互者。若名實相當。何定耶。彼曰：於諸相中實無有定。若定諸相。何名爲實。祖曰：諸相不定。便名實相。汝今不定。當何得之。彼曰：我言不定。不說諸相當說諸相。其義亦然。祖曰：汝言不定。當爲實相。定不定。故即非實相。彼曰：定既不定。即非實相。知我非故。不定不變。祖曰：汝今不變。何名實相。已變已往。其義亦然。彼曰：不變當在。在不在。故變實相。以定其義。祖曰：實相不變。變即非實。於有無中何名實相。薩婆羅心知聖師懸解潛達。即以手指虛空曰：此是世間有相。亦能空。故當我此身得似此否。祖曰：若解實相。即見非相。若了非相。其色亦然。當於色中不失色。體於非相中不礙有。故若能是解。此名實相。彼衆聞已。心意朗然。欽禮信受。祖瞥然匿跡。至無相宗所而問曰：汝言無相當何。證之彼衆中有

波羅提者答曰。我明無相心不見。故祖曰。汝心不見。當何明之。彼曰。我明無相心不取捨。當於明時亦無當者。祖曰。於諸有無心不取捨。又無當者。諸明無故。彼曰。入佛三昧。尚無所得。何況無相而欲知之。祖曰。相既不知。誰云有無。尚無所得。何名三昧。彼曰。我說不證。證無所證。非三昧故。我說三昧。祖曰。非三昧者。何當名之。汝既不證。非證。何證。波羅提聞祖辨析。即悟本心。禮謝於祖。懺悔往謬。祖記曰。汝當得果不久。證之。此國有魔。非久降之言。已忽然不見。至定慧宗所問曰。汝學定慧。爲一爲二。彼衆中有婆蘭陀者。答曰。我此定慧。非一非二。祖曰。既非一二。何名定慧。彼曰。在定非定。處慧非慧。一卽非一二。亦不二。祖曰。當一不一。當二不二。既非定慧。約何定慧。彼曰。不一不二。定慧能知。非定非慧。亦復然矣。祖曰。慧非定。故然。何知哉。不一不二。誰定誰慧。婆蘭陀聞之。疑心氷釋。至戒行宗所問曰。何者名戒。云何名行。當此戒行。爲一爲二。彼衆中有一賢者。答曰。一二二一。皆彼所生。依教

無染此名戒行。祖曰。汝言依教。卽是有染。一二俱破。何言依教。此二違背。不及於行。內外非明。何名爲戒。彼曰。我有內外。彼已知竟。既得通達。便是戒行。若說違背。俱是非言。及清淨卽戒。卽行。祖曰。俱是俱非。何言清淨。既得通達。故何談內外。賢者聞之。卽自慚服。至無得宗所問曰。汝云無得。無得何得。既無所得。亦無得。得彼衆中有寶靜者。答曰。我說無得。非無得。得當說得。得無得。是得。祖曰。得既不得。得亦非得。既云得。得得何得。得彼曰。見得非得。非得是得。若見不得。名爲得。得祖曰。得既非得。得得無得。既無所得。當何得。得寶靜聞之。頓除疑網。至寂靜宗。故問曰。何名寂靜。於此法中。誰靜誰寂。彼衆中有尊者。答曰。此心不動。是名爲寂。於法無染。名之爲靜。祖曰。本心不寂。要假寂靜。本來寂。故何用寂靜。彼曰。諸法本空。以空空故。於彼空空。故名寂靜。祖曰。空空已空。諸法亦爾。寂靜無相。何靜何寂。彼尊者聞祖指誨。豁然開悟。於是六衆咸誓歸依。

庚子四年魏和平元年

祖留化天竺

辛丑五年

壬寅六年

癸卯七年

甲辰八年

明帝諱或在位八年改元者二

明帝乙巳泰始元年先稱景和元年

丙午二年魏天安元年 丁未三年魏皇興元年

佛教來東土四百年

戊申四年

己酉五年

庚戌六年

辛亥七年魏延興元年 壬子泰豫元年

蒼梧王諱昱在位四年改元者一

蒼梧王癸丑元徽元年

甲寅二年

乙卯三年

丙辰四年魏承明元年

順帝諱準在位三年改元者一

順帝丁巳昇明元年魏太和元年

戊午二年

己未四月前宋昇明三年五月後齊建元元年 是歲齊代宋

宋立寺一千九百一十三所譯經二百一十部

齊姓蕭氏

高帝諱道成代宋在位四年

高帝庚申建元二年

辛酉三年

壬戌四年

武帝諱蒨在位十一年

武帝癸亥明永元年

甲子二年齊范縝作神滅論書何著邪見也

齊司徒王子良奉佛范縝盛稱無佛著神滅論以

爲形者神之質神者形之用也神之於形猶利之

於刀未有刀沒而利存豈容形亡而神在哉

祥符蔭曰縝此論謂人死神滅蓋斷見也邪見有

六十四常見斷見亦常亦斷見非常非斷見單複

綜錯之有六十四見均之不達大道執著邪見也

今世間作此斷見者多是以撥無因果豈知此形

雖滅愚者業識未泯至人智照無方安得形亡而

神滅乎縝尙未知邪見之邊表又何足以語夫佛

道之圓妙哉當時蕭琛曹思文難之詳矣刀沒而

利盡固也利盡而刀存其謂之何

沙門對制稱名著爲令

沙門法獻玄暢於帝前稱名或稱貧道帝訝之以問中書王儉儉曰漢魏佛法初來對上稱謂載記無聞至宋魏始盛沙門多稱貧道而預坐帝曰稱名始得宜可善令以爲定式

詳符蔭曰出家之法對衆稱名上可以通於帝王次可以施於一切其稱貧道貧訥皆非所宜至稱臣僧則起於晚季蓋率士之瀆莫非草莽之臣而世外之人未忘於世間之禮當引分也趙宋時因受勅開堂稱臣僧而後世効之遂爲時式愚以爲對衆宜稱僧稱名對制當稱臣齊之著令亦一時之見也

乙丑三年

丙寅四年

丁卯五年

姬光生

是爲二祖

發明諸祖未嗣統時皆書名微君父前臣子稱名之義也

父寂武牢人以無子禱祈既久一夕有異光照室

母遂懷妊生而名之曰光

戊辰六年

己巳七年

庚午八年

辛未九年

壬申十年

癸酉十一年

明帝諱鸞在位五年

明帝甲戌建武元年

乙亥二年

丙子三年

丁丑四年

戊寅永泰元年

東昏侯名寶卷在位二年

東昏侯巳卯永元元年

庚辰二年魏景明元年

和帝名寶融在位一年

利帝辛巳中興元年

齊譯經二十人出經律論等四十七部凡三百五十卷

梁姓蕭氏都建康

武帝名衍代齊在位四十八年改元者七

武帝壬午天監元年 陶弘景造太清經及衆醮儀

十卷道經妄撰述者不勝書其一以明邪見惑世爲可歎也

癸未二年

甲申三年魏正始元年

帝著捨道發願文

四月八日帝製文發願永棄道教其略曰經云發

菩提心者。卽是佛心。一切散善。不得爲喻。弟子蕭  
 衍。比因愚迷。就事老君。累棄相承。深此邪法。今捨  
 棄舊習。歸仗正。因願使未來童真出家。廣弘經教。  
 化度舍識。共證菩提。甯在正法中。長淪惡道。不樂  
 歸依老子。暫得神仙。陟大乘心。永離邪見。唯願諸  
 佛。證明菩薩。攝受弟子。蕭衍和南。升重雲殿。對僧  
 俗二萬餘人。發願懺悔。十一日。勅門下曰。大經中  
 說九十六種。唯佛道是正。餘皆邪也。朕捨道事佛。  
 冀歸於正。公卿能入此道者。各可發菩提心。老君  
 周公孔子等。雖是如來弟子。經云老子爲迦葉菩薩。且應生。然止是世間之善。不能革凡成聖。云云。  
 發明終帝之世。其捨身講經等。不具書。此以見帝之正信。私願爲不易反也。  
 祥符蔭曰。仙術長生。未了一心。不達大道。終墮輪  
 迴。周孔世間聖人。尙不能出天地範圍之外。又豈  
 能了生死業緣之極。致乎佛教頓悟自心。則十方  
 三世。一念圓攝。眞照妄消。善惡俱泯。湛然圓覺。名  
 大涅槃。是知欲了生死等。以正道廣度含生。非佛  
 教無從矣。武帝捨道發願之文。眞一切人天所宜

錄聽眞母以先入之見自溺泥塗長淪苦趣也

乙酉四年

丙戌五年

丁亥六年

戊子七年

魏永平元年

己丑八年

三藏法師菩提流支譯經

支北天竺國人。從魏永平二年。至天平年間。共歷  
 二十餘載。共譯楞伽等經論三十九部。合一百二  
 十七卷。

勅沙門僧旻撰衆經要鈔

帝以法海浩博。淺識窺尋。卒難該究。因勅莊嚴寺  
 僧旻等。集撰衆經要鈔一部。計八十八卷。

庚寅九年

辛卯十年

壬辰十一年

延魏昌元年

癸巳十二年

甲午十三年

禪師寶誌公寂

書禪師始此

發明

誌法身大士。應化聖賢。機用語言。皆全提

向上不可以心思。意解者。其先來東震成。熟西來直指之機乎。故書禪師

誌應迹金陵東陽出家鍾山宋齊間。屢著神異。帝

一日詔問弟子煩惑未除。何以治之。答曰。十二又

問其旨如何。答曰：在書字時，節刻漏中，帝益不曉。嘗詔畫工張僧繇寫誌像，僧繇下筆，輒不自定，誌遂以指撝面門，分披出十二面觀音，妙相殊麗，或慈或威，僧繇竟不能寫。他日與帝臨江，縱望有紫旛檀栾流而上，誌以杖引之，卽以屬供奉官俞紹令雕誌像，頃刻而成，神彩如生。所垂語句及大乘讚十二時歌，皆直示大道，迥絕言詮。是年冬，無疾而終。然一燭以付後闍舍人吳慶，帝聞歎悼，厚禮葬於鍾山獨龍阜。王筠撰碑。

乙未十四年

帝勅僧紹編集三藏目錄 勅沙門實唱撰集經律儀制

帝以國土調安，皆承三寶恩德，天龍默祐之功，乃勅莊嚴寺僧寶唱撰集建福禳災禮懺祈願等儀，制合於經律者，帝親覽授以備行持。

丙申十五年

魏熙平元年

丁酉十六年

祖留南天度異見王

祖化被南天，聲馳五印，經六十載，度無量衆，後值異見王欲毀佛法，王故祖之姪也。祖憫之，欲開其蒙，而六衆亦各念佛法，有難師將何所匡濟。祖造知衆意，彈指應之。六衆悉聞云：此我師信響也。皆至祖所。祖曰：一翳蔽空，孰爲翦之前無相宗。宗勝欲行祖曰：汝雖辯慧，道力未全，且與王無緣。勝辭祖竟。至王所，廣陳法要。王曰：汝今所解其法何在。宗勝曰：如王治化，當合其道。王所有道，其道何在。王曰：我所有道將除邪法。汝所有法將伏何人。祖不起於座，惡知宗勝義，墮召波羅提曰：宗勝不稟吾語，與王論屈。汝急往救。波羅提曰：願假神力，言訖雲起，足下遂乘以見王。王正問宗勝，忽見愕然，忘其所問。而顧波羅提曰：乘空來者是，正是邪提曰：我非邪正，而來正邪。王心若正，我無邪正。王雖驚異而驕慢，方熾，卽擯宗勝，令出。波羅提曰：王既有道，何擯沙門。我雖無解，願王致問。王怒而問曰：何者是佛。提曰：見性是佛。王曰：師見性否。提曰：我見佛性。王曰：性在何處。提曰：性在作用。王自不見。

王曰於我有否。提曰王若作用無有不是。王若不用體亦難見。王曰若常用時幾處出見。提曰若出見時當有其人。王曰其入出見當爲我。說波羅提卽說偈曰。在胎爲身處世爲人。在眼曰見在耳曰聞。在鼻辨香在口談論在手執提。在足運奔偏見俱該沙界收攝在一微塵。識者知是佛性不識喚作精魂。王聞偈已心卽開悟。悔謝前非。諮詢法要。王復問波羅提師承爲誰。提曰大王之叔菩提達摩也。王聞遽勅近臣迎祖。至王宮祖爲王懺悔。往非王聞泣謝。隨詔宗勝歸國。近臣曰宗勝被謫時已捐軀投崖矣。祖曰勝尚在召之當至。初勝受擯耻不能正。王遂投身危崖。俄有神人以手捧承置於巖上。勝曰我忝沙門當與正法爲主。不能抑絕。王非是以捐身自責。神何佑助。願示所以。於是神人乃說偈曰。師壽於百歲八十而造非爲近至尊。故熏修而入道。雖具少智慧而多有彼我所見諸賢等。未嘗生珍敬二十年功德其心未恬靜。聰明輕慢故而獲。至於此得王不敬者當感果如是。自

今不疎怠。不久成奇智。諸聖悉存心。如來亦復爾。勝聞偈欣然。遂宴坐巖間。至是王遣使山中召勝。祖謂王曰。知勝來乎。王曰未知。祖曰再命乃來耳。使者至山而勝辭果再命乃至。

戊戌十七年

魏神龜元年

姬光出家宴坐香山

光少則超然博極載籍。尤善談老莊。後覽佛乘。遂盡棄去。依寶靜禪師出家。名神光。偏學大小乘義。年三十三返香山終日宴坐。

己亥十八年

沙門慧皎奉勅撰高僧傳成

始於後漢明帝永平十年。終至梁天監十八年。凡四百五十三載。共二百五十七人。附見者二百餘人。開爲十例。一曰譯經。二曰義解。三曰神異。四曰習禪。五曰明律。六曰遺身。七曰誦經。八曰興福。九曰經師。十曰唱導。凡十科所叙皆散在衆記。刪聚一處。述而無作。合序錄爲十四卷。號曰高僧傳。祥符蔭曰。普通以前直指之道。未來東震最上風。

規無聞焉而譯經弘法之士皆大龍香象神力變化未有以奮發沉鍊之其習禪者皆四禪八定而非祖師立地超脫頓漸絕迹之旨故皎之所列十科以德業言其中雜緣疊出者亦有之然蒐揚之功不為無補於法苑也

庚子普通元年 辛丑二年 壬寅三年

癸卯四年

梁太子綱編法寶集

甲辰五年

祖留化南天共六十七年

乙巳六年魏孝昌元年

祖發南天竺航海來東土

祖念般若多羅六十七載之記復思東震旦國佛記一千年後般若智燈運光於彼遂嚮弟子不若蜜多羅住天竺傳法而躬至震旦乃辭祖塔別學侶慰勉於王曰當勤修白業吾去一九即回王聞祖言涕淚交集曰此國何罪彼土何祥取既有緣非吾所止唯願不忘父母之國事畢蚤回王即具

大舟躬率臣僚學衆送至海壖而別

丙午普通七年

祖航海東來泛重溟凡三周還書達于南海

丁未大通元年

佛教來東土四百六十年 發明書教來東土止於是年此後聖

書宗統以宗統教也

東土第一世祖菩提達磨尊者自南天竺來

九月二十一日達於廣州刺史表聞帝遣使貴詔

迎請

考定景德傳燈錄作普通八年丁未五燈會元作普通七年庚子傳法正宗記作普通元年庚子又作或曰普通八年丁未佛祖統紀作以梁大通元年達南海佛祖歷代通載作丁未改元大通初祖菩提達摩來梁佛祖綱目作普通元年十一月至金陵今考景德傳燈錄作普通八年丁未是也普通止七年作八年非也五燈會元作普通七年庚子普通七年其年丙午年甲差誤也傳法正宗記作普通元年庚子或曰普通八年丁未此未定之詞也謹按般若多羅親記祖云吾滅後六十七載當往震旦多羅之寂在宋孝武大明元年丁酉從戊戌大明二年順數至梁普通五年魏正光五年甲辰為六十七年此六十七年祖留南天竺從梁普通六年魏孝昌元年乙巳祖辭南竺當在新年三周寒暑以梁大通元年丁未至廣州此確證也佛祖統紀及佛祖歷代通載皆相合其日丁未改大通王怡長歷甲子數有普通八年若然則傳燈所稱普通八年亦自有由而丁未又正相合以是合證定祖于大通元年丁未至

梁與跨水逢羊之識前  
後相符萬無可疑者也

別證陶宗儀輟耕錄陶華陽譜曰大同二年丙辰

記乃詣鄧縣禮阿育王塔自誓受戒世傳呂巖從鍾  
離權受劍訣後二百餘年來參黃龍誨機始竟佛言  
不修正覺別得生理休止深山大島絕于人境報盡  
還來散入諸趣晚年始堅此願唐志有所著草堂法  
師傳當時佛教雖隆禪宗未聞圓覺以大通元年至  
以是年去留臺城十九日度君不及相見圓覺初祖  
諡○百丈清規章祖章云初祖梁普通八年丁未九  
月二十一日至南海十月一日至金陵十九日渡江  
北十一月二十三日至洛陽至丙辰歲十月  
五日端居而逝十二月二十八日葬熊耳山

祖至金陵帝問法不契

十月一日至金陵帝問卽位來造寺寫經度僧有  
何功德祖曰並無功德帝曰何以無功德祖曰此  
但人天小果有漏之因如影隨形雖有非實帝曰  
如何是真功德祖曰淨智妙圓體自空寂如是功  
德不以世求帝遂問如何是聖諦第一義祖曰廓  
然無聖帝曰對朕者誰祖曰不識帝不悟

祖居洛陽寓少林面壁

祖知帝不契機是月十九日潛回江北十一月二  
十三日居洛陽寓止嵩山少林寺面壁而坐人莫  
之測謂之壁觀婆羅門

祥符陰曰聖賢佛祖設化因時作止語默無非教

也孔子見學者多從事於言語而曰子欲無言又  
曰吾無行而不與聖人亦何嘗不欲人忘言會道  
哉佛教東來至梁之時經律論等譯出者凡有五  
千四百餘卷語言文字不爲不多矣天下僧至二  
百餘萬寺院凡四萬餘所帝王捨身講法化儀莊  
嚴不爲不盛矣於是初祖以並無功德蕩修行之  
執相者以面壁九年折文言之外求者直指人心  
頓證大道西來大意與孔氏之教若合符節也

戊申二年

祖寓少林 勅沙門智藏等撰義林八十卷

己酉中大通元年魏永安元年

魏主遣使至少林徵祖前後三至不起

魏主聞祖寓少林遣使齎詔徵前後三至祖不顧

魏主彌加欽尙

梁主捨身同泰寺地震百僚三請復位

帝捨身講經非一書此以

之樂

九月十五日帝捨身於同泰寺設四部無遮大會

釋御服持法衣行清淨大捨素牀瓦器親爲大衆講涅槃經地大震羣臣以錢億萬奉贖表請還宮三請乃許十一月一日駕還宮

祥符陰曰以世治言之武帝過矣以佛法言之此菩薩行也疇則能之若其了悟中道契第一義諦於廓然不識之答其於祖也豈不覲面親承乎而乃當前失之惜哉

庚戌二年

魏遣使賈衣鉢就少林供祖三辭堅請受之

魏使賈摩訶袈裟二領金鉢銀水瓶繒帛等物來

少林供祖祖固讓三返魏主意彌篤祖乃受之自

爾經白之衆倍加信向

辛亥三年魏普泰元年

祖在少林

壬子四年魏永熙元年

癸丑五年

甲寅六年東魏天平元年

癸亥入南斗

僧神光來參

僧神光者久居伊洛博覽羣籍善談玄理每歎曰

孔老之教禮術風規莊易之書未盡妙理近聞達摩大士住止少林至人不遙當造玄境遂詣祖參承祖晨夕端坐面壁莫聞示誨

神光斷臂安心

光自惟曰昔人求道敲骨取髓刺血濟饑布髮掩泥投崖餉虎古尚若此我又何人其時十二月九日值夜大雪光夜侍堅立不動遲明積雪過膝祖顧而憫之問曰汝久立雪中欲求何事光悲淚曰惟願和尚慈悲開甘露門廣度羣品祖曰諸佛無上妙道曠劫精勤難行能行非忍而忍豈以小德小智輕心慢心欲冀真乘徒勞辛苦光聞祖誨勵潛取利刀自斷左臂置於祖前祖知是法器乃曰諸佛最初求道爲法忘形汝今斷臂吾前求亦可在遂因與易名曰慧可乃問諸佛法印可得聞乎祖曰諸佛法印匪從人得可曰我心未甯乞師與安祖曰將心來與汝安可良久曰覓心了不可得祖曰與汝安心竟

祥符陰曰此是東土第一箇樣子學道求法者急

著眼

乙卯大同元年西魏文帝寶炬大統元年東魏天平二年  
祖付慧可正法眼并授袈裟表信

祖止少林越九年欲返天竺命門人曰時將至矣汝等盍言所得乎有道副對曰如我所見不執文字不離文字而爲道用祖曰汝得吾皮尼總持曰我今所解如慶喜見阿閼佛國一見更不再見祖曰汝得吾肉道育曰四大本空五蘊非有而我見處無一法可得祖曰汝得吾骨最後慧可禮拜依位而立祖曰汝得吾髓乃顧慧可而告之曰昔如來以正法眼付迦葉大士展轉囑累而至於我今付汝汝當護持并授汝袈裟以爲法信各有所表宜可知矣可曰請師指陳祖曰內傳法印以契證心外付袈裟以定宗旨後代澆薄疑慮競生云吾西天之人言汝此方之子憑何得法以何證之汝今受此衣法却後難生但出此衣并吾法偈用以表明其化無礙至吾滅後二百年衣止不傳法周沙界明道者多行道者小說理者多通理者少

潛符密證千萬有餘汝當闡揚勿輕未悟一念回機便同本得聽吾偈曰吾本來茲土傳法度迷情一花開五葉結果自然成祖又曰吾有楞伽經四卷亦用付汝卽是如來心地要門令諸衆生開示悟入吾自到此凡五度中毒我嘗自出而試之置石石裂緣吾本離南印來此東土見赤縣神州有大乘氣象遂踰海入漢爲法求人際會未諧如愚若訥今得汝傳授吾意已終

祖往禹門太守楊街之問道

祖與徒衆往禹門千聖寺止三日有期城太守楊街之蚤慕佛乘問祖曰西天五印師承爲祖其道如何祖曰明佛心宗行解相應名之曰祖又問此外如何祖曰須明他心知其今古不厭有無於法無取不賢不愚無迷無悟若能是解故稱爲祖又曰弟子歸心三寶亦有年矣而智慧昏蒙尙迷真理適聽師言罔知收措願師慈悲開示宗旨祖知懇到卽說偈曰亦不觀惡而生嫌亦不觀善而勤措亦不捨智而近愚亦不拋迷而就悟達大道兮

過量通佛心。分出度不與凡聖同躋。超然名之曰祖。街之聞。偈悲喜交并。曰。願師久住。世間化導羣有。祖曰。吾即逝矣。不可久留。根性萬差。多逢患難。街之曰。未審何人。弟子爲師。除得否。祖曰。吾以傳佛秘密利益。迷途害彼。自安必無。此理街之曰。師若不言。何表通變觀照之力。祖不獲已。乃爲識曰。江槎分玉浪。管炬開金鎖。五口相共行。九十無彼我。街之莫測。禮辭而去。

丙辰大同二年。魏大統二年  
東魏天平三年

東土第一世少林圓覺祖示寂

時魏氏奉釋禪。雋如林。議論多與祖違。祖玄風所被。有識咸歸。彼徒生嫉。數加毒藥。莫能中傷。至第六度。以化緣既畢。遂端居而逝。時十月五日。十二月二十八日。葬熊耳山。建塔定林寺。曰空觀。安隱忍曰。達摩大師初破六宗。其意銳甚。及乎東來。震旦六番受毒。而不言。謗議沸騰。而不辯。其弘法之心。乎方其不契於梁。不容於流支之徒。機亦危矣。稍有爭論。安能默坐。九年。以傳二祖耶。予以

是知傳佛心宗者。不可執一方便。而進退有時也。祥符蔭曰。初祖東來。爲傳法也。二祖得髓。而能事已畢。其他何卹焉。義學之徒。狃於聞見。驟聞直指。別傳。夫誰能不惑。無怪其嫉之深也。使東土之人。皆卽聞而信之。祖亦無庸汎重溟矣。面壁九年。至今凜凜猶生。千載之後。法周沙界。伊誰之力。歟。藉非祖來。以眞宗持之。迦文之教。流行震旦。不知作何底止。潛符蜜證。道豈在空言哉。

宗統編年卷之八

宗統編年卷之九

第二世祖

諱慧可。造少林。安心得法。逮初祖西歸。乃闡化。

武帝丁巳大同三年。魏大統三年  
東魏天平四年

第二世鄴都祖嗣宗統五十一年

戊午四年

發明。西天邈隔。故晉祖住世傳法。明宗統有在也。東土止書某年實事。關

宗統者而不書住世傳法  
明遠近昭然文獻足徵也

己未五年東魏興和元年

詔取初祖遺履少林寺供養

宋雲奉使西域回遇初祖於葱嶺見手携隻履翻  
闕而逝雲問祖何往曰西天去雲歸具奏其事帝  
令啓墳唯空棺一隻革履存焉舉朝爲之驚歎奉  
詔取遺履於少林寺供養

梁主撰初祖道行碑

初帝遇初祖因緣未契及聞化行魏邦遂欲自撰  
祖碑而未暇也及聞宋雲事乃成之刻石鍾山

庚申六年

辛酉七年

壬戌八年

癸亥九年

甲子十年

乙丑十一年

丙寅中大同元年

丁卯太清元年

湘東王記室虞孝敬撰內典博要二十卷

戊辰二年

己巳三年

或問梁武帝事佛而因  
拜臺城佛法之驗安

在也答曰梁報各有因緣佛法一切平等梁武帝奉佛  
臨登道岸將來決證菩提臺城之報乃往昔已定之  
梁子今會值亦復何尤具  
正信者自可無此疑也

文帝諱綱在位二年

文帝庚午大寶元年北齊天保元年

法師慧聞遙稟能樹祖

聞北齊高氏因閱龍樹祖大智度論發明中道遂

遙稟承是爲台宗二祖

辛未二年北齊天保二年

祖度僧璨作北齊天平二年者誤

有一居士年踰四十不言名氏聿來設禮而問祖

曰弟子身纏風恙請和尚懺罪祖曰將罪來與汝

懺士良久曰覓罪了不可得祖曰與汝懺罪竟宜

依佛法僧住士曰今見和尚已知是僧未審何名

佛法祖曰是心是佛是心是佛法佛法無二僧寶亦

然士曰今日始知罪性不在內外不在中間如其

心然佛法無二也祖深器之即爲剃髮曰是吾寶

也宜名僧璨其年三月十八日於光福寺受具自

茲疾漸愈

祖回示向居士書偈

向居士幽棲林野木食湖飲北齊天保初闢觀盛

化乃致書曰。影由形起。響逐聲來。弄影勞形。不識形爲影本。揚聲止響。不知聲是響根。除煩惱而趣涅槃。喻去形而覓影。離衆生而求佛。果喻默聲而求響。故知迷悟一途。愚智非別。無名作名。因其名則是非生矣。無理作理。因其理則爭論起矣。幻化非眞。誰是誰非。虛妄無實。何空何有。將知得無所得。失無所失。未及造謁。聊申此意。伏望答之。祖回示曰。備觀來意。皆如實。眞幽之理。竟不殊本。迷摩尼謂瓦礫。豁然自覺。是眞珠。無明智慧等。無異當知萬法。卽皆如愍此二見之徒。輩申辭措筆。作斯書。觀身與佛不差。別何須更覓彼。無餘居士。捧披祖偈。乃申禮覲密承印記。

佛滅後一千五百年

元帝名釋在位三年

元帝壬申承聖元年

癸酉二年

祖付僧瓌衣法

僧瓌執侍經二載。祖遂囑累付以衣法。偈曰。本來

緣有地。因地種花生。本來無有種。花亦不曾生。又曰。汝受吾教。宜處深山。未可行化。當有國難。般若多羅懸記。所謂心中雖吉。外頭凶者是也。吾亦有宿累。今往酬之。汝諦思聖記。勿罹世難。俟時傳化。祖度僧那。

那馬氏子。少而神雋。年二十一。講禮易於東海。聽者如市。投祖出家。自是手不執筆。盡棄世典。惟一衣一鉢。一坐一食。奉頭陀行。後謂門人慧滿曰。祖師心印。非專苦行。但助道耳。若契本心。發隨意眞光之用。則苦行如握土成金。若惟務苦行而不明本心。爲愛憎所縛。則苦行如黑月夜履於險道。汝欲明本心者。當審諦推察。遇色遇聲。未起覺觀時。心何所之。是無耶。是有耶。既不墮有無處。所則心珠獨朗。常照世間。而無一塵許間隔。未嘗有一刹那頃斷續之相。

甲戌三年

祖往鄴都化導

詔國內一切禪師入臺供養。應供不書此書以其普也

慧思謁法師慧聞

思武津李氏子。頂有肉髻。牛行象視。辭親入道。及稟具常習坐。日唯一食。晝夜攝心。乃往受學。聞大師經三七日。獲宿智通。悟法華三昧。

敬帝名方智在位三年

敬帝乙亥紹泰元年

丙子太平元年

西魏禪周

丁丑二年梁禪陳又陳永定元年

陳姓陳氏

武帝名翳先代梁在位三年

武帝戊寅永定二年

法師慧思造金字經

思嘗示衆曰。道源不遠。性海非遙。但向已求。莫從他覓。覓即不得。亦不真。以末法多難。發大誓願。修行度世。造金字摩訶般若波羅蜜及法華經二部。函以七寶琉璃。發願普見色身盡。未來際爲衆講說。令衆生信不退惡。法消除善緣。成就至彌勒佛出世。說般若時。金經出見光明。震耀見聞。證道於十方佛界。亦復如是。

己卯三年

文帝名蒨在位七年改元者二

文帝庚辰天嘉元年齊乾明元年

智顗謁大蘇山

顗字德安。荊州華容人。七歲聞僧誦法華經。忽自記憶。十五禮佛誓志出家。十八依果願寺僧法緒剃度。二十進具。謁光州大蘇山慧思大師。思示以普賢道場說四安樂行。顗入觀三日。悟法華三昧。獲旋陀羅尼。見靈山一會儼然未散。

辛巳二年周保定元年齊太甯元年

壬午三年齊河清元年

癸未四年

甲申五年

乙酉六年慧星見

旃檀佛像至淮南

丙戌天康元年

臨海王丁亥光大元年

戊子二年

大師慧思自大蘇山往南嶽

思嘗以般若法華二經爲衆發解。命門人智顗代

講至一心具萬行有疑請決思曰汝所疑乃大品次第意耳未是法華圓頓旨也吾昔於夏中一念頓發諸法見前吾既身證不必致疑遂以是年至南嶽謂衆曰吾寄此山止期十載吾身前曾歷此處指示宿蹟宛然猶在又指一林泉勝異處曰此古寺也吾昔曾居俾掘之基址猶存自此化道彌盛陳主屢致供訊目爲大禪

宣帝名項在位十四年

宣帝己丑大建元年齊武平元年

智顗辭南嶽往金陵闡化

顗辭思往金陵宣化凡說法辯才無倦以五時華嚴

阿含方等般若判如來一代教相以四教頓漸秘密不定

化儀以四教藏通別圓判化法謂法華爲一乘妙典出

五重玄義釋名辯證明宗以釋之依一心三諦示

三止觀中觀一一觀心心念不可得復示六即理

即佛即本體以化執名相者二名字即佛令未除妄

想者聞名信解三觀行即佛令因解修觀返源達本

四相似即佛觀行功深發相似用五分真即佛得真如用一念成佛六究竟即佛無明永盡證無所證故通具三身法報隨居四土一常寂光土法身居之

二實報無障礙土登地

菩薩所居三方便其餘土四淨觀同身土互融權居土並爲應化上二乘凡夫所居實無礙晝夜宣演生四種益具四悉檀門人灌頂編記之爲天台教東傳章安頂頂傳紹興威威傳然皆以教觀輔翼禪宗後因安史之亂會昌之廢五代兵火之變幾至失傳螺溪尋訪舊聞天台一宗復興弘江浙傳至四明荆溪中興教觀至明雲棲宏復闡明之迄今曲水蓮居阜亭龍溪之間傳持未泯諸方講席自爲性宗

大士傳善慧寂

慧示跡雙林廣弘法化如傳所載嘗有偈曰空手把鋤頭步行騎水牛人從橋上過橋流水不流四月二十四日示衆曰此身甚可厭惡衆苦所集須慎三業精勤六度若墮地獄卒難得脫常須懺悔弟子問師之發跡可得聞乎曰我從第四天來爲度汝等次補釋迦故大品云有菩薩從兜率天來諸根猛利疾與般若相應即吾是也言訖跌坐而逝七日後有沙門法猛持繡彌勒像及九乳鐘來鎮其龕

庚寅二年

辛卯三年

壬辰四年

癸巳五年

甲午六年 五月周主宇文邕毀像法 發明 大道

不可毀也邕所毀者乃像法耳故書法如此

沙門惠遠道琳抗論廷辯法師靜謐身狗法

發明

遠排衆出對琳抗論醉雖不能迴邕之妄而適其悲怒血誠不可泯也故並書之

毀法詔下沙門惠遠排衆出對與邕反復論辯邕

皆屈無對道琳與邕議論二十餘日醉醉七十番

邕亦不能屈然邕決欲行法師靜謐聞詔下慨然

詣闕上表引見極陳禍福指證明白邕爲改容顧

已行之詔不可返謝遣欲官之藹退而泣曰何忍

見之遂入終南山號泣七日夜撰三寶錄二十卷

坐磐石自條其肉并腸胃掛松枝上捧心而逝

乙未七年

丙申八年

法師智顗謝遣徒衆隱天台山佛隴峯

丁酉九年

周主邕感病疾祖邕入地獄受大極苦求隋文帝救之見冥報記

性宗第三世南嶽大師慧思寂

思習慈忍行奉持三聚戒將順世囑門人常修法

華般舟念佛三昧方等懺悔期於見證是年六月

二十二日屏衆泯然而逝

戊戌十年 己亥十一年 庚子十二年

辛丑十三年 是年隋代周又爲隋開皇元年

隋 姓楊氏都長安天下爲一

壬寅 陳大建十四年隋開皇二年

長城公 名叔寶立七年

癸卯 陳後主叔寶至德元年隋開皇三年

甲辰 至德二年開皇四年 乙巳五年 丙午六年

丁未 陳禎明元年隋開皇七年

祖 韜光晦跡

祖於鄴都化導四衆皈依凡三十四年遂韜光混

迹變易儀相人莫之測 發明 祖雖價業尙有六宗統之紀當止於是年

第三世祖

諱僧璨不言姓氏邑里以白衣禪二祖得度傳

法後隱舒之皖山往來太湖縣司空山後周毀

法時祖深自韜晦居無常處積十餘載人無知

者至是二祖韜光祖乃紹化

戊申陳祚明二年  
隋開皇八年

第三世羅浮祖嗣宗統十九年

隋文帝名堅代周在位二十四年改元者二

文帝己酉開皇九年是年陳亡  
天下爲一

庚戌十年 辛亥十一年

壬子十二年

祖示沙彌道信解脫法門

有沙彌梵語沙彌  
此云勦息道信者年十四來禮祖曰願和

尚梵語和尚此云力生謂一切道法由此師之力而生也慈悲乞與解脫法

門祖曰誰縛汝曰無人縛祖曰何更求解脫乎信

於言下大悟

癸丑十三年

第二世鄴都大祖祖示寂

祖韜光六載以宿業故因至莞城縣匡救寺說法

有憤嫉之者輿訪於邑宰祖怡然委順而化時年

一百七歲

安隱忍曰永明壽禪師垂誠云學道之門別無奇

特只要洗滌根塵下無量却來業識種子汝等但

能消除情念斷絕妄緣對世間一切愛欲境界心

如木石相似直饒未明道眼自然成就淨身又云

深嗟末世只學虛頭全無實解步步行有口口談

空自不實業力所牽更教人撥無因果便說飲酒

食肉不礙菩提行盜行姪無妨般若生遭王法死

陷阿鼻諸佛出來也無救你處若割心肝如木石

相似便可食肉若喫酒如喫屎尿相似便可飲酒

若見端正男女如死屍相似便可行姪若見己財

他財如糞土相似便可侵盜饒你鍊得到此田地

亦未可順汝意在直待證無量聖身始可行世間

逆順事古聖施設豈有他心只爲末世僧尼少持

禁戒恐賺他向善俗子多退道心所以廣行遮護

千經所說萬論所陳若不去姪斷一切清淨種乃

至若不去酒斷一切智慧種如何後學略不聽從

自毀正因反行魔說夫永明無量壽之應身觀其

垂誠與楞嚴三決定義同一概切後代魔子或借

二祖調心之言爲口實如刻糞作檀佛說名爲可

憐憫者。昔玉泉皓禪師製犢鼻褌。書歷代祖師名字。有狂僧效之。皓見而詬曰。汝具何道理。敢以爲戲。事耶。嘔血無及矣。僧尋於鹿門。如所言而逝。夫酒仙。蜺子。皆散聖中人。應時而出。以救一期之病。非傳佛心宗者所宜效顰也。至於末後一段光明。輔疑爲信。今之大言不慚者。能如是乎。或謂之祖住世一百七歲。韜光混迹。皆爲償債。而然祥符曰。似則似也。然祖之方便。有非一切所能測識者。唯證乃知。毋庸擬議也。

甲寅十四年

乙卯十五年

丙辰十六年

丁巳十七年

性宗天台第一世智者大師智顓寂於剡東石城寺。十一月十七日。帝遣使至天台。詔迎顓將行。告門人曰。吾今往而不返。汝等當成就佛隴南寺。一依我圖門人曰。若非師力。豈能成辦。顓曰。乃是王家所辦。汝等見之。吾不見也。二十一日。到剡東石城寺。百尺石像前。不進二十四日。顧侍者曰。不久應去。大士來迎。吾其西矣。門人智朗請曰。不審何位。

何生顓曰。吾不領衆。必淨六根。損己利他。獲預五品耳。命筆作觀心偈。示諸法門。綱要訖。跌坐而逝。壽六十。臘四十。

祥符陰曰。止觀立義。皆圓極一心。妙該萬法。當禪宗初來。未大舉揚之時。而師能表裏導引之。至其玉立精嚴。淨業成就。則又師之緒餘也。

戊午十八年

己未十九年

庚申二十年

辛酉仁壽元年

詔天下建舍利塔。書何著善也

帝龍潛時。遇梵僧授舍利一裹。曰。檀越他日爲晉天慈父。此大覺遺靈。留與供養。帝作七寶箱貯之。是年六月十三日。詔岐州等三十州各建塔。帝親以七寶箱奉三十舍利。置於御座。燒香禮拜。曰。願弟子常以正法護持三寶。救度一切衆生。乃取金瓶瑠璃瓶各三十。以瑠璃瓶盛金。瓶置舍利於其內。薰陸爲泥塗蓋而印之。諸沙門各奉而行。初入州境。總管刺史夾道步引。四部大衆。威儀齋肅。共以寶蓋旛幢。華臺珠幔。種種音樂。盡來供養。圍繞。

限十月十五日午時同下石函帝於是時執珪降  
階率文武百僚燒香及舍利入塔處處表聞皆有  
感應

壬戌二年

祖付道信衣法

信服勞九載後於吉州受戒侍奉尤謹祖屢試以  
玄微知其緣熟乃付衣法偈曰華種雖因地從地  
種華生若無人下種華地盡無生

癸亥三年

祖適羅浮山

祖告道信曰昔可大師付吾法後往鄴都行化三  
十餘年今吾得汝何滯此乎乃適羅浮山

甲子四年

煬帝名廣在位十三年按  
諡法好內遠禮曰煬

煬帝乙丑大業元年

祖自羅浮山還著信心銘

信心銘曰至道無難惟嫌揀擇但莫憎愛洞然明  
白毫釐有差天地懸隔欲得見前莫存順逆違順

相爭是爲心病不識玄旨徒勞念靜圓同太虛無  
欠無餘良由取舍所以不如莫逐有緣勿住空忍  
一種平懷泯然自盡止動歸止止更彌動惟滯兩  
邊甯知一種一種不通兩處失功還有沒有從空  
背空多言多慮轉不相應絕言絕慮無處不通歸  
根得旨隨照失宗須臾返照勝却前空前空轉變  
皆由妄見不用求真惟須息見二見不住慎莫追  
尋纔有是非紛然失心二由一有一亦莫守一心  
不生萬法無咎無咎無法不生不心能由境滅境  
逐能沉境由能境能由境能欲知兩段原是一空  
一空同兩齊含萬象不見精靈甯有偏黨大道體  
寬無易無難小見狐疑轉急轉遲執之失度必入  
邪路放之自然體無去住任性合道逍遙絕惱繫  
念乖真昏沉不好不好勢神何用疎親欲取一乘  
勿惡六塵六塵不惡還同正覺智者無爲愚人自  
縛法無異法妄自愛著將心用心豈非大錯迷生  
寂亂悟無好惡一切兩邊良由斟酌夢幻空花何  
勞把捉得失是非一時放却眼若不寐諸夢自除

心若不異萬法一如一如體立元爾忘緣萬法齊觀歸復自然泯其所以不可方比止動無動動止無止兩既不成一何有爾究竟窮極不存軌則契心平等所作俱息狐疑盡淨正信調直一切不留無可記憶虛明自照不勞心力非思量處識情難測真如法界無他無自要急相應惟言不二不二皆同無不包容十方智者皆入此宗宗非延促一念萬年無在不在十方目前極小同大忘絕境界極大同小不見邊表有即是無無即是有若不如是必不須守一卽一切一切卽一但能如是何慮不畢信心不二不二信心言語道斷非去來今

丙寅二年

第三世羅浮鑑智祖示寂

發明

禪宗初來祖師弘道傳法居無定止

二祖稱鄴都三祖稱羅浮者以曾過化存神故從稱之也

祖還山逾時士民奔禮大設檀供祖爲四衆廣宣心要訖於法會大樹下合掌立化時十月十五日也四衆建塔供養塔曰覺寂祥符蔭曰祖信心銘如取香水海中乳注之七寶

瓶以灌一切凡聖頂蒙其一滴者無不透體清涼當下受用後來法海波瀾盡從這裏流出千古而下其尙知所朝宗乎母爲飲水區河之見也

第四世祖

諱道信姓司馬氏世居河內後徙於鄆州廣濟縣生而超異幼慕空宗諸解脫門宛如宿習既嗣祖法攝心無寐脇不至席者六十年

丁卯大業三年

第四世鄆春祖嗣宗統

四十五年

沙門靜琬創刻石藏經

幽州智泉寺沙門靜琬慮三災壞劫時大法湮沒乃創刻石藏經板封於涿州之西白帶山

山有七洞洞

皆滿由大業至唐貞觀十二年願未終而化門人感遇法儀等相繼五世而經亦未完歷唐及宋代不乏人元至正間有高麗沙門慧月其緒尚未卒梁明無聞焉其事頗末具載雲居各碑記

祥符蔭曰末劫衆生非佛法何以拯濟但其靈障深難逢佛法南嶽思大師誓以願力住世奉持佛法俟見慈氏琬公創刻石經爲三災苦海作大津梁二師之大行弘慈眞塵刹身心護持法脉者

矣

戊辰四年

己巳五年

庚午六年

辛未七年

壬申八年

癸酉九年

甲戌十年

乙亥十一年

丙子十二年

丁丑十三年

祖抵吉州解賊難

時隋季兵起羣盜圍吉州七旬不解萬衆惶怖祖愍之教令念摩訶般若時賊衆望雉堞間若有神兵乃相謂曰城內必有異人稍稍引去圍遂解

隋文帝寫經四十六藏十三萬卷修治故經四百部造金銅檀像六千餘尊修治故像一百五十萬九千尊宮內造刺繡織成像畫像五彩珠幔以億計崇葺寺宇五千餘所番譯經論垂五百卷煬帝置翻經館四時供養無乏

祥符蔭曰世俗之見每以作福費財爲言試觀隋朝莊嚴佛事如其盛而當時海宇之大戶財之富冠絕古今未嘗少損是知福報從心供養三寶則其量無盡若貪吝自封轉瞬泡幻終歸於空譬

如有嘉種良田而不善加種穫付之碩鼠荒茨也亦可悲夫

唐姓李氏  
郡長安

高祖名淵受附禪而有天下在位九年

高祖戊寅武德元年

己卯二年

庚辰三年

辛巳四年

壬午五年

癸未六年

甲申七年

祖返斬春破頭山

乙酉八年

夏沙汰僧道

太白經天

帝傳位

傳奕上疏請除佛法上詔百官議其事唯太僕卿張道源是奕言蕭瑀曰佛聖人也而奕非之非聖人者無法當治其罪又曰地獄之設正爲是人與儀李師政上內德論三篇愷切詳明上悟奕等挾私不獲已乃詔沙汰天下僧道

祥符蔭曰沙汰治世之教是也而實有功於佛門傳奕之所以言沙汰者非也而原未知夫佛法佛法之波靡由於僧衆之汎濫汰其不如法者而佛

法自嚴此正佛之所以付囑國王大臣者其意有在也。而凡世之爲國王大臣者當體世尊付囑之意。顯密護持申明大道。毋徇私見。共正人心。斯得之矣。李君之論可謂精識讜議者也。

丙戌九年

太宗名世民在位二十三年

太宗丁亥貞觀元年

分天下爲十道

關內河南河東河北山南

隴右淮南江南劍南嶺南

戊子二年

己丑三年

庚寅四年

辛卯五年

祖度裁松道者

祖住破頭山學侶雲臻有裁松道者年已耆禮祖

而請曰法道可得聞乎祖曰汝已老脫有聞其能

廣化耶儻若再來吾尚可遲汝道者禮拜而去

壬辰六年

性宗天台第二世法師章安灌頂寂

頂住天台嘗著涅槃玄義疏安洲溪流湍急歲常

溺人頂誓曰若此溪平當於此演法俄白沙漲漫

平如玉鏡乃講光明法華以答靈惠頂每宴坐有天花飄墜其側八月日室有異香合掌稱佛及二大士名而化

癸巳七年

甲午八年

乙未九年

丙申十年

丁酉十一年

戊戌十二年

祖度弘忍

祖一日往黃梅縣路逢一小兒骨相奇秀異乎常

童問曰子何姓答曰姓卽有不是常姓祖曰是何

姓答曰是佛性祖曰汝無姓耶答曰性空故無祖

默識其法器俾侍者至其母所乞令出家母以宿

緣故殊無難色遂捨爲弟子名弘忍

己亥十三年

庚子十四年

相宗法師華嚴帝心法順寂

順降迹雍州萬年杜氏如晦族長也神異炳著帝

嘗苦勞熱詔問何以蠲除順曰但願大赦聖躬自

安帝從之疾頓瘳因錫號曰帝心大弘華嚴圓頓

之旨作法界觀。嘗作法身頌曰。懷州牛喫禾。益州馬腹脹。天下覓醫人。灸猪左膊上。五月寂門人智儼傳其教。

二祖支下第三世禪師慧滿寂

滿榮陽張氏子。嗣法僧。那後奉頭陀行。唯蓄二鉢。冬則乞補夏則捨之。所至伽藍破柴製履。住無再宿。持鉢周行。聚落隨得。隨散。索爾虛閑。有請宿齋者。曰。待天下無僧。滿方受請。嘗示人曰。諸佛說心。令知心相虛妄。今乃更加心相。深違佛意。又增論議。殊乖大理。於陶冶中坐化。

辛丑十五年

壬寅十六年

祖入牛頭山度懶融

祖遙觀牛頭山氣象。知彼有異人。乃躬自尋訪。問寺僧。此間有道人否。曰。出家兒。那個不是道人。祖曰。阿那個是道人。僧無對。別僧曰。此去山中十里許。有一懶融。見人不起。亦不合掌。莫是道人麼。祖遂入山。見融端坐。自若。曾無所顧。祖問曰。在此作

甚麼。融曰。觀心。祖曰。觀是何人心。是何物。融無對。便起作禮。曰。大德高棲。何所。祖曰。貧道不決所止。或東或西。融曰。還識道信禪師否。祖曰。何以問他。融曰。嚮德滋久。冀一禮謁。祖曰。道信禪師。貧道是也。融曰。因何降此。祖曰。特來相訪。莫更是宴息之處否。融指後面曰。別有小菴。遂引祖至菴。所繞菴。惟見虎狼之類。祖乃舉兩手作怖勢。融曰。猶有這個在。祖曰。這個是甚麼。融無語。少選。祖却於融宴坐石上。書一佛字。融觀之。竦然。祖曰。猶有這個在。融未曉。乃稽首請說。真要。祖曰。夫百千法門。同歸方寸。河沙妙德。總在心源。一切戒門。定門。慧門。神通變化。悉自具足。不離汝心。一切煩惱業障。本來空寂。一切因果。皆如夢幻。無三界可出。無菩提可求。人與非人。性相平等。大道虛曠。絕思絕慮。如是之法。汝今已得。更無闕少。與佛何殊。更無別法。汝但任心自在。莫作觀行。亦莫澄心。莫起貪瞋。莫懷愁慮。蕩蕩無礙。任意縱橫。不作諸善。不作諸惡。行住坐臥。觸目遇緣。總是佛之妙用。融曰。心既具足。

何者是佛何者是心祖曰非心不問佛問佛非不

心融曰既不許作觀行於境起時心如何對治祖

曰境緣無好醜好醜起於心心若不強名妄情從

何起妄情既不起真心任徧知汝但隨心自在無

復對治即名常住法身無有變異吾受璨大師頓

教法門今付於汝汝今諦受吾言只住此山向後

當有正人達者紹汝玄化

後法席之盛擬黃梅先是融幽棲石室有百鳥銜花之異至是絕迹

癸卯十七年

祖四紹不起

帝嚳祖道味欲瞻風采遣使詔祖赴京祖上表遜

謝前後三返堅以疾辭第四度命使曰如果不起

取首來使至山諭旨祖引頸就刃神色儼然使異

之回以狀聞帝彌加欽歎就賜珍縉以遂其志

甲辰十八年

乙巳十九年

三藏法師玄奘西域回至西京詔百官具儀仗迎經

像

發明教法東來譯經請法者不可勝紀別有載籍皆不具書此書何嘉法師之願力

超于人

奘以貞觀二年離唐西逝求佛大乘經論以決羣

疑經涉寒暑一十七年備歷艱難險阻誓志不回

奉身前邁周覽大小百三十國佛之遺蹟一一躬

瞻致敬所獲二乘三藏梵冊總六百五十七部將

抵西京具表奏聞時帝在洛陽見表大悅勅西京

留守左僕射房玄齡使有司迎待奘聞帝欲問罪

遠演恐稽緩不及乃倍途而進於貞觀十九年正

月二十七日至都亭驛明日二十八日丑左僕射

梁國公房玄齡承勅遣右武侯大將軍侯莫陳實

雍州司馬李叔慎長安縣令李乾祐並營勅四衆

嚴設迎供之具齊集朱雀街其從如雲儀仗周列

金花散彩珠珮流音旌幢導前爐薰殿後奉迎新

至經像於弘福寺數十里內都人士子內外官僚

瞻仰歌詠闐噎道旁有司恐相騰踐各令當處燒

香散花無得移動時衆同見天見五色綺雲周圍

紛郁至寺而合奘所得舍利一百五十粒金銀栴

檀寶像七尊並經論等具供弘福寺奘以二月己

亥見帝於儀鸞殿。帝迎慰甚厚。廣問山川風俗。欲  
獎借征高麗。獎謝辭願就少林。譯經帝令卽就弘

福寺翻譯。勅玄齡供給所須。詳見本傳

丙午二十年

帝撰大唐三藏聖教序。書何嘉信法也

獎等譯經上表以聞。帝親揮翰製序。御慶福殿詔

獎坐百官侍。令弘文館學士上官儀宣讀序文。凡

七百八十一字。獎表謝帝復報手書

丁未二十一年

戊申二十二年

祖付弘忍衣法

偈曰。華種有生性。因地華生生。大緣與性合。常生  
生不生。付法已遂。以學徒委之。祖一日告衆曰。吾  
昔武德中。遊廬岳。登絕頂。望破頭山。見紫雲如蓋。  
下有白氣橫分五道。汝等會否。衆皆默然。忍曰。莫  
是他後。佛法分枝否。祖曰。善。

己酉二十三年

高宗。名治。在位三十四年。

高宗庚戌永徽元年

辛亥二年

第四世廬山春大醫祖示寂

閏九月四日。祖忽垂誠。門人曰。一切諸法悉皆解  
脫。汝等各自護念。流化未來。言訖安坐而逝。壽七  
十有二。塔於本山曰圓寂。

安隱忍曰。汾陽無業禪師曰。古德道人得意之後。  
茅茨石室。向折脚鐺中煮飯喫。過三二十年。大忘  
人世隱跡。巖叢君王命而不來。諸侯請而不赴。豈  
同我輩貪名愛利如短販人。又僧問大珠如何是  
大涅槃。珠云。不造生死業。是大涅槃。曰。如何是生  
死業。珠曰。求大涅槃。是生死業。圓覺經云。生死涅  
槃。猶如昨夢。夫涅槃且不可求。況餘事耶。  
佛滅後一千六百年

宗統編年卷之九

宗統編年卷之十

第五世祖

諱宏忍。黃梅縣人也。先爲破頭山中栽松道者。請法於四祖。祖許以再來。乃去。行水邊見一女。子浣衣。揖曰。寄宿得否。女曰。我有父兄。可往求之。曰。諾。我即敢行。女首肯之。即回策而去。女周氏季子也。歸輒孕。父母大惡。逐之。女無所歸。日傭紡里中。夕止於衆館之下。已而生一子。以爲不祥。棄濁港中。明日見之。汭流而上。氣體鮮明。大驚異。遂舉之。成童。隨母乞食里人。呼爲無姓兒。逢一智者。歎曰。此子缺七種相。不逮如來後遇四祖。得法。嗣化破頭山。

唐高宗壬子永徽三年

第五世東山祖嗣宗統<sub>二十一年</sub>

四月八日四祖塔戶自開

儀相如生。自後遂不敢復開

癸丑四年

甲寅五年

乙卯六年

丙辰顯慶元年

丁巳二年

道人千歲寶掌寂

發明

掌從初祖悟法。何以不書。嗣法以印證。皮髓時。掌不

與也。掌應化聖賢密跡。難定。故書法如此。

掌中印度人。周威烈十二年丁卯降神受質。則左掌握拳七歲。祝髮乃展。因名寶掌。魏晉之間。東遊此土。入蜀禮普賢。留大慈常不食。日誦般若千餘卷。有詠之者曰。勞勞玉齒寒。似迸巖泉急。有時中夜坐。階前神鬼泣。一日謂衆曰。吾有願住世千歲。今六百二十有六矣。故人以千歲稱之。旋遊五臺。復南歷衡嶽。黃梅匡廬。尋入建業。會初祖入梁。就而扣請。悟無生忍。武帝高其道。臘延供內庭。未幾如吳。述偈曰。梁城遇導師。參禪了心地。飄零兩浙遊。更盡佳山水。遂徧探兩浙名山。後居浦江之寶嚴。與朗禪師友善。每通問。遣白犬馳往。朗則使青猿。故有題朗壁者。云白犬銜書至。青猿洗鉢回。云顯慶二年正旦。手塑一像。至九日。成謂門人慧雲曰。此肖誰。雲曰。與和尚無異。即澡浴易衣。跌坐謂

雲曰吾住世已一千七十二年今將謝世聽吾偈曰本來無生死今亦示死吾得去住心他生復來此又囑曰吾滅後六十年有僧來取吾骨勿拒言訖而逝入滅五十四年有剎浮長老自雲門至塔所禮曰翼塔洞開少選塔戶果啓其骨連環若黃金浮即特往秦望山建窣堵波奉藏以周威烈丁卯至唐高宗顯慶二年實一千七十二年其在此土蓋歷四百餘歲云

四祖支下第一世禪師牛頭山法融寂

邑宰肅元善請住建初寺辭不克先是善請就寺講大般若經至滅靜品地爲震動遂命入室上首智嚴付以法印將下山謂衆曰吾不復踐此山矣時鳥獸哀號踰月不止山前有四大桐樹仲夏之月忽然凋落時顯慶元年也至二年正月二十三日不疾而逝窆於雞籠山融生緣延陵韋氏行化歸里創今天甯寺

皇清康熙丁卯過菴輪禪師重建大殿題丈室曰懶融堂云

戊午三年

己未四年

庚申五年

辛酉龍朔元年

壬戌二年

沙門威秀表明不拜君親詔依議

四月十五日勅令僧道咸施俗拜京師大莊嚴寺沙門威秀上表徵引經律所以不拜之故及歷朝會典崇奉之意表上集百官中臺議時朝宰五百三十九人請不拜三百五十四人請拜至六月勅不拜君而拜父母尋以道重於所生罷拜親之詔如秀議

祥符蔭曰佛制出家不拜君親佛以法眼明見無差非悖倫傲上也以君爲國主雅有化育之恩僧出世學道志出三界之外得道者重其道未得道者申其志歷代帝王咸令不拜著有令典自宋奉勅住山致有稱臣膜拜者俯徇一時乃踰佛制當時以道自守者或不然今則去古愈遠僧稱知識者蓋爲知時引分未得堅持篤守其道帝王盛有雅重三寶者而無遠公秀公其人表章之何必古道之盡復也至親則生我一世之色身而凡爲僧者以道報親度其親無量劫生死之苦使親得知

有法身向上事。以此校之。勝於生育色身之恩多矣。故親在所不拜。不然儼然學佛祖之道。而岸傲悖謬。烏乎政。亦何以受一切人天禮拜。而使之信服乎。

### 大士善導化生淨土

導不知何處人。貞觀中見西河道。緯九品道場。講

誦觀經。

緯篇志。淨土有僧定中見其數珠如七寶。大山爲衆講十六觀經。將二百遍。聽者指

珠念佛響。振林谷念佛日以七萬爲限。貞觀二年寂衆見化佛空迎天花下散。大喜曰。此

眞入佛之津要。修餘行業迂僻難成。惟此法門。速

超生死。於是晝夜禮誦。激發四衆。每入室長跪念

佛。非力竭不休。雖時寒冰亦須流汗。出則爲人演

說淨土法門。三十餘年。不暫睡眠。般舟行道。方等

禮佛。護持戒品。纖毫不犯。好食送厨。蠶惡自奉。乳

酪醍醐。皆不經口。凡有觀施用寫彌陀經十萬卷。

畫淨土變相三百壁。壞寺廢塔。所至修營。然燈續

明。常年不絕三衣瓶鉢。不使人持。行不共衆。恐談

世事。長安道族傳授淨土法門者。不可勝數。或問

念佛往生。耶曰。如汝所念。遂汝所願。乃自念一聲。

有一光明從其口出。十至於百光。亦如之。其勸世  
偈曰。漸漸雞皮鶴髮。看看行步龍鍾。假饒金玉滿  
堂。豈免衰殘病苦。任是千般快樂。無常終是到來。  
惟有徑路修行。但念阿彌陀佛。一日忽謂衆曰。吾  
將西歸。乃登樹投身而逝。同時有僧懷感。得念佛  
三昧。見佛金色玉毫來迎。而化。

癸亥三年

譯大般若經畢

三藏法師玄奘。以己未年奉勅於玉華宮譯大般

若至是年冬十月二十三日。纔畢凡六百卷。進上

帝嘉歎曰。今觀佛經之若是。瞻天望海。莫測高深。

以儒道九流方之。如河溟之類。溟渤也。而世云三

教齊致者。是妄談耳。

甲子麟德元年

三藏法師玄奘寂

春正月五日。寂於玉華宮。表聞上震。備罷朝三日。

公卿傷悼。上嗚咽。悲不能勝。謂羣臣曰。法師今寂。

四生失大導師。何異苦海方割舟揖。遽沉閻室。猶

昏燈炬斯掩言已嗟惋不止恩勅再三下裏葬事  
祥符蔭曰法師抗志輕生涉險求法闡唐風於異  
域揭慧日乎中天福庇四生法流千古可謂法苑  
之元勳緇林之備美矣

乙丑二年

丙寅乾封元年

丁卯二年

律師京兆西明寺澄照道宣寂

宣丹徒人母夢月貫其懷復夢梵僧語曰汝所妊  
者梁朝律師僧祐祐則南齊剡溪僧護也在胎十  
二月九歲能賦習業如舊聞厭棄世榮十六依律  
師智顗出家專精克念感舍利見於寶函受具智  
律久之晦迹終南山谷地泉湧雪瑞草披芳有異  
徵遷豐德寺時有羣龍易形男女來禮謁及異人  
常獻奇花珍果非世所有者善處士孫思邈詔充  
西明寺上座同三藏法師玄奘譯經時延勅令僧  
拜上啓止之精修戒行三衣皆紵一食唯菽每感  
天人梵釋等往來諮受律相及毗沙門天王太子  
那吒密侍神蹟多端秘而不言撰法門文記廣弘

明集續高僧傳三寶錄羯磨戒疏行事鈔義鈔等  
二百二十餘卷春秋七十二臘五十二將寂之前  
有天來庭除禮白曰師當生觀史天持物一包云  
是棘林香云乃安坐十旬而化時十月三日靈昌  
太守李邕工部朗中嚴厚本各撰碑頌以久居終  
南故稱南山焉塔曰淨光

祥符蔭曰如來滅後戒乃大師如攢華堂當培基  
址未有明了明體性而撥棄毗尼者縱身心之解脫  
必清淨以無依律師辯洽精嚴提綱振紀誠可謂  
法門憲章禪流砥柱者也

戊辰總章元年

西明寺釋道世撰法苑珠林成

凡一百卷始從切量終於雜記分門別序十稔乃  
成蘭臺郎李儼爲之序

己巳二年

庚午咸亨元年

辛未二年

居士盧慧能來參經八月付衣

居士盧慧能自新州來參謁祖問曰汝自何來盧

曰嶺南祖曰欲須何事。盧曰唯求作佛祖。曰嶺南人無佛性。若爲得佛。盧曰人卽有南北。佛性豈然。祖今隨衆作務。盧曰弟子自心常生智慧。不離自性。卽是福田。未審和尚教作何務。祖曰這獵獐根性太利。著槽廠去。盧禮足而退。便入碓坊服勞。於杵臼晝夜不息。經八月。祖知付授時。至告衆曰。正法難解。不可徒記吾言。持爲己任。汝等各自隨意。述一偈。若語意冥符。則衣法皆付。時會下七百餘僧上座。神秀者學通內外。衆所宗仰。咸推稱曰。若非尊秀。曠敢當之神秀。竊聆衆譽。不復思惟。乃於廊壁書一偈曰。身是菩提樹。心如明鏡臺。時勤拂拭。莫使惹塵埃。祖因經行。忽見此偈。知是神秀所述。乃讚歎曰。後代依此修行。亦得勝果。其壁本欲令處士盧珍繪榜。伽藍相及見題偈在壁。遂止不畫。各令念誦。盧在碓坊。忽聆誦偈。乃問同學。是何章句。同學曰。汝不知和尚求法。嗣令各述心偈。此則秀上座所述。和尚深加歎賞。必將付法傳衣也。盧曰。其偈云何。同學爲誦。盧良久曰。美則美矣。

了則未了。同學訶曰。庸流何知。勿發狂言。盧曰。子不信耶。願以一偈和之。同學不答。相視而笑。盧至夜密告一童子。引至廊下。盧自秉燭。請別駕張日用於秀偈之側。寫一偈曰。菩提本無樹。明鏡亦非臺。本來無一物。何處惹塵埃。祖後見此偈曰。此是誰作。亦未見性。衆聞祖語。遂不之顧。逮夜祖潛詣碓坊。問曰。米白也。未。盧曰。白也。未有篩。祖以杖三擊其碓。盧卽以三鼓入室。祖告曰。諸佛出世。爲一大事故。隨機大小而引導之。遂有十地三乘。頓漸等旨。以爲教門。然以無上微妙秘密圓明真實正法眼藏。付於上首大迦葉尊者。展轉傳授。二十八世至達摩。居於此土。得可大師承襲。以至於今。以法寶及所傳袈裟。用付於汝。善自保護。無令斷絕。聽吾偈曰。有情來下種。因地果還生。無情既無種。無性亦無生。盧跪受訖。問法則既受衣付何人。祖曰。昔達摩初至。人未之信。故傳衣以明得法。今信心已熟。衣乃爭端止於汝。身不復傳也。且當遠隱。俟時行化。所謂受衣之人。命如懸絲也。盧曰。當隱。

何所祖曰逢懷卽止遇會且藏盧禮足已捧衣而出是夜南邁大衆莫知祖自後不復上堂大衆疑怪致問祖曰吾道行矣何更詢之復問衣法誰得耶祖曰能者得於是衆議盧行者名能卽共奔逐壬申三年

僧惠明追及盧行者得法而同

行者南行兩月至大庾嶺僧惠明本將軍同數百人來欲奪衣鉢明先及之行者擲衣鉢於石曰此衣表信可力爭耶明舉衣鉢不能動乃曰我爲法來不爲衣也行者曰汝既爲法可屏息諸緣勿生一念吾爲汝說明良久行者曰不思善不思惡正與麼時那個是明上座本來面目惠明言下大悟復問曰上來密語密意外還有密意旨否行者曰與汝說者卽非密也汝若返照密在汝邊明曰惠明雖在黃梅實未省自己面目今蒙指示如人飲水冷暖自知今行者師惠明師也行者曰汝若如是吾與汝同師黃梅善自護持明又問惠明今宜何往行者曰逢衰則止遇蒙則居明禮辭還至

嶺下謂衆曰向涉崔嵬杳無蹤跡當別道尋之趁衆遂散明後居袁州蒙山避祖諱更名道明癸酉四年

道人蕩回入王宮詔度爲僧

回閩鄉張氏子弱齡笑傲徃狂鄉黨莫測有兄萬年久征遼左母思其音信回曰此甚易爾乃告母往至暮而還及持到書鄰里驚異因號萬回同與龍興沙門大明少相狎嘗往來其室屬給諫明崇儼夜過寺見回左右神兵侍衛儼大駭一日回令家人灑掃云有勝客來是日玄奘自西國還訪回回問印度風境了如所見奘作禮圍繞稱是菩薩帝知其異詔入宮度爲沙門時有扶風僧蒙頊者先在宮內每曰回來回來及回至頊曰替到當去旬日而頊逝回神異多端館於集賢院給侍二美人嘗有偈曰明暗兩忘開佛眼不繫一法出蓮叢眞空不壞靈智性妙用嘗存無作功聖智本來成佛道寂光非照自圓通祥符陰曰神異變通乃小乘顯化之所爲大乘法

印一切平等。聖見凡情。二俱不涉。如同者。偈句圓明。蓋密機混。世乘權利物者。也塵世中。如同者多。但凡夫難測識耳。

甲戌上元年

乙亥二年

第五世東山大滿祖示寂

祖一日告衆曰。吾今事畢。時可行矣。卽入室安坐而逝。塔曰法雨。

第六世祖

諱慧能。姓盧氏。其先范陽人。父行瑫。武德中。左官南海之新州。遂占籍焉。母李氏。感異夢。覺而異香滿室。黎明有僧來。語瑫曰。此子可名慧能。語畢不知所之。祖不飲母乳。遇夜。神人灌以甘露。三歲父喪。母守貧鞠育。幼則樵採資養。一日鬻薪於市。聞客誦金剛經。悚立聽之。至應無所住而生其心。處冷然感悟。而問客曰。此何法也。客曰。此金剛經。黃梅忍大師教人。恒誦祖聞。勃然思出家。求法。乃乞於一客爲母備歲儲。遂辭。

母直抵韶州。遇高士劉志略。結爲友。尼無盡藏者。卽志略之姑也。嘗讀涅槃經。祖暫聽之。卽爲解義。尼敬異之。告鄉耆艾。請居寶林寺。四衆營葺。俄成寶坊。祖曰。本求大法。止此何爲。遂棄之。抵黃梅。呈偈。後三更入室。五祖徵其初悟。至應無所住而生其心。語祖言下大徹。遂啓五祖曰。一切萬法。不離自性。何期自性。本自清淨。何期自性。本不生滅。何期自性。本自具足。何期自性。本無動搖。何期自性。能生萬法。五祖知悟本性。乃告曰。不識本心。學法無益。若識本心。見自本性。卽名大丈夫。天人師。佛。遂傳衣法。隱於漁獵隊中。經四載。

丙子儀鳳元年

第六世曹溪寶林祖嗣宗統  
八年

祖至法性寺。法師印宗請開法。

正月八日。祖至廣州法性寺。值印宗法師講涅槃經。暮夜風颺。利旛二僧抗論。一日風動。一日旛動。往復不已。祖曰。非風旛動。仁者心動。印宗竊聆。竦

然異之。延祖上席徵詰奧義。知祖受法黃梅。於是印宗執弟子之禮。乃告四衆曰。印宗具足凡夫。今遇肉身菩薩。因請出所傳衣鉢。悉令瞻禮。至十五日。集諸名德。爲祖剃髮。二月八日。就法性寺智光律師授滿分戒。其戒壇卽宋末那跋陀三藏之所立也。三藏記云。後當有肉身菩薩在此壇受戒。又梁末真諦三藏於壇之側手植二菩提樹。謂衆曰。却後一百二十年。有大士於此樹下演無上乘度無量衆。祖受戒已。於樹下開示大法。宛如宿契。印宗會參黃梅有所證悟

丁丑二年

祖開法曹溪里人陳亞仙捨山成寶林寺

韶州刺史韋據請於大梵寺說法。并受心地戒。門人并記法性寺所說者。成錄目爲壇經。乃至曹溪寶林寺見堂宇湫隘不足容衆。欲廣之。遂謁里人陳亞仙。乞檀越一坐具地。亞仙唯唯。祖以坐具一展盡罩。曹溪四境四天王出見。四隅亞仙願盡捨爲寶坊。遂成蘭若。一十三所。

懷讓生是爲南岳

四月八日生於金州杜氏。生時白光燭天。太史奏白氣應於玄象。在安康之分。帝問是何瑞。太史對曰。國之法器不染世榮。帝傳勅金州太守韓偓親往存慰。見讓炳然殊異。性惟恩讓。乃安名懷讓。

戊寅三年

禪師雙峯即牛頭山第二世智嚴寂

嚴曲阿人。姓華。弱冠過人。身長七尺六寸。隋大業中爲郎將。頻立戰功。年四十乞出家。宴坐定中。觀異僧謂曰。卿八十生出家。宜加精進。嘗在谷中入定。山水瀑漲。怡然不爲動。有舊從軍者入山訪之。謂曰。郎將狂耶。何爲住此。答曰。我狂欲醒。君狂正發。感悟歡息而去。後謁融。得法。遷住石頭城。壽七十八。示寂室有異香。經旬不散。顏色不變。遺言水葬。臘三十有九。

己卯調露元年

庚辰永隆元年

法師台宗第三世法華智威寂

威嗣章安頂住天台鍊丹山剪棘刈茅班荆爲座聚石爲徒晝講夜禪每登座有紫雲覆頂如寶蓋鳥雀旁止自然馴狎衆苦乏水浚一石井纔三尺日給千衆冬夏無竭十一月二十八日跌坐而化異香在室七日不散東陽威傳其教時聞小威

辛巳開耀元年

壬午永淳元年

律師西京恒濟寺懷素寂

素京兆人姓范氏母李夢雲雷震駭有娠誕之夕神光滿室占者云此子極貴當爲王者之師年十歲禮立契法師出家依法礪律師學戒得其指南著疏十卷并四分律記上元三年詔住西太原寺尋歸恒濟撰俱舍論疏十五卷及經律疏鈔共五十卷壽七十四臘五十三奄然坐逝時間空中天樂劉亮葬之日有鴻鶴繞塔悲鳴至暮乃散南康韋臯撰記素辭翰象美尤精於律云

相宗慈恩第一世法師窺基寂

基尉遲氏父左金吾將軍松州都督江由縣開國

公諱宗其鄂國公德則諸父也母裴氏夢攬月輪吞之有孕年十七奉勅爲玄奘法師弟子凡百經論一覽無遺切問近思勤於著述造疏計將百本

尋遊五臺登太行感異夢探得彌勒上生經恍然曰得此慈氏令我造疏通其義乎遂援毫次筆鋒有舍利累累而隕二七粒大如舍利色亦可愛次零然而下者如黃粟粟粒感歎希有疏遂不日而成先是契公從西域法師戒賢親授瑜伽師地唯識宗而基盡領其妙恢廓源流天下後世稱之爲三乘法相顯理宗慈恩教與宣律師善宣忽其坦率一日過談宣每有天使侍役是日基去方來宣怪其遲對曰適大乘菩薩在此金剛翼從者多我曹不得前耳十一月十二日寂壽五十一基矢願生兜率寂之日身光爛然一名乘基高宗製讚稱百本疏主云

祥符蔭曰祥符寺在太湖中爲七十二峯之首創建於唐貞觀年間相傳三藏法師奘公從西竺歸遊東南見此山形彷彿靈鷲因呼爲小靈山屬基

公開法焉傳中載公貌豐碩長八尺氣蓋萬夫頂有玉枕十指羅紋皆盤折如印見者響伏然心慈善每出以三車自隨又稱三車法師晚節祈生內院循戒彌篤云

中宗名顯

中宗癸未弘道元年

甲申嗣聖元二月文明元九月太后光宅元年

乙酉垂拱元年 丙戌二年

丁亥三年

懷讓出家

讓幼樂佛書有三藏玄靜過舍告其父母曰此子若出家必獲上乘廣度衆生至是年方十二辭親往荊州玉泉寺依弘景律師出家

戊子四年 己丑永昌元年 庚寅天授元年

辛卯二年

壬辰如意改長壽元年

禪師仁儉說法王宮

儉即騰騰和尚四月武后詔迎入宮儉視后良久

曰會麼曰不會曰老僧持不語戒言訖而去進短歌十九首有曰修道道無可修問法法無可問迷人不了色空悟者本無逆順八萬四千法門至理不離方寸識取自家城郭莫謾尋他州郡不用廣學多聞不要辯才聰俊不知月之大小不管歲之餘閏煩惱即是菩提淨華生於泥糞人來問我若爲不能共伊談論寅朝用粥充饑齋時更餐一頓今日任運騰騰明日騰騰任運心中了了總知且作佯癡縛鈍

癸巳二年 甲午延載元年

乙未天冊萬歲元年

沙門實叉難提等譯華嚴經

初武后聞于闐有梵本華嚴大經遣使求之并請善梵學者一人隨經以來於是于闐國王以實叉難提此云遣來應命乙未三月詔入大遍空寺翻譯

沙彌法藏開示華嚴宗旨

藏姓康康居國人初杜順傳晉譯華嚴法界觀於

知儼藏久侍儼盡得其教儼滅藏以巾幘說法武  
后度爲僧乙未詔藏開示華嚴宗旨方序經題白  
光昱然自口而出須臾成蓋停空后大悅賜號賢  
首

### 禪師牛頭山第三世慧寂

方延陵人嗣牛頭巖住山十載不出林樾四方學  
者雲集八月一日謂衆曰吾將他適衆見五百許  
人髻髮後垂狀如菩薩各持幡花而來迎請乃寂  
山林變白溪澗絕流者七日道俗哀慕聲動山谷  
壽六十七臘四十

### 禪師慧安神秀應詔入王宮

安秀俱得法五祖安棲嵩少初隋煬帝嘗徵不起  
高宗召亦不起至是春秋已百餘武后以師禮同  
秀迎入內道場供養后問安甲子多少曰不記生  
死之身有若循環無起盡識心流注無有間斷  
見漚起滅者乃妄想耳從初識至動相滅時亦只  
如此何年月可記乎天下之人稱老安國師

丙申萬歲通天元年

丁酉神功元年

懷讓來參

發明

曹溪以後參承者衆難以具書  
傳宗統及一二年月有徵者以契

之

讓受戒後習毗尼藏一日自歎曰夫出家者爲無  
爲法天上人間無有勝者時同學坦然同謁嵩山  
安禪師安啓發之乃直詣曹溪禮祖祖問甚處來  
讓曰嵩山來祖曰什麼物與麼來讓無語後經八  
載忽悟  
戊戌聖歷元年 己亥二年 庚子久視元年  
辛丑長安元年

賢首法師法藏應詔講華嚴

詔藏講新譯華嚴至華藏世界品地震動召對問  
帝綱十重立門海印三昧藏敷宣有緒立旨通貫  
后聞驚異藏指殿隅金獅子爲曉譬之至一毛頭  
獅子百億毛頭獅子后乃豁然

壬寅二年

禪師牛頭山第四世法持寂

持江甯人受法牛頭方嗣其席終金陵延祚寺

癸卯三年

甲辰四年

乙巳神龍元年

帝復位

祖印懷讓所悟

讓居八年一日忽悟曰說似一物即不中祖曰還可修證否讓曰修證即不無污染即不得祖曰只此不污染諸佛之所護念汝既如是吾亦如是西天般若多羅識汝足下一馬駒踏殺天下人應在汝心不須速說

梵僧般刺蜜諦貴楞嚴梵夾至高州

時相國房融流高州就制止寺同諦翻譯融筆授禪師智隍參祖悟道

隍初參五祖自謂已得正受結菴長坐積二十年祖弟子玄策遊方至河朔聞隍名造菴激以勤求法要隍遂捨菴徑來謁祖祖垂開扶即於言下豁然契悟前二十年所得心都無影響其夜河北土庶聞空中聲云隍禪師今日始得道也後回河北開化四衆

僧志徹禮謁曹溪

徹初名行昌姓張少任俠自南北分化二宗主雖

忘彼我而徒侶競起愛憎北宗忌祖傳衣囑行昌刺祖祖預知其事置金十兩於座間昌懷刃入室祖舒頸就之昌揮刃者三都無所損祖曰只負汝金不負汝命昌驚仆久而方蘇求哀悔過願出家祖以金授曰汝且去他日易形而來吾當攝受昌遂宵遁出家精進一日過曹溪謁祖曰蒙和尚赦罪今雖出家苦行難報深恩其惟傳法度生乎弟子嘗覽涅槃經未曉常無常義乞和尚慈悲祖便與之宣說昌如醉醒說偈曰因守無常心佛演有常性不知方便者猶春池拾磔我今不施功佛性而見前非師相授與我亦無所得祖曰汝今徹也宜名志徹禮謝而去

遣使薛簡奉詔迎祖以疾辭

詔云朕請安秀二師宮中供養萬機之暇每究一乘二師並推讓云南方有能禪師密受忍大師衣法可就彼問今遣內侍薛簡馳詔迎師願師慈念速赴上京祖上表辭疾願終林麓簡問曰京城禪德皆云欲得會道必須坐禪習定若不因禪定而

得解脫者未之有也。未審師所說法如何。祖曰。道由心悟。豈在坐也。經云。若言如來若坐若臥。是行邪道。何故。無所從來。亦無所去。無生無滅。是如來清淨禪。諸法空寂。是如來清淨坐。究竟無證。豈況坐耶。簡曰。弟子回京。主上必問。願師慈悲。指示心要。傳奏兩宮及京城學道者。譬如一燈然百千燈。冥者皆明。明明無盡。祖曰。道無明暗。明暗是代謝之義。明明無盡。亦是有盡相待立名。故淨名經云。法無有比。無相待故。簡曰。明喻智慧。暗喻煩惱。修道之人。若不以智慧照破煩惱。無始生死。憑何出離。祖曰。煩惱卽是菩提。無二無別。若以智慧照破煩惱者。此是二乘見解。羊鹿等機。上智大根。悉不如是。簡曰。如何是大乘見解。祖曰。明與無明。凡夫見二。智者了達其性。無二無二之性。卽是實性。實性者。處凡愚而不滅。在聖賢而不增。住煩惱而不亂。居禪定而不寂。不常不來不去。不在中間。及其內外不生不滅。性相如如。常住不遷。名之曰道。簡曰。師說不生不滅。何異外道。祖曰。外道所說

不生不滅者。將滅止生。以生顯滅。滅猶不滅。生說不生。我說不生不滅者。本自無生。今亦不滅。所以不同。外道汝若欲知心要。但一切善惡都莫思量。自然得入清淨心。體湛然常寂。妙用恒沙。簡蒙指教。豁然大悟。禮辭歸闕。表奏師語。有詔。謝祖并賜摩訶袈裟。絹五百尺。寶鉢一口。

十二月十九日。勅改古寶林爲中興寺。  
行思來參令首衆

思吉州劉氏子。幼歲出家。每羣居論道。思惟默然。後參祖問曰。當何所務。卽不落階級。祖曰。汝曾作甚麼來。思曰。聖諦亦不爲。祖曰。落何階級。思曰。聖諦尙不爲。何階級之有。祖深器之。令首衆。

立覺參

覺永嘉戴氏子。精止觀法門。因閱維摩經。發明心地。後遇左谿激勵。與立策同參。祖初到。振錫繞祖三匝。卓然而立。祖曰。夫沙門者。具三千威儀。八萬細行。大德自何方來。生大我慢。曰。生死事大。無常迅速。曰。何不體取無生。了無速乎。曰。體卽無生了。

本無速曰如是如是於時大衆無不愕然覺方具威儀禮拜須臾告辭祖曰返太速乎曰本自無動豈有速耶曰誰知非動曰仁者自生分別曰汝甚得無生之意曰無生豈有意耶曰無意誰當分別曰分別亦非意曰善哉少留一宿時謂一宿覺

丙午二年

五祖支下禪師東都天宮寺大通神秀寂

是爲北宗

秀開封尉氏人姓李捨儒服出家久侍東山誓心苦節以樵汲自役五祖深器重之武后欽風召至都下於內道場供養特加禮敬王公士庶望塵拜伏中宗復位尤加崇重大臣張說嘗問法要執弟子之禮寂後勅羽儀法物殯於龍門帝送至橋王公士庶皆至葬所張說及徵士盧鴻一各爲碑誄秀爲南京法主三帝國師禮敬尊崇異於常等祖示智通三身四智偈

通看楞伽經約千餘遍不會三身四智禮祖求解其義祖曰三身者清淨法身汝之性也圓滿報身汝之智也千百億化身汝之行也若離本性別說

三身卽名有身無智若悟三身無有自性卽名四智菩提通曰四智之義可得聞乎祖曰既會三身便明四智若離三身別譚四智此名有智無身也卽此有智還成無智偈曰大圓鏡智性清淨平等性智心無病妙觀察智見非功成所作智同圓鏡五八六七果因轉但用名言無實性若於轉處不留情繁興永處那伽定

丁未景隆元年

五祖支下國師嵩嶽慧安寂

安辭返嵩嶽三月三日囑門人曰吾死將尸向林中待野火焚之俄爾萬回公來見安猖狂握手言論旁侍傾耳都不體會至八日閉戶偃身而寂春秋一百二十八門人遵旨昇置林中果野火自然闍維得舍利八十粒

戊申二年

法師荊州玉泉寺恒景振錫還山

景習天台止觀三被詔入內爲受戒師奏乞歸山詔中書門下及學士於林光宮設齋餞送帝親賦

詩學士中書令李嶠等應和景捧詩振錫而行天下榮之

證聖大師泗洲僧伽寂

伽神化事迹具載本傳二月三日寂勅就薦福寺起塔忽臭氣滿城上祝送歸臨淮言訖異香騰馥乾符中諡證聖大師

己酉三年

勅賜中興寺額爲法泉新州舊居爲國恩寺

睿宗名旦在位二年

庚戌景雲元年

祖示一相三昧一行三昧

祖示衆略曰若欲成就種智須達一相三昧一行三昧若人具此三昧決獲菩提

祥符陰曰初祖示入道之要不出理行二種今祖垂示一相一行三昧融凡聖之情見發本體之妙用眞實達道者日用親證方契如如否則觸處猶存隔礙未能念念與道相應也

辛亥二年

壬子太極元立年  
宗先天元年

祖付法

祖告懷讓行思等曰吾忝受忍大師衣法今爲汝等說法不付其衣蓋汝等性根淳熟堪任大事聽吾偈曰心地含諸種普雨悉皆萌頓悟花情已菩提果自成

祥符陰曰祖當法運中開羣機淳熟之時其所說法如大雲時雨普潤皆萌厥後一物不中的腳下騰踏馬駒建立無相三昧直接大機大用不落階級底嶺南消息盡從這裏去一花五葉二桂昌昌頓悟花情菩提果就達摩氏之道於是乎岳立雲擎昭昭天下矣

禪師懷讓往衡嶽居般若寺

度沙彌希遷

問曰和尚百年後當依附何人祖曰尋思去

祖命弟子往新州國恩寺建報恩塔

立宗名隆基

立宗癸丑開元元年  
先天二年

祖辭衆歸新州

祖謂門人曰。吾欲歸新州。汝等速理舟楫。大衆留甚堅。祖曰。諸佛出見。猶示涅槃。有來必去。理亦常然。吾此形骸。歸必有所。衆曰。師從此去。蚤晚可回。祖曰。葉落歸根。來時無口。及示讖垂誡等。如錄所載。

法師京兆大薦福寺義淨寂

淨從咸亨二年。出西域。經二十五年。歷三十餘國。得梵本經論四百部。以天冊元年乙未仲夏。還至洛陽。天后親迎於上東門。命修文館大學士李嶠。兵部侍郎張說等二十餘人。同於薦福寺翻譯。弘法之功。不在樊下。寂勅塔龍門北岡。

第六世曹溪大鑑祖示寂

八月三日。祖示衆曰。沐浴端坐。至三更奄然遷化。異香彌空。白虹委地。林木改色。禽獸哀鳴。遠近緇素如失所天。

十一月十三日奉祖龕并衣鉢歸曹溪

時廣韶新三州官僚暨門人僧俗。爭迎眞身。莫決。

所之乃焚香禱曰。香烟指處。師所歸焉。時香烟直貫曹溪。乃奉龕歸曹溪。塔曰元和靈照。入塔時。白光自塔起。上亘天三日始散。

祖春秋七十六。三十四傳衣。三十八剃髮。說法三十八年。

歷年表曰。自西竺一祖。嗣統於周穆王癸酉。至貞定王辛卯。佛滅五百年。爲正法住世之初。九祖皆躬承聖記。密持心印。東震聖人之教。顯示倫常。世賴以治。而人心尙有約束。自貞定王壬辰。至東漢光武辛亥。佛滅一千年。大法行於西竺者。周徧純熟。而東震聖人之教。燬於秦。隱出於諸子。漢儒之矯糴。人心日失其眞。不可收拾。若非佛法攝受之。則漸不可救。於是金身應夢。像法東垂。所以慈濟四生。陰翊王化者。至矣。自壬辰至梁武帝丁未。大通元年。佛滅一千將五百年。大教東來。已四百六十年。三乘內典。廣事翻梵。行高流咸資神用。化儀既洽。宗旨未申。般若智光。於焉遲照。少林初祖。雖則直接上根。然實無機不被。無法不周。安心懺

罪大地衆生聞斯二者。尙何佛之可成。法之可說。自丁未至唐玄宗癸丑。開元二年。二百餘年之間。六世相承。正位凝命。眞機密用。厚植深培。佛祖之道。至曹溪而始集。此後南嶽青原。分燈照世。心宗綿亘。雖無分今古。然化隨時異。道以人弘。時節因緣。間不容髮也。

宗統編年卷之十

宗統編年卷之十一

第七世祖

諱懷讓。金州杜氏子。住南嶽般若寺。

唐玄宗甲寅。開元二年。

第七世南嶽祖。嗣宗統三十一年。

青原祖。同嗣宗統二十七年。

發明南嶽青原同紹曹溪正脉臨濟實統五宗

直接單傳故書法如此

六祖支下禪師永嘉玄覺叙

覺住溫江學。者輻輳。號眞覺。十月日辭衆端坐入滅。覺嘗著證道歌。感定中觀見字字皆成金色。時有梵僧傳歸西竺。翻成梵筴。稱爲東土大乘經。

乙卯三年

丙辰四年

五祖支下第二世禪師嵩嶽元珪叙

珪。伊闕人。嗣嵩嶽。宴隱於嶽之龐塢。一日有神人率羣從來。謁觀其貌。奇偉非常。乃問曰。善來仁者。何爲而至。神曰。師甯識我耶。珪曰。佛與衆生。吾一目之。豈分別耶。神曰。吾此嶽神也。能生死於人師。安得一目我哉。珪曰。吾本不生。汝焉能死。吾視身與空等。視吾與汝等。汝能壞空。與汝手。神稽首曰。我亦聰明。正直於餘。神願授以正戒。珪曰。汝旣乞戒。旣戒矣。戒外無戒。又何戒哉。師曰。此理也。我聞茫昧。止求師戒。我身爲門弟子。珪卽秉爐正几。曰。付汝五戒。若能奉持。卽應曰。能。曰。謹受教。珪曰。汝能不姪乎。曰。我亦娶也。珪曰。非謂此也。謂無羅欲也。曰。能。珪曰。汝能不盜乎。曰。何乏我也。焉有盜。

取。誡。珪。曰。非。謂。此。也。謂。享。而。福。淫。不。供。而。福。善。也。曰。能。珪。曰。汝。能。不。殺。乎。曰。實。司。其。柄。焉。曰。不。殺。珪。曰。非。謂。此。也。謂。有。濫。誤。疑。混。也。曰。能。珪。曰。汝。能。不。妄。乎。曰。我。正。直。焉。有。妄。乎。珪。曰。非。謂。此。也。謂。先。後。不。合。天。心。也。曰。能。珪。曰。汝。不。遺。酒。敗。乎。曰。能。珪。曰。如。是。爲。佛。戒。也。以。有。心。奉。持。而。無。心。拘。執。以。有。心。爲。物。而。無。心。想。身。能。如。是。則。先。天。地。生。不。爲。精。後。天。地。死。不。爲。老。終。日。變。化。而。不。爲。動。畢。盡。寂。默。而。不。爲。休。信。此。則。雖。娶。非。妻。也。雖。饗。非。取。也。雖。柄。非。權。也。雖。作。非。故。也。雖。醉。非。惜。也。若。能。無。心。於。萬。物。則。羅。欲。不。爲。姪。福。淫。禍。善。不。爲。盜。濫。誤。疑。混。不。爲。殺。先。後。遠。天。不。爲。妄。惜。荒。顛。倒。不。爲。醉。是。謂。無。心。也。無。心。則。無。戒。無。戒。則。無。心。無。佛。無。衆。生。無。汝。及。無。我。孰。爲。戒。哉。神。曰。我。神。通。亞。佛。珪。曰。汝。神。通。十。句。五。能。五。不。能。佛。則。十。句。七。能。三。不。能。神。竦。然。避。席。跪。啓。曰。可。得。聞。乎。珪。曰。汝。能。戾。上。帝。東。天。行。而。西。七。曜。乎。曰。不。能。汝。能。奪。地。祇。融。五。嶽。而。結。四。流。乎。曰。不。能。珪。曰。是。謂。五。不。能。也。佛。能。空。一。切。相。成。

萬。法。智。而。不。能。卽。滅。定。業。佛。能。知。羣。有。性。窮。億。劫。事。而。不。能。化。導。無。緣。佛。能。度。無。量。有。情。而。不。能。盡。衆。生。界。是。爲。三。不。能。也。定。業。亦。不。牢。久。無。緣。亦。是。一。期。衆。生。界。本。無。增。減。如。我。解。佛。亦。無。神。通。也。但。能。以。無。心。通。達。一。切。法。爾。神。曰。我。誠。淺。昧。未。聞。空。義。師。所。授。戒。我。當。奉。行。今。願。報。慈。德。效。我。所。能。珪。曰。我。觀。身。無。物。觀。法。無。常。塊。然。更。有。何。欲。耶。神。曰。師。必。命。我。爲。世。間。事。展。我。小。神。功。使。已。發。心。初。發。心。未。發。心。不。信。心。必。信。心。五。等。人。目。我。神。踪。知。有。佛。有。神。有。能。有。不。能。有。自。然。有。非。自。然。者。珪。曰。無。爲。是。無。爲。是。神。曰。佛。亦。使。神。護。法。師。甯。驟。叛。佛。耶。願。隨。意。垂。誨。珪。不。得。已。而。言。曰。東。巖。寺。之。陸。莽。然。無。樹。北。岫。有。之。而。背。非。屏。擁。汝。能。移。北。樹。於。東。巖。乎。神。曰。已。聞。命。矣。然。昏。夜。必。有。喧。動。願。師。無。駭。卽。作。禮。而。去。珪。門。送。之。見。儀。衛。逶。迤。如。王。者。之。狀。其。夕。果。有。暴。風。吼。雷。棟。宇。搖。蕩。珪。曰。神。言。徵。矣。衆。可。無。怖。詰。旦。和。霽。則。北。巖。松。栝。盡。移。東。嶺。森。然。行。植。珪。謂。其。衆。曰。毋。令。外。知。至。是。年。丙。辰。囑。門。人。曰。吾。

始居東嶺。吾威汝當置吾骸於彼。言訖若委蛻焉。  
詔諡三祖鑑智禪師塔曰覺寂之塔。從淮南節度使張延賞疏請也。  
詔曹溪塔主令韜赴闕辭疾不起。  
韜依六祖出家。祖寂爲塔主。帝聆其德風。詔令赴闕。韜以疾辭。

丁巳五年

律師光州道岸寂

岸頴川唐氏名家子。少多奇槩。遊學江淮。討論百氏。遂洗心出家。堅修律儀。深入禪慧。常居會稽龍興寺。中宗親率六宮請法。稟戒圖像於林光宮御製讚曰。戒珠皎潔。慧流清淨。身局五篇。心融入定。學綜真典。觀通實性。維持法務。綱統僧政。律藏冀分。傳芳象教。因乎充盛。歷總名監。極承帝眷。力辭還山。以是年八月十日。右脇而逝。門人皆極一時之選。禮部侍郎姚奕撰碑記。

戊午六年

己未七年

瑜伽教主金剛智至自西域。勅迎就慈恩寺。瑜珈教始此梵

傳經師

語瑜珈此云相應。謂三業清淨。表裏如一也。吾佛設教。一死生之理。達鬼神之情。通幽明之故。慈悲所緣。緣苦衆生。以顯密語。令衆生直悟本心。脫離業苦。其名曰灌頂。眞言如以甘露直灌頂門。透體清涼。除人熱惱也。始於阿難。施食不空。三藏宣密。言於唐土。梁集大德。無爲水陸科儀。以通三界。幽顯靈祇。自此僧徒。因爲瑜珈佛事。然必須戒行精嚴。理觀通達。方能加持感應。若自疎律儀。借營私食。非惟無益。損失多。多不可不慎也。

智南印度人。傳通三藏及瑜珈密部。以開元己未達於番禺。來京。勅就慈恩寺。尋徙薦福。凡所住之刹。必建大曼拏羅。灌頂道場。作法祈雨。無不立應。玄宗深敬信之。異跡赫然。傾動內外。不空三藏等皆師事之。理無不通。事無不驗。隨問剖陳。如鐘虛受。至於語默與居。凝然不改。喜怒逆順。無有異容。瞻禮者莫知津涯。自然率服。

庚申八年

辛酉九年

禪師神會詔住南陽龍興寺

壬戌十年

癸亥十一年

祖度道一

一在衡嶽。日唯坐禪。祖知是法器。往問曰。大德坐禪圖甚麼。一曰。圖作佛祖。乃取一磚於彼前。菴石上磨。一曰。磨作甚麼。祖曰。磨作鏡。一曰。磨磚豈得成鏡耶。祖曰。磨磚既不成。鏡坐禪豈得成佛。一曰。如何。卽是祖曰。如牛駕車。車若不行。打車卽是打牛。卽是一無對。祖又曰。汝學坐禪。爲學坐佛。若學坐禪。禪非坐。臥若學坐佛。佛非定。相於無住。法不應取。捨汝若坐佛。卽是殺佛。若執坐。相非達其理。一聞示誨。如飲醍醐。禮拜問曰。如何用心。卽合無相。三昧。祖曰。汝學心地法門。如下種子。我說法要。譬彼天澤。汝緣合故。當見其道。又問道非色相云。何能見祖。曰。心地法眼。能見乎。道無相。三昧亦復然矣。一曰。有成壞否。祖曰。若以成壞聚散而見道者。非見道也。聽吾偈曰。心地含諸種。遇澤悉皆萌。三昧華無相。何壞復何成。一蒙開悟。心意超然。大慧杲曰。而今禪人理會道。牛噉心。車噉法。但只明心法自明矣。但只打牛車自行矣。且喜沒交涉。若恁麼馬祖。臘年也不能得悟去。

祥符蔭曰。佛祖設教。因時而已。拈花之旨。西天諸祖。以及東土六祖。以前皆直示心源。一言契證。大鑑而後。機緣漸熟。知解橫生。於是設大法藥。以藥之。迥絕言思。不容擬議。穿却一切鼻孔。坐斷天下舌頭。不入虎穴。不得虎子。不透重關。總非活路。打車打牛。實全潮之一滴。五宗之岷源也。

甲子十二年 乙丑十三年 丙寅十四年  
丁卯十五年

律師京師崇聖寺文綱寂

綱會稽孔氏子。十二齡出家。力學切究。毗尼操有彝檢。口無溢言。爲四方來學所歸。定力感通。靈迹非一。奉勅京都翻譯滿朝檀施。盡用莊嚴。累歷名藍。二十餘所。刺血書經六百卷。中宗孝和皇帝。事以師禮。疊承恩施。悉付常住。八月十五日。寂春秋九十有二。滑臺太守李邕撰碑記。

義解沙門中嶽嵩陽寺大慧禪師一行寂

行鉅鹿張氏子。少歲不羣。禮普寂禪師出家。寂嘗設大會。有高士盧鴻自袖撰文置之。凡謂寂曰。此

文將數千言字僻文古。請求朗雋者。宣之。當須面指。擡而授之。寂呼行。行至。覽而微笑。鴻怪其輕脫。及衆集。行登堂。抗音莊誦。一無遺誤。鴻愕視久之。歎不能已。乃遊學律冊之外。旁涉陰陽讖緯之書。尋訪算術。至天台。見一院古松數十步。門枕流淙。淡然岑寂。行立於門。屏聞院中布算。其聲簌簌然。而相謂曰。今日當有弟子自遠至。求算法。計合到門。無人導達耶。又除一算子。而謂侍者曰。門前水合西流。弟子當至。行承其言。而入稽首。盡受其訣。門前水復東流。立宗聞之。詔入試之。命取宮籍。以示行。流覽一周。覆籍誦之。如瀉水。立宗不覺降榻。曰。師真神聖也。漢洛下閎造歷。云八百歲當差一日。有聖人定之。屬大衍歷。出行正其差。謬編開元大衍歷五十二卷。及歷律志。立宗密問社稷祚運。行無語。徐對曰。陛下有萬里之行。復封一合子。若彈丸內貯。物搖之有聲。進曰。有急則開。及幸蜀。到成都。啓之。則藥中蜀當歸也。前有橋曰萬里云。又曰。社稷畢得終吉。後昭宗初。封吉王。及太子德王。

爲梁滅。故行先言之。開元十五年十月八日。隨駕幸新豐。身無諸患。忽然沐浴更衣。跌坐怡然。而寂帝趨視之。悲愴不勝。詔有司葬於銅人原。諡曰大慧禪師。御撰塔銘。行著。攝調伏藏六十卷。釋氏系錄一卷。疏七卷。

戊辰十六年

禪師希遷受具戒於羅浮

遷自六祖寂後。上下羅浮。往來三峽間。是年從羅浮受戒歸曹溪。夢與六祖同乘一龜。泳於深池。覺而曰。吾與師乘靈智。遊性海久矣。又何夢耶。

希遷至青原

遷每靜坐。寂若忘生。第一座發之曰。祖非教汝默坐尋思也。今行思和尚出世。吉州汝因緣在彼。遷直詣靜居參禮。祖曰。子何方來。遷曰。曹溪。祖曰。將得甚麼來。曰。未到曹溪。亦不失祖。曰。若恁麼。用到曹溪作甚麼。曰。若不到曹溪。爭知不失。遷又曰。曹溪大師還識和尚否。祖曰。汝今識吾否。曰。識。又爭能識得。祖曰。衆角雖多。一麟足矣。遷又問和尚自

離曹溪甚麼時至此間祖曰我却知汝蚤晚離曹溪曰希遷不從曹溪來祖曰我亦知汝去處也曰和尚幸是大人莫造次他日祖復問遷汝甚麼處來曰曹溪祖乃舉拂子曰曹溪還有這個麼曰非但曹溪西天亦無祖曰子莫曾到西天否曰若到即有也祖曰未在這道曰和尚也須道取一半莫全靠學人祖曰不辭向汝道恐已後無人承當己巳十七年

禪師牛頭山第五世智威寂

威江甯陳氏子受法牛頭持爲江左學者所歸二月十八日寂延祚寺壽七十七

庚午十八年

義學沙門京兆西崇福寺智昇撰開元釋教錄

自後漢明帝永平十八年丁卯至唐開元十八年庚午凡六百六十四載中間傳譯經素總一百七十六人所出大小二乘三藏聖教及聖賢集傳并及失譯人名總二千二百七十八部合七千四百六卷先是道真道宣等各有晉魏漢等錄而重出

誤入者多昇乃重經撰次爲二十卷最號精詳又續內典錄圖紀各一卷文筆高博法苑重之

辛未十九年

南嶽祖付道一等法眼

一侍奉九秋日益玄奧入室弟子總有六人祖各印可曰汝等六人同證吾身各契其一一人得吾眉善威儀常一人得吾眼善願勝達一人得吾耳善聽理然一人得吾鼻善知氣神照一人得吾舌善談說嚴一人得吾心善古今道又曰一切萬法皆從心生心無所生法無能住若達心地所作無礙非遇上根宜慎辭哉

希遷持書到南嶽

青原祖令遷持書與南嶽祖曰汝達書了速回吾有個鋤斧子與汝住山遷至彼未呈書便問不慕諸聖不重己靈時如何師曰子問太高生何不同下問遷曰甯可永劫受沉淪不從諸聖求解脫祖便休玄沙曰大小石頭被南岳推倒直至如今起不得

青原祖付希遷法

遷回青原祖問子返何速書信達否遷曰書亦不通信亦不達去日蒙和尚許個鈿斧子祇今便請祖垂一足遷便禮拜尋辭往南嶽

祥符蔭曰明暗偏正回互尊貴之旨不消拈出蚤已密印全提矣

禪師道一居建陽佛迹嶺

壬申二十年

瑜伽教主灌頂國師洛陽廣福寺金剛智寂

智於開元十一年奉勅翻譯瑜伽密部十八年又譯諸陀羅尼等法要八月既望於洛陽廣福寺命諸門人曰白月圓時吾當去矣遂禮佛寂然而化壽七十一臘五十一葬於龍門伊川之右勅諡灌頂國師弟子中書侍郎杜鴻漸述碑紀德

癸酉二十一年

禪師道一遷於臨川

甲戌二十二年

乙亥二十三年

瑜伽教主洛京聖善寺無畏寂

畏本天竺烏荼國王讓位於兄出家學道遊中天竺遇達摩掬多授以總持瑜伽密教乃偏禮聖迹入雞足山爲迦葉尊者剃髮神蹟炳著非一折伏九十六宗使異學歸正掬多曰汝與震旦有緣畏乃禮辭途中廣作法利至大唐西境夜有神人白曰此東非弟子界也文殊師利實護神洲禮足而退睿宗知畏將達中國詔將軍史獻出玉門塞以候來儀開元初立宗夢與眞僧相見姿狀非常躬以丹青寫之殿壁及畏至與夢符帝悅重之尊爲教主甯薛王已降皆跪席捧器焉奉勅住西明寺翻譯經呪畏性恬慮靜泊然禪觀面奉接儀形者若蓮華敷於淨沼咨承言說者如甘露潤於心田不動聲色消伏羣機神力密嚴無禱不應開元二十年求還西域優詔留之十月七日無疾而化壽九十九臘八十帝聞訃震悼具威儀護喪事定慧所薰全身不壞累朝旱澇皆就祈請無不徵驗龜供龍門西山廣化寺

祥符蔭曰大道不尚功勳亦猶至治歸於無爲恭

己垂裳不廢臯夔臣鄰之化。金剛無畏輩之密護。宗持可謂禦侮疏輔之臣也。

丙子二十四年

禪師道一至南康龔公山居之

先是此山峯岫魑魅所居人莫敢近。犯者災釁立生。及師至。當宴息時。有神紫衣玄冠。致禮言。捨此地爲清淨梵場。自是猛鷲毒螫。變心馴擾。

南嶽祖遣僧往江西觀化

一闍化江西祖問衆曰。道一已爲衆說法。未見有個消息來。因遣一僧往。囑曰。待伊上堂時。但問作麼生。伊道。底言語。記將來。僧如命而往。回謂祖曰。伊云。自從胡亂後。三十年不曾少鹽醬。祖然之。

安隱忍曰。此塞心性義路之錮。鎔摧生死魔軍之利劍。而直指人心。見性成佛之指南車也。金圈棘蓬穿入鼻孔者。蓋自此始。但不可向癡人說夢耳。

丁丑二十五年 戊寅二十六年 己卯二十七年 庚辰二十八年

第七世吉州青原弘濟祖示寂塔曰歸真

僧問。如何是佛法大意。祖曰。廬陵米作麼價。十二月十三日。陞座告衆。跏趺而逝。

青原第二世祖

諱希遷。高要陳氏。幼而徇齊。鄉民多殺牛祀鬼。神以義止之。數毀祠。奪牛俗以之化。後造曹溪。得度。見青原。得法。

辛巳二十九年

石頭希遷祖嗣青原宗統<sub>五十</sub>年

衡山南寺之東有石狀如臺。乃結庵其上。名石頭。南嶽祖常指學者來參。衆乃集鬼神多顯迹聽法。祖皆與授戒法。

壬午天寶元年 癸未二年

甲申三載正月改年曰載

第七世南嶽般若寺大慧祖示寂塔曰最勝輪

第八世祖

諱道一。漢州什邡縣人。姓馬氏。故俗稱馬祖。容貌奇異。牛行虎視。舌過鼻。足下有二輪文。幼歲於本邑羅漢寺出家。受具於渝州圓律師。嗣南

嶽開法江西

乙酉四載

第八世江西馬祖嗣宗統四十年

南康郡守裴公入龔公山問道

裴公躬勤諮稟祖直示心源每至海霞歛空山月

凝照心與境寂道隨悟深

詔名僧碩學赴內道場與本淨禪師論道

淨絳州張氏子受記曹溪住司空山中使楊光庭

採藥入山見淨還奏闕庭詔至內道場正月十五

日詔與兩街禪學共揚佛法

丙戌五載

制天下度僧尼並令祠部給牒祠部給牒始此然限

也故書之以  
著作備之非

丁亥六載 戊子七載

己丑八載

懷海參爲侍者

海州龍巖三學該鍊參祖命侍左右

庚寅九載

禪師惟儼從石頭來

儼十七出家納戒衡嶽博通經論嚴持戒律一日

歎曰大丈夫當離法自淨誰能屑屑事細行於布

巾耶首造石頭之室便問三乘十二分教某甲粗

知嘗聞南方直指人心見性成佛實未明了伏望

慈悲指示頭曰恁麼也不得不恁麼也不得恁麼

不恁麼總不得子作麼生儼問措頭曰子因緣不

在此且往馬大師處去儼稟命恭來禮祖仍伸前

問祖曰我有時教伊揚肩瞬目有時不教伊揚眉

瞬目有時揚眉瞬目者是有時揚眉瞬目者不是

子作麼生儼於言下契悟便禮拜祖曰子見甚麼

道理儼曰某在石頭處如蚊子上鐵牛祖曰汝既

如是善自護持

辛卯十載

佛滅後一千七百年

壬辰十一載

雙峯第四世禪師潤州鶴林徑山玄素寂

侍者懷海悟道

海侍祖經三載一日侍祖行次見一羣野鴨飛過。祖曰是甚麼海曰野鴨子祖曰甚處去也海曰飛過去也祖遂把海鼻扭海負痛失聲祖曰又道飛過去也海於言下省悟却歸侍者寮哀哀大哭同事問曰汝憶父母耶曰無曰哭作甚麼海曰我鼻孔被大師扭得痛不徹同事曰有甚因緣不契海曰汝問取和尚去同事問祖曰海侍者有何因緣不契祖曰是伊會也同事歸寮曰和尚道汝會也海乃呵呵大笑次日祖陞座衆纔集海出卷却席祖便下座

癸巳十二載

甲午十三載

祖令惟儼返石頭

儼侍奉三年祖一日問子近日見處作麼生儼曰皮膚脫落盡唯有一真實祖曰子之所得可謂恻於心體布於四肢既然如是將三條篋束取肚皮隨處住山去儼乃辭祖返石頭一日在石上座次石頭問曰汝在這裏作麼曰一物不爲頭曰恁麼

則閑坐也曰若閑坐卽爲也頭曰汝道不爲不爲個甚麼曰千聖亦不識頭以偈讚曰從來共住不知名任運相將祇麼行自古上賢猶不識造次凡流豈可明石頭垂語曰言語動用沒交涉儼曰非言語動用亦沒交涉頭曰我這裏針劑不入儼曰我這裏如石上栽花頭然之

法師台宗第五世左溪玄朗寂

朗嗣東陽威宴坐左溪三十年精約自持弟子湛然等數十人傳其教

乙未十四載

范陽安祿山學兵反

丙申

天寶十五載至德元

肅宗 名亨在位五年改元者四

肅宗丁酉二載

禪師懷海再參付法

海再參侍立次。祖目視繩牀角拂子。海曰。卽此用。

離此用。祖曰。汝向後開兩片皮。將何爲人。海取拂子。豎起。祖曰。卽此用。離此用。海掛拂子於舊處。祖振威一喝。海直得三日耳聾。遂付正法。

戊戌乾元元年。復以載爲年。己亥二年。

庚子上元元年。

勅使至曹溪。請六祖衣鉢歸內。供養。詔塔主令韜赴闕。以疾辭。

禪師大鑑支下洛京荷澤寺眞宗大師神會寂。

會襄陽高氏子。年十三。至曹溪禮祖。祖一日告衆曰。有一物無頭無尾。無名無字。無背無面。諸人還識否。會出曰。是諸佛之本源。神會之佛性。祖曰。向汝道無名無字。汝便喚作本源佛性。汝向後只成得個知解宗徒。後於洛陽闡明祖化。大爲王臣敬信。五月十二日。寂塔於洛陽寶應寺。勅謚眞宗大師。

辛丑二年。

禪師大鑑支下司空山大曉本淨寂。

詔禪師南陽慧忠。至待以師禮。

忠諸暨由氏子。得法曹溪。居南陽白崖山。黨子谷四十餘年。不下山。道行聞於朝。勅中使孫朝進貴。詔徵赴京。居千福寺。待以師禮。

壬寅寶應元年。

律師餘杭宜豐寺靈一寂。

一精持戒律。品行清高。禪誦之餘。詩歌不輟。與襄陽朱放。南陽張繼。安定皇甫曾。范陽張南史。吳郡陸迅。東海徐嶷。景陵陸鴻漸。爲塵外之友。同時會稽曇一。晉陵義宣。俱以高雅見稱。寂年方三十五。右金吾衛兵曹參軍。獨孤及撰碑塔於虎林東峯。

代宗名立。在位十七年。

代宗癸卯廣德元年。

詔謚初祖菩提達摩曰圓覺大師。塔曰空觀。

甲辰二年。

石頭祖移庵梁端。

祖一日見負米登山者。愍之。明日卽移庵下梁端。乙巳永泰元年。

詔奉六祖大師衣鉢歸曹溪

五月五日帝夢六祖大師請衣鉢七日遣鎮問大將軍劉崇景頂戴而送勅刺史楊城曰朕之國寶卿可於本寺如法安置專令僧衆親承宗旨者嚴加守護勿令遺墜

丙午大歷元年

洪州連帥路嗣恭請祖開元寺開堂

四方學者雲集座下僧問和尚爲甚麼說卽心卽佛祖曰爲止小兒啼曰啼止時如何祖曰非心非佛曰除此二種人來如何指示祖曰向伊道不是物曰忽遇其中人來時如何祖曰且教伊體會大道

洪州廉使參

問弟子喫酒肉卽是不喫卽是祖曰若喫是中丞祿不喫是中丞福廉使禮謝

丁未二年

詔諡四祖曰大醫禪師塔號慈雲

戊申三年

詔禪師徑山道欽問法要賜號國一

二月詔曰朕聞江左有蘊道禪人德性冰霜淨行林野朕虛心瞻企渴仰懸懸有感必通國亦大慶願和尚遠降中天盡朕歸向不違願力應物見形今遣內侍黃鳳宣旨特到詔迎速副朕心勅令本州供送凡到州縣開淨院安置官吏不許謁見疲師心力弟子不算多少聽其隨侍帝見鄭重咨問法要供奉勤至司徒楊綰一見歎禮退而告人曰此實方外之高士也難得而名焉詔號國一禪師詔諡五祖曰大滿禪師塔號法雨

己酉四年

禪師懷海住洪州大雄山

巖巒峻極故號百丈祖寄三甕醬去海集衆上堂開書了拈拄杖指甕曰道得卽不打破道不得卽打破衆無語海打破歸方丈

安隱忍曰馬祖以三甕醬寄百丈可疑也百丈上堂一時打破又可疑也不善疑而求善悟譬若首燕而之越也

國師雙峯下六世惠忠寂

忠嗣牛頭威平生一粥食唯一鐙虎爲巡守鵲爲移巢寂之夕有瑞雲凝覆天樂聞空

祥符蔭曰雙峯融未聞道前百鳥銜花諸天送供及見四祖後日負米供衆故其支下多有德化感異然斷際祖謂其未知有向上關板子非貶剝諸方語也具向上全提眼目者自知之

庚戌五年

辛亥六年

律師會稽開元寺曇一寂

一禪律之外囊括百氏與張說宋璟蘇瓌陸象先賀知章等善著四分律疏十卷天寶十四載浙江潮激錢塘一率律學千人念摩訶般若莊嚴伍胥以祈潮退夢一神人衣冠甚偉稽首謝曰蒙垂法施卽改波流未逾旬時漲沙五十里大歷六年十一月十七日寂壽八十臘六十一制服執紼者江淮之南河洛之表殆人人雪涕各各增悲焉會稽徐浩撰碑紀其德

壬子七年

癸丑八年

甲寅九年

三藏法師京兆大興善寺大辯廣智不空金剛寂不空北天竺人行五部灌頂法神應不測玄宗肅宗皆師重之代宗恩渥彌厚寂聞輟朝三日勅開府李元琮知護喪事火浴得舍利一百八十粒

乙卯十年

禪師大鑑支下南陽大證國師慧忠寂

忠將涅槃辭帝帝曰師滅度後弟子將何所記忠曰告檀越造取一所無縫塔帝曰就師請取塔樣忠良久曰會麼帝曰不會忠曰有弟子應真却知此事可詔問之十二月十九日右脇而逝詔應真問前語真良久曰聖上會麼曰不會真以偈進曰湘之南潭之北中有黃金充一國無影樹下同船琉璃殿上無知識

丙辰十一年

丁巳十二年

戊午十三年

己未十四年

德宗  
名适在位  
二十六年

德宗庚申建中元年

辛酉二年

壬戌三年

法師台宗第六世國清湛然寂

然荊溪臧氏子。智者五世孫。左溪朗公嗣。著法華釋義疏。記各十卷。止觀輔行傳弘訣十卷。法華三昧補助儀一卷。方等懺補闕儀二卷。略維摩疏十卷。維摩疏記三卷。重治定涅槃疏十五卷。金錫論十妙不二門等。盛行於世。學士梁肅撰傳。稱其爲法門命世云。

癸亥四年

法師澄觀註華嚴疏

觀字大休。會稽夏侯氏子。生於開元戊寅。身長九尺四寸。垂手過膝。口四十齒。目光夜發。晝乃不眴。天寶七載出家。肅宗二年丁酉。受具奉詔入內。勅譯華嚴。初至德中。卽以十事自勵。曰。體不捐沙門之表心。不違如來之制。坐不肯法界之經。性不染情礙之境。足不履尼寺之塵。脇不觸居士之榻。目不視非儀之綵。舌不味過午之餚。手不釋圓明之

珠宿不離衣鉢之側。從牛頭忠徑山欽。問西來宗旨。受華嚴圓教於京師。說禪師。大歷三年。代宗詔入內。與大辯正三藏譯經爲潤文。大德既而辭入五臺。大華嚴寺。覃思華嚴。以五地聖人。棲身佛境。心體眞如。猶於後得。智起世俗。心學世間。解繇是博覽六藝。圖史九流。異學華夏。訓詁竺經。梵字及四圍五明。聖教世典等書。靡不該洽。是年下筆著疏。先求瑞應。一夕夢金容當陽山峙。光相顯顯。因以手捧咽面門。既覺而喜。以謂獲光明徧照之徵。自是落筆無停思。乃以信解行證分華嚴爲四科。理無不包。觀每慨舊既未盡經旨。唯賢首國師頗涉淵源。遂宗承之。製疏凡歷四年。而文成。

甲子興元元年

詔諡二祖曰大祖禪師

乙丑貞元元年

居士龐蘊來參

蓋全家入道可謂解脫塵勞者故書

蘊字道玄。衡陽人世業。儒少悟塵勞。志求真諦。初謁石頭。問不與萬法爲侶者。是甚麼人。頭以手掩。

其口豁然有省。後與丹霞爲友。一日石頭問曰。見老僧以來。日用事作麼生。曰。若問日用事。卽無開口處。呈偈曰。日用事無別。惟吾自偶諸頭頭。頭非取捨處。處沒張乖。朱紫誰爲號。邱山絕點埃。神通并妙用。運水及搬柴。頭然之曰。子以緇耶。素耶。士曰。願從所慕。遂不剃染。後參馬祖。問曰。不與萬法爲侶者。是甚麼人。祖曰。待汝一口吸盡西江水。卽向汝道。士於言下頓領玄旨。後以舟盡載珍橐數萬。沉之湘流。舉室修行。有女曰靈照。常繫竹漉離。以供朝夕。有偈曰。有男不婚。有女不嫁。大家團圓頭。共說無生話。

丙寅二年

丁卯三年

戊辰四年

祖登建昌石門山

春正月。祖遊石門山。見林壑平坦。謂侍者曰。吾之朽質。當於來月歸茲地矣。歸遂示疾。院主問和尚近日尊候如何。祖曰。日面佛。月面佛。

第八世江西洪州開元大寂祖示寂塔曰大莊嚴

二月一日寂祖世壽八十。僧臘六十。入室弟子一百三十九人。得法者八十四人。其參承機緣各見別傳。茲不具書。丹陽公包佶爲碑紀述。權德輿銘塔。

安隱忍曰。大師應般若多羅之識。爲震旦第一法王。觀其施設。如石季倫讌客。雖厨廁卑穢之地。羅列雜寶。客隨手而得之。往往揖婢爲夫人。錯愕遷避。自謂入崇之室。及其登廣筵。罰巨觥。照以明月之珠。使綠珠歌於前十丈珊瑚。一擊粉碎。又不覺爽然自失。此大智之得於扭鼻而失於最後之一喝。臨濟所謂吹毛用了急須磨是也。夫虎豹之威。信乎其猛矣。或不免於戈戟吞舟之魚。信乎其大矣。或難逃於巨浸。騏驥之駒。瞬目而馳千里。人得而縻之。以其跡在耳。惟龍則不然。大而溟渤小而杯盞間。莫不卷舒自得。排山嶽與雲雨過而不留。變化而莫窮。得此道者。謂之龍奮迅三昧。馬大師其是乎。變三十四祖之法式。融其弊掃其轍。若疾雷之破山。使心性解路之偷。心聞之立死。如金翅

鳥王直取龍吞。然後翱翔九天。不住虛空。不離於空。不爲空性之所留住。我爲法王。於法自在。不特龍變而已。後來臨濟雲門。瀉仰法眼。各建寶幢。不過一爲拈出。豈於三日耳。輦外別有宗旨哉。然則今之不透重關。認悟中迷爲實法者。與客之登廁得寶時節等耳。

沙門金陵惠炬集寶林傳

先是崔寇難作。付法藏傳失於次序。多見差謬。炬乃往曹溪寶林。同西竺勝持三藏重共參校。祖偈并唐初以來傳法宗師機緣行世。曰寶林傳。

宗統編年卷之十一

宗統編年卷之十二

第九世祖

諱懷海。福州長樂王氏子。參馬祖嗣法。住百丈。

德宗己巳貞元五年

第九世百丈祖嗣宗統

二十六年

庚午六年

禪師智常開法歸宗

常嗣馬祖。住廬山。歸宗江州刺史李渤問。常曰。教中謂須彌納芥子。渤卽不疑。芥子納須彌。莫是妄談否。常曰。人傳使君讀萬卷書。是否。曰。是。常曰。摩頂至踵。如椰子。大萬卷書。向何處著。渤俛首而已。異日。渤又問。一大藏教。明得箇甚麼。邊事常舉。拳示之。曰。還會麼。曰。不會。曰。這箇措大拳頭。也不識。青原下第二世石頭無際祖示寂。塔曰。見相。

祖著參同契。曰。竺土大仙心。東西密相付。人根有利鈍。道無南北祖。靈源明皎潔。枝派暗流注。執事原是迷。契理亦非悟。門門一切境。回互不同回互。

而更相涉不爾依位住色本殊質象聲元異樂苦暗合上中言明明清濁句四大性自復如子得其母火熱風動搖水濕地堅固眼色耳音聲鼻香舌鹹醋然依一一法依根葉分布本末須歸宗尊卑用其語當明中有暗勿以暗相遇當暗中有明勿以明相觀明暗各相對比如前後步萬物自有功當言及用處事存函蓋合理應箭鋒拄承言須會宗勿自立規矩觸目不會道運足焉知路進步非近遠迷隔山河固謹白參玄人光陰莫虛度十二月二十五日示寂壽九十一

祥符陰曰南嶽青原分江西石頭兩宗石頭參同契全提明暗回互事理相涉之旨寶鏡三昧五位君臣盡從這裏去其言曰進步非近遠迷隔山河固石頭路滑豈虛語哉

### 青原第三世祖

諱惟儼絳州韓氏子首造石頭令往江西馬大師處言下契悟歸嗣石頭

辛未七年

青原下第三世藥山祖嗣石頭宗統四年

發明祖

石頭之後應書道悟祖分嗣宗統以雲門法眼兩宗所自來也因有懷疑以俟後補

壬申八年

### 祖立禪林清規

祖以禪宗傳持大法化儀未備乃博約折中設立制範首立方丈以尊主法不立佛殿唯樹法堂以親承法印當代為尊也來參學衆盡列僧堂朝夕參請以道為務主法者稱和尚上堂陞座說法大衆雁立側聆示依法而住也齋粥隨宜二時均徧行務普請上下均力示同衆無私也立兩序分列東西助揚法化也立列職各司其事專領庶務也有過舉罰公擯出院示清衆無染也其諸軌度高簡詳序號曰百丈清規天下禪林遵而行之祥符陰曰今日之清規非祖當日所立之清規也祖尊主法尚不立佛殿何得有如今之繁文等事一增改於宋僧贊甯再修飾於元僧德輝而從上之宗風法式掃土盡矣靈隱禮和尚嘗切歎欲釐正之南嶽儲和尚欲成宗門典禮一書以告方來

俱有志未就。後有志於敦祖。復古者其幸加之意焉。

禪師希運來參

運幼於閩縣黃檗山出家。身長七尺。額有圓珠。後遊天台。路逢一僧。與之談笑。如舊相識。熟視之。目光射人。頗有異相。乃偕行。歷溪水瀑漲。捐笠植杖而止。其僧率運同渡。運曰。兄要渡。自渡。彼即褰衣躡波。若履平地。回顧曰。渡來。渡來。運曰。咄。這自了漢。吾蚤知捏怪。當斫汝脛。其僧歎曰。真大乘法器。吾所不及。言訖。不見。至洛京。行乞吟添鉢。聲有一。軀出扉間。曰。太無厭。主。運曰。汝猶未施。責我無厭。何耶。軀笑而掩扉。運異之。進與語。多所發藥。須臾辭去。軀告曰。可往南昌。見馬大師。至南昌。馬祖已示滅。遂往石門謁塔。時祖結廬於塔旁。乃往參祖。祖問。巍巍堂堂。從何方來。曰。巍巍堂堂。從巔南來。祖曰。巍巍堂堂。當爲何事。曰。巍巍堂堂。不爲別事。祖深器之。曰。某甲特來禮拜。祖緣淺薄。不及一見。未審平日有何言句。願聞開示。祖遂舉再參。馬祖

因緣。運聞之不覺吐舌。祖曰。子已後莫承嗣。馬大師麼。曰。不然。今日因師。舉得見馬祖。大機大用。然且不識馬祖。若嗣馬祖。他日已後。喪我兒孫。祖曰。如是如是。是見與師齊滅。師半德。見過於師。方堪傳授。子今甚有超師之見。運便禮拜。一日。運問從上宗乘如何。指示祖良久。運曰。不可。教後人斷絕去也。祖曰。將謂汝是個人。乃起入方丈。運隨後入。曰。某甲特來。祖曰。若爾。則他後不得孤負吾。

禪師曇晟參

經二十年。因緣不契。後造藥山。

禪師雙峯支下第七世徑山國一大覺國師道欽寂。欽鶴林素嗣。崔趙公問。弟子出家得否。欽曰。出家乃大丈夫事。非將相之所能爲。崔有省。十二月寂。壽七十九。臘五十。塔於龍興禪院。刺史王顏撰碑。癸酉九年。

禪師靈祐參

祐長溪趙氏子。年十五。剃染。受具。究大小乘教。嘗遊方至國清寺。與寒山拾得往松門夾道。寒作虎

吼三聲。祐無對。寒曰。自從靈山一別。迄至於今。還相記麼。祐又無對。拾拈杖曰。老兄喚這箇作什麼。祐又無對。寒曰。休休。不用問他。自從別後。已三生作國王來。總忘却。也是年祐年二十三。遊江西參祖。祖一見許之。入室。遂居參學之首。一日侍立次。祖問誰對曰。靈祐。祖曰。汝撥爐中有火否。祐撥之曰。無火。祖躬起。深撥得少火。舉示曰。汝道無這箇。響祐自是發悟。禮謝陳其所解。祖曰。此乃暫時岐路耳。經云。欲識佛性義。當觀時節因緣。時節既至。如迷忽悟。如忘忽憶。方省己物。不從他得。故祖師云。悟了同未悟。無心亦無法。只是無虛妄。凡聖等心。本來心法。原自備足。汝今既爾。善自護持。

甲戌十年

乙亥十一年

禪師普願至池陽

願新鄭王氏子。受業於大隗山大慧禪師。受戒於嵩山曇律師。歷遊講席。教海淹淹。通後入大寂之室。頓然忘筌。得遊戲三昧。掛錫池陽南泉堙谷刊木。

同入巖人次

以構禪棲。餐飯牛躬耕足食。不下南泉山三十餘年。諸方目爲郢匠。

從諗至南泉

諗曹州郝鄉郝氏子。童稚披剃。未納戒。便隨本師行脚。抵池陽。參普願。本師先入事了諗。方入事願。在方丈內外見諗來。參便問。近離甚處。諗曰。近離瑞像。願曰。還見立瑞像麼。諗曰。不見立瑞像。只見臥如來。願乃起坐曰。汝是有主沙彌。無主沙彌。諗曰。有主沙彌。願曰。那箇是你主。諗近前躬身曰。孟春猶寒。伏惟和尚尊體萬福。願乃喚維那曰。此沙彌別處安排。本師先歸。諗遂留參。一日問願如何。是道。願曰。平常心是道。諗曰。還可趣向也。無願曰。擬向即乖。諗曰。不擬爭知。是道。願曰。道不虛知。不屬不知。知是妄覺。不知是無記。若真達不疑之道。猶如太虛廓然。蕩豁豈可強是非耶。諗於言下大悟。

丙子十二年

法師澄觀應詔入京

詔河東節度使禮部尚書李訢迎法師澄觀入京。觀至詔同廟賓國三藏般若同譯華嚴後分梵冊。帝親預譯場一日不至卽差僧寂光依僧欲云皇帝國事因緣如法僧事與欲清淨觀承睿旨翻宣既就進之詔令開示華嚴宗旨帝大悅賜紫方袍號教授和尚相國齊抗鄭餘慶高郢請撰華嚴綱要相國李吉甫侍郎歸登駙馬杜琮請述正要又爲南康王韋臯相因武元衡著法界觀玄鏡僕射高崇文請著鏡燈說文司徒嚴綬司空鄭元刺史陸長源請撰三聖圓融觀節度使薛華觀察使孟簡中書錢徽拾遺白居易給事杜羔等請製七處九會華嚴界圖心鏡說文又與僧錄靈邃等製華嚴圖覺四分中觀等經律論關脉三十餘部

丁丑十三年

戊寅十四年

己卯十五年

庚辰十六年

辛巳十七年

藥山祖登山長嘯

祖一夜登山經行忽雲開見月大嘯一聲應澄陽

東九十里許刺史李翱嚮祖風屢請不赴乃躬謁祖祖不顧翱性褊急乃曰見面不如聞名拂袖使出祖曰太守何得貴耳賤目翱回拱謝問曰如何是道祖以手指上下曰會麼白不會祖曰雲在青天水在瓶翱欣然作禮述偈曰鍊得身形似鶴形千株松下兩函經我來問道無餘話雲在青天水在瓶選得幽居愜野情終年無送亦無迎有時直上孤峯頂月下披雲嘯一聲翱又問如何是戒定慧祖曰這裏無此閑家具翱罔測祖曰太守欲保任此事須向高高山頂立深深海裏行闔闔中物捨不得便爲滲漏翱作復性書約三千言翱韓愈門人律師南嶽雲峯法證寂

壬午十八年

癸未十九年

甲申二十年

順宗名誦在位一年

順宗乙酉永貞元年

憲宗名純在位十五年

憲宗丙戌元和元年

丁亥二年

禪師靈祐往瀉山

司馬頭陀自湖南來百丈白祖曰潭州大瀉山水奇絕可成一大道場聚千五百衆乞和尚分一枝佛法王化此山祖令集衆曰若能對衆一語出格者卽令瀉山闡化卽指淨瓶問曰不得喚作淨瓶喚作什麼華林覺爲第一座曰不可喚作木椀也祖不肯祐時充典座出衆踢倒淨瓶祖笑曰第一座輪却山子也遂遣祐往是山峭絕復無人烟祐牽蘿而登拾橡爲食與猿獠爲伍山下居民稍稍知之

祥符蔭曰此選擇住持之始也當時瀉山一荒絕無人之境而祖必珍重對衆擇遣豈非人傑地靈而地以人重耶祐單丁食糲不五年於蛇虎叢中成象龍法席迄今大瀉名垂霄壤可謂不負祖之愼畀矣

禪師大鑑下第三世荊州天皇道悟寂

悟婺州東陽張氏子神儀挺異幼而生知年十四懇求出家父母不許遂減食飲父母不得已許之

戊子三年

禪師大鑑下第三世荊州天王寺道悟寂

及出家精修梵行風雨昏夜宴坐邱塚離諸怖畏謁徑山國一受心法服勤五載復謁馬祖重印前解依止二夏後謁石頭問曰離却定慧以何法示人頭曰我這裏無奴婢離個甚麼曰如何明得頭曰汝還撮得虛空麼曰恁麼則不從今日去也頭曰未審汝蚤晚從那邊來曰道悟不是那邊人頭曰我蚤知汝來處也曰師何以賊誣於人頭曰汝身見在曰雖然如是畢竟如何示於後人頭曰汝道誰是後人從此頓悟罄殫前二哲匠言下有所得心後居天皇客無貴賤皆坐而揖江陵尹右僕射裴公稽首問法接之無加禮裴愈歸向元和丁亥四月示疾命弟子先期告終至晦日大眾問疾悟薦召典座座近前悟曰會麼曰不會悟拈梳子拋於地上卽便告寂壽六十臘三十五

悟渚宮崔氏子漢子玉之裔十五出家二十三受戒三十謁石頭頻沐指示而不契次謁忠國師三

直覺真

十四與國師侍者應直南還謁馬祖。祖曰：識取自心。本來是佛，不屬漸次。不假修持，體自如如。萬德圓滿。悟於言下。大悟祖囑曰：汝若住持，莫離舊處。悟蒙旨已，便返荊門。去郭不遠，結草爲廬。節使來訪，不爲加禮。使怒擒悟，擲江中。及歸，見徧衙火發，且聞空中天王神嘖責聲。遂哀悔，設拜，烟燄頓息。宛然如初。乃躬往江邊迎悟。見悟在水，都不濕衣。益自敬重。於府西造天王寺，供之。龍潭信問從上相承底事如何。悟曰：不是明汝來處，不得信。曰：這個眼目，幾人具得。悟曰：淺草易爲長，蘆僧問如何。是玄妙之說。悟曰：莫道我解佛法好，曰：爭奈學人疑滯。何悟曰：何不問老僧。曰：卽今問了也。悟曰：去不是汝存泊處。悟常云：快活快活。及臨終時，叫苦。苦又云：閻羅王來取我也。院主問曰：和尚當時被節使拋向水中，神色不動。如今何得恁麼地。悟舉枕子云：汝道當時是如今是。院無對，便入滅。時十月十三日。年八十二。坐六十二夏。

闕疑 景德傳燈錄叙馬祖法嗣共一百三十八人，七十五人見錄，餘無機緣語句不錄，其一百

三十八人中，無天王道悟禪師。名叙石頭法嗣二十一人。首天皇道悟禪師，列龍潭崇信禪師于其後。宋高僧傳亦然。此疑之可闕者一也。五燈會元曰：按景德傳燈錄，稱青原下出石頭，還一也。出天悟悟下出龍潭，信信下出德山，鑒鑒下出雲峯，存存下出雲門，偃玄沙，備再傳爲法眼，益皆謂雲門法眼二宗來自青原。石頭雖二家兒孫，亦自謂青原。石頭所自出，不知其差誤所從來久矣。道悟同時有二：一住荊南城西天王寺，嗣馬祖一住荊南城東天皇寺，嗣石頭。其下出龍潭信者，乃馬祖下天王道悟非石頭下天皇道悟也。此疑之可闕者二也。指月錄載南岳青原宗派法嗣未定二人曰：荊州天皇道悟禪師，嗣石頭。住城東弟子三人，慧真、文寶、幽閑，協律朗符，載麟碑傳燈所錄悉同符碑，而誤以龍潭信列師法嗣。天王道悟嗣馬祖，住城西弟子一人，龍潭崇信，荆南節度使邱玄素撰碑，又唐聞人歸登、南岳碑主峰答裴相國宗趣狀，灌德興馬祖塔銘，皆以天王爲馬祖嗣。佛國白達觀、呂夏卿、張無盡皆著辨證傳燈之誤。獨其時同其地，同其參謁石頭馬祖同，故猶不能不闕疑。此疑之可闕者三也。

祥符陸曰：大凡古今疑信之間，有疑而難信者，有信而無可疑者。其疑其信，可以決也。惟可疑而實可信，既可信而猶不能無疑，其信其疑，須平其心。公其見，毋執一時一己之私。此古之所以有國文也。天皇天王景德傳燈及五燈會元諸家文獻，皆非無徵徵則皆可信，信則疑不必闕。然佛祖出世，無非爲一大事，因緣雲興電拂，甯爭剩迹，千釋迦萬彌勒，彼此何分。況同爲大鑑之後，均闡達摩之

道謂其出自石頭固迦文之後裔也。謂其出自馬祖亦迦文之後裔也。必欲定其信史。兩家之執一。紛然何妨。闕爲疑文。千古之大同自在。故兩存天。皇天王而書其系曰。大鑑下第三世以俟後之詳定焉。

己丑四年

禪師曇晟造藥山

曇參百丈二十年。因緣不契。遂造藥山。祖問甚處來。曰百丈來。祖曰百丈有何言。句曰尋常道。我有一句。子百味具足。祖曰鹹則鹹味。淡則淡味。不鹹不淡。是常味。作麼生。是百味具足的。句。晟無對。祖曰爭奈目前生死何。曰目前無生死。祖曰在百丈多少時。曰二十年。祖曰二十年在百丈。俗氣也不除。他日侍立次。祖又問百丈更說甚麼法。曰有時道三句外省去。六句內會取。祖曰三千里外且喜沒交涉。祖又問更說甚麼法。曰有時上堂大衆立定。以拄杖一時趁散。復召大衆。衆回首。丈曰是甚麼。祖曰何不蚤恁麼。道今日因子得見海兄。晟於

可變河

言下頓悟便禮拜

庚寅五年

辛卯五年

壬辰七年

詔諡曹溪六祖大鑑禪師塔曰靈照

從南海經略馬總請也。可東柳

宗元  
撰碑

癸巳八年

瀉山道場成

祐單丁五年。一日念道在接物利生。獨居非是。乃出至山口。語蛇虎曰。我若於此山有緣。汝等各自散去。若其無緣。我充爾腹。言訖。蟲虎四散。祐乃回山。未幾。懶安上座至。禪學稍集。衆營梵宇。連帥李景讓奏號同慶寺。風動天下。四方輻輳歸之。慧寂至瀉山。悟旨。

寂韶州懷化葉氏子。年九歲於廣州和安寺投通禪師出家。十四歲父母取歸。欲與婚。憐寂不從。遂斷手二指。跪致父母前。誓求正法。以報劬勞。父母乃許。再詣通處。而得披剃。未登具。卽遊方。初謁耽源。已悟玄旨。後參瀉山。問汝是有主沙彌。無主沙

彌寂曰有主曰主在甚麼處寂從西過東立瀉異之寂問如何是真佛住處瀉曰以思無思之妙反思靈燄之無窮思盡還源性相常住事一二真佛如如寂於言下頓悟自此執侍前後盤桓十五載一日又問子既稱善知識爭辨得諸方來者知有不知有有師承無師承是義學是立學子試說看寂曰慧寂有驗處但見僧來便豎起拂子問伊諸方還說這個不說又曰這個且置諸方老宿意作麼生瀉歎曰此是從上宗門中牙爪又問大地衆生業識茫茫無本可據子作麼生知他有之與無曰慧寂有驗處時有一僧從面前過寂召曰闍黎僧回首寂曰和尚這個便是業識茫茫無本可據瀉曰此是師子一滴乳迸散六斛驢乳

甲午九年

第九世洪州百丈大智祖示寂塔曰大寶勝輪

祖上堂曰靈光獨耀迥脫根塵體露真常不拘文字心性無染本自圓成但離妄緣卽如如佛僧問對一切境如何得心如木石去祖曰一切諸法本

不自言空不自言色亦不言是非垢淨亦無心繫縛人但人自虛妄計著作若干種解會起若干種知見生若干種愛畏但了知法不自生皆從自己一念妄想顛倒取相而有知心與境本不相到當處解脫一一諸法當處寂滅當處道場又本有之性不可名目本來不是凡不是聖不是垢淨亦非空有亦非善惡與諸染法相應名人天二乘界若垢淨心盡不住繫縛不住解脫無一切有爲無爲縛脫心量處於生死其心自在畢竟不與諸妄虛幻塵勞蘊界生死諸入和合迥然無寄一切不拘去留無礙往來生死如門開相似夫學道人若遇種種苦樂稱意不稱意事心無退屈不念名聞利養衣食不貪功德利益不爲世間諸法之所滯礙無親無愛苦樂平懷麤衣遮寒糲食活命兀兀如愚如聾稍有相應分若於心中廣學知解求福求智皆是生死於理無益却被知解境風之所漂溺還歸生死海裏佛是無求人求之卽乖理是無求理求之卽失若著無求復同於有求若著無爲復

同於有爲故經云不取於法不取非法不取非非法又云如來所得法此法無實無虛若能一生心如木石相似不被陰界五欲八風之所漂溺卽生死因斷去住自絲不爲一切有爲因果所縛不被有漏所拘他時還以無因縛爲因同事利益以無著心應一切物以無礙慧解一切縛亦云應病與藥祖凡作務執勞必先於衆正月十七日寂世壽九十有五

寂音洪題祖廣錄曰佛語心宗法門旨趣至江西爲大備大智精妙頓悟之力能到其所安此中雖無地可以棲言語然要不可以終去語言也故其廣演之語大別禪者法執而今之五家宗趣皆此錄森列如井之在海其清涼甘滑泄苦濁毒所不同而本則無異質也

安隱忍曰先聖教人悟後還來舊處行又曰但一切仍舊今之錯認此言者不少夫君臣父子僧俗長幼乃至百工貴賤各有常儀卽悟後亦當安分設見已同聖人而輕放肆志惡得謂之仍舊歟今

◆會疑言

學者纔涉參尋便將禪師二字貼在面上東奔西走爲求出世可謂不仍舊之甚矣況乃猖狂妄作不避譏嫌使高視之士疑慢宗乘中下之流展轉造業痛哉觀百丈所說所行而不悛革眞土木無心矣

禪師馬祖支下虔州西堂大覺智藏寂

藏骨表殊衆入大寂之室大寂嘗令藏詣長安通書於忠國師忠問汝師說甚麼法藏從東過西立忠曰只這個更別有藏從西過東立忠曰這個是馬師的仁者作麼生藏曰蚤已呈似和尚了尋又令送書與徑山國一禪師書中作一圓相徑山發緘於圓相中著一點却封回後受記萌貞元七年開堂李尚書翺問馬大師有甚麼言教藏呼李翺翺應諾藏曰鼓角動也住西堂時有一俗士問有天堂地獄否藏曰有曰有佛法僧寶否藏曰有曰和尚莫錯否藏曰汝曾見尊宿來耶曰曾參徑山和尚藏曰徑山向汝道什麼曰他道一切總無藏曰汝有妻否曰有藏曰徑山和尚有妻否曰無藏

曰徑山和尚道無即得士禮謝而去僧問有問有答賓主歷然無問無答時如何藏曰怕則却那壽八十臘五十五四月八日寂憲宗諡大宣教禪師塔曰元和證真主穆宗重諡大覺禪師

第十世祖

諱希運閩人也額間隆起如珠往南昌參馬祖值已寂乃見百丈嗣法

乙未十年

第十世黃檗祖嗣宗統三十四年

瀉仰宗首建第一世

諱靈祐福州長溪趙氏子參百丈嗣法開瀉山道場

嗣瀉山法同建宗旨袁州仰山祖

諱慧寂韶州懷化葉氏子年十四斷二指跪致父母前誓求正法以報劬勞依南華寺通禪師得度初謁耽源後參瀉山嗣法共建宗旨天下稱曰瀉仰宗

瀉仰祖首建宗統

發明何以不書嗣宗統曰以瀉仰首建也禮曰別子為祖

◆代或伐歟

繼別子為宗百世不遷者別子之後也。圓覺六傳至曹溪分為南岳青原南岳青原後分五宗五宗既定各宗始別之祖以定宗統不書嗣者尋首建也然則臨濟奚以書曰以承嗣來源單傳世系有在也或問祥符曰帝王歷世獨尊一統之經佛祖開宗何列諸家之紀祥符曰治統與道統不同治統以天下為家帝王誕膺天命君臨萬邦大統集焉春秋首書王正於魯史之元年者大一統也五霸之強必黜之不使奸此統也吳楚之竊必外之不使僭此統也又治統必天命人歸而大統始集故周文王在侯服五十年三分天下有其二以撫方夏商命未革而周統不膺至武王代商大統始集焉綱目書始皇二十六年乃繼周統高祖功成五年方接秦亡晉始於平吳而不始於秦和唐始於滅盜而不始於武德正統之歸間不容髮治統必世次相承天下不可一日無君道統則今古可紹百世以俟聖人而不惑然幾微之間千差萬別所以佛祖垂統不許無師自悟千佛列祖必躬承記萌乃稱法王法王治統則以法界為家以立法開宗為統立法因時所以救知見之不一開宗設教所

以示綱要之大同其間父子投機君臣合妙此爲  
仰曹洞所以前垂宗統也法王治統即集於道統  
故建統開宗而年歷紀焉昭法化相宣也法界之  
在人心不一不異人人悟證此心人人自成宗統  
五家樞要密嚴於以善承拈花微笑上下獨尊之  
旨可以五宗而統百千萬億無盡藏宗可以百千  
萬億無盡藏宗而統於五宗以統於拈花微笑上  
下獨尊之大宗非如八百國之閭位分封實如一  
太虛之圓容普攝也爲仰雲門法眼三宗不數傳  
而中斷相承世數湮沒無徵故闕而不書爲仰開  
宗而爲仰之後統焉雲門法眼開宗而雲門法眼  
之後統焉道統非如治統之隔礙也心承千古者  
自融會貫通焉耳矣

丙申十一年

爲山祖送鏡與東平

寂祖住東平爲山祖令僧送書并鏡一面寂祖上  
堂提起示衆曰且道是爲山鏡東平鏡若道是東  
平鏡又是爲山送來若道是爲山鏡又在東平手

裏道得則留取道不得則撲破去也衆無語祖撲  
破便下座

禪師馬祖支下隱峯寂

峯邵武鄧氏子屢參馬祖石頭後於馬祖言下相  
契元和中登五臺路出淮西屬吳元濟阻兵兩軍  
交鋒未決勝負峯曰吾當少解其患乃擲錫空中  
飛身而過兩軍將士仰觀闕心頓息峯既顯異慮  
成惑衆遂入五臺於金剛窟前將示滅問衆曰諸  
方遷化坐去臥去吾嘗見之還有立化也無曰有  
曰還有倒立者否曰未嘗見有峯乃倒立而化亭  
亭然其衣順體時衆議昇就茶毗屹然不動遠近  
瞻覩驚歎無已峯有妹爲尼時亦在彼乃拊而咄  
曰老兄疇昔不循法律死更熒惑於人於是以手  
推之儼然而踣遂就闍維收舍利建塔

丁酉十二年

戊戌十三年

禪師馬祖支下信州鷲湖慧覺大義寂

義衢州須江徐氏子嗣法馬祖李翱問大悲菩薩

用千手眼作麼義曰今上用公作麼憲宗詔入麟德殿論道有一法師問如何是四諦義曰聖上一帝三帝何在又問欲界無禪禪居色界此土憑何而立禪義曰法師只知欲界無禪不知禪界無欲法師曰如何是禪義以手點空法師無對帝曰法師講無窮經論只這一點尙不奈何帝問何者是佛性義對曰不離陛下所問帝默契益加欽重正月七日寂壽七十四勅諡慧覺禪師見性之塔

禪師馬祖支下京兆章敬寺大覺懷惲寂

惲泉州同安謝氏子受大寂心印初住定州柏巖次止中條山元和初詔居上寺有僧來參繞座三匝振錫而立惲曰是其僧復到南泉亦繞座三匝振錫而立泉曰是不是僧曰章敬道是和尙爲什麼道不是泉曰章敬卽是是汝不是十二月二十二日寂塔於灞水曰大寶相

禪師馬祖支下婺州五洩山靈默寂

默毗陵宣氏子參馬祖密契玄機入天台居白沙猛虎馴擾後居五洩頗著異蹟三月二十三日沐

◆俱疑供

浴焚香端坐告衆曰法身圓寂示有去來千聖同源萬靈歸一吾今溥散奚假與哀尙固違言非吾弟子時有僧問和尙向甚麼處去默曰無處去曰某何不見默曰非眼所覩言畢奄然而化壽七十二臘四十一高僧志閑撰行錄

己亥十四年

帝遣中使迎佛骨至京師貶韓愈爲潮州刺史

正月中使自鳳翔法門寺塔迎佛指骨入內供養二月具威儀歷送諸寺俱養王公士民瞻奉唯恐弗及刑部侍郎韓愈上表切諫上大怒將加愈極刑裴度崔羣爲言愈雖狂發於忠愍宜寬容以開言路乃貶潮州刺史

祥符蔭曰唐昌黎與宋之歐陽司馬諸公雖以文名世然實未聞大道毋怪乎其不知佛法也昌黎到郡以表哀謝勸東封泰山冀召己以述作則其當時諫佛骨也特徇名使氣之所爲耳豈忠臣事君不顧其身之謂乎及祀神海上謁見大顛憤鬱悲躁之情不覺逡巡自失史稱退之性懷許當時

皆薄其爲人。與李紳同列。恥居其下。數上疏訟其短。今觀退之上閣下諸公書。求哀乞憐之態。出自至情。使愈而果聞道。豈若是乎。卽此可以知佛法之當學矣。其文章不過波瀾流動。能洗從前衰靡耳。黃山谷謂愈見大顛後。文章理勝而排佛之詞亦少。沮誠道其實也。嘉祐中有西蜀龍某者。摘退之言行悖戾先聖者。條攻之。凡二十篇。退之生平蹈僞疎脫。盡露底裏。歐陽文忠見之。歎曰。退之復生。不能自解免矣。王荊國嘗曰。人有樂孟子距楊墨也。而以排佛老爲己功。嗚呼。莊子所謂夏蟲者。其斯人之謂乎。道歲也。聖人時也。執一時而疑歲者。終不聞道。夫春起於冬。而以冬爲終。終天下之大道者。其釋氏乎。不至於是者。皆所謂夏蟲也。司馬景文新史極譏佛。至謂佛不過一槁人耳。又謂其精微不出於吾書。其誕吾不信。嗚呼。景文活人也。於天下後世爲何如。而一槁人乃能感化如此。則其爲槁人也。亦不可得而知之神聖矣。景文非神聖。又何足以知夫神之所以爲神聖。之所以爲

聖哉。不知而極譏之。景文亦何心乎。東坡謂其爲聰明之所障。較其精微。不出吾書。誕而不信之語。可謂詳至。文載別傳圓通秀居法雲時。神宗遣中使降香并磨納。仍傳聖語。表朕親至之禮。皇弟荊王俱日夕問道。座下景文方登庸。以佛法太盛。將經營之。秀曰。公聰明人類英傑。非因佛法不能爾。遽忘願力乎。景文意憬然。從此不敢復言佛法之非。歐陽文忠修唐書。撰五代史。凡所載釋氏之事。並皆削去。後官洛中。一日遊嵩山。却去僕吏。放意而往。至一山寺。入門。修竹滿軒。公休於殿陞旁。有老僧閱經。自若與語。不甚顧答。公心異之。曰。道人住山久。如曰甚久也。又問誦何經。曰法華經。公曰。古之高僧。臨生死之際。類皆談笑。脫去何道致之耶。對曰。定慧力耳。又問。今乃寂寥。無有何哉。老僧笑曰。古人念念定慧。臨終安得散亂。今人念念散亂。臨終安得定慧。文忠大驚。不自知膝之屈也。謝希深嘗作文記其事觀此則知昌黎司馬歐陽等諸公。其始所爲皆爲虛名所劫。持而障於聰明者也。然究皆晚而

自悔有所得於佛法而止。今之聰明文章不及三公者萬一。又不知三公晚年之造詣。纔事帖。學操觚。讀原道本論等書。而乃以新史退之排佛老之功。比於孟子欲效尤之。噫。其亦自墮夏蟲之見。而不覺後來嚴冬栗冽時。屈蟠重壤。瞻天日以無從始悔。從前之謬妄也。詎不悲夫。凡此之言。非爲佛法饒舌。實爲自外於佛法者。不惜婆心也。幸慎思之。

庚子十五年

穆宗名恒在位四年

穆宗辛丑長慶元年

禪師馬祖支下汾州大達國師無業寂

業商州上洛杜氏子。得旨於馬祖。尋詣曹溪。徧歷廬嶽天台。舉无兩街大德。笑而不受。曰。非吾志也。後遊上黨。爲節度使李抱真所重。旦夕瞻奉。業有倦色。乃之縣上。復南下。至西河。刺史董叔繼請住開元業。曰。吾緣在茲。不可却也。雨大法雨。垂二十一年。并汾繼白。無不向化。凡有致問。皆答之曰。莫妄。

想憲宗屢遣使徵召。皆辭疾不赴。暨穆宗即位。思一瞻禮。乃命兩街僧錄靈卓等。齎詔迎請。曰。皇上此度思旨。不同常時。願和尙且順天心。不可言疾也。業微笑曰。有何德累煩聖上。且請前行。吾從別道去矣。乃沐浴剃髮。至中夜告弟子惠愔等曰。汝等見聞覺知之性。與太虛同壽。不生不滅。一切境界。本自空寂。無一法可得。迷者不了。卽爲境惑。一爲境惑。流轉不窮。汝等當知心性本自有之。非因造作。猶如金剛。不可破壞。一切諸法。如影同響。無有實者。故經云。唯此一事。實餘二則。非眞常。了一切空。無一物當情。是諸佛用心處。汝等勤而行之。言訖跏趺而逝。荼毗日。祥雲五色。異香四徹。所獲舍利。瑤若玉珠。弟子等貯以金棺。藏於石塔。塔曰澄源。

梅屋常曰。荊國王文公嘗問張文定公曰。去孔子百年而有孟軻。此後迨孔孟者爲誰。何吾道之寥乎。文定沉吟久之曰。有人第恐過之耳。曰。誰耶。文定曰。南嶽讓嵩山珪。馬祖石頭丹霞。無業若此。

類孔孟之教。嚮勒不住。故歸釋氏矣。文公深肯之。其後張無盡聞之。歎曰。達人之論也。然嵩山汾州。蓋祖庭之旁出者。其感應超絕說法沛然如此。則南嶽而下的。傳正續宗師。世教嚮勒不住。端可見矣。二三公之謙論。渠不信夫。

宗統編年卷之十二



宗統編年卷之十三

穆宗壬寅長慶二年

祖住筠州黃檗

上堂大衆纔集祖拈拄杖一時打散復召大衆衆回首祖曰月似彎弓少雨多風祖一日捏拳謂衆曰天下老和尚總在這裏我若放一線道從汝七縱八橫若不放過不消一捏時有僧問放一線道時如何祖曰七縱八橫曰不放過時如何祖曰普問如何是道如何修行祖曰道是何物汝欲修行自是黃檗門風盛於江表

睦州道明禪師來參命居第一座

明睦州人江南陳氏之後目有重瞳面列七星影相奇特持戒精嚴學通三藏參黃檗契旨於祖居

第一座首衆後居開元織蒲養母諸方高其風威以尊宿稱發明禪林職事

不書此書以尊宿不忝其職也

祥符蔭曰首座之職眼目人天輔成師學如廷之一個臣斷斷休休盡公無私者方可爲之青原一

到曹溪今首衆以不落階級也睦州之在黃檗乃能推轂濟祖後來發悟雲門令嗣雪峯其心眼爲何如者叢林以得人乃興大書曰睦州道明禪師來參命居第一座繼書義玄問法於其後歸啓迪之功於首座者不小而祖之命職得人益可見矣義玄問法祖三度賜棒

玄參黃檗三年行業純一首座顧而問之曰上座在此曾參問否曰不曾參問不知問個甚麼座曰何不問堂頭和尚如何是佛法的大意玄便去問聲未絕祖便打玄下來座曰問話作麼生玄曰某問聲未絕和尚便打某不會座曰但更去問玄又問祖又打如是三度問三度被打

祥符蔭曰但向問聲未絕便打處一觀覷破黃檗臨濟無立地處矣

安隱忍曰三問三打古今惟黃檗一人又止於接臨濟一用若再用則效顰者蠶然而起矣況千問千棒萬問萬打可至今日而無斃乎昔者昭覺勤禪師常曰近來諸方盡成窠臼五祖下我與佛鑑

△論語

佛眼三人結社參禪。如今蚤見漏逗出來。佛鑑下有一種作狗子叫鶻。鳴取笑人。佛眼下有一種觀燈籠露柱。指東畫西。如眼見鬼。我這裏且無這兩般病。妙喜曰。擊石火閃電光。引得無限人弄業識。舉了便會了。豈不是佛法大窠窟。動不覺吐舌。乃曰。休管他。我以契證爲期。若不契證。斷不放過。妙喜曰。契證卽得。若只怎麼傳將去。舉了便會了。硬作主。將擊石火閃電光。業識茫茫。未有了日。勤深肯之。噫證之一字。惟宗旨可以辨驗。否則金鎗混雜。孰敢誰何。

義玄不契首座啓令參大愚

玄白首座曰。蚤承激勸。問法累蒙和尚賜棒。不領深旨。願且辭去。座曰。汝若去。須辭和尚了。去座先啓祖曰。問話上座。雖是後生。却甚奇特。若來辭方便。接伊已後。爲一株大樹。覆蔭天下人。去在玄來曰。辭祖。祖曰。不須他去。只往高安灘頭參大愚。必爲汝說。玄到大愚。愚曰。甚處來。曰。黃檗來。愚曰。黃檗有何言句。曰。某三度問佛法的的大意。三度被

打不知。有過無過。愚曰。黃檗與麼老婆心切。爲汝得徹困。更來這裏問。有過無過。玄於言下大悟。乃曰。原來黃檗佛法無多子。愚擲住曰。這尿牀鬼子。適來道有過無過。如今却道黃檗無多子。你見個甚麼道理。速道速道。玄於大愚肋下築三拳。愚拓開曰。汝師黃檗非干我事。

義玄從大愚回黃檗

玄辭大愚。却回黃檗。祖問這漢來來去去。有甚了期。玄曰。只爲老婆心切。祖復問甚處去來。曰。奉慈旨。參大愚去。來祖曰。大愚有何言句。玄舉先話。祖曰。大愚老漢。饒舌待來。痛與一頓。玄曰。說甚待來。卽今便打。隨後便掌。祖曰。這風顛漢。來這裏持虎鬚。玄便喝。祖喚侍者曰。引這風顛漢。參堂去。大愚住洪州高安。歸宗智常禪師法嗣。 馮山舉問仰山。臨濟當時得大愚力。得黃檗力。仰山曰。非但騎虎頭。亦解把虎尾。安隱忍曰。臨濟當時在黃檗處。喫棒直得盡大地草木一時放大光明。帝釋梵王贊歎不及。可惜許。

被大愚老婆鷲面印破未免平地上喫交而今諸方老宿道臨濟悟得棒頭拂著的道理且道臨濟還肯麼諸仁者只如臘月三十日到來眼光落地了鋸解斧削又不知痛金抹香塗又不知喜正當與麼時這棒頭拂著的向甚麼處著還會麼我恁麼道且作死馬醫又曰睦州三勸問話而黃檗三打既不悟又指參大愚正見三老鉗錘妙密處臨濟立宗旨盡在此也今人但知黃檗三問三打遂倚一棒爲極則若無郢匠之手雖萬打安能活人宜鑒參龍潭付法

鑒劍南周氏子蚤歲出家受具精究律藏於性相諸經貫通旨趣嘗講金剛經時謂之周金剛後聞南方禪席頗盛鑒氣不平乃曰出家兒千劫學佛威儀萬劫學佛細行不得成佛南方魔子敢言直指人心見性成佛我當撲其窟穴滅其重類以報佛恩遂擔青龍疏鈔出蜀至灤陽路上見一婆子賣餅因息肩買餅點心婆子指擔曰這個是甚麼文字鑒曰青龍疏鈔婆曰講何經鑒曰金剛經婆

曰我有一問你若答得施與點心若答不得且別處去金剛經道過去心不可得見在心不可得未來心不可得未審上座點那箇心鑒無語婆遂指令去參龍潭至法堂曰久嚮龍潭及手到來潭又不見龍又不見信於屏風後引身曰子親到龍潭鑒無語遂棲止焉一夕侍立次信曰更深何不下去鑒便揭簾而出見外面黑却回曰門外黑信點紙燭度與鑒鑒接信便吹滅鑒豁然大悟便禮拜信曰子見箇甚麼鑒曰某甲從今後去更不疑天下老和尚舌頭也至來日信陞座曰可中有箇漢牙如劍樹口似血盆一棒打不回頭他時向孤峯上立吾道去在鑒遂取疏鈔於法堂前舉火炬曰窮諸玄辨若一毫置於太虛竭世樞機似一滴投於巨壑遂焚之

癸卯三年

甲辰四年

禪師雙峯下第六世烏窠道林寂

林徑山欽嗣見秦望山長松盤屈如蓋遂棲止其

上有侍者會通。一日辭曰。會通爲法出家。和尚不垂慈諒。今往諸方學佛法去。林曰。若是佛法。吾此間亦有少許。曰。如何是和尙佛法。林於身上拈起布毛吹之。通遂領悟。通先爲六宮使。德宗甚眷遇。懇求出家。遂賜歸休。下求師。

得度執持。精勤後居招賢寺。俗姓吳名元卿。杭州人。白居易守杭時。入山謁

林曰。禪師住處甚危險。林曰。太守危險尤甚。曰。弟子位鎮江山。何險之有。林曰。薪火相交。識性不停。

得非險乎。又問。如何是佛法大意。林曰。諸惡莫作。

衆善奉行。曰。三歲孩兒也。解恁麼道。林曰。三歲孩

兒。難道得八十老人行不得。白作禮而退。二月十

日。無疾告侍者曰。吾今報盡言訖。坐亡。

禪師石頭支下鄧州丹霞天然寂

然。本業儒。入京應舉。宿於逆旅。夢白光滿室。偶遇

禪者。謂之曰。選官何如。選佛曰。選佛當於何所。禪

者曰。今江西馬大師處。是選佛之場。仁者宜往。遂

造江西馬祖。一見。顛而撫之。曰。南嶽石頭是汝師

也。遽抵石頭。執爨役。凡三年。剃髮後。再謁馬祖。錫

號天然。杖錫參方。後住丹霞。壽八十八。六月告門

人曰。具湯沐。吾將行矣。乃戴笠策杖。受屨垂一足。未及地而化。勅諡智通禪師。塔曰妙覺。膳部員外郎劉軻撰碑。

敬宗名湛在位二年

敬宗乙巳寶歷元年

禪師北宗支下壽春三峯山道樹寂

樹。唐州聞氏子。多才幹。而沉靜。虛豁。徧歷名山。得

法於北宗秀至壽州三峯結茅而居。常有野人服

色素樸。言談詭異。化見種種神奇。如此涉十年。觀

之者皆不能測。後寂。無影響。樹告衆曰。野人作多

般伎倆。眩惑於人。只消老僧不見不聞。伊伎倆有

窮。吾不見不聞。無盡壽九十二告寂。

丙午二年

禪師義立再參付法

立。半夏上黃檗山。見祖看經。乃曰。我將謂是個人。

元來是庵黑豆老。和尚住數日。辭去。祖曰。汝破夏

來。何不終夏去。立曰。某暫來禮拜。和尚祖便打趣

令去。立行數里。忽疑此事。劫回。終夏後。又詣去祖。

曰甚處去曰不是河南便歸河北祖便打立約住與一掌祖大笑乃喚侍者將百丈先師禪板几案來立曰侍者將火來祖曰不然子但將去已後坐斷天下人舌頭去在

安隱忍曰濟悟後棒喝交馳機鋒頓脫諸方老宿業已稱之又云中路忽疑此事蓋濟上綱宗所由設也寶覺曰但有纖疑在便不得天迴地轉然豈欲天迴地轉以誇耀其能蓋以毫末不通卽是遮障障者無明也非黃檗盡其機用與之連根截斷古今到此者幾人是故臨濟初住鎮州便立種種宗旨以鍛學者之病曾爲浪子偏憐客其悲願可想見也

禪師馬祖支下常州芙蓉山大寶太毓寂

毓金陵范氏子禮牛頭忠出家內外精融深詣虛襟衆無能測受印於大寂之室元和十三年止於毗陵義興芙蓉山道俗歸化相國崔羣出鎮宣城以寶歷元年延居禪定寺明年告歸齊雲山九月朔儼然示滅壽八十臘五十八相國韋處厚奏謚

大寶禪師楞伽之塔

文宗名涵在位十四年

文宗丁未太和元年

禪師馬祖支下南嶽西園曇藏寂

藏嗣江西貞元二年深入衡嶽後結茅西園營東厨有一大蟒長數丈張口呀氣毒醺熾然侍者請避之藏曰死可逃乎彼以毒來我以慈受毒無實性激發則強慈苟無緣冤親一揆言訖其蟒按首徐行倏然不見

戊申二年

己酉三年

庚戌四年

辛亥五年

禪師馬祖支下天目山千頃院明覺寂

覺河內猷氏子風流蘊藉力學性成大寂之室徧歷衡嶽天台於徑山負薪數夏面黧手胝不以爲勞結茅西湖之畔范陽盧中丞嚮風躬請住大雲寺元和十五年隱天目山是山特秀基踰四郡有上下龍潭深不可測覺棲遁未久有白鹿毛質詭異俯首來歸土人謂爲山神共營禪宇嘗大旱

野火蔓延將及林際僧惶惶覺曰倘與此山有緣火當速減少。遇雷雨驟作火遂熄焉。遠近驚歎。

壬千六年

癸丑七年

甲寅八年

青原下第三世澧州藥山祖示寂

祖久不陞座。一日院主白云。大眾久思和尚示誨。曰打鐘著時。大眾纔集。祖便下座。歸方丈。院主隨後問云。和尚許爲大眾說法。爲甚麼一言不措。祖曰。經有經師。律有律師。爭怪得老僧。十月六日。臨示寂。連聲呼曰。法堂倒。法堂倒。衆皆持柱撐之。祖揮手曰。不會我意。乃告寂塔於院東隅。

祥符陰。曰藥山祖於大寂言下。悟得在石頭處。如蚊子上鐵牛。底道理。一物不爲。石上栽花。有一句。子待特牛生兒。卽向汝道。非情識到。甯容思慮。潛行密用。如愚若魯。此寶鏡三昧之所由立也。故曰力在逢緣。不借中。

禪師馬祖支下尊宿池州南泉普願寂

大夫陸亘與太守護軍等皆北面尊禮。壽八十七。

臘五十八冬十二月二十五日示疾之時。有白虹貫於禪室。西峯巨石崩。聞數十里。當晝有乳鹿繞禪座而號。衆咸異之。告門人曰。星孛燈幻亦久矣。勿謂吾有去來也。言訖而逝。墨巾泣血赴喪會葬者。相滿道塗。哀號之聲震於崖谷。門弟子契元文暢等凡九百人。膳部員夜郎史館修撰劉軻撰次道行。

祥符陰。曰當馬駒蹴踏之時。王老師高風大化。振拔汪洋。如大海迴瀾。中天柱蒼寒屹然。攀仰莫及。其垂尊宿之範於今古者乎。

青原第四世祖

諱曇晟。鍾陵建昌王氏子。生有自然胎服。右祖少出家。參百丈二十年。後嗣藥山。住潭州雲巖。

乙卯九年

青原下第四世雲巖祖嗣藥山宗統七年

禪師藥山支下潭州道吾山修一大師宗智寂

智豫。章海昏張氏子。密契心印於藥山。居長沙道吾海衆。歸附年六十七。九月十一日示疾而逝。塔。

於石霜勅諡修一大師寶相之塔南嶽高行僧玄  
泰撰碑頌

丙辰開成元年

相宗法師大安國寺大達端甫寂

甫天水趙氏子母夢梵僧出囊中舍利使吞之而  
娠傳唯識於安國素法師德宗徵見大悅賜紫詔  
侍皇太子於東朝順宗親之如昆弟恩禮特隆憲  
宗待之若賓數幸其寺常承注問皆契真乘由是  
天子益知佛爲大聖人其教有大不思議事詔率  
四衆迎請佛骨於內供養掌內殿法儀講涅槃唯  
識以開誘道俗者凡一百六十座壽六十七西向  
右脇而寂茶毗得舍利三百餘粒賜諡曰大達塔  
曰玄秘裴休撰碑柳公權書

●語錄師  
禪語良价造雲巖有省

价初參潯山問無情說法話不契潯山指令造雲  
巖价遂承命來參便問無情說法甚麼人得聞祖  
曰無情得聞曰和尚問否祖曰我若聞汝卽不聞  
吾說法也曰某爲甚麼不聞祖豎起拂子曰還聞

麼曰不聞祖曰我說法汝尙不聞豈況無情說法  
乎曰無情說法該何典教祖曰豈不見彌陀經云  
水鳥樹林悉皆念佛念法价於此有省乃述偈曰  
也大奇也大奇無情說法不思議若將耳聽終難  
會眼處聞聲方得知

丁巳二年

行僧五臺山善住無染焚身苦行斷衆故書  
戊午三年

相宗法師鎮國清涼大師澄觀寂

觀歷九朝玄宗以至文宗爲七帝門師代宗以下皆師事之春秋一  
百有一僧臘八十有八身長九尺四寸垂手過膝  
目光夜發晝視不瞬才供二筆聲韻如鏡三月六  
日將寂謂其徒曰吾聞偶還無功先聖悼歎復質  
無行古人恥之無昭穆動靜無綸緒往復勿穿鑿  
異端勿順非辨僞勿迷陷邪心勿固牢鬪諍大明  
不能破長夜之昏慈母不能保身後之子當取信  
於佛無取信於人眞理玄微非言說所顯要以深  
心體解朗然見前對境無心逢緣不動則不孤我

矣言訖而逝帝以聖祖崇仰輟朝三日臣民編素奉全身塔於終南山賜塔號曰妙覺相國裴休奉勅撰碑

已未四年

禪師良价過水觀影悟旨

价問雲巖祖曰某有餘習未盡祖曰汝曾作甚麼來曰聖諦亦不爲祖曰還歡喜也無曰歡喜則不無如糞掃堆頭拾得一顆明珠又問擬欲相見時如何祖曰問取通事舍人曰見問次祖曰向汝道甚麼又問百年後忽有人問還遯得師真否如何抵對祖良久曰祇這是价沉吟祖曰价闍黎承當個事大須審細价猶遲疑因過水觀影大悟前旨有偈曰切忌從他覓迢迢與我疎我今獨自往處處得逢渠渠今正是我我今不是渠應須恁麼會方得契如如

禪師馬祖支下明州大梅山法常寂

常襄陽鄭氏子幼通羣籍性度剛峻謁大寂問如何是佛寂曰卽心是佛常卽大悟遂之四明梅子

眞舊隱處結茅幽棲寂聞遣僧徵驗之曰大師近日佛法又別向道非心非佛常曰這老漢惑亂人未有了日任他非心非佛我只卽心卽佛寂曰梅了熟矣山旁有石庫相傳神仙貯藥之所每有靈氣光怪一夕夢神人語之曰君非凡夫石庫中有聖書受之者爲地下主不然亦爲帝王師嘗於夢中答曰昔僧稠不顧仙經其卷自亡吾以涅槃爲樂豈羨天仙耶居四十年衲徒六七百衆九月十九日示衆曰來莫可抑往莫可追從容聞鼙鼓聲乃曰卽此物非他物汝等諸人善自護持吾今逝矣言訖示滅茶毗收五色舍利建塔進士江積撰碑

庚申五年

武宗名炎在位六年

辛酉會昌元年

禪師大鑑支下第五世圭峯草堂寺定慧宗密寂

密果州西充何氏子元和二年謁遂州圓圓曰汝當大弘圓頓之教次謁荊南忠公洛陽照公皆以

大乘期之詣上都。以師資禮見。清涼觀觀曰。毗盧華藏能從我遊者。其唯汝乎。回住鄠縣草堂寺。未幾遷終南圭峯。太和中徵至都。天子而下悉歸慕。參叩。相國裴休獨稱入室。密以禪教相非。乃著禪源詮以通之。賜紫方袍。相國蕭悅尙書溫造咨受法。要開成中偽甘露事。宰臣爲中官屠戮王涯賈餗舒元輿李訓等。奔入終南山。訓求剪髮。尋趨鳳翔。時仇士良知之。捕密入左軍。面詰其罪。將加害。密怡然曰。識訓年深。豈遇厄而不濟。今日之事。死固甘心。中尉魚恒志奏釋之。朝士聞之。扼腕出涕。壽六十二。臘三十四。坐滅塔于圭峯。諡曰定慧禪師。塔號青蓮。

青原下第四世潭州雲巖無住祖示寂

冬十一月二十六日。祖喚主事僧令備齋。來日有上座發去。遂示寂。壽六十。茶毗得舍利一千餘粒。勅諡無住大師淨勝之塔。

寶鏡三昧曰。如是之法。佛祖密付。汝今得之。宜善保護。銀盤盛雪。明月藏鷺。類之弗齊。混則知處。意

不在言來機亦赴。動成窠臼。差落顛佇。背觸俱非。如大火聚。但形文彩。卽屬染汚。夜半正明。天曉不露。爲物作。則用拔諸苦。雖非有爲。不是無語。如臨寶鏡。形影相覩。汝不是渠。渠正是汝。如世嬰兒。五相完具。不去不來。不起不住。婆婆和。和有句無句。終不得。物語未正。故重離六爻。偏正回互。疊而爲三。變盡成五。如荳草味。如金剛杵。正中妙挾。敲唱雙舉。通宗通塗。挾帶挾路。錯然則吉。不可犯忤。天真而妙。不屬迷悟。因緣時節。寂然則昭著。細入無間。大絕方所。毫忽之差。不應律呂。今有頓漸緣立。宗趣宗趣分矣。卽是規矩通宗。趣極眞常。流注外叙。中搖繫駒伏鼠。先聖悲之。爲法檀度。隨其顛倒。以緇爲素。顛倒想滅。肯心自許。要合古轍。請觀前古。佛道垂成。十劫觀樹如虎之缺。如馬之鼻。以有下劣寶几珍御。以有驚異狸奴白牯。繫以巧力射中。百步箭鋒。相值巧力何預。木人方歌。石女起舞。非情識到。甯容思慮。臣奉於君子。順於父。不順非孝。不奉非輔。潛行密用。如愚若魯。但能相續。名主中。

主

禪師惟政入終南山避讐後二年武宗毀法

政平原周氏子得法於普寂爲北宗秀第三世結廬太乙太和中文宗嗜蛤蜊海民供遞甚勞一日御饌中有蟹不張者帝以其異焚香祝之乃開見菩薩形儀梵相具足遂奉貯以金粟檀合賜興善寺令僧衆瞻禮宣問羣臣斯何祥也相國李德裕奏曰臣聞終南山有惟政禪師大明佛法可召問之乃詔入宣問政曰物無虛應此乃啓陛下之心耳故經云應以此身得度者卽見此身而爲說法帝曰菩薩身已見未聞說法政曰陛下觀此爲常耶非常耶信耶不信耶帝曰希有之事朕深信焉政曰陛下已聞說法竟帝大悟詔天下寺院各立觀音像留政內道場累乞歸詔住聖壽寺武宗卽位政急入終南山或問其故曰吾避讐焉可已乎及後廢教其菩薩像忽失所在高僧傳作恒政

曹洞宗首建第一世祖

諱良价會稽俞氏子禮五洩默禪師出家受具

嵩山首參南泉次參潯山嗣法雲巖住洞山

嗣洞山法同建宗旨曹山祖

諱本寂泉州莆田黃氏子少業儒年十九出家於福州靈石二十五圓具尋謁洞山得旨嗣法造曹溪禮祖塔自螺川還止臨川以志慕六祖乃名山爲曹大闢洞山宗猷共設法藥道合君臣位彰偏正天下翕然宗之共稱曰曹洞宗

壬戌二年

青原下第五世曹洞宗第一世洞山祖嗣雲巖宗統

同法嗣曹山首建曹洞宗

書法書同建同臨齊

安隱忍曰單傳之道自大鑑已後裂爲五宗言詮雖異未有不因事建立者據悟繇可考也洞山初見雲巖已悟無情說法之旨矣又於默然良久處沉吟不決非得其半而昧其全乎故雲巖曰如臨寶鏡形影相觀汝不是渠渠正是汝後過水觀影大徹述偈云云曹山亦有偈曰渠無我卽死我無渠卽餘渠如我卽佛我如渠卽驢父子祖孫立言

垂教何其似歟。石頭參同契多明暗回互之旨。雲巖實闡明之。而洞山父子大彰其道。師法淵源。其來尙矣。

或問祥符曰。世尙唐虞。不聞並稱帝。歷周開文武。何同紀王年。今滌仰曹洞歲月。後先旺化。彼此何以並紀宗統。同編歲年。祥符曰。法王宗統。不侔於世主之治統。治統無二王之經。雖同時間位。而大統必有專歸。宗統有大同之化。是以一世界佛說此法。不可說世界佛說亦然。主伴圓融。遠近互合。無邊剎境。自他不隔於毫端。十世古今。始終不離於當念。初非僞侗之言。抑豈瞞盱之說。一念普觀。無量劫。無去無來。亦無住。非惟理事無礙。實乃事事無礙。入斯法界。乃可明宗。會此宗趣。方堪垂統道。並行而不悖。何彼此之殊。法交互以相彰。甯後先之別。滌仰曹洞。並紀同編。正如放勳重華。合稱唐虞之盛。文謨武烈。丕肇成周之隆。紀歲年而不局。歲年在世史亦有之矣。孟子不云乎。先聖後聖其揆一也。智者大師悟法華三昧。見靈山一會。

儼然未散。豈欺我哉。

禪師馬祖支下杭州鹽官海昌院悟空齊安寂。

安唐系之英。深避世榮。終秘氏族。母夢日兆祥而誕。有神光下燭。數歲異僧。欸門見而摩頂曰。鳳穴振儀。龍宮藏寶。紹終之業。其在斯乎。及少。垂請出家。父母訶止之。安曰。祿利之養。止於親耳。冥報之利。不其遠耶。珪組之榮。止於家耳。濟拔之益。不其廣耶。二親感其言。聽依本郡雲琮禪師。剃染詣南嶽智嚴律師。乞戒。聞大寂祖開法江西。振錫造焉。寂委蛻安。肅禮心喪。時春秋已逾七十。遊越之蕭山法樂寺。見古屋頽垣。荒寒可掬。乃宴坐烟蘿。未久之間。海昌有法听者。肇葺禪居。請安主法。四方參衆翕然。暨至安。不言寒暑。不下堂廡。無流盼。無傾聽。而挺身魁岸。相好莊嚴。眉毫紺垂。顴犀圓聳。望之者如仰嵩華。而揖滄溟。曾無測其高深也。時宣宗爲武宗所忌。隱曜繙林。周遊叢席。將至海昌。安懸知之。接待有異。乃語之曰。時節至矣。無滯泥蟠囑。以佛法而津之行。後武宗崩。左神策軍中尉。

諷宰臣百官迎而立之。聞安已寂。愴悼久之。勅諡

悟空大師。御製詩篇追悼焉。

癸亥三年。毀像法。築望仙觀於禁中。發明書毀

於上築望仙觀於下見為方士所惑也明矣

時有方士趙歸真。授帝以延年之術。寵遇無比。每

一對揚排毀釋氏。與羅浮道士鄧元起。南嶽劉玄

靖等同謗佛法。欲盡芟除。乃下詔廢天下釋教。

法寶大師玄暢抗表論諫弗聽。

暢纂輯古今經史上表。牋論諫帝。為趙歸真蠱惑

已深不省。

祥符陰日。宇文邕滅佛法。隋開皇辛亥歲。太府丞

趙文昌入冥。見邕受極罪。寄語文帝拔救。周世宗

澄汰勅立僧帳。大漸之時。見招惡報。亦有入冥。見

其與贊成澄汰者同受刑獄。此皆記載。聞見彰彰。

不誣。然則武宗不悔於後來。歸真能登於仙籍者。

未之有也。噫。以一時之愚惑。受無窮之劇報。凡諸

王臣其慎鑒哉。

甲子四年

乙丑五年

丙寅六年

宣宗名忱在位十三年

宣宗丁卯大中元年

詔復興佛法。禪師龜洋慧忠隱迹入山。

忠嗣草庵義義嗣曹山會昌初。詔天下廢釋氏教。

及宣宗即位。詔重興之。而忠笑曰。仙去者未必受

籙成佛者。未必須僧。遂過中不食。不字。而禪迹不

出山者三十年。以三偈自見曰。雪後始知松栢操。

雲收方見濟淮分。不因世主令還俗。那見雞羣與

鶴羣。多年塵土自騰騰。雖著伽黎未是僧。今日歸

來。酬本志不妨留髮候。然燈形容雖變道。常存混

俗心源亦不昏。試讀善財巡禮偈。當時豈例是沙

門。

禪師宣鑒開法德山全。麓來參。

武陵太守薛延望。再崇德山精舍。號古德禪院。請

鑒居之大闢。玄風上堂。若也於已無事。則勿妄求。

妄求而得。亦非得也。汝但無事於心。無心於事。則

虛而靈寂。而妙若毫端。許言本末者。皆為自欺。何

故。毫釐繫念。三塗業因。譬爾情生。萬劫羈鎖。聖名

凡號盡是虛聲。殊相劣形。皆爲幻色。汝欲求之。得無累乎。及其厭之。又成大患。終爲無益。竊泉州柯氏子。少落髮。稟戒習經律。諸部值沙汰。隱於鄂州湖邊。來參德山上法堂。瞻視山曰。作麼。竊便喝山曰。老僧過在甚麼處。曰。兩重公案。乃下。參堂山曰。這個阿師。稍似個行脚人。至來日上問訊。山曰。闍黎是昨日新到否。曰。是。曰。甚麼處學得這虛頭來。曰。全竊終不自護。曰。他後不得孤負老僧。禪師義存自洞山來。參德山有省。

存泉州南安曾氏子。久歷禪會。在洞山作飯頭。淘米次。洞問淘沙去米。淘米去沙。存曰。沙米一時去。洞曰。大衆喫甚麼。存遂覆却米盆。洞曰。據子因緣。合在德山。遂謁德山。問從上宗乘。學人還有分也。無山打一棒曰。道什麼。存曰。不會。至明日請益山曰。我宗無語句。實無一法與人。存有省。祥符蔭曰。古人一言半句。能洞見學者之精神。如洞山之於雪峯者。不一而足。師資之間。豈不在眼明心直哉。德山之道。以巖頭雪峯而大峯一傳而

令校錄

得雲門三傳而得法眼。兩宗發源於雪峰。而皆潛自洞山。阡陌無分水乳一色。古人何嘗有彼此之見乎。

戊辰二年

第十世洪州黃檗斷際祖示寂塔曰。廣業。

祖晦跡洪州開元刺史裴休延入府署。執弟子禮。及鎮宛陵。建利延祖。亦以黃檗名之。休一日托一尊佛於祖前。跪曰。請師安名。祖召曰。裴休休應諾。祖曰。與汝安名。竟休。禮謝休。一日以所解一編呈祖。祖略不披閱。良久曰。會麼。裴曰。未測。祖曰。若便恁麼會去。猶校些子。若也形於紙墨。何有吾宗。休乃呈偈一章曰。自從大士傳心印。額有圓珠七尺身。掛錫十年棲蜀水。浮杯今日渡漳濱。一千龍象隨高步。萬里香花結勝因。擬欲事師爲弟子。不知將法付何人。祖答偈曰。心如大海無邊際。口吐紅蓮養病身。自有一雙無事手。不曾低揖等閑人。祖在鹽官殿上禮佛。次時宣宗爲沙彌問曰。不著佛求。不著法求。不著僧求。長老禮拜。當何所求。祖曰。

不著佛求不著法求不著僧求常禮如是事沙彌曰用禮何爲祖便掌沙彌曰太粗生祖曰這裏是甚麼所在說應說細隨後又掌

寂音洪題祖錄曰斷際之所養峻嚴廣大其語言斷斷如藥石深可以治晚世學者之病是知其言蓋所養也卷舒放肆驅逐邪妄開闢正信直明一心以歸合佛祖之言可謂深渺宕肆大哉洋洋乎光明之言也

歷年表曰自南嶽青原分嗣大鑑於開元二年至大中二年凡一百三十五年南嶽中更大慧大寂大智斷際四世大慧以無相三昧心地法眼直接上根六人共證法體而大寂獨得吾心三十年不曾少鹽醬江西宗旨從此建立般若多羅之識大寂躬實膺之振威一喝三日耳聾大機大用隱顯莫測如神劍光鏡四照望其鋒而影懾心伏矣清規定千古之法式譬之三代之始制禮作樂而教化備焉斷際三頓棒下開悟臨濟無多子佛法一時分付坐斷天下人舌頭愈密愈嚴愈廣愈大精

微變化傑立弘施於是乎不可端倪矣青原中更青原石頭藥山雲巖四世青原垂一足以示石頭石頭著參同契全提明暗回互之旨藥山一物不爲石上栽花有一句子百味具足待特牛生兒時向汝道雲巖以寶鏡三昧示洞山洞山得曹山深明的旨共唱嘉猷洞上玄風播於天下參同契及寶鏡三昧歷歷數百言亦如虞廷允執厥中而授禹則增爲一十六字也潯山從百丈撥火得悟建立門風得仰山父子投機交互增輝垂範設教總之從曹溪一相三昧一行三昧中流出因時錯綜設化隨機於以護持涅槃妙心闡明正法眼藏悟處端的體道精深所以縱橫合妙絕毫絕釐如山如嶽也

宗統編年卷之十四

震澤祥符寺沙門釋 紀蔭 編纂

參學門人 乘品乘密 等 全校錄

常州天甯寺沙門釋 清如 重校

五宗紀

宗具多義曰。始初受命也。曰本流源所自出也。曰繼傳統紹述也。曰法立法垂緒也。曰主大綱主要也。曰尊道德可尊也。曰衆衆所崇仰也。臨濟曹洞。潯仰雲門法眼五祖。各首建宗旨。故曰五宗。三峯藏曰。命將者必以兵符。悟心者必傳法印。符不契。卽爲姦僞。法不同。則爲外道。自威音以來。無一言一法。非五家宗旨之符印也。昔人證之。遂默契其微。而不分後人似之。故建立其宗。以防僞法。法自明心。心相印。豈若室中密授之死法耶。嘗試原之一。○中蚤具五宗旨矣。五宗各出一面。然有正宗第一。先出臨濟宗旨。此相拋出。直下斷人命根於一。○中賓主觀。輒直入首羅眼中。所謂沿流不止。問如何。眞照無邊。說自他離相。離名人不

稟吹毛用了。急須磨是也。次則雲門三句一字關也。潯仰圓相本於此也。法眼談教義於六相之外。曹洞分回互於黑白之交。只一○中五宗具矣。安隱忍曰。五宗各出一面。謂各出○相之一面。以接人也。如洞宗以五位回互。或因偏以顯正。或卽正以攝偏。或兼至而背向俱非。或兼却而通身尊貴。皆卽一面而通諸面者也。至臨濟宗。則直下全拋出矣。故以臨濟爲正宗。非簡偏也。猶曰五宗之長也。昔吉祥元實禪師。觀星月燦然有省。而未悟宗旨。曉趨天衣。方丈天衣聰問曰。五位君臣如何。話會實曰。我這裏一位也。無衣令參堂。而謂侍者曰。這漢有個見處。奈不識宗旨。何入室。次衣令行者五人分序而立。實至。俱召實上座。實於是密契宗旨。述偈曰。一位纔彰。五位分君臣。合處紫雲屯。夜明簾卷無私照。金殿重重隱至尊。知此者可與言圓相之開合矣。知相之開合。可與論五宗之同異矣。或問祥符曰。五宗何以立也。祥符曰。以悟處不同。

人根復異垂慈立法各主其要以定綱宗如世之三代文質因革損益互有不同而要之使人歸於中道也大道之原一尚不立何有於五一心之極道尚難名何有於宗然會一心而歸大道其本末偏全之候始終小大之間非一一洞明不能毫釐無間五祖各以其所悟之全體立宗垂統以詔天下後世天下後世非透徹其所立之宗大法不明大道未達猶殊方異俗未可與言王化之全者也故曰五宗建立只完得個拈花公案異流同源殊途一致非如世之分疆立界各自稱尊後之區別門庭者或亦未之思夫

首建臨濟宗東土單傳第十一世祖

諱義玄曹州南華邢氏子幼而穎異長以孝聞精究毗尼博讀經論參黃檗嗣法住鎮州臨濟

宣宗己巳大中三年 正月五色雲中佛見金身

首建臨濟宗第十一世祖嗣宗統九年

書法諸宗書嗣某宗統者表宗系不系也臨濟書嗣宗統者表單傳正脉也

發明禮別子為祖繼別子為宗百世不遷者別子之後也達摩之傳以南岳青原為別子臨濟

成字更勤

曹洞等則南岳青原後之別子也五宗既定當各宗其始別之祖以承宗統焉而臨濟遠邇達摩者明單傳之統有在也

祖開法鎮州臨濟上座普化克符佐之 發明佛祖出世

各有佐揚濟祖開宗二上座成觀之功不可泯故大書之

學侶雲集祖一日謂普化克符二上座曰我欲於此建立黃檗宗旨汝且成觀我二人珍重下去三日後普化却上來問和尚三日前說甚麼祖便打三日後克符上來問和尚前日打普化作甚麼祖亦打

三峯藏曰原來臨濟不曾自立宗旨亦不但是黃檗宗旨逆而推之迦葉釋迦七佛威音一派威旨幸從這裏建立不被斷貫索禪壞却只今還有抹得煞者麼個個縛來好與三十棒責圖天下太平復頌曰三日前三日後普化克符俱漏逗如今臨濟到三峰與他一鏃三關透

祥符蔭曰濟祖不合平地上自栽荆棘引得天下人捏目生花即今還有似清風度荆棘林者麼亦好縛來與他三十棒何故從前汗馬何須問且只

## 重論蓋代功

## 祖示人境縱奪克符上座領旨

祖至晚小參曰。有時奪人不奪境。有時奪境不奪人。有時人境俱奪。有時人境俱不奪。克符問。如何是奪人不奪境。祖曰。煦日發生。鋪地錦。嬰兒垂髮。白如絲。符曰。如何是奪境不奪人。祖曰。王令已行。天下遍。將軍塞外絕烟塵。符曰。如何是人境俱奪。祖曰。并汾絕信。獨處一方。符曰。如何是人境俱不奪。祖曰。玉登寶殿。野老謳歌。符於言下領旨。

克符頌曰。奪人不奪境。緣自帶誑。詭擬欲求玄旨。思量反責。塵網珠光。璨爛丹桂。影婆娑。觀面無差互。還應滯網。羅奪境不奪人。尋言何處。真問禪。禪是妄。究理理非親。日照寒光。澹山搖翠。色新直。饒玄會得也。是眼中塵。人境兩俱奪。從來正令行。不論佛與祖。那說聖凡情。擬犯吹毛劍。還如值木盲。進前求妙會。特地斬精靈。人境俱不奪。思量意不偏。主賓言不異。問答理俱全。踏破澄潭月。穿開碧落天。不能明妙用。淪溺在無緣。

## 祖示三玄要

僧問。如何是真佛真法真道。乞師開示。祖曰。佛者心清淨。是法者心光明。是道者處處無礙淨光。是三即一。皆是空名而無實。有如真正作道人。念念

心不間斷。自達摩大師從西土來。祇是覓個不受人惑的人。後遇二祖一言便了。始知從前虛用工。夫山僧今日見處。與佛祖不別。若第一句中薦得。堪與佛祖爲師。若第二句中薦得。堪與人天爲師。若第三句中薦得。自救不了。僧便問。如何是第一句。祖曰。三要印開。朱點窄。未容擬議。主賓分。曰。如何是第二句。祖曰。妙解豈容無著。問。溫和爭負。截流機。曰。如何是第三句。祖曰。但看棚頭弄傀儡。抽牽全藉裏頭人。乃曰。大凡演唱宗乘一句中須具三玄門。一玄中須具三要有權有實有照有用。汝等諸人作麼生會。

神鼎譚舉曰。若人問神鼎。如何是第一句。曰。蒼天蒼天。如何第二句。曰。有甚麼驢漢。如何是第三句。曰。近前來。向你道。纔近前。便打。若恁麼會得也。不孤負祖師西來。若是從頭一一問過。幾時得休。佛法不是磨殺合縫的道理。似這一脉說話。須是久在他門風來。始得。直是嫌佛不作。嫌法不說。方可如是仔細珍重。

天童悟曰。今日陞座。有乞老僧說第一句者。老僧不覺失笑。殊不知第一句乃古人之方便耳。若執第一句爲實。則達摩單傳之旨。撲地了也。又不知未作意時。分明覲體見前。纔擬心來。乞說時。脚跟下已蹉過了。直饒怎麼見得。領略得。已是言中取則。句裏承當。落在第二句了也。所謂承言者。喪滯句者。迷且作麼生。是不承言不滯句者。還委悉麼。不知誰是個中人。獨是出頭天外學。

三峰藏曰。句中只具一立。一要權實照用。與汝分了也。且道臨濟爲何說三。這裏明得。方不孤負先宗。切莫亂統。若道是一。又是瞎漢。

南嶽儲曰。一句中具三立。三立則一句破矣。一立中具三要。三要立則一立破矣。故曰以立銷立。以要銷要。又曰退翁嘗說建立。卽是掃蕩。掃蕩却成建立。非無謂也。臨濟初謂黃檗佛法無多子。後來建立黃檗宗旨于一心。上唱明三眞。首出三句。以定綱宗。實有所本也。世尊於靈山會上拈起一枝。花迦葉便破頭微笑。豈非無多子之佛法。世尊

不合與賊過梯。無端道我有正法眼藏。涅槃妙心。實相無相微妙法門。付囑摩訶迦葉。故臨濟以無多子之法。演成三句。正見佛佛祖祖同一鼻孔。而今十個五雙。誰不道臨濟建立。曾有一人具眼看破此老。是掃蕩前來。板定個三句。首尾次第。毫不可移。換審如是。成什麼禪宗。一句中具三立。一立中具三要。堪與佛祖爲師無疑矣。如何又說得他祇堪與人天爲師。人天爲師亦無礙。如何又好喚他自救不了。則三句之次第。顯然掃蕩盡情。三句爲之掃蕩。而三立立矣。豈非建立之掃蕩乎。他當日劈口吐出個黃檗佛法無多子。則他在學地時。蚤已建立了也。後來開演三眞。建立三句。正掃蕩前面無多子的佛法。豈非掃蕩時卽是建立。安隱忍曰。臨濟最初三寸甚密。及乎學了。又道個有權有實。有照有用。大似把火行山。汾陽雖解別轉旂鎗。未免使人向難分處作證據。三峯老子一串穿却。猶是看樓打樓。箇點將來。總欠悟在。安隱不惜眉毛爲你下個註脚。乃拈起拂子曰。會麼。若

向玄中薦得泥牛帶月眠霄漢正在半途若從要裏翻身石女拋梭足錦文全亡功照然雖如是醍醐毒藥一道而行

寶雲潛曰天下之言臨濟者非臨濟之意臨濟之意在法其無法故馬祖曰無門爲法門而世之刻畫臨濟者皆竭力於有法故非臨濟之意也臨濟之意在法之不測而世之刻畫臨濟者唯恐測之不盡而言之不定故非臨濟之意也臨濟之意在古今法有因革損益變化無方如鬼神不可端倪而世之刻畫臨濟者唯恐古異於今今異於後故非臨濟之意也臨濟之意在說一句法而世之刻畫臨濟者曲爲破碎說自說他無所不至而都不知一句之旨故非臨濟之意也臨濟之意單提第一句故其言曰一句語須具三玄門一玄門須具三要猶孔子之傳易而言大明終始六位時成時乘六龍以御天知時之乘六龍則知一句之具三要而世之刻畫臨濟者穿鑿三句惟恐鑿之不公而不知臨濟單用第一句故非臨濟之意也臨濟

之意如洛書之圖用逆也而世之刻畫臨濟者知順不知逆故非臨濟之意也臨濟之意在無心可以說法而世之刻畫臨濟者大略主於有心而后說法故非臨濟之意也臨濟之意言立而言自變有隨時而變者矣有隨地而變者矣有隨人而變者矣而世之刻畫臨濟者入其玄中而查不知其爲變故不知臨濟之意也如古塔主者又何足責也

寶華震曰一棒一喝一句下悟去目前無一法可當情者正是最初一步耳若乃認定便是實法繫縛人矣故三峯師翁嘗言之直須入三玄以銷盡出三要以了盡當知玄非玄妙之玄法乃無法之法

祥符蔭曰句有甚麼第一第二第三只在薦得時看下落三玄三玄又作麼生具全在演唱宗乘時具分曉謂之三者如字如摩醯眼分不得合不得自然而分自然而合亦如洞山五位究竟只得一位然一位立自然而有五位面目若不得五位

參合則位不圓。位不圓則墮偏墮。正落在聖凡故。日正中妙挾通回互。擬議鋒銳失却。威金剛透匣。誰能曉。唯有那吒第一機。

### 祖示四喝

示衆曰。有時一喝如金剛王劍。有時一喝如踞地師子。有時一喝如探竿影草。有時一喝不作一喝。用汝等作麼生。會衆擬議。祖便喝。

### 祖禁參徒學喝

祖應機多用喝。會下參徒亦學喝。祖曰。汝輩總學我喝。我今問汝。有一人從東堂出。一人從西堂出。兩人齊喝一聲。這裏分得賓主麼。汝且作麼生分。若分不得。已後不得學老僧喝。兩堂首座相見。同時下喝。僧問。祖還有賓主也無。祖曰。賓主歷然。乃召衆曰。要會臨濟賓主句。問取堂中二首座。

### 祖示四賓主

示衆。參學之人。大須子細。如賓主相見。便有言論往來。或應物見形。或全體作用。或把機權喜怒。或見半身。或乘師子。或乘象王。如有真正學人。便喝。

◆山巖出

先拈山一個膠盆子。善知識不辨是境。便上他境上作模作樣。便被學人又喝。前人不肯放下。此是膏肓之病。不堪醫治。喚作賓看主。或是善知識不拈出物。祇隨學人問處。即奪學人被奪。抵死不肯放。此是主看賓。或有學人應一個清淨境。出善知識。前知識辨得是境。把他拋向坑裏。學人言大好善。知識知識。即云咄哉。不識好惡。學人便禮拜。此喚作主看主。或有學人披枷帶鎖。出善知識。前知識更與安一重枷鎖。學人歡喜。彼此不辨。喚作賓看賓。大德山僧所舉。皆是辨魔揀異。知其邪正。

僧問克符禪師。如何是賓。符曰。倚門傍戶。猶如醉出。言吐氣。不漸惶。曰。如何是賓。主符曰。口念彌陀。雙拄杖。目瞽瞳人。不出頭。曰。如何是主。中賓符曰。高提祖印。當機用利物。應和語。帶悲。曰。如何是主。中主符曰。橫按鐵錐。全正令。太平實字。斬癡頑。曰。既是太平實字。爲甚麼却斬癡頑。符曰。不許夜行。剛把火直須當道與人看。

安隱忍曰。臨濟有四賓主。有賓主句。同中有別。而別中自同。不可混也。臨機勘辨之際。魔宮佛國。一時見前。譬如觀音大士。百千手眼。或慈或威。或定或慧。隨學家立地處。與之奪之。如珠之走監圓轉。

橫斜千態萬狀所言四者珠不出盤之候而已。昔善財童子徧參五十三人。善知識於知識所各得恒河沙等無量法。及見無厭足王之慘虐。勝熱婆羅門之熾然。婆須密女之淫艷。諸外道種之差別。未免望崖自屈。何故垢淨未忘。而三昧之量未銷也。故云。但可入佛。不能入魔。直至大樓閣中。從三昧起。忽然打失布袋。便將從前所得玄妙。盡底揚却。十方坐斷。一法不留。方契善財本來面目。然非五十三老。驅耕奪食。擒縱變化。不能至此耳。

### 祖示照用

示衆曰。我有時先照後用。有時先用後照。有時照用同時。有時照用不同。時先照後用。有人在先用後照。有法在照用同時。驅耕夫之牛。奪饑人之食。敲骨取髓。痛下針錐。照用不同。時有問有答。立賓立主。合水和泥。應機接物。若是過量人。向未舉已前。撩起便行。猶校些子。

汾陽昭曰。先照後用。且共汝商量。先用後照。汝也是個人。始得照用同時。汝作麼生。當抵照用不同。

◆校同較欺

時汝作麼生湊泊

瑯琊覺曰。先照後用。露師子之爪牙。先用後照。縱象王之威猛。照用同時。如龍得水。致雨騰雲。照用不同。時提獎嬰兒。拊憐赤子。此是古人建立法門。爲合如是不合如是。若合如是。紀信乘九龍之輦。不合如是。項羽失千里之驪。還有爲瑯琊出氣的麼。如無山僧。自道去也。卓拄杖。

安隱忍曰。先師三峯藏嘗云。待心死而伏誅。須切用前之照。先擒下而去縛。略挑後用之燈。實照用之真虎。譬如神醫刮骨療病。必見病而下刀。若確定一方。妄加針割。是重增一病矣。古德云。纔有所重。便成窠臼。夫學者之窠臼。不一而足。宗師之照用。臨時自古聖人。莫不皆爾。如夾山之接洛浦。大覺之接興化。所謂心死而伏誅。擒下而去縛者也。蓋二公之病。在有一概硬禪之主宰。所以纔問便喝。將謂禪道如是而已。賴二大老臨之以法鏡。使其無逃隱處。然後乞命於我。故一言而起其痼疾。所云略挑用後之燈。是也。

庚午大中四年

辛未五年

佛滅後一千八百年

存獎禪師圓具

壬申六年

行僧成都福威寺定蘭然臂

癸酉七年

詔天下祖塔未賜諡號者所在以聞太常考行頒賜

瀉山首建第一世大圓祖示寂

祖一日謂仰山曰寂子速道莫入陰界仰山曰慧

寂信亦不立祖曰子信了不立不信不立曰只是

慧寂更信阿誰祖曰若恁麼即是定性聲聞曰慧

寂佛亦不見上堂示衆曰老僧百年後向山下作

一頭水牯牛左脇書五字云瀉山僧某甲此時喚

作瀉山僧又是水牯牛喚作水牯牛又是瀉山僧

喚作什麼即得凡敷揚宗教四十餘年首建宗旨

三十五年壽八十三臘六十四春正月十九日示

寂勅諡大圓禪師塔曰清淨

仰山祖傳示九十七種圓相共一百零二相除去重出五相九十七個正

祥符蔭曰瀉仰父子機深開鑿人天眼目以垂範

百世故仰山所立宗旨即書於瀉山之後非曰交

互增輝也但欲學者於無名無相處更進一步耳

三位。信位

三位。人位

三位。無位

三位。無相

三位。同相

三位。異相

三類。有情類

三類。異類

三類。無情類

三界。佛界

三界。生界

三界。魔界

末前句。

日用句。

然燈前

三照。

正然燈

然燈後

日落處

舌

牛

圖

角

女

拜

又

交拳

第一句

第二句

方圓任器


頭角全彰





體用互收


名言不立



傍隱  
通顯  
這無  
醉私




新













































































◆當下懸脫時字

開爲百二十合爲九十七一十九種門施設

一垂示三昧門	二問答互換門
三性起無作門	四緣起無礙門
五明機普互門	六暗合賓主門
七三生不隔門	八卽約明眞門

更無遺失。後就源上堂祖出衆作此○相以手拓

呈却又手立源以兩手相交作拳示之祖進前三步作女人拜源點頭祖便禮拜後因僧參問和尚還識字否祖曰隨分僧以手畫此○相拓呈祖以衣袖拂之僧又作此○相拓呈祖以兩手作背拋勢僧以目視之祖低頭僧還祖一匝祖便打像遂出去又祖坐次有僧來作禮祖不顧其僧乃問師識字否祖曰隨分僧乃右旋一匝曰是甚麼字祖於地上書十字酬之僧又左旋一匝曰是甚麼字祖改十字作卍字僧畫此○相以兩手拓如修羅掌日月勢曰是甚麼字祖乃畫此○相對之僧乃作婁至德勢祖曰如是如是此是諸佛之所護念汝亦如是吾亦如是善自護持其僧禮謝騰空而去時有一道者見經五日後遂問祖祖曰汝還見否道者曰某甲見出門騰空而去祖曰此是西天羅漢故來探吾道道者曰某雖觀種種三昧不辨其理祖曰吾以義爲汝解釋此是八種三昧是覺海變爲義海體則同然此義合有因有果即時異時總別不離隱身三昧也觀此則知九十七種圓

相皆佛祖直示全提百千法門河沙妙用皆從此出而不與百千法門河沙妙用爲侶祖稱東土小釋迦其一十九門施設非妙得佛祖機宜何能顯密盡善如此後之一概頭禪觸處偏枯者須一一透過如陣清風過荆棘林了無掛礙日用方可見行此事人天眼目載五峯良五觀悟謂圓相總有六名曰圓相曰暗機曰義海曰字海曰言語曰默論有云畫此④相者乃縱意畫此⑤佛者奪意⑥此爲相肯○此爲許相見○此爲舉函索蓋答者當以此①相則函蓋相稱○此爲抱玉求鑑答者當於其中書某字答之②此爲鉤入索續答者當於△字側添△乃問者鉤入答者索續共成寶器相③此爲已成寶器相答者於中書土字答之此爲立印立旨相獨脫超前衆相不著也審如是是猶市賈私爲誌驗三尺牧豎語之故卽無不喻雖有聖智不問不可強解矣謂入聖位者所建法幢乃如是乎傀儡登場癡人說夢良可悲夫祥符陰曰華嚴經偈云如來得菩提實不繫於日

諸佛出世以大事了畢爲一期方便。祖師紹佛傳法化緣示見。亦不過空中電影不住長空。所以諸祖行蹟年月或闕而不詳。以法垂後世。雖千古不隔。目前如親承面稟也。又心燈光照焰布無涯。非如世間箕裘嗣續。乃稱紹述。爲仰雲門法眼三宗。迄今正眼昭然。流輝並耀。浩劫有窮。斯文未泯。豈謂其傳世未永。宗統遂湮乎。編年闕疑。正所以示信心燈綿亘古今。彼此不隔一線帝網。重重交光。涉入後起明宗者。百世不惑是在其人矣。

甲戌八年

乙亥九年

禪師存獎來參

侍中張重起戎壇於涿郡。請獎統領講筵。獎罷講參祖爲侍者。一日元安是爲洛浦來參。祖問甚處來。安曰。變城來。祖曰。有事相借問得麼。安曰。新戒不會。祖曰。打破大唐國。覓個不會底人也。無參堂去。獎隨後請問曰。適來新到是成禪。他不成。禪他祖曰。我誰管你成禪不成。禪獎曰。和尚祇解將死雀就

地彈不解將一轉語蓋覆却。祖曰。你又作麼生。獎曰。請和尚作新到。祖遂曰。新戒不會。獎曰。却是老僧罪過。祖曰。你語藏鋒。獎擬議。祖便打。至晚祖又曰。我今日問新到是將死雀。就地彈就窠子裏打。及至你出得語。又喝起了。向青雲裏打。獎曰。草賊大敗。祖又打。

丙子十年

丁丑十一年

戊寅十二年

禪師慧然住鎮州三聖院。存獎禪師爲第一座。

然初參仰山。後嗣祖開法三聖。獎佐之爲首座。常曰。我向南方行脚。一遭拄杖頭。不曾撥著一個會佛法底人。然聞之乃問曰。你具箇什麼眼。便恁麼道。獎便喝。然曰。須是你始得。

己卯十三年

存獎禪師至大覺爲院主

魏府大覺和尚名號嗣祖住魏府大覺。獎爲院主。

一日覺喚院主。我聞你道向南方行脚。一遭拄杖頭。不曾撥著一個會佛法底。你憑個什麼道理。與

麼道獎便喝。覺便打獎。又喝。覺又打獎。來日從法堂過。覺召院主我直下疑你。昨日這兩喝。獎又喝。覺又打獎。再喝。覺再打獎。曰某於三聖師兄處學得個賓主句。總被師兄折倒了也。願與某個安樂法門。覺曰這瞎漢來這裏納敗闕。脫下衲衣痛與一頓獎於言下。頌旨。

考定 獎在三聖首衆於大覺爲院主。詳考其時皆在咸通年前。蓋祖大。中初開法。鎮州臨濟。三聖大覺及獎等先後從之。參悟遠。咸通以後。祖因兵革欲離河北。而三聖大覺各俱領院。獎南方行脚。已同河北。其佐三聖大覺當在斯時。於大覺言下。薦得臨濟先師於黃檗處喫棒底道理者。乃後來錄此公案在濟祖已寂之後。追述其意而序之。非獎當時口道之語。燈錄諸書皆因記錄而誤承之者也。

禪師馬祖支下第二世普化振鐸而化

化嗣盤山積輔。弼臨濟將示滅。乃入市謂人曰。乞我一箇直裰。人或與披襖。或與布裘。皆不受。振鐸而去。祖令人送與一棺。化笑曰。臨濟饒舌。便受之。乃辭衆曰。普化明日去。東門死也。至明日。郡人相率送化出城。化厲聲曰。今日葬不合青鳥。乃曰。明日南門遷化。至明日出南門。人又隨之。化又曰。明日出西門。方吉。至日人出漸稀。出已還。返人意稍

怠。第四日自擎棺出北門外。振鐸入棺而逝。郡人奔走出城。揭棺視之。已不見。惟聞空中鐸聲漸遠。莫測其繇。

宗統編年卷之十四

宗統編年卷之十五

懿宗 名漵 在位十四年

懿宗庚辰咸通元年

祖應默太尉請

祖因丁兵革。欲離河北。太尉默君和於城中捨宅爲寺。亦以臨濟爲額。延祖。祖受其請居之。

從諗禪師住趙州觀音院

諗行脚時。參祖。方將洗脚。祖便問。如何是祖師西來意。諗曰。恰值老僧洗脚。祖近前作聽勢。諗曰。會。即便會。啗啄作麼。祖便歸。方丈住觀音院。示衆云。老僧行脚時。除二時齋粥。是雜用心。餘外更無別

用心處。又曰。老僧此間。即以本分事。接人。若隨伊根機。接自有三乘十二分教。若是不會。誰之過歟。又曰。老僧將一莖草。作丈六金身。用把丈六金身。作一莖草。用僧問。十二時中。如何用心。諗曰。汝被十二時辰。使老僧。使得十二時。僧問。如何是祖師西來意。諗曰。庭前栢樹子。曰。和尚莫將境示人。諗曰。我不將境示人。曰。如何是祖師西來意。諗曰。庭前栢樹子。問。新到。曾到此間麼。僧曰。曾到。曰。喫茶去。又問。僧曰。不曾到。諗曰。喫茶去。院主問曰。爲甚。曾到也。云。喫茶去。不曾到也。云。吹茶去。諗召院主。主應諾。諗曰。喫茶去。僧問。狗子還有佛性也無。諗曰。無。曰。上至諸佛。下至螻蟻。皆有佛性。狗子爲甚。却無。諗曰。爲伊有業識。在。又僧問。狗子還有佛性也無。諗曰。有。曰。既有爲甚。入這皮袋裏。諗曰。知而故犯。有官人問。和尚還入地獄否。諗曰。老僧未上入。曰。大善。知識爲甚。麼入地獄。諗曰。我若不入。阿誰教化。汝馬大夫問。和尚還修行也。無。諗曰。老僧若修行。卽禍事。曰。和尚若不修行。教甚麼人修。

行諗曰。大夫是修行底人。曰。某甲何名。修行諗曰。若不修行。爭得撲在人王位中。饒得來。赤凍紅地。無有解出期。大夫乃下淚拜謝。

洞山祖建立五位君臣等宗旨。嗣法曹山唱明之。

祖初住新豐。次盛化於洞山。示五位君臣頌曰。正中偏。三更初夜月。明前莫怪相逢不相識。隱隱猶懷舊日嫌。偏中正。失曉老婆逢古鏡。分明覲面別無真。休更迷頭猶認影。正中來。無中有路隔塵埃。但能不觸當今諱。也勝前朝斷舌才。兼中至。兩刃交鋒不須避。好手猶如火裏蓮。宛然自有冲天志。兼中到。不落有無誰敢和。人人盡欲出常流。折合還歸炭裏坐。

上堂。向時作麼生。奉時作麼生。功時作麼生。共功時作麼生。功功時作麼生。僧問。如何是向。祖曰。喫飯時作麼生。曰。如何是奉。祖曰。背時作麼生。曰。如何是功。祖曰。放下饅頭時作麼生。曰。如何是共功。祖曰。不得色。曰。如何是功。祖曰。不共。乃示頌曰。向聖主由來。法帝堯。御人以禮。曲龍腰。有時闕市。

頭邊過到處文明賀聖朝。淨洗濃粧爲阿誰。子規聲裏勸人歸。百花落盡啼無盡。更向亂峯深處啼。功枯木花開劫外春。倒騎玉象趨麒麟。而今高隱千峯外。月皎風清好日辰。共功衆生諸佛不相侵。山自高兮水自深。萬別千差明底事。鷓鴣啼處百花新。功頭角纔生已不堪。擬心求佛好羞慚。迢迢空劫無人識。肯向南詢五十三。

僧問曹山祖五位。君臣旨訣祖曰。正位卽空界。本來無物偏位卽色界。有萬象形。正中偏者。背理就事。偏中正者。捨事入理。兼帶者。冥應衆緣。不墮諸有。非染非淨。非正非偏。故曰虛玄大道。無著真宗。從上先德推此一位。最妙最玄。當詳審辨明。君爲正位。臣爲偏位。臣向君是偏中。正君視臣是正中。偏君臣道合是兼帶。語僧問。如何是君曹山祖曰。妙德尊寰宇。高明朗太虛。曰。如何是臣祖曰。靈機宏聖道。眞智利羣生。曰。如何是君視臣。祖曰。不墮諸異趣。凝情望聖容。曰。如何是君視臣。祖曰。妙容雖不動。光燭本無偏。曰。如何是君臣道合。祖曰。渾

然無內外和融。上下平祖又曰。似君臣偏正言者。不欲犯中。故臣稱君不敢斥言是也。此吾法宗要。乃示偈曰。學者先須識自宗。莫將眞際雜頑空。妙明體性知傷觸。力在逢緣不借中。出語值教燒不著。潛行須與古人同。無身有事超岐路。無事無身落始終。復作五相。○偈曰。白衣雖拜相。此事不爲奇。積代簪纓者。休言落魄時。正中偏○偈曰。子時當正位。明正在君臣。未離兜率界。烏雞雪上行。中偏○偈曰。臘裏寒氷結。楊花九月飛。泥牛吼水月。木馬逐風嘶。正中來○偈曰。王宮初降日。玉兔豈能離。未得無功旨。人天何太遲。兼中至○偈曰。渾然藏理事。朕兆卒難明。威音王未曉。彌勒豈惺惺。兼中到祥符蔭曰。洞山宗旨得曹山而顯。所以稱曹洞宗。近或依圖鑑圖今詳審參同契旨。改正明暗正偏。瞭然指掌。新豐父子敲唱分明矣。

祖示五位王子

一曰朝生。一曰末生。一曰誕生。一曰化生。一曰內

生

僧問石霜諸如何是朝生王子霜曰白衣爲上輔直指禁庭中如何是末生王子霜曰循途方覺貴漸進不知尊如何是誕生王子霜曰貴裔非常種天然位至尊如何是化生王子霜曰政威無比況神用莫能僞如何是內生王子霜曰重幃休勝負金殿臥清風

祥符陰曰洞山功建立功勳王子蓋真嚴臣奉子順之旨功勳明奉君王子表順父也有內紹外紹之分金提半提之別與五位功勳互相表裏人根利鈍法有頓漸當時石霜可謂墮旆叶奏有謂其建自石霜者譌也有以朝生配正中偏末生配偏中正誕生配正中來化生配兼中至內生配兼中到者有以誕生列第一位朝生列第二位末生列第三位內生列第四位化生列第五位者有以內生爲第一位當正中來化生爲第二位當正中偏末生爲第三位當兼中至朝生爲第四位當偏中正誕生爲第五位當兼中到者有以誕生統攝四

位謂誕大也生也朝生誕於朝而生末生誕於末而生化生誕於化而生內生誕於內而生亦猶正中來之正偏兼帶始終圓貫而謂誕生猶有待者卽待朝末等而生而誕之所以爲誕實不生故曰欲識誕生王子父鶴冲霄漢脫銀籠者順逆縱橫一一合妙如安公破句讀楞嚴不妨見道神而明之方契立法之旨若執一定以方破圓則是癡人說夢矣寶鏡三昧重離六爻疊三變五之言紛紛不一可類推也

### 祖示三種滲漏

祖因曹山辭付以寶鏡三昧已復曰末法時代人多乾慧若要辨驗眞僞有三種滲漏一曰見滲漏機不離位墮在毒海二曰情滲漏滯在向背見處偏枯三曰語滲漏究妙失宗機昧終始濁智流轉於此三種子宜知之

寂音洪曰大般若經曰應觀欲界色界無色界空善見是善薩作此觀時不令心亂若心不亂則不見法若不見法則不作證又曰若金翅鳥飛騰虛

空自在翱翔久不墮落。雖依於空戲而不據空。亦不爲空之所拘礙。昔洞山大師立五位。偏正以標準大法。約三種滲漏。以辨褻子。非意斷苟爲。皆本佛之遺意。今叢林間滲漏之語。往往鼻笑。雖洞山復出。安能爲哉。

祖示綱要

一敲唱俱行。偈曰。金針雙鎖。備叶路隱。全該寶印。當風妙重重。錦縫開二金鎖。玄路偈曰。交互明中。暗功齊轉。覺難力窮。忘進金鎖。網鞵鞵三不墮。凡聖亦名理事不涉。偈曰。事理俱不涉。回照絕幽微。背風無巧拙。電火爍難追。

曹山祖示三墮

示衆曰。凡情聖見。是金鎖玄路。直須回互。夫取正食者。須具三種墮。一者披毛戴角。二者不斷聲色。三者不受食。時有稠布褻問。披毛戴角。是甚麼墮。祖曰。是類墮。曰。不斷聲色。是甚麼墮。祖曰。是隨墮。曰。不受食。是甚麼墮。祖曰。是尊貴墮。乃曰。食者。卽是本分事。知有不取。故曰尊貴墮。若執初心。知有

自己及聖位。故曰類墮。若初心。知有己事。同光之時。擯却色聲香味觸法。得甯謐。卽成功動。後却不執六塵等事。隨分而昧任之。則礙。所以外道六師。是汝之師。彼師所墮。汝亦隨墮。乃可取食。食者。卽是正命食也。亦是就六根門頭。見聞覺知。祇是不被他染污。將爲墮。且不是同向前。均他本分事。尙不取。豈況其餘事耶。

祖示四禁

示偈曰。莫行心處路。不掛本來衣。何須正恁麼。切忌未生時。

安隱忍曰。洞上宗道。合君臣位分。貴賤由正偏。而及兼帶。自奉向以至功。功如指與拳。舉一該五。混則知處類之弗齊。妙無以加矣。但辭多典雅。理亦春融。若鏡之照花。雖情理俱絕。而娟娟可愛。是故蓄情之士。對之情生。抱理之夫。觀之理著。此情滲漏之所以設也。夫情之所結。因見不忘情。見相私語成窠。曰。片瑕千累。衆病一源。故曹山立三墮。以明尊貴。設四禁。以辟邪途。捐不賞之功。絕未然之

福渠無國土。何處逢渠。我本無瘡。勿傷之也。後世不曰洞曹。而曰曹洞。其在此乎。

辛巳二年

壬午三年

定上座參祖

定參問。如何是佛法大意。祖下禪牀。擒住。定擬議。祖與一掌。定佇思。旁僧曰。定上座何不禮拜。定方作禮。忽大悟。後南遊。路逢巖頭雪峯。欽山舉。祖赤肉團上。無位真人。面門出入。話巖頭不覺吐舌。雪峯曰。臨濟大似白拈賊。欽山曰。何不道赤肉團上。非無位真人。定擒住曰。無位真人。與非無位真人。相去多少。速道。速道。欽山被擒。罔措。巖頭雪峯曰。這新戒不識好惡。觸忤上座。且望慈悲。定曰。若不是這兩個老漢。壓殺這尿牀鬼子。

存獎禪師住大名府興化

禪師百丈支下杭州大慈寰中寂

中蒲坂盧氏子。頂骨圓聳。其聲如鐘。出家於并州童子寺。受心印於百丈。結茅於南嶽。一日南泉至。

問。如何是庵中主。中曰。蒼天蒼天。泉曰。蒼天且置。如何是庵中主。中曰。會即便會。莫切切。泉拂袖而出。趙州問。般若以何爲體。中曰。般若以何爲體。趙州大笑而出。中明日見趙州。掃地問。般若以何爲體。趙州置筯。拈掌大笑。中便歸。方丈住大慈示衆曰。山僧不解答話。只能識病。又曰。說得一丈不如行取一尺。說得一尺不如行取一寸。問道者。衆山素缺。水中擬飛。錫夜夢神人告之曰。勿它之。詰朝見二虎以爪跑地。泉自湧出。味甘如飴。有僧自岳至。乃曰。童子泉涸矣。移來在此。

祖至河府王常侍迎以師禮

祖拂衣南邁。至河府。府主王常侍與諸官請祖陞座。山僧今日事不獲已。曲順人情。方登此座。若約祖宗門下。稱揚大事。直是開口不得。無你措足處。山僧此日以常侍堅請。那隱綱宗。還有作家戰將。直下展陣開旗。麼對衆證據。看僧問。如何是佛法大意。祖便喝。僧禮拜。祖曰。這個師僧。却堪持論。癸未四年。

詔法師知玄爲悟達國師總教門事

甲申五年

全齋禪師住鄂州巖頭

齋住巖頭示衆但明取綱宗本無實法不見道無實無虛若向事上觀即疾若向意根下尋卒摸索不著又曰此是向上人活計只露目前些子如同電拂如擊石火截斷兩頭靈然自在若道向上有法有事真婉鳴聲塗糊汝繫單汝古人喚作繫驢橛若將實法與人士亦消不得又曰欲得易會但知於聲色前不被萬境惑亂自然露保保地自然無事送向聲色前蕩蕩地恰似一團火燄相似觸著便燒更有甚麼事不見道非是塵不侵自是我無心又曰若是有筋骨底不用多諸處行脚也須帶眼始得莫被人謾不見道依法生解猶落魔界夫唱教須一一從自己胸襟中吐得出來與人爲榜樣又曰是句亦刻非句亦刻自然轉轉地露保保地飽餉地不解却不解較不見道却物爲上逐物爲下又曰纔有所重便成窠臼古人喚作

貼體衣病最難治又曰無依無欲便是能仁古人道置毒藥安乳中乃至醍醐亦能殺人這箇不是汝習學得底莫錯認門頭戶口賺汝臘月三十日赤闕闕地無益

禪師曹洞支下第四世泉州龜洋慧忠寂

忠住龜洋遁世不出山一日謂衆曰衆生不能解脫者情累爾悟道易明道難問如何得明道去忠曰但脫情見其道自明矣夫明之爲言信也如禁蛇人信其呪力藥力以蛇縮弄揣懷袖中無難未知呪藥等力者怖駭棄去但諦見自心情見便破今千疑萬慮不得用者是未見自心者也忽索香焚罷安坐而化

乙酉六年

大鑑下第五世鼎州德山見性大師宣鑒寂

鑒居德山門庭高峻十二月二日告衆曰捫空追響勞汝心神夢覺覺非竟有何事言訖安坐而化祥符蔭曰德山出雪峯存存出雲門偃爲雲門宗又存出玄沙備備出羅漢琛琛出清涼益爲法眼

宗是爲二宗之祖同時與臨濟並稱以棒唱提挈  
大綱訶佛罵祖真不忝大雄後勁云

丙戌七年

禪師義存開法雪峯

存阻雪鼇山於巖頭齋言下大徹嗣德山咸通中  
登閩之象骨山雪峯創立禪院學徒奔萃法席之  
盛卓冠天下四十餘年衆恒一千五百

禪師馬祖支下第三世徑山無上鑒宗寂

宗嗣鹽官安住徑山爲第二世法席之盛冠於江  
浙三月五日集衆說法端坐而化法嗣洪謹繼其  
席

祖北至大名府嗣法小師存獎趨侍迎居興化東堂  
先是祖因兵革拂衣南邁王常侍延以師禮時蒲  
相蔣公禮請祖將應之獎聞趨省至中條太尉中  
令何公專使迎祖獎翼行旋至府下止觀音寺江  
西禪院問道者簪裾繼踵道俗連肩未期年獎迎  
居東堂

丁亥八年

首建臨濟宗第一世慧照祖示寂

祖無疾四月十日示衆偈曰沿流不止問如何眞  
照無邊說似他離相離名人不稟吹毛用了急須  
磨復謂衆曰吾滅後不得滅却吾正法眼藏三聖  
然出曰爭敢滅却和尚正法眼藏祖曰已後有人  
問你向他道甚麼然便喝祖曰誰知吾正法眼藏  
向這瞎驢邊滅却言訖端坐而逝塔全身於府西  
北隅曰澄靈

住鎮州保壽嗣法小師延沼臨濟祖塔記曰師諱  
義立曹州南華人也俗姓邢氏幼而穎異長以孝  
聞及落髮受具居於講肆精究毗尼博顧經論俄  
而嘆曰此濟世之醫方也非教外別傳之旨卽更  
衣遊方首參黃檗次謁大愚其機緣語句載於行  
錄旣受黃檗印可尋抵河北鎮州城南隅潯沱  
河側小院住持其臨濟因地得名時普化先在彼  
徉狂混衆聖凡莫測師至卽佐之師正旺化普化  
全身脫去乃符仰山小釋迦之懸記也適丁兵革  
師棄去太尉默君和於城中捨宅爲寺亦以臨濟

爲額迎師居焉。後拂衣南邁。至河府。府主王常侍延以師禮。住未幾。卽來大名府興化寺。居於東堂。師無疾。忽一日。攝衣據座。與三聖問答畢。寂然而逝。時咸通八年丁亥孟陬月十日也。門人以師全身建塔於大名府西北隅。勅諡慧照禪師。塔號澄靈合掌稽首記師大略。

靈嚴儲臨濟祖塔重建碑曰。少林氏之言曰。行解相應。超然名之曰祖。六傳至盧氏子提挈一相一行三昧。大其門。應西天般若多羅之記。生南嶽讓。讓生潞潭一南嶽。以一物不中之解。證有修無染之行。潞潭氏超然於卽心卽佛。非心非佛。渾焉周匝。廓爾懸殊。創大機。大用接百丈海西來法式。至海廣。大悉備。以己所得。得見過於師之黃檗。運東土宗旨。大段三變。臨濟氏挺出。集十代之大成。出古今之獨斷。博也厚也高也明也。以言乎道。發靈山以來未發之妙。以言乎行。開東西歷世未開之門。廣大精微。詳嗣法保壽延。沼記中余小子弘儲。何能增益澄靈寶塔。建自唐咸通丁亥。歷四百餘

年。洪流衝裂。又三百年。三十三世孫超覺念我祖道滿天下。而無以副脚下子孫執筭瞻依之篤切。走告江南北諸孫。共襄塔事。塔成銘焉。弘儲銘曰。更七百年還舊觀。斯文不泯。終古傳。河流嶽立同永綿。

靈嚴儲臨濟祖塔源流序曰。源流之見。始於昭覺。昭覺臨濟十一世孫。手書臨濟正宗記。付佛曰。宗杲著見。載藉議者。謂昭覺特出手定。抑上有因承。西天諸祖說偈相傳。從一祖至二祖。至二十七祖。般若多羅告香至王子。菩提多羅曰。如來以正法眼付大迦葉。如是展轉。乃至於我。我今囑汝。聽吾偈曰。心地生諸種。因事復生理。果滿菩提圓。花開世界起。此西天源流之可據者也。達摩念東。震旦國。佛記後五百歲。般若智燈運光於彼。遂囑弟子不若密多羅。住天竺傳法。而躬至震旦。從震旦初祖至黃梅五祖。告盧能曰。諸佛出世爲一大事故。隨機大小而引導之。遂有十地三乘頓漸等旨。以爲教門。然以無上微妙秘密圓明眞實正法眼藏。

付於上首大迦葉尊者。展轉傳授二十八世。至達摩。居於此土。得可大師承襲。以至於今。以法寶及所傳袈裟。用付於汝。善自保護。無令斷絕。聽吾偈曰。有情來下種。因地果還生。無情既無種。無性亦無生。盧陂受訖。問法則既受。衣付何人。祖曰。昔達摩初至人未之信。故傳衣以明得法。今信心已熟。衣乃爭端止於汝身。不復傳也。此震旦源流之可據者也。臨濟承曹溪以來四世傳至禹門。爲臨濟二十九世。唐宋佛法盛時。家喻戶曉。源流不待問。迨其衰也。至有明嘉隆山水微茫。僅存一綫。禹門稟圓通法付四人。一曰天童圓悟。一曰報恩圓修。一曰雲門圓信。一曰淨明圓蓮。天童於天啓甲子。付淨慈法藏。丁卯。付大滙如學。次第付梁山海明。徑山通容。金粟通乘。寶華通忍。龍池通微。天童道忞。雪竇通雲。鷗林通門。善權通賢。天童通奇。報恩付竹林本豫。報恩通琇。南澗通問。石霜通際。雲門付海岸居士黃端伯弘儲。爲淨慈藏和尚子。茲因善權法孫斷指超覺。將興復臨濟祖塔。特上靈巖

請文記臨濟源流。弘儲不文。祇據本支宗派依次序述。付石河出崑崙導積石。不遡其源而循其流者。無以盡經天帶地之勢也。後世永鑑哉。三峯僧鑒青。臨濟祖師塔頌曰。靈山正法眼。付囑大龜氏。慶喜及商那。次第傳真訣。如是密相承。二十餘八葉。香至最小男。棄榮猶敝屣。親稟般若多。記名爲達摩。應識泛重溟。遠屆支那國。遊歷梁魏間。面壁棲嵩少。號曰婆羅門。訪求大乘器。直指佛卽心。講徒且驚擾。置毒不能傷。慈心三昧力。可師鸞鳳姿。根勝無倫匹。五嶽峭頭顱。千頃涵胸臆。妙辨類懸河。異花隨塵落。每一談論時。宿師盡辟易。終疑缺齒胡。別有安心要。變服毀形軀。立雪彌勤懇。一言了此心。三拜得其髓。啓迪甘露門。分燈照無盡。從茲五六傳。衣法雙流衍。信心久成熟。衣止遂不傳。大法遍塵沙。得道如林數。二桂久傳陰。一粒重啣粟。金雞聲轉高。馬駒足何闊。踏殺天下人。莫能行籌數。一子坐大雄。迎喝壘雙耳。苟非纘行僧。大機誰辨的。吾祖法中王。應用同垂跡。氏族及

鸞閣具如傳所述三學備研幾三業還純粹三年不飛鳴三度遭鞭策大法若雲披大用如雷迅大宗續大雄大志恢大業大樹蔭人天大龍霈雲雨熱惱頓清涼枯槁咸霑溉三句非縱橫三頁非並別三要絕雕鐫三玄善闢闔三世同一儀三乘同一航法說種種殊皆爲從上式字字解脫幢句句光明藏如世大慈航能渡諸漂溺如世大寶聚能濟諸貧窮如世大樓櫓能却諸冤敵如世大城塹能拒諸魔軍是故七百年燈燄彌增熾令行吳越區一人大威力誰云塔有壞壞者非其真離相與離名全密還全主然於不壞相而復示摧頽蔓草與寒烟遍覆黃金國如師所建立縱奪各隨時勿以人境乖而昧全體用譬如鏡中像妍醜各不同隨遇輒了然初非鏡分別譬如摩尼光青黃隨色轉色相本非珠珠亦不外是譬如春與花不可岐爲二花落知春歸春實無來往譬如石中火擊之乃成燄破石覓踪由畢竟無形段譬如清淨月散影諸江湖水月不相知印見宛然在譬如水結冰

日照還成水融結狀雖差濕性終無改斷公知此義堅固最初心哀金等聚沙復觀巍巍相千秋表眞仗萬世成具瞻却燒無能侵嵐風莫能撼是知取相者終不達無生棄相亦復然五十笑百步欲超權學見成毀二俱空空見併銷亡寶幢赫然湧無雜無動搖非常非斷滅斯爲無縫樣五眼莫能窺星月掛闌干烟霞生戶牖一切諸天人敬心常守護我今說是頌處處見祖師惟有逸格人乃能深諦信或於筆尖上散作翰墨香或於紙素中透出文字障或於清淨境解脫無纖塵或於差別緣顯見無窮義或於熱喝內威猛如象王或於痛棒頭翻擲同師子或主賓言論或照用施呈或全或抑揚或偏或喜怒何處非全身何物非生面苟能如是見今古常見前變化絕端倪眉目日相拄不離跬步間展禮眞儀訖堯封潛臨濟慧照祖塔重建碑後記曰往讀桐江釣叟姚桐壽樂郊私語載與括蒼劉氏遇於海鹽之橫山劉氏謂南龍一支從峨嵋並江而東竟不

知其結局。頃從通州泛海至此。乃知海鹽諸山。是南龍盡處。天目雖爲浙右鎮山。然勢猶未止。蜿蜒而來。右束。浙左帶。蒼霄直至長牆秦駐之間而止。於是。以平松諸山爲龍左抱。以長江淮泗之水。以慶紹諸山爲虎右繞。以浙江曹娥之水。諸水率皆朝拱於此。而後乘潮東出。前復以朝鮮日本爲案。此南龍一最大地也。非周孔其人不足以當之。然而無有乎爾。吾恐山川亦不忍自爲寂寂。若此也。按樂郊私語序。時則至正癸卯。又歷三百年。辛丑。老師補住金粟南潛。隨侍覽山川形勢之大致。微欄江釣叟之舊聞。我天童老和尚拔九地之雷於此。我三峯老和尚發天衢之輒於此。所謂非周孔其人不足當之者。隔三百年。驗如玉符而臨濟之道。至是炳然若赫日之中天矣。古記稱震旦國三大幹龍。皆始於崑崙北條。出河海以入於海。爲冀燕之分。中條出河南。自秦隴三輔入豐沛汾晉。派伊洛東而淮泗以入於海。爲雍豫青徐之分。南條出江南。自陝右分出西鄙。廻巴蜀踰荊衡入黔

中東而匡阜南極嶺海東北渡閩粵跨三吳自浙右以入於海。爲梁荆揚之分。夫冀州天地之一樞要也。儒者亦言冀州好風水。古帝王之所都。潯沱河在真定府城南。自雁門來。經靈壽等縣至直沽入於海。我臨濟祖之所縱轡而馳也。而大名爲禹貢冀兗二州之域。魏州興化則澄靈之塔在焉。故讀保壽沼所作臨濟慧照禪師塔記及英華所載公乘億魏州樊公塔碑而益歎山川形勢源流順逆之故。往往與道法相關。蓋山水之大機在逆。猶古兵法以正合以奇勝。其用以逆而千古禪宗綱領亦未有不以順爲體以逆爲用者也。故從曹溪發源天南北而爲南嶽一逆也。又北而爲臨濟一逆也。臨濟已上自順而逆。夫三吳又天地之一樞要也。臨濟南而爲揚岐雲蓋有會祖塔焉。又南而爲虎邱虎邱有隆祖塔焉。臨濟以下自逆而順。而及天童三峯。至於老師臨濟之道。大行吳越。使小釋迦沒而不食其言。順而逆逆而復順。冀州爲北樞吳越爲南樞而山川大勢與道法相終始者。

亦可以考而見矣

庵主道膺爲洞山室中領袖

膺先遊方至翠微問道會有僧自豫章來盛稱洞山法席遂造洞山祖問汝名甚麼曰道膺祖曰向上更道曰向上卽不名道膺後結庵三峯天人送供祖問子近日何不起齋曰每日自有天神送食祖曰我將謂汝是個人猶作這個見解在汝晚間來膺晚至祖召膺庵主膺應諾祖曰不思善不思惡是甚麼膺回庵寂然宴坐天神尋覓不見三日乃絕祖一日問作甚麼曰合誓祖曰用多少鹽曰旋入祖曰作何滋味曰得祖大問大闡提人作五逆罪孝養何在曰始成孝養自爾祖許爲室中領袖

大字疑衍

寂祖開法曹山

寂辭洞山遂造曹溪禮塔還止臨川有佳山水因定居焉以志慕六祖乃名山爲曹

宗統編年卷之十五

宗統編年卷之十六

臨濟第二世祖

諱存獎姓孔氏鄒魯闕里之裔孫也於蘄三河縣盤山甘泉院出家大中五年圓具九年棄講參臨濟嗣法住魏州興化

懿宗戊子咸通九年

臨濟第二世魏州興化祖嗣宗統二十一年

祖開堂興化

拈香曰此一炷香本爲三聖師兄三聖於我太孤本爲大覺師兄大覺於我太賒不如供養臨濟先師僧問四面八方來時如何祖曰打中間底僧便禮拜祖曰昨日赴個村齋中途遇一陣卒風暴雨却向古廟裏躲避得過

己丑十年

禪師慶諸復住石霜

諸廬陵新塗陳氏子初抵潯山爲米頭後參道吾智嗣其法初住潭州石霜後隱長沙瀏陽人莫識

者因僧舉洞山解制上堂秋初夏末兄弟東去西去直須向萬里無寸草處去語曰何不道出門便是草洞山祖聞之驚曰劉陽乃有古佛自是僧衆迎諸再住石霜

### 洞宗第一世瑞州洞山悟本祖示寂

祖示疾令沙彌傳語道膺乃囑曰他若問和尚安樂否但道雲巖路相次絕也汝下此語須遠立恐他打汝沙彌領旨去傳語聲未絕蚤被膺打一棒將圓寂祖謂衆曰吾有閑名在世誰人爲吾除得衆無對時有沙彌出曰請和尚法號祖曰吾閑名已謝僧問和尚遠和還有不病者也無祖曰有曰不病者還看和尚否祖曰老僧看他有分曰未審和尚如何看他祖曰老僧看他見有病祖乃問僧離此殼漏子向甚麼處與吾相見僧無對祖示偈曰學者恒沙無一悟過在尋他舌頭路欲得忘形泯蹤迹努力殷勤空裏步乃命剃髮澡身披衣聲鐘辭衆儼然坐化時大衆號慟移晷不止祖忽開目謂衆曰出家人心不附物是真修行勞生惜

死哀悲何益復令主事辦愚癡齋齋衆戀慕不已延七日食具方備祖亦隨衆齋畢乃曰僧家無事大率臨行之際勿須喧動遂歸丈室端坐長往塔曰慧覺

祥符陰日祖與濟祖同時王化建立宗旨廣大精微互盡美善迄今昌昌二桂奕奕榮靈山一花芳傳未艾源深流長其信然矣

### 禪師道全繼席洞山

全初參洞山問如何是出離之要祖曰閹黎足下烟生全當下契悟遂繼席一衆悅服

### 曹洞宗第二世祖

諱道膺幽州玉田王氏子童丕出家於范陽延壽寺二十五成大僧初參翠微尋謁洞山爲室中領袖嗣其法

庚寅十一年

### 曹洞宗第二世雲居祖嗣宗統三十

發明洞山寂然無恙也不書曹山者表雲居嗣統也然則雲居嗣統何不俟曹山寂後曰雲居曹山雁行也宗旨既定曹山能事畢矣馮仰父子也馮山寂而仰山在亦止不書于洞山寂後即以雲居嗣統者重傳持也

祖之囑曰毋令斷絕千古法既豈不貴得人哉

### 祖開法洪州雲居

祖登歐阜冠世絕境就樹縛屋而居號雲居禪子追求而集散處山間樹下久成苦架說法其下示衆佛法有什麼事行得即是但知心是佛莫愁佛不解語欲得如是事還須如是人若是如是人愁箇甚麼若云如是事卽難自古先德醇素任真元來無巧他根本脚下實有力卽是不思議人握土成金若無如是事饒汝說得簇花簇錦相似人總不信受又曰暫時不在如同死人豈況如今論年論月不在如人常在愁什麼家事不辦欲知久遠事祇在如今如今若得久遠亦得亦人千鄉萬里歸家行到卽是是卽一切總是不是卽一切總不是又曰升天底事須對衆掉却十成底事須對衆去却擲地作金聲不須回頭顧著自餘有什麼用處不見二祖當時博覽三藏如觀掌中因什麼更求達摩安心將知此門中事不是等閑所以道智人不向言中取得人豈向說中求又曰一切事須

◆今疑合

向這裏及盡始得無過若一毫去不盡卽被塵累豈況更多差之毫釐過犯山嶽古人道學處不立盡是流俗閨閣中物捨不得俱爲滲漏

辛卯十二年

壬辰十三年

文偃參尊宿睦州明得悟尊宿指今見雪峰

偃嘉興張氏子生知天縱落髮受具探窮律部以己事未明參尊宿明明纔見來便閉却門偃乃扣門明日誰曰某甲曰作甚麼曰己事未明乞師指示明開門一見便閉偃如是連三日扣門至第三日開門偃乃拶入明便擒住曰道道偃驚不暇答明便推出曰秦時轆轤鑽遂掩門損偃右足偃從此悟入明乃指見雪峰到莊見一僧問上座今日上山去那曰是曰寄一則因緣問堂頭和尚祇是不得道是別人語上座到山見和尚上堂衆纔集便出握腕立地曰這老漢頂上鐵枷何不脫却僧一依教峯見這僧與麼道便下座攔胸把住曰速道速道僧無對峰拓開曰不是汝語曰是某甲語

曰侍者將繩棒來曰是莊上一浙中上座教某甲  
來道曰大衆去莊上迎取五百人善知識來偃次  
日上山峯纔見便曰因甚得到與麼田地偃乃禮  
拜

癸巳十四年

僖宗名儼在位一十五年

僖宗甲午乾符元年

乙未二年

丙申三年

禪師師備開法玄沙

備聞縣謝氏子父以漁爲業因夜泛船墮水備鼓  
掉而救見水中月乃云先達有言一切諸法皆如  
水月若父存與其同業只益三途之苦今旣不可  
救莫若捨緣出家報父恩也於是斷髮受具芒屨  
布禱食纔接氣宴坐終日與雪峯存親厚存以其  
苦行呼爲頭陀臂携露出嶺擬欲遍參忽築破脚  
指血流痛楚歎曰是身非有痛從何來是身是苦  
畢竟無生休休遂不出嶺依存咨決心要一日存  
召曰備頭陀何不遍參去曰達摩不來東土二祖

不往西天存然之稱曰備頭陀再來人也後忽夢  
父來謝曰荷子出家我得生天存住雪峯備入室  
又閱楞嚴發明心地自是應機敏捷與修多羅冥  
契諸方立學有所未決必從之請益辭峰結屋梅  
溪後住玄沙衆相尋而至遂成叢林上堂曰佛道  
閑曠無有程塗無門解脫之門無意道人之意不  
在三際故不可升沉建立乖真非屬造化動則起  
生死之本靜則醉昏沉之鄉動靜雙泯卽落空亡  
動靜雙收顛預佛性必須對塵對境如枯木寒灰  
臨時應用不失其宜鏡照諸像不亂光輝鳥飛空  
中不雜空色所以十方無影像三界絕行蹤不墮  
往來機不住中間意鐘中無鼓響鼓中無鐘聲鐘  
鼓不相交句句無前後如壯士展臂不借他力師  
子遊行豈求伴侶九霄絕翳何用穿通一段光明  
未曾昏昧夫佛出世者元無出入蓋名相無體道  
本如如法爾天真不同修證祇要虛閑不昧作用  
不涉塵泥箇中若纖毫不盡卽爲魔王眷屬句前  
句後是學人難處所以道一句當機八萬法門永

前字更動

絕生死直饒得似秋潭月影靜夜鐘聲隨扣擊以無虧觸波瀾而不散猶是生死岸頭事道人行處如火銷冰終不却成冰箭既離弦無返回勢所以牢籠不肯住呼喚不同頭古聖不安排至今無處所若到這裏步步登立不屬邪正識不能識智不能知動便失宗覺即迷旨二乘膽戰十地魂驚語路處絕心行處滅直得釋迦拖室於摩竭淨名杜口於毗耶須菩提唱無說而顯道釋梵絕聽而雨花若與麼見前更疑何事沒棲泊處離去來今限約不得心思路絕不因莊嚴本來清淨動用語笑隨處明了更無欠少古德云情存聖量猶落法塵已見未忘還成滲漏不可道持齋持戒長坐不臥住意觀空凝神入定便當去也有甚麼交涉西天外道入得八萬劫定却數滿後不免輪迴蓋爲道眼不明生死根源不破夫出家兒即不然不可同他外道也如今甚麼處不是汝甚麼處不分明甚麼處不露見何不與麼會去如實未有發明切須在急時中忘餐失寢似救頭然如喪身命冥心自

劫疑却

救放捨閑緣歇却心識方有少許相親若不如是明朝後日盡被識情帶將去有甚麼自緣分又諸行無常是生滅法世間難信之法具大根器方能明達今生若徹萬劫亦然古德云直向今生須了劫誰能累劫受餘殃又曰立沙遊徑別時人切須知三冬陽氣盛六月降霜時有語非關舌無言切要詞會我最後句出世少人知

丁酉四年

禪師黃檗下尊宿睦州道明寂

明住睦州示衆汝等諸人還得箇入頭處也未若未得箇入頭處須覓箇入頭處若得箇入頭處已後不得孤負老僧時有僧出禮拜曰某甲終不敢孤負和尚曰蚤是孤負我了也尋常見神僧來即閉門或見講僧乃召曰座主主應諾明日擔板漢上堂裂開也在我捏聚也在我時有僧問如何是裂開曰三九二十七菩提涅槃真如解脫即心即佛我且與麼道你又作麼生曰某甲不與麼道曰蓋子撲落地碟子成七片曰如何是捏聚明乃斂

手而坐。一日陞座曰。首座。嚮曰。在寺主。嚮曰。在維那。嚮曰。在日三段不同。今當第一。向下文長。付在來日下座。又示衆大事未明。如喪考妣。大事既明。如喪考妣。一日召門人曰。此處緣息。吾當逝矣。乃跏趺而寂。火焚舍利。如雨。收靈骨建塔。壽九十八。臘七十六。

祥符陰曰。尊宿眼明心公。故其機用超妙。如拔九地之雷。如噓萬里之風。而鯢鵬之變化。神龍之奮迅。有不知其所以然。而然者。巍然兩宗。脫穎於指顧之下。而不以自私千載。而後尊之爲尊。宿與南泉趙州鼎立而三宜也。

戊戌五年

已亥大年

庚子廣明元年

十二月賊黃巢入長安。帝走興元。黃巢僭號自稱大齊皇帝。改元金統。

禪師南泉下衢州子湖利蹤寂

蹤嗣南泉。願住子湖。於門下立牌曰。子湖有一隻狗。上取人頭。中取人心。下取人足。擬議即喪身失命。示衆曰。諸法浩浩。何絀何拘。汝等於中。自生難易。心源一統。綿亘十方。上上根人。自然明白。歷歷

分明。無有不是。只少箇丈夫之志。致見如斯疲勞。欲得易會麼。自古及今。未有一個凡夫聖人出見。汝前亦無有一善語惡語。到汝分上。爲甚麼故。爲善善無形。爲惡惡無相。既已無我。把甚麼爲善。惡立那個是凡聖。汝信否。還保任否。有甚麼迴避處。恰似日中逃影。還逃得麼。子湖山下有陶家無子。夫婦日夕焚禱。蹤一日過而問曰。爾何所祈。陶告之。故蹤曰。汝施我竹。我施汝子。陶遂施竹。其夕感異夢。隨舉一男。衆因號神力禪師。

辛丑中和元年

正月帝幸成都

禪師船子下澧州夾山傳明善會寂

會廣州廖氏子。初住夾山上堂。有僧問。如何是法身。會曰。法身無相。曰。如何是法眼。會曰。法眼無瑕。時道吾智在座中。不覺失笑。會便下座。請問道吾。某適來對這僧話。必有不是。致令上座失笑。望不吝慈悲。吾曰。和尚一等是出世。未有師在會。曰。甚處不是。望爲說破。吾曰。某甲終不說。請和尚却往華亭船子處去。會曰。此人如何。吾曰。此人上無片

瓦下無卓錫。和尙若去須易服而往。會乃散衆束裝。直造華亭。船子纔見。便問大德住甚麼寺。會曰。寺卽不住。住卽不似船子。曰。不似個甚麼。會曰。不是目前法。船子曰。甚處學得。來會曰。非耳目之所到。船曰。一句合頭語。萬劫繫驢橛。船又問。垂絲千尺。意在深潭。離鈎三寸。子何不道。會擬開口。被船子一橈。打落水中。會纔上船。船子又曰。道道會擬開口。船子又打會。豁然大悟。乃點頭三下。船曰。竿頭絲線從君弄。不犯清波意。自殊會。遂問。拋綸擲釣。師意如何。船曰。絲懸綠水。浮定有無之意。會曰。語帶玄而無路。舌頭該而不談。船曰。釣盡江波。金鱗始遇會。乃掩耳。船子曰。如是如是。遂囑曰。汝向去直須藏身處。沒蹤跡。沒蹤跡處。莫藏身。吾三十年在藥山。祇用斯事。汝今已得。他後莫住城隍聚落。但向深山裏鑽頭。邊覓取一個半個接續。無令斷絕。會乃辭行。頻頻回顧。船子遂名闍黎。會乃回首。船子豎起橈子曰。汝將謂別有乃覆舟入水而逝。會自此幽遞至咸通庚寅。復開席夾山。道吾

復遣僧往問。如何是法身。仍答曰。法身無相。如何是法眼。仍答曰。法眼無瑕。僧歸舉似道吾。吾曰。這漢此回方徹。僧問。如何是夾山境界。會曰。猿抱子歸青嶂裏。鳥啣花落碧巖前。示衆曰。百草頭薦取老僧開市裏。識取天子十一月七日。召主事曰。吾與衆僧話道。累歲佛法深旨。各應自知。吾今幻質時盡。卽去。汝等善保護。如吾在日。勿得雷同。世人輒生惆悵。言訖奄然而逝。證傳明大師塔曰。永濟祥符蔭曰。悟後實須遇人。盡却師承。邊事方能大法。自在觀夾山之於船子。世之竹葉精靈。可以冷然。愧避矣。然不得道。吾發藥。則自墮於雲霧。而不知非此啓迪之功。不可緩也。當時夾山已開堂。蓄衆道。吾當衆笑之。不以爲嫌。乃虛心下問。一聞船子。卽散衆直造此一段風規。豈今之高頭強項者。能望其後塵乎。至船子囑曰。莫住城隍聚落。但向深山裏鑽頭。邊覓取一個半個接續。尤爲末法抱道者。頂門金針云。

普聞斷髮造石霜

聞僖宗第三子信宗幸蜀親王宗室皆逃亡聞斷髮逸遊人無知者造石霜謁慶諸諸與語歎異曰汝乘願力而來乃生帝王家脫身從我火中蓮也

壬寅二年

通玄禪師開法末山隆濟

玄初參德山時已臘高門風益峻獨奇玄然玄不大微辭謁洞山與語喜撫之曰掌有神珠白晝示人人且按劍況玄夜乎子可貴也曰但不識珠耳儻識亦無晝夜洞稱爲俊士洞入滅玄廬塔旁三年學者依從曰盛玄曰太平時世饑餐困臥復有何事吾本無事汝與麼來相尋是無事生事無事生事道人所忌何不各自歇去中和初寓塔北遊久之南還寓止豫章南平鍾王執弟子禮玄厭城居王爲買末山建精舍號隆濟以延之學者雲集

癸卯三年

五月李克用破黃巢收復長安

禪師百丈支下福州慶圓智大安寂

安繼席溪山豫章廉使崔公敦崇禮譽咸通十四年詔號延聖大師賜紫袈裟安室中每問僧有句

無句如藤依樹子意旨如何僧問黃巢軍來和尚向甚麼處迴避安曰五蘊山中僧曰忽被他捉著時如何安曰惱亂將軍春秋九十一十月二十二日奄然坐化於怡山丈室贈圓智大師塔號證真博陵司空相國及詩人周朴仰慕篤重著詩文禮頌焉

甲辰四年

乙巳光啓元年 丙午二年

丁未三年

禪師德山下鄂州巖頭全靈寂

靈德山嗣住巖頭光啓之後中原盜起衆皆避地靈端居自若一日賊大至靈知宿緣乃順化焉門人焚之獲舍利四十九粒起塔

祥符陰日巖頭初謁臨濟後參德山鰲山阻雪打脫雪峯漆桶托鉢堂前重過德山塗毒四藏鋒末後句天下人不奈伊何乃一棹烟波孤行於芳草渡頭迄今流風遺韻凜然與曲肱牀擁千百衆者同其高峭噫道豈在形迹間哉

祖付慧顯正法

願生緣河北參祖於興化祖付以法印

祖攢克賓維那

祖一日謂克賓維那曰汝不久爲唱導之師賓曰不入這保社祖曰會了不入不會了不入曰總不與麼祖便打曰克賓維那法戰不勝罰錢五貫設饋飯一堂次日祖自白椎曰克賓維那法戰不勝不得喫飯即便出院

戊申文德元年

禪師道吾下石霜慶諸寂

諸嗣道吾智不出霜華二十年學衆多有常坐不臥屹若株杙天下謂之枯木衆齊已貫休泰布衲等俱在座下皆以吟詠爲佛事而泰更力於禪秀才張拙嘗與泰等道話一日謂泰曰三師中何不選一人爲長老意少已休等以詩筆見長泰曰先輩何失言也堂頭和尚肉身菩薩會下一千五百人如我輩者七百餘人勝我輩者七百餘人拙愧服乃同上拜謁諸問先輩何姓曰姓張名拙曰覓巧了不可得拙自何來拙遂有省呈偈曰光明寂

照遍河沙凡聖含靈共我家一念不生全體見六根纔動被雲遮斷除煩惱重增病趣向真如亦是邪隨順世緣無罣礙涅槃生死是空華諸肯之二月日安坐而化壽八十二臘五十九

祥符陰曰道吾雲巖同出藥山之門敲唱雙行有似巖頭之於雪峯洞山五位王子石霜互闡明之酥酪醍醐皆出於乳而味則同中有異矣劉陽古佛推自洞山住山三十年一衆如枯木然貫休齊己輩不妨聯吟座下先師意旨首座與九峯各出一隻手此從上宗門中爪牙也

臨濟第二世魏州興化廣濟祖寂

堯封潛正訛記曰景德傳燈錄魏府興化存獎禪師爲後唐莊宗師莊宗一日謂師曰朕收大梁得一顆明珠未有人酬價師曰請陛下珠看帝以手舒開幘頭脚師曰君王之寶誰敢酬價碑文師化於文德元年七月十二日唐僖宗文德元年戊申去後唐莊宗同光元年癸未凡三十六年則非莊宗明矣今考其時舒幘頭脚者蓋晉王李克用而

誤爲其子莊宗存嗣也。按僖宗廣明元年庚子黃巢入長安。帝走興元。黃巢僭號中和二年壬寅。李克用將沙陀兵趣河中。三年癸卯五月。李克用破黃巢。收復長安。詔以李克用爲河東節度使。四年甲辰五月。黃巢趣汴州。李克用追擊大破之。秋七月。時溥獻黃巢首。八月。進李克用爲隴西郡王。傳燈錄所謂收大梁得一顆無價寶珠者也。其稱朕者。以莊宗而訛也。碑又言大德奉先師之遺命於龍紀元年八月二十二日。於本院焚我眞身。用觀法相。卽示寂。次年己酉。昭宗元年也。而五燈會元謂後唐莊宗車駕幸河北。回至魏府行宮。詔師問曰。朕收得中原。獲得一寶。及龍顏大悅。賜紫衣師號。皆不受等語。皆因莊宗而訛也。史之闕文。豈不信哉。傳燈錄師滅後。勅諡廣濟大師。塔曰通寂。而不見於塔碑得之塔碑之後也。傳燈錄師爲魏府大覺禪師院宰時。覺一日問曰。我常聞汝道向南行。一迴拄杖頭。未曾撥著一個會佛法底人。汝憑什麼道理。有此語。師乃喝覺打之。師又喝覺。又

打來。日師從法堂過。覺召曰。院主。我直下疑汝。昨日行底。喝與我說來。師曰。存獎平生。於三聖處學得底。盡被和尚折倒了也。頗與存獎個安樂法門。覺曰。這瞎驢。卸却衲帔。待痛決一頓。師卽言下領旨。雖同嗣臨濟。而常以覺爲助發之友。其事在臨濟示滅之先。不待辨而明。而五燈會元諸書訛而爲師於言下薦得臨濟先師於黃檗喫棒底道理。此先師二字。蓋從拈香法語。不如供養臨濟先師之句而訛也。佛祖綱目繫存獎禪師開法興化於傳宗。於符元年甲午。則在晉王之前也。皆異於塔碑。又祖塔碑左記曰。當周之時。西方有聖人曰釋迦氏。東土有聖人曰仲尼氏。東土聖人。生魯國。而西方聖人。已示滅四百年矣。當是時。東土之人。固未知有西方聖人也。而東土聖人。始知之而始名之。其後東土聖人滅六百年。西方聖人之教。乃至於東土。又歷年。東土得達摩氏傳西方聖人不傳之心印。又歷年。東土五宗拔起。以應一花之瑞。而首承臨濟氏之宗祧者。實東土聖人之孫也。其事

景德傳燈錄闕焉。文苑英華卷第八百六十八碑第二十五釋碑第十九宣州新興縣寺碑後載魏州故禪大德獎公塔碑作者公乘億碑曰和尚姓孔字存獎家本鄒魯。即闕里之裔孫也。南潛年來欲集僧寶獻徵意。蓋在拾遺而補闕也。公乘億與化塔碑則非獨拾遺而補闕也。西方聖人東土聖人風教設施之同。異後世子孫之會通以端俗學之歧塗。以定人天之眼目。實在於是。盤山甘泉著其抽簪三統講筵明其義。虎京華水國表其遊跡。仰山擊指及其同聲。臨濟止觀音寺江西禪院補寶壽之佚文。末期遷化。克盡茶毗之禮。證三聖之同侍。南轅門外通衢之左。興化舊基。舍利一千餘粒。德儀殊勝。建塔於府南貴鄉縣薰風里。附於先師之塔志也。父子存亡。始終靡間。昭垂萬古矣。余特悲世之奉教於東土聖人者。於東土聖人之心法皆背而馳。而岸然自謂於東土聖人之教若執干戈以捍禦焉。噫亦異矣。夫東土聖人仲尼氏二傳而爲子思氏。親得東土聖人之心法。著中庸其

第一句曰天命之謂性。非世之所謂天命者也。世所謂天命云者。所以開近世天主邪說之漸。而子思氏之言則西方聖人之心也。其末後句曰無聲無臭。非世之所謂無聲臭也。世之所謂無聲臭云者。所以承宋儒混茫一氣之訛。而子思氏之言則西方聖人之心也。夫東土聖人仲尼氏二傳之孫手著中庸以闡東土聖人之道。則仲尼氏之心也。闕里裔孫親承臨濟以傳西方聖人之心。則亦仲尼氏之心也。此世儒之所不察也。安隱忍曰祖英挺天縱如虎生三日氣便食牛與洛浦俱爲臨濟侍者。然皆坐在一悟。視天下無人微大覺夾山則一墮無尾巴隊中矣。浦嗣夾山不忘最後之得。而化嗣臨濟使濟上宗風不致滅裂。蓋師友力也。師既脫鞵於大覺。便有驅耕奪食之手。後來接人不輕放過。故子孫十餘世皆光明照人。其淵源承接有自來矣。昔法雲杲公入圓通機道者之室。一語相合。而圓通稱賞之。明日秉拂機思遲鈍。衆大笑杲爲之置茶。慚無以自處。偶打翻

茶具因而有省於是機鋒迅捷無敢當者未幾謁  
眞淨復大悟此等公案甚多使後世讀之如明鏡  
當臺妍醜自見存錄良有以也近世禪子叙悟由  
槩多修飾凡師匠發藥之語或臨機挫抑之言盡  
情刪去甚欲改換師承所示之偈頌惟褒揚者存  
之夫所責從師爲能與我解黏去縛若一皆稱贊  
又安在其爲師匠耶因及化之悟絲一并拈出以  
見古今之不逮悲夫

祥符蔭曰宗師垂示鑑定機宜病治末流之病如  
良醫設藥透徹膏肓觀變化之於大覺及接見同  
參擯克賓維那等公案天下後世師資上下之間  
可以不言喻矣而猶岸然歎歎是何異於負販兒  
童安在其爲親承決擇稱人天祖佛師哉其時竊  
盜充斥雲擾烟馳以致化迹訛傳甚多遺漏然存  
大意於千載祖可謂不忝溥沲後勁矣

### 宗統編年卷之十六

### 宗統編年卷之十七

#### 臨濟第三世祖

諱慧願河北人嗣興化住汝州南院一名寶應

昭宗名傑在位一十六年

昭宗己酉龍紀元年

臨濟第三世汝州南院祖宗統四十二年

祖上堂曰赤肉團上壁立千仞僧出問赤肉團上  
壁立千仞豈不是和尚道祖曰是僧便掀倒禪牀  
祖曰這瞎驢亂做僧擬議祖便打趂出

八月二十二日茶毗興化祖全身得舍利一千餘粒  
諡廣濟塔曰通寂

庚戌大順元年 時天下分裂霸據一方者凡十三

處西秦吳吳越燕楚前蜀荆  
閩南漢後蜀南唐殷東漢

嗣瀉山法同建宗旨瀉仰宗第一世智通祖示寂法書

同曹山

祖自仰山開法遷觀音接機利物爲禪宗標準將  
遷化前數年有偈曰年滿七十七老去是今日日

輪正當午兩手攀膝屈至大順庚戌時在韶州東平山將入滅有數僧侍立祖示偈曰一二三子平目還仰視兩口無一舌此是吾宗旨言訖以兩手抱膝而逝年七十七諡智通塔號妙光

存考 按仰山距潯山祖人滅時凡三十八年一傳為西塔光穆龍山景通龍泉文喜新羅顯支南塔光湧等共六人南塔湧再傳為清化全付芭蕉慈清等共五人西塔穆再傳為資福如寶一人芭蕉清三傳為興陽清讓幽谷法滿等共四人資福寶傳真遠德紹等亦四人而此後傳燈無考又自西塔而後諸師皆年代不載准文喜禪師載開成二年趙郡具戒咸通三年至洪州觀音院見仰山言下頓了心契仰山令與常住光啓三年錢王請住龍泉解署大順元年錢王表薦賜紫衣乾甯四年又奏師號曰無著光化二年示寂餘具寥寥語句僅以存其大端今並闕焉以俟後來詳考雲門法眼亦同此例也

辛亥二年

壬子景福元年 癸丑二年

甲寅乾甯元年

乙卯二年

禪師臨濟支下灌溪志閑寂

閑館陶史氏子初參臨濟祖後參末山然住灌溪嗣臨濟五月一日問侍者曰坐死者誰曰僧伽問立死者誰曰僧會閑乃行七步垂手而逝禪師潯山支下徑山洪謹寂

謹嗣潯山住徑山九月日院前檉樹忽萎厨內飯如金色謹令鳴鏡集衆陞座曰牟尼掩足迦葉藏峯彼彼不落見聞一句莫教人說汝須急切各自知時法界雖長世人景促佛法非遠大道不迷孝順住持如吾在日久立珍重遂入滅

禪師洞山支下九峯通玄寂

玄嗣洞山由末山遷九峯二月十七日誡衆曰無虛度光陰無虛消信施既已出家惟道是履名大丈夫言訖遂寂然在定至三月二十日乃化

丙辰三年

延沼生於餘杭劉氏

丁巳四年

戊午光化元年

禪師華嶽玄偉纂聖胄集成

偉編次貞元已來宗師機緣行世曰聖胄集

禪師南泉下尊宿趙州觀音院真際大師從諗寂諗住趙州觀音院燕趙二王同至院見諗諗端坐不起燕王問曰人王尊耶法王尊耶諗曰若在人

王人王中尊。若在法王法王中尊。二王默然敬服。乃同供養。諡志效古人。住持四十餘年。道滿天下。所有言句。諸方傳播。尊爲古佛。壽一百二十歲。祥符蔭曰。南泉趙州。皆稱尊宿。如歲寒松柏。挺秀丹山碧嶂。間時花芳草。對之異矣。住持四十餘年。未嘗以一事告檀越。繩牀一角。折以繩繫。殘薪支之。噫。高風碩德。所以冠卓古今也。

禪師夾山下澧州洛浦

或作樂善

元安寂

安夾山會嗣。初爲臨濟侍者。濟稱之爲門下一隻聖箭。後辭臨濟。住夾山。住菴夾山。修書招之。乃服膺語。具本傳。住洛浦上堂曰。末後一句。始到牢關。鎖斷要津。不通凡聖。尋常向諸人道。任從天下樂欣欣。我獨不肯。欲知上流之士。不將佛祖言教。貼在額頭上。如龜負圖。自取喪身之兆。鳳縈金網。趣霄漢。以何期。直須旨外。明宗莫向言中取。則是以石人機似汝也。解唱巴歌。汝若似石人。雪曲也應和。指南一路。智者知疏。八月誠主事曰。出家之法。長物不留。播種之時。切宜減省。締構之務。悉從廢。

停流光迅速。大道玄深。苟或因循。曷由體悟。冬示微疾。不倦請參。十二月二日午時。與僧問答。罷使告寂。

禪師瀉山支下鄧州香嚴智閑寂

閑青州人。徧參諸方。在百丈時。性識聰敏。參禪不得。洎丈遷化。遂參瀉山。山問我。聞汝在百丈。先師處。問一答十。問十答百。此是汝聰明靈利。意解識想。生死根本。父母未生時。試道一句。看閑被一問。直得茫然。歸寮將平日看過底文字。從頭要尋一句。酬對。竟不能得。乃自歎曰。畫餅不可充饑。屢乞瀉山說破。山曰。我若說似汝。汝已後罵我去。我說底是我底。終不干汝事。閑遂將平昔所看文字。燒却。曰。此生不學佛法也。且作個長行粥飯僧。充役心神。乃泣辭瀉山。直過南陽。觀忠國師遺跡。遂憩止焉。一日。芟除草木。偶拋瓦礫。擊竹作聲。忽然省悟。遽歸沐浴焚香。遙禮瀉山。讚曰。和尚大慈。恩踰父母。當時若爲我說破。何有今日之事。乃有頌曰。一擊忘所知。更不假修持。動容揚古路。不墮悄然。

機處處無蹤跡。聲色外威儀。諸方達道者。咸言上上機。滙山聞得。謂仰山曰。此子徹也。仰曰。此是心機。意識著述得。成待某甲。親自勘過。仰後見閑曰。和尙讚歎師弟發明大事。你試說看。閑舉前頌。仰曰。此是夙習記持而成。若有正悟。別更說看。閑又成頌曰。去年貧未是貧。今年貧始是貧。去年貧猶有卓錫之地。今年貧錫也無。仰曰。如來禪許師弟會祖師禪。未夢見在。閑復有頌曰。我有一機。瞬目視伊。若人不會。別喚沙彌。仰乃報滙山曰。且喜閑師弟會祖師禪也。閑初開堂。滙山令僧送書并拄杖至。閑接得。便哭。蒼天蒼天。僧曰。和尚爲甚麼如此。閑曰。祇爲春行秋令。閑有偈曰。子啐母啄。子覺母殺。子母俱亡。應緣不錯。同道唱和。妙云獨脚祥符蔭曰。聰明障道爲其難。透脫也香嚴得力於師友。糞掃堆頭一擊而了。所以啐啄俱亡。應緣不錯。後之學者。應無俟騰口說矣。

己未二年

庚申三年

禪師仰山支下杭州龍泉無著文喜寂

喜仰山嗣嘉禾禦兒朱氏子。七歲出家。開成二年登戒。咸通三年。禮仰山於豫章觀音院。言下了契。充典座。有異蹟。七年。旋浙右。止千頃山。十年。居龍泉古城院。乾符六年。避地至湖州。餘不亭刺史杜孺休請居仁王院。光啓二年。錢武肅王疏請住龍泉大順元年。賜紫。乾甯四年。賜師號曰無著。十月二十七日。夜中時。告衆曰。三界心盡。卽是涅槃。言訖。跏趺而寂。春秋八十。夏六十。塔於靈隱西塢。天祐二年。叛兵發塔。肉身不壞。髮爪俱長。吳越王重加封瘞。

祥符蔭曰。無著神異炳著。是再來吳位中人。仰山東土小釋迦。故一時參承之士。如南塔光湧者。山每對人稱之曰。此子是肉身佛。旃檀林中無穢草。師子窟中無異獸。法化之隆。隱顯莫測。此所以爲護持正眼者歟。

辛酉天復元年

嗣洞山法同建宗旨曹洞宗第一世撫州曹山祖示

寂 書法曹山爲洞山子同建宗旨爲曹洞第一世故書法如此

祖住仰山。南平鍾王雅重。致禮敦請。祖但書隱山。山居頌一首付使者。曰。摧殘枯木倚寒林。幾度逢春不變心。樵客遇之。猶不顧。郢人那得苦追尋。六月日間知事。今日是幾何。日月日六月十五日。日曹山平生行。脚到處只管九十日。爲一夏。明日辰時。吾行脚去。及時焚香宴坐而化。

或問祥符曰。洞山寂後。曹山住世。尙三十二年。雲居既稱曹洞二世。何不嗣統於曹山。寂後曹山既遜統矣。而書其寂於雲居三十二年。此三十二年。曹山毋乃贅旒乎。祥符曰。佛祖付正法眼。以毋令斷絕。爲囑洞宗。傳持於今者。皆雲居之後。雲居嗣法洞山。曹山同建宗旨者也。以宗旨言。曹山合洞山而成一世。洞山寂而曹山不單書者。曹山統於洞山。所以從洞山尊洞山也。不然洞山寂而曹山單書。是二宗統矣。洞山寂而書雲居。嗣統者尊曹山爲一世也。今之傳持洞宗者。皆雲居之後。而並尊曹山合洞山爲一世。稱曹洞者。大同之道。無彼

此也。曹山既遜位而書其寂於雲居三十二年者。如唐之玄宗傳位於天寶十五載而崩於肅宗之寶應元年。宋高宗禪位於紹興二十三年而崩於孝宗淳熙十三年。何贅旒之有。雲居嗣統爲第二世。自當並尊曹山爲第一世。亦如宋太宗以弟而承兄。太祖正統則兄弟而祖宗焉。統序昭然。百世不易。仰山之寂亦然。瀉仰雲門法眼三宗止於首建濟洞。編年歷世相次者。二枝嫩桂。久昌昌祖。識光垂至今未艾也。

師禪了悟補住曹山

壬戌二年

曹洞宗第二世洪州雲居弘覺祖示寂作天福者誤

祖住持三十餘年。道徧天下。衆至千五百人。南昌鍾王師尊之。願以爲世世師。天復元年秋。示微疾。十二月八日。爲大衆最後開方便門。敘出世始末。是年正月三日。問侍者。今日是幾對。云初三祖曰。三十年後。但云祇這是。乃端然告寂。祥符陰曰。江河之行。萬里未聞源清而流濁。法脉

相承宗眼相照如空鏡交融不合而合觀雲巖洞山雲居三世可瞭然矣

曹洞宗第三世

諱 丕生緣傳燈失載

癸亥二年

曹洞宗第三世洪州鳳棲山同安祖嗣宗統約十年

僧問如何是和尙家風祖曰金雞抱子歸霄漢玉兔懷胎入紫微曰忽遇客來將何祇待祖曰金果朝來猿摘去玉花晚後鳳銜歸新到參祖問甚處來曰湖南祖曰還知同安這裏風雲體道花籃瓊瑣廢曰知祖曰非公境界僧便喝祖曰短販樵人徒誇書劍僧擬進語祖曰劍甲未施賊身已露

存考

按雲居傳同安丕丕傳鳳棲志志傳梁山觀緣示寂之年月考太陽立以宋咸平三年庚子觀歿

辭塔出山至太陽謁堅禪師堅欣然讓法席使主之是梁山寂于咸平三年之際也從唐天復三年癸亥至宋咸平庚子爲九十餘年而同安鳳棲梁山三世三世之間各准三十年爲一世以定宗統細故雖則脫略微茫無徵而大旨粲然不失存之以俟後來考定云

禪師道簡繼席雲居

簡范陽人童子剃落受滿分戒徧遊叢席後謁雲居與語連三日大奇之誠令刻苦事衆於是簡躬操井臼同樵爨徧掌寺務不妨商略古今衆莫有知者以臘高爲堂中第一座先是高安洞山有禪靈甚雲居祖住三峯時神受服役既來雲居神亦隨至舍於枯樹之下而樹茂號安樂樹神雲居將順寂主事僧白曰和尚卽不諱誰可繼者曰堂中簡主事意不在簡謂當揀擇堪說法者僉曰第二座可然姑請簡意簡必辭簡既夙受記前卽攝衆演法主事大沮簡察知之一夕遯去其夕安樂樹神號泣詰旦衆追至麥莊悔過迎歸聞空中連聲唱曰和尚來也僧問如何是和尙家風曰隨處得自在問維摩豈不是金粟如來曰是曰爲甚麼却在釋迦會下聽法曰他不爭人我問路逢猛虎時如何曰千人萬人不逢爲甚麼闍黎徧逢問孤峯獨宿時如何曰閑却七間僧堂不宿阿誰教汝孤峯獨宿問古人云若保任此事直須向高高山頂立深深海底行意旨如何曰高峯深海迥絕孤危

似汝闔閭中軟煖麼。簡契悟精深。履踐明驗對機。應物度越格量。天下宗師之壽八十餘。無疾而化。

甲子天祐元年

八月宋全忠義帝於椒殿立太子。祝爲昭宣帝。雖立而不改元。仍稱

天祐○此後唐末并五代莊紀

乙丑二年

禪師長沙下四明雪竇常通寂

通嗣長沙岑住雪竇。鬱然盛化。七月集衆焚香付

囑訖合掌而逝。

丙寅三年

禪師幼璋住瑞龍

璋受白水仁心印。住靜天台。值浙東饑疫。璋於溫

台明三郡收瘞遺骨數千。時謂悲增大士。錢王建

瑞龍寺請璋住持。

禪師慧稜住招慶

稜往來雪峯。玄沙二十年。坐破七箇蒲團。不明此

事。一日捲簾。忽大悟曰。也大差也大差。捲起簾來

見天下有人問我。是何宗拈起拂子。劈口打。峯舉

謂沙曰。此子徹也。曰。未可。此是意識著述。更須勘

過始得。至晚峯謂稜曰。備頭陀未肯汝在。稜乃頌曰。萬象之中獨露身。惟人自肯乃方親。昔時謬向途中覓。今日看來火裏冰。峰乃曰。不可。更是意識著述。泉州刺史王延彬請稜住招慶。開堂日。彬朝服趨侍。曰。請師說法。曰。還聞麼。彬設拜。稜曰。雖然如此。恐有人不肯。僧問。如何是正法眼。稜曰。有願不撒沙。

祥符陰日。雲勤見桃花悟道。玄沙曰。諦當甚諦。當敢保老兄未徹在。香巖閑擊竹了。悟仰山曰。更須勘過。始得。稜公坐破七箇蒲團。捲簾徹見天下。而玄沙猶恐其屬意識邊事。古人師友之間不肯輕易放過。如此真玉火三日而見性。詎不信夫。

禪師文遂住欽山

遂嗣洞山祖住澧州欽山。一日巨良來參。問一簇破三關時。如何。曰。放出關中主。看曰。恁麼則知過必改。曰。更待何時。曰。好隻箭放不著。所在便出。遂曰。且來。閣黎良回首。遂下禪牀。擒住曰。一簇破三關。卽且置。試爲欽山發箭看。良擬議。遂打七棒曰。

且聽這亂統漢疑三十年

丁卯四年

四月以後梁開平元年是歲唐亡梁晉  
岐淮南四川凡五國吳越湖南荆南福

建嶺南

○是歲晉岐淮南仍稱唐天祐  
凡五鎮○四川稱天復餘皆稟梁正朔

禪師德謙住明招山

謙受羅山印記不滯一隅激揚玄旨諸老宿皆畏

其敏捷後學鮮敢當其鋒者道聲遐播衆請居婺

州明招山

禪師道慈住鏡清

慈嗣雪峯住鏡清學者奔蹙

禪師行修幽棲四明

修泉南陳氏子母夢吞日驚寤而生長耳垂肩異

香滿室七歲不言或問曰汝非痴乎忽應聲曰不

遇作家徒撞破烟樓耳人益奇之比長讀書過目

成誦旁及內典徧閱三藏忽幡然欲遊方外躡屣

名山至金陵瓦棺寺祝髮受具參雪峯得受心印

遊天台國清日憩巖畔猛虎巨蛇往來左右馴擾

不去至四明獨棲松下天花紛雨又跌坐黃尾巖

結茅爲蓋百鳥銜花所坐盤石富膝處成坳

戊辰晉岐淮南稱唐天祐五年梁開平二  
年蜀王建武成元年是歲四川稱蜀

禪師德山下福州雪峯眞覺大師義存寂

存住雪峯道滿天下僖宗欽風錫眞覺大師之號

併紫袈裟闍主大加隆禮問法投誠將寂之前自

製塔銘并序三月示疾闍主遣醫進藥存曰吾非

疾也竟不服藥遺偈付囑五月二日朝遊藍田暮

歸澡身中夜入滅壽八十七臘五十九

禪師雪峯下福州玄沙宗一師備寂

備嗣雪峰住梅溪後居玄沙一時海衆皆望風欽

服學徒千人應機接物垂三十年十一月二十七

日示疾而化壽七十五臘四十四賜號宗一

文偃禪師徧參諸方至靈樹爲第一座尋嗣其席

偃受法印於雪峯後出嶺徧謁諸方激揚辨論到

九江尙書陳操問儒書中卽不問三乘十二分教

自有麼主作麼生是禪僧行脚事曰尙書曾問幾

人來曰卽今問上座曰卽今且置作麼生是教意

曰黃卷赤軸曰這個是語言文字作麼生是教意

曰口欲談而詞喪心欲緣而慮亡曰口欲談而詞

喪爲對有言。心欲緣而慮亡。爲對妄想作麼生。是教意操無語。偃曰。見說尙書看法華經。是否。曰。是。曰。經中道一切治。生產業皆與實相不相違背。且道非非想。天有幾人退位。操又無語。偃尙書。誓且莫草草三經五論。師僧拋却。特入叢林。十年二十年。尙不奈何尙書。又爭得會。操禮拜曰。某甲罪過。最後到曹溪。禮祖塔。塔作長興元靈樹知聖敏。請爲第一座。先是敏不請首座。有勸請者。但曰。我首座已出家久之。又請曰。我首座已行脚。悟道久之。又請曰。我首座已廣嶺矣。忽一日。令擊鐘接首座。衆皆出。迺偃果至。敏迎笑曰。奉遲甚久。何來。暮卽命之偃。亦不辭而就職。俄廣主劉王將興兵。就敏決可否。敏前知手封奩子。語侍者曰。王來出。以似之。乃就坐而逝。王至。聞敏已化。大驚。問和尙何時得疾。曰。師不曾有疾。適封一奩子。令候王至。王開奩。得一帖子。云。人天眼目。堂中首座。乃勅刺史何希範具疏禮請。偃繼其法席。

禪師慧球嗣席安國

球莆田人。玄沙室中參訊。居首。因問如何。是第一月沙。曰。用汝。月作麼。球從此悟入。沙將示。球問。帥王公遣子至。問疾。仍請密示。繼踵說法者。誰。沙曰。球子得至。默記遺旨。乃問鼓山臥龍法席。孰當其任。山舉城下宿德。具道眼者十有二人。皆堪出世。亦默之。至開堂日。官僚與僧侶俱會。法筵王忽問衆曰。誰是球上座。於是衆人指出王。便請球住安國禪院上堂。我此間粥飯。因緣爲兄弟舉唱。終是不常欲得省要。却是山河大地。與汝發明其道。既常亦能究竟。若從文殊門入者。一切無爲。土木瓦石。助汝發機。若從觀音門入者。一切音響。蝦蟇蚯蚓。助汝發機。若從普賢門入者。不動步而到。以此三門方便示汝。如將一隻折箸。攪大海水。令彼魚龍知水爲命。會麼。若無智眼而審諦之。任彼百般巧妙。不爲究竟。

師虔禪師自青林遷住洞山

虔參洞山。山問近離甚處。曰。武林。曰。武林法道何似。此間曰。胡地冬抽筍。曰。別甌炊香飯。供養於此。

人虔拂袖便出山曰此子向後走殺天下人在一日虔栽松次有從虔乞傷虔作偈曰亭亭三尺餘鬱鬱覆青草不知何代人得見此松老山見偈曰此第三代洞山主人也住青林復遷洞山凡新到先令搬柴三轉然後參堂首建雲門宗等一世祖

諱文偃雪峯嗣嘉興張氏子幼依空王寺志澄

律師出家初參睦州尊宿發明大旨後造雪峯

深造闡奧徧參諸方幾二十年後抵韶州靈樹

敏禪師法席居第一座尋補住後遷雲門

已已

晉岐淮南稱唐天祐六年梁開平三年

大鑑下第七世雲門宗第一世祖首建雲門宗

發明

書大鑑下第七世表來源也書首建表立宗也

祥符蔭日向見雲門機用以爲英靈駿發傑出之士也今編年歷詳檢生平知其蚤脫轡於睦州旋蜜證於雪峯忘餐待問立雪求知出嶺徧參諸方名宿如疎山臥龍歸宗天童鸞湖乾峯等無一不激揚勘辨維時天下分崩雲迷霧塞師乃不避險

難孤策遨翔今讀其遺表困風霜於十七年間涉南北於數千里外始見心猿罷跳意馬休馳之語爲之神悚淚落是知師乃百鍊精金鑄成神鋒四照其光芒燄彩有不望影心服者乎宋蘇軾序師之錄有曰擒縱舒卷縱橫變化放開江海魚龍得遊泳之方把斷乾坤鬼神無行走之路草木亦當稽首土石爲之放光本分鉗鎚金聲玉振崢嶸世界瓦解冰消列派分宗將錯就錯其知言哉禪師居遁出世龍牙

遁契旨洞山服勤八載是年出世龍牙法濟示衆夫參玄人須透過佛祖始得新豐和尚道佛祖言教如生冤家始有參學分若透不得卽被佛祖謾去僧問佛祖還有謾人之心也無曰汝道江湖還有礙人之心也無江湖雖無礙人之心爲時人過不得江湖却成礙人去不得道江湖不礙人佛祖雖無謾人之心爲時人透不得佛祖却成謾人去不得道佛祖不謾人若透得佛祖過此人過却佛祖若也如是始體得佛祖意方與向上人同如未

透得但學佛學祖則萬劫無有出期曰如何得不  
被祖佛誤去曰道者直須自悟始得

### 招慶慧稜移居長慶

稜住招慶受閩主王審知請住福州長慶上堂撞  
著道伴交肩過一生參學事畢上堂我若純舉喝  
宗乘須閉却法堂門所以道盡法無民僧問不怕  
無民請師盡法稜曰還委落處麼

庚午

晉岐吳齊唐天祐七年  
梁開平四年

### 沙門南嶽惟勁續寶林傳

勁集光化以來出世宗師機緣爲續寶林傳

辛未

晉岐吳齊唐天祐八年  
梁乾化元蜀永平元年

祖住雲門光泰

年者誤

上堂曰函蓋乾坤目機銖兩不涉世緣作麼生承

當衆無對自代曰一鏃破三關

安隱忍曰雪峰禪師有函蓋乾坤句截斷衆流句  
隨波逐浪句雲門生平用此接人如風馳電轉自  
非透明大法死盡全心者難爲湊泊蓋自家立地  
處不漏絲髮故應機垂手不期然而然

### 祖示法病

上堂曰光不透脫有兩般病一切處不明面前有  
物是一又透得一切法空隱隱地似有個物相似  
亦是光不透脫又法身亦有兩般病得到法身爲  
法執不忘已見猶存坐在法身邊是一直饒透得  
法身去放過卽不可仔細點簡將來有甚麼氣息  
亦是病

大慧杲曰不用作禪會不用作道會不用作向上  
商量此是雲門老漢據實而論我恁麼道有沒量  
罪過汝若簡點得出許你具擇法眼若簡點不出  
且向雲門葛藤裏參又曰而今學實法者以透過  
法身爲極致而雲門反以爲病不知透過法身了  
合作麼生到這裏如人飲水冷暖自知不著問別  
人問別人則禍事也  
安隱忍曰透過法身雲門猶以爲病正悟之難如  
此也後代有透一切空遂斥言句爲實法以隱隱  
地一物爲本分事不知皆墮此老呵忌之中此其  
有實悟者依稀彷彿輩不足論也

祖示綱宗

偈曰。康氏圓形滯不明。魔深虎喪擊寒冰。鳳羽展時超碧漢。晉鋒八博擬何憑。其一是機是對對機迷關機塵遠遠塵樓夕。日日中誰有掛。因底底事隔塵迷。其喪時光藤林荒徒人意滯騰庭三咄咄咄。力口希禪子訝中眉垂。其四上不見天下不見地。塞却咽喉何處出。氣笑我者多。晒我者少。其五

寶雲潛曰。關之一字。雲門之總持也。關則不對對。則不關。關奇而對偶也。乾關而坤闔者也。關者從無而關者也。故不知從無而出者。不能知雲門之旨者也。關者從一而關者也。故不知從一而出者。故不知雲門之旨者也。關則新不關則故。天下之言雲門者。皆故雲門而非新雲門也。故雪竇爲雲門之中興也。關則生不關則死。故天下之言雲門三句者。皆死雲門而非活雲門也。夕日月中誰有掛。知以掛爲法者之非雲門也。關者奪其掛之飛將也。晉鋒八博擬何憑。知以憑爲法者之非雲門也。關者破其憑之寶鏡也。晉鋒八博關之所以爲

關也。此雲門之密也。

禪師智暉建寺重雲

暉得法白木仁結茅中灘。日以施濟爲事。人莫能淺深之。有癩比丘求暉洗摩。暉無難色。俄有神光異香。忽失所在。乃還圭峯。深入巖石。顧見磨納數珠銅瓶。櫻笠藏石壁間。觸之卽壞。斂目良久曰。此吾前身道具也。因就建寺。方薙草。有祥雲出衆峯間。遂名重雲。虎豹引去。又塞龍潭。龍亦移他處。

壬申晉殷吳稱唐天祐九年  
梁乾化二年

禪師如訥卓菴道場山

訥湖州人。得法翠微學。薙草卓菴道場山。乘虎道行。學徒四至。遂成禪苑。

癸酉梁乾化三年

禪師玄沙支下安國慧球寂

甲戌梁乾化四年

禪師翠微下舒州投子山寂住慈濟大同寂

同翠微學。嗣參翠微。問未審二祖初見達摩有何所得。微曰。汝今見吾。復何所得。遂契悟。他日問如

何是佛理。微曰。佛卽不理。同曰。莫落空否。微曰。真空不空。微示識偈曰。佛理何曾理。真空又不空。大同居寂。住敷演我師。宗同後住投子院。名寂。住四月六日寂。

### 禪師洞山支下疎山匡仁寂

仁嗣洞山祖。先參大滌祐。不契。與香嚴閑約曰。向後有住處。特來相見。滌笑曰。這矮子。向後住處。近山無柴燒。近水無水喫。乃造洞山。問未有之言。請師示。誨山曰。不諾。無人肯曰。還可。功也。無山曰。你卽今還功得麼。曰。功不得。卽無諱。處山寂。後入嶺。詢大滌。安有句。無句如藤倚樹。語安笑之。且曰。向後有獨眼龍爲子點破。後明招謙出世。諺曰。徑往一目。禮拜大悟。言下。香嚴出世。不爽前約。訪之。嚴上堂。答僧問。不求諸聖。不重己靈。語仁在衆。嘔之。嚴躡前問。仁曰。何不道。肯諾不得。全嚴曰。肯又肯。個甚麼。諾又諾於阿誰。仁曰。肯卽肯。他千聖諾。卽諾於已。靈嚴曰。師叔恁麼。道向後倒屣三十年。在住疎山。後果病吐二十七年。而愈。却每於食後。挾口令

吐曰。香嚴師兄。記我三十年倒屣。尙欠三年。在臨遷化。示衆偈終而逝。

### 沙門蜀禪月大師貫休寂

休。蘭溪姜氏子。精法華。起信。奧義。吟詩。善翰墨。時謂姜體王。體吳融。雅相篤。重入蜀。署禪月大師。有禪月集行世。

### 乙亥梁貞明元年

### 禪師神宴住鼓山

宴。大梁李氏子。幼惡葷。羶。樂聞鐘梵。年十二時。有白氣數道。騰於所居屋壁。宴題壁曰。白道從茲速。改張休來。顯見作妖祥。定祛邪行。歸眞見。必得超凡入聖。鄉題罷。氣卽滅。年十六。夢梵僧告曰。出家時至矣。遂披削。受具。謂同學曰。古德云。白四羯磨。後全體戒定慧。豈準繩而可拘也。於是杖錫徧叩禪關。參雪峯。峯知其緣熟。忽起。擲住曰。是甚麼。宴釋然。了悟。亦忘其心。惟舉手搖曳而已。峯曰。子作道理耶。曰。何道理之有。峯深肯之。後赴闔王。請峯門送回至法堂。乃曰。一隻聖箭。直射九重城裏。

去也。孚上座曰：是伊未。在曰：渠是徹底人。曰：若不信。待某甲去。勘過。遂趨至中路。問師兄向甚處去。曰：九重城裏去。曰：忽遇三軍圍繞。時如何。曰：他家自有通霄路。曰：怎麼則離宮失殿去也。曰：何處不稱尊。孚拂袖便回。峯問如何。曰：好隻聖箭。中路折却了也。遂舉前話。峯曰：奴渠語在。曰：這老凍膿。猶有鄉情。在。是年住鼓山。直下猶難會。尋言轉更。賒若論佛與祖。特地隔天涯。

禪師獻蘊遷夾山

蘊參洞山。虔問如何。用心得齊於諸聖。虔仰面良久。曰：會麼。曰：不會。曰：去。無子用心處。蘊乃契悟。更不他遊。遂作園頭。出世黃嶽。蘭若遷夾山。僧問：月生雲際時如何。曰：三個孩兒抱華鼓。好大哥莫來攔我。徑門路。凡蘊應機多云：好大哥。時稱大哥和尚。

丙子梁貞明二年

丁丑晉統吳稱唐天祐十四  
梁貞明三蜀天漢元漢乾亨元年  
布袋和尚坐化明州

布袋和尚不示氏族。自稱名契此。形裁臞腰。蹙額蹙腹。常以杖荷一布囊。入廛市中。見物則乞人呼爲長汀子。布袋和尚出語無定蹤跡。莫測三月於岳林寺。端坐說偈曰：彌勒真彌勒。分身千百億。時時示時人。時人自不識。偈畢安然。而化。其後復見於他州。亦負布袋。四衆競圖其像。

祥符蔭曰：大士應化如月散千江。風行大地。甯可形迹定其賢。愚日月紀其生滅。豐干寒拾之倫。實掌僧伽之輩。偶亦云露隱而不發者。山林闌闌。未嘗無人。順行逆施。曠能測識。皆所以默運悲智。隨類引導。佐輔眞宗。書一二示著者。以槩一切。凡聖兩忘者。自能不向百草頭。識取祖師也。

戊寅梁貞明四年

己卯晉統吳稱唐天祐十六梁貞明五年  
蜀乾德元吳宣王楊隆演武義元年  
禪師石霜下龍湖圓覺普聞寂

聞住龍湖。神異多端。凌晨跨虎出遊。不復歸山而逝。

禪師從展住保福

展嗣雪峰漳州王刺史創保福禪院請展居之  
庚辰梁貞明六年

禪師桂琛住地藏

琛常州李氏子爲兒童時日一素食出言有異既冠披削登戒學毗尼一日爲衆宣戒已乃曰持戒但律身而已非眞解脫也依文作解豈發聖智乎初謁雲居雪峰不大發明後參玄沙言下大悟時與慧球齊名號二大士琛能秘重大法痛自韜晦叢林共指爲雪峰法道所寄漳州牧王公請住城西石山地藏

辛巳梁龍德元吳嘗年  
皇楊潤順義元年

禪師石霜下潯潭開法九峰大覺道虔寂

虔嗣石霜諸初百丈處馬祖舍利於海昏石門廬塔十餘年及住百丈不復還石門虔自九峯往遊遂成法席爲潯潭第一代是年安坐而化諡大覺興化侍者守廓參驗諸方發明與化祖寂已三十  
年仍書興化侍者  
者見不忝其爲祖之侍者也  
凡書職事皆無愧於其職也  
廓得法興化祖行脚到德山問鑒曰從上諸聖向

甚麼處去曰作麼作麼曰勅點飛龍馬跛驚出頭來鑒便休去來日浴出廓過茶與鑒鑒於背上拈一下曰昨日公案作麼生曰這老漢今日方始管地鑒又休去廓行脚到襄州華嚴會下一日華嚴上堂大衆今日若是臨濟德山高亭大愚烏窠船子兒孫不用如何若何便請單刀直入華嚴與汝證據廓出禮拜起便喝嚴亦喝廓又喝嚴亦喝廓乃曰大衆看這老漢一場敗闕又喝一喝拍手歸衆嚴下座歸方丈時延沼作維那上去問訊嚴曰維那汝來也叵耐守廓適來把老僧扭捏一上待集衆打一頓趁出曰趁他遲了也自是和尙言過他是臨濟下兒孫本分恁麼嚴方息怒沼舉似廓廓曰你著甚來由勸這漢我未問前蚤要棒喫得我話行如今不打搭却我這話也沼曰雖然如是已遍天下也廓到鹿門一日見鹿門問楚和尚你終日披披搭搭作甚麼楚曰和尚見某甲披披搭搭搭那鹿門便喝楚亦喝兩家總休去廓曰你看這兩個瞎漢隨後便喝鹿門歸方丈却令侍者請廓

宗統編年卷之十八

壬午梁龍德二年

禪師延沼至南院

沼魁畧有英氣於書無所不觀然無經世意父兄強之仕一應舉至京師卽東歸從開元寺智恭律師剌染受具遊講肆玩法華玄義修止觀定慧宿師爭下之棄去遊名山依雪峯五年見瑞巖無留意到越州謁鏡清清歎其俊邁到華嚴爲維那屬守廓侍者從南院來沼心奇之因結爲友遂默悟三玄旨要歎曰臨濟用處如是耶因參祖入門不禮拜祖曰入門須辨主沼曰端的請師分祖於左膝拍一拍沼便喝祖於右膝拍一拍沼又喝祖曰左邊一拍且置右邊一拍作麼生沼曰瞎祖便拈棒沼曰莫盲枷瞎棒奪打和尚莫言不道祖擲下棒曰今日却被黃面浙子鈍置一場沼曰和尚大似持鉢不得詐道不饑祖曰闍黎曾到此間麼沼曰是何言歟祖曰老僧好好相借問沼曰也不得

上來曰老僧適來與楚闍黎賓主相見什麼敗闕曰轉見病深曰老僧自見興化來便會也曰和尚到興化時守廓爲侍者記得與麼時語曰請舉看廓遂舉興化問和尚甚處來和尚曰五臺來興化曰還見文殊麼和尚便喝興化曰我問你還見文殊麼又惡發作麼和尚又喝興化無語和尚作禮興化至明日教守廓喚和尚和尚蚤去也興化上堂云你看這個僧擔條斷貫索向南方去也已後也道見興化來今日公案恰似與麼時底曰興化當時爲甚無語曰見和尚不會賓主句所以無語及欲喚和尚持論和尚已去也鹿門明日特爲煎茶晚參告衆

宗統編年卷之十七

放過便下參堂了。却上堂頭禮懺。祖曰。闍黎曾見甚麼人來。沼曰。在襄州華嚴與廓侍者同夏。祖曰。親見作家來。又曰。他向你道甚麼。沼曰。始終只教某甲一向作主。祖便打推出。方丈曰。這般納敗缺底漢。有甚用處。沼於是服膺爲園頭。祖一日到園。問曰。南方一棒作麼生商量。沼曰。作奇特商量。良久。沼却問和尙。此間作麼生商量。祖拈棒曰。棒下無生。忍臨機不見師。沼於言下大徹。玄旨乃依止六年。

安隱忍曰。棒下無生。忍臨機不見師。卽玄要的旨。風穴於廓侍者處雖悟三玄。而未至於要安得。不有再悟耶。汾陽因僧問。如何是學人得力處。答曰。嘉州打大象。如何是學人轉身處。答曰。陝府灌鐵牛。如何是學人親切處。答曰。西河弄師子。乃曰。若人會此三句。已辨三玄。更有三要。語在。切須薦取。此無漸次中真。漸次無得失中真。得失也。洞宗亦曰。士庶公侯一道看。貴賤尊卑明位次。知此者可與言宗旨矣。

●城隍城

祥符蔭曰。汾陽他日。又曰。三玄三要。事難分得意。忘言道易。親合而觀之。可與言一句矣。沼英凜之氣。蚤蓋諸方。皆無留意。一言服膺於祖。便作園頭。今之到處受人名位。籠罩安排。向明窗淨几間者。所圖亦竟何事也哉。觀沼宜知愧矣。

禪師文益造地藏阻雪悟道  
益餘杭魯氏子。生而秀發。七歲剃染。弱齡稟具。究毗尼探儒典。振錫南遊。抵福州參長慶。不大發明。後同紹修法進三人。自漳州抵湖外。值天雨雪。溪流瀑漲。遂解包休於城隅古寺。入堂有老僧擁爐。三人附火。次老僧問益曰。此行何之。益曰。行脚去。曰。如何是行脚事。益曰。不知。曰。不知最親切。又同三人舉肇論至天地與我同根處。老僧曰。山河大地與諸上座是同。是別。益曰。別。老僧豎兩指。益曰。同。老僧又豎兩指。便起去。益大驚。及周行廊廡。讀寺額曰。石山地藏。乃知桂琛禪師也。雪霽辭去。琛門送之。問曰。上座尋常說三界惟心。萬法惟識。乃指庭下片石曰。且道此石在心。內在心。外。益曰。在。

心內琛笑曰。行脚人著甚來。由安片石在心頭。益窘無以對。遂辭修進。二人即放包依席下求決擇。近一月餘。日呈見解。說道理。琛語之曰。佛法不恁麼。益曰。某甲辭窮理絕也。琛曰。若論佛法。一切見成。益於言下大悟。

禪師慧清住芭蕉山

清得法於石亭湧住芭蕉山。拈拄杖示衆曰。你有拄杖子。我與你拄杖子。你無拄杖子。我奪却你拄杖子。靠拄杖子下座。

癸未梁龍德三年四月以後後唐莊宗李存勗同光元年

禪師洞山支下龍牙居遁寂

甲申後唐同光二年

祖付延沼正法印

祖一日問沼汝道四種料簡語料簡何法對曰。凡語不滯凡情。即墮聖解。學者大病。先聖憂之。爲施方便。如楔出楔。祖因問。如何是奪人不奪境。對曰。新出紅爐金彈子。這破闍黎鐵面皮。又問。如何是奪境不奪人。對曰。薊草乍分頭腦裂。亂雲初綻影。

猶存。又問。如何是人境俱奪。對曰。躡足進前。須急急捉。鞭常鞅莫遲遲。又問。如何是人境俱不奪。對曰。常憶江南三月裏。鷓鴣啼處百花香。又問。臨濟有三句。當日有問。如何是第一句。濟曰。三要印開。朱點窄。未容擬議。主賓分。沼隨聲便喝。又問。如何是第二句。濟曰。妙解豈容無著。問。溫和爭負。截流機。沼曰。未問以前錯。又問。如何是第三句。濟曰。但看棚頭弄傀儡。抽頭全藉裏頭人。沼曰。明破。即不堪。於是祖以爲可支。臨濟宗付以法印。

禪師誨機住黃龍

機嗣立泉彥住黃龍。一日。真人呂巖道經黃龍山。觀紫雲成。蓋疑有異人。乃入謁。值擊鼓陞堂。機見意必呂公。欲誘而進。厲聲曰。座旁有竊法者。巖毅然出曰。雲水道人。曰。忽遇雲盡水乾時。如何。巖無對。求代語。巖如前問。機曰。黃龍出見巖。問一粒粟中藏世界。半升鐘內煮山川。且道此意如何。機指曰。這守屍鬼。曰。爭奈囊中有長生不死藥。曰。饒經八萬劫。終是落空亡。巖飛劍。脇之。劍不能入。遂再

拜求指歸機曰半升鐺內煮山川即不問如何是一粒粟中藏世界巖言下頓契作偈曰棄却瓢囊撼碎琴如今不戀汞中金自從一見黃龍後始覺從前錯用心機囑加護巖字洞賓京川人

乙酉同光三年

丙戌

同光四年四月以後明年宗天咸元年越實正元年

丁亥

後唐天成二年吳乾貞元年

戊子

天成三年漢大有元年

禪師立沙下漳州羅漢院真應桂琛寂

琛後遷羅漢平居顏坐匡牀見僧來即舉拂子曰會麼對曰謝和尚指示琛曰見我豎拂子便謝指示汝每日見山見水可不指示汝耶又見僧來舉拂子其僧禮贊琛曰見我豎拂子便禮拜贊歎那裏掃地豎起蒼葦爲甚不贊歎閱世六十有二坐四十二夏沐浴坐化闍維收舍利建塔證真應

禪師行崇住谷山

崇嗣法保福展住谷山報恩謂門弟子曰吾雖不在未嘗不爲諸兄弟若委悉報恩常爲人處許汝出意想知解五陰身田若委不得保汝未出得意

想知解所以古人喚作鬼家活計蝦蟇衣下客欲得速疾相應卽如今立地便證驗取識取有什麼罪過不然根思遲迴且以日及夜尋究將去忽一日覷見更莫以少爲足更能研窮究竟乃至淫坊酒肆若觸若淨若好若惡以汝所見事覷教盡是此境界入如入律若見一法如毫髮許不見此箇事我說爲無明翳障直須不見有法是別底法方得圓備到這裏更能翻擲自由開合不成痕縫如水入水如火入火如風入風如空入空若能如是直下提一口劍刺斷天下人疑網一如不作相似所以古人道繁興大用舉必全真若有箇漢到與麼境界誰敢向前說是說非何以故此人是個漢超諸限量透出因果一切處管束此人不得若能如是卽可若未得如此直須好看莫取次發言吐氣沉墜却汝無量劫莫到與麼時便道報恩不道首建法眼宗第一世祖

諱文益地藏嗣餘杭魯氏子七齡秀發依新建全偉律師落髮詣趙州開元希覺律師受具足

戒初謁長慶無所契悟後叩地藏琛嗣法初住  
崇壽後住金陵清涼

大鑑下第九世法眼宗第一世祖首建法眼宗 書法同雲

安隱忍曰如金鑄器鐘孟鼎彝皆金而鼎不是鐘  
孟不是彝所用異也干將莫邪用在斬割臨濟雲  
門近之秦宮寶鏡用在兼攝曹洞濤仰似之而法  
眼則鼎也易曰鼎折足覆公餗蓋鼎三足而立廢  
一則傾嚴頭謂伊字三點略似宗門法眼以華  
嚴六相立爲宗旨慮後世學者偏局於一其意深  
矣六相者總別同異成壞是也而總不是別異不  
是同互爲子母以盡法界廣大之性開合之變如  
織錦回文詩一字百詠祖師之全體大用至五宗  
各立發揮盡矣玄沙宗旨有用處不換機與六相  
義相爲隱顯琛公善之至法眼專以此機接人故  
玄沙之道至法眼始大但學者未能細心研究不  
數傳而宗鏡出焉義解沙門倚以爲說可歎也

禪師雪峯支下天台靈曜慈濟澡先寂

先新豐翁氏子母夢梵僧風神爛然荷錫求宿孕  
時香霧滿室初事講說後棄謁雪峯峯記之曰子  
異曰爲王者師神人獻地開瑞嚴法席二虎侍側  
夏則衣楮冬則扣冰而浴人呼扣冰古佛後住靈  
曜上堂曰四衆雲臻教老僧說個甚麼便下座是  
年冬闍王延入內堂問法茶次先提起橐子曰大  
王會麼曰不會曰人王法王各自照了留十日以  
疾辭至十二月二日沐浴陞堂告衆而逝茶毗祥  
曜滿山獲五色舍利證慈濟

己丑 唐天成四年  
吳太和中 年  
庚寅 唐長興元年 年

臨濟第三世汝州南院 一名寶應 祖示寂 綱目作壬子年誤

祖上堂曰諸方只具啐啄同時眼不具啐啄同時  
用僧便問如何是啐啄同時用祖曰作家不啐啄  
啐啄同時失曰此猶未是某甲問處祖曰汝問處  
作麼生僧曰失祖便打其僧不肯後於雲門會下  
聞二僧舉此話一僧曰當時南院棒折那其僧忽  
契悟遂奔回省覲祖已圓寂乃謁風穴穴一見便

問上座莫是當時問先師啐啄同時話底麼。僧曰：是穴。曰：汝當時作麼生會。曰：某甲當時如在燈影裏行，相似穴。曰：汝會也。

祥符陰曰：唐季五代之際，巾子山下菩薩王於江南浙閩之間，佛法大振，跛脚阿師方崛起於嶺南，而法眼亦發軔於江右。禪苑宗風於斯爲盛，而祖壁立千仞，凝然不動，聲色坐震，雍容洞上，同安當新豐唱拍廣播之後，亦復風雲體道，花籃璇璣，是知傳持正脉，不在門庭施設，而真風綿亘，無可得而名也。

### 益祖住崇壽

祖住撫州崇壽院。上堂曰：盡十萬世界，皎皎地無一絲頭。若有一絲頭，卽是一絲頭。

### 臨濟第四世祖

諱延沼，餘杭劉氏子。親炙南院六年，而南院寂。

住汝州風穴。

辛卯二年

臨濟第四世汝州風穴祖嗣宗統四十年

### 祖居風穴

祖行化至汝水，見草屋數椽，依山如逃亡人家。問田父：此何所？田父云：古風穴寺。世以律居僧物，故又歲饑，衆棄之而去。餘佛像、鼓、鐘耳。祖曰：我居之可乎？田父云：可。祖乃留止，晝乞村落，夜然松脂，單丁者七年。

祥符陰曰：高風冷然，可想見也。傳持祖道，豈在鬧熱門庭哉。

壬辰三年

旃檀佛像復至江南

禪師雪峯支下長慶慧稜寂

稜兩處開法，衆恒一千五百化行，閩越二十七載。

五月日寂

禪師道匡補住招慶

癸巳唐長興四年  
閩龍啓元年

禪師玄沙支下大章山菴主契如寂

如參玄沙悟旨，隱小界山，剝大朽杉，僅能容身。居之禪者，清豁冲煦，同訪之，頗味高論，不覺及夜，觀

豺虎奔至菴前自然馴繞。豁有詩曰。行不等閑行。誰知去住情。一餐猶未飽。萬戶勿聊生。非道難應。伏空拳莫與爭。龍吟雲起。處閒嘯兩三聲。二人尋於大章創菴。請如居之兩處。孤坐垂五十二載而終。

祥符蔭曰。古人住山林。蛇虎皆馴。伏今人居城市。同類相仇。讐道心何處見。請試著眼看。看物我既一體。甯復有兩般心。外境無餘。斯可與言道。

曹洞宗第三世同安丕祖宗統止於是年。示寂年月燈錄不載。故書法如此。

曹洞第四世祖

諱□志生里未詳。嗣先同安。

曹洞宗第四世鳳棲祖。嗣宗統。三十。稱鳳棲別於前同安也。

先同安祖將示寂。上堂曰。多子塔前。宗子秀五。老峯前事。若何如是。三舉莫有對者。鳳棲祖出曰。夜明簾外安班立。萬里歌謠道太平。祖曰。須這驢漢始得。

甲午。四月以前唐僖宗從厚。應順元年以後廢年。帝從珂。清泰元年。蜀主孟知祥。明德元年。

唐立試僧科。試僧始此。

功德司奏。應立禪定科。講經科。文章議論科。持念科。以試僧。帝從奏。

禪師師靜隱居天台。

靜初參玄沙。值示衆曰。汝諸人。但能一生如喪考妣。吾保汝究得徹底。去靜躡前語問曰。祇如教中道。不得以所知心。測度如來。無上知見。又作麼生。沙曰。汝道究得徹底。所知心還測度得及否。靜從此信入。後居天台三十餘載。不下山。博綜三學。操行孤立。禪寂之餘。常閱龍藏。遐邇欽重。時謂大靜上座。嘗有人問弟子。每當夜坐。心念紛飛。未明攝伏之方。願垂示誨。靜曰。如或夜間安坐。心念紛飛。却將紛飛之心。以究紛飛之處。究之無處。則紛飛之念。何存。反究究心。則能究之心。安在。又能照之智。本空。所緣之境。亦寂寂而非寂者。蓋無能寂之人也。照而非照者。蓋無所照之境也。境智俱寂。心慮安然。外不尋枝。內不住定。二塗俱泯。一性怡然。此乃還源之要道也。同時有小靜上座。時號二靜上。

座並終於天台

乙未清泰二年吳天祚元年

丙申清泰三年十一月以後晉高祖年晉以前稱石敬瑭天福元閏主稷通文元長興七年

丁酉晉天福二年唐烈祖徐誥昇元元年

風穴道場成汝州牧請祖開堂

州牧盡禮請開法上元日示衆曰先師曰欲得親切莫將問來問會麼問在答處答在問處雖然如有時問不在答處答不在問處汝若擬議老僧在汝脚跟底大凡參學眼目直須臨機大用見前勿自拘於小節設使言前薦得猶爲滯殼迷封句下精通未免觸途狂見應是向來依他作解明味兩岐與汝一切掃却直教個個如師子兒吒呀地對衆證據哮吼一聲壁立千仞誰敢正眼覷著覷著卽瞎却渠眼

禪師省念至風穴

念萊州狄氏子爲人簡重有精識專修頭陀行纔具戒徧遊叢席常密誦法華經衆因目爲念法華至風穴爲知客隨衆作止無所參扣然終疑教外

有兄傳之旨

禪師雪峯支下龍冊道忞寂

忞自鏡清徙天龍吳越王一見曰眞道人也又創龍冊請居之學侶雲臻八月日寂

禪師德韶至崇壽領悟尋往天台

韶龍泉陳氏子母夢白光觸體覺而娠年十五有梵僧拊其背曰汝當出家塵中無置汝所也遂剃染受具徧參知識五十四人所至少留後至臨川謁崇壽祖祖一見深器之韶以徧涉叢林但隨衆而已無所咨參一日有問者曰如何是曹源一滴水祖曰是曹源一滴水韶於座側豁然大悟平生疑滯渙若冰釋感涕沾衣祖曰汝向後當爲國王師致祖道大光行矣無滯於是韶乃辭去遊天台觀智者遺蹤如故居瞭然有終焉之心

沙門衡嶽齊已寂

已益陽胡氏子出家大瀉持律耽吟詠謁德門發悟藥嶠石霜皆參請徧及後遊荆渚爲節度高季興留居龍興寺非其志也已頸有癭贅時號詩囊

◆氏隱氏

愛山水懶干謁有未曾將一字容易謁諸侯之句

與華山隱士鄭谷相酬唱其後居西山金鼓寂有

白蓮集行世自號衡嶽沙門明季海虞隱湖毛晉刻已及清畫真依存

山禪月白蓮集題曰唐三高僧詩集行世

戊戌天福三年

己亥天福四年

庚子天福五年

辛丑天福六年

壬寅天福七年

漢主玠光天元年

癸卯天福八年

唐元宗璟保太元殷主王延政天福元南漢主成乾和元年

益祖自報恩遷清涼

金陵國主自崇壽迎祖居報恩未幾遷清涼示衆

趙州曰莫費力也大好言語何不仍舊去世間法

尙有門佛法豈無門自是不仍舊故諸佛諸祖祇

於仍舊中得如初夜鐘不見有絲毫異得與麼恰

好聞時無一聲子闔何以故爲及時節無心曰死

且不是死止於一切祇爲不仍舊忽然非次聞時

諸人盡驚愕道鐘子怪鳴也且如今日道孟夏漸

熱卽不可方隔一日能較多少向五月一日道便

成賺須知較絲髮不得於方便中向上座道不是

時蓋爲賺所以不仍舊寶公曰暫時自肯不追尋

歷劫何曾異今日還曾麼今日只是塵劫但著衣

喫飯行住坐臥晨參暮請一切仍舊便爲無事人

也三界惟心頌曰三界惟心萬法惟識惟識惟心

眼聲耳色色不到耳聲何觸眼眼色耳聲萬法成

辦萬法匪緣豈觀如幻大地山河誰堅誰變華嚴

六相義頌曰華嚴六相義同中還有異異若異於

同全非諸佛意諸佛意總別何曾有同異男子身

中入定時女子身中不留意不留意絕名字萬象

明明無理事

甲辰晉齊王重貴開運元年

舊唐書成司空劉煦撰并載佛祖異述

乙巳開運二年

丙午開運三年

丁未開運四年二月後漢高祖劉鄩入汴仍稱天福九年漢嶺南劉晟乾和五年

戊申漢高祖劉鄩乾祐元年漢劉晟乾和六年

祖付省念正法

祖每念大仰有識臨濟一宗至風而止懼富之熱

視座下堪任法道無如念者一日念侍立次祖乃

垂涕告曰不幸臨濟之道至吾將墜於地矣念曰

觀此一衆豈無人耶。祖曰：聰明者多見性者少。念曰：如其者如何？祖曰：吾雖望子之久，猶恐耽著此經，不能放下。念曰：此亦可事。願聞其要。祖遂上堂。舉世尊以青蓮目顧視大衆，正當是時，且道說個甚麼？若道不說而說，又是埋沒先聖語。未卒，念便下去。祖歸方丈，侍者曰：念法華因甚，不祇對和尚。曰：渠會也。次日，念與真園頭同上問訊。次祖問真曰：如何？是世尊不說說真曰：鶻鵠樹頭鳴。祖曰：汝作許多癡福作麼？何不體究？言訖，又問念曰：汝作麼？生念曰：動容揚古路，不墮悄然機。祖謂真曰：汝何不看念法華下語？又一日，祖陞座，顧視大衆，念便下去。祖歸方丈，念自後泯迹，韜光人莫知其所。以一日，白兆楚至汝州，宣化祖。今念往傳語，纔相見，提起坐具，便問：展卽是不展？卽是楚曰：自家看取。念便喝。楚曰：我曾親近知識來，未嘗輒敢恁麼造次。念曰：草賊大敗。楚曰：來日若見風穴和尚，待一一舉似。念曰：一任不得忘却。念乃先回。學似祖。祖曰：今日又被你收下一員草賊。念曰：好手。

不張名次。日楚纔到，相見，便舉前話。祖曰：非但昨日，今日和賊捉敗，自是念名振諸方。祖乃付以正法。臨濟辭渴山時，仰山侍其旁，渴問仰曰：此人他日法道如何？仰曰：此人他日法道大行，吳越遇風，卽止渴。又問：嗣之者何人？仰曰：有卽有，只是年代深遠，不欲舉。似和尚渴固問之曰：吾亦欲知。仰曰：經不云乎？將此身心奉塵刹，是則名爲報佛恩。是知省念乃仰山後身也。

祥符蔭曰：道雖不在踐履，然非操履穩密者，不充荷持世尊大法，必顧命之苦行。尊者祖熟視可起欲墜之緒者，無如精修杜多行之念。法華可見傳道之力在於修證也。譬如寶舟得風，則千里瞬息然修證而不明道，則屬染汚。此南嶽所以云：修證卽不無污染，卽不得也。深心塵刹，矢願再來，大仰可謂眞報佛恩者矣。

### 禪師守初住洞山

初參雲門祖，祖問近離甚處。日查渡問夏在甚處。日湖南報慈。日幾時離彼。日八月二十五日放汝。三頓棒初罔然。至明日却上問訊。昨日蒙和尚放三頓棒，不知過在甚處。日飯袋子江西湖南便恁麼去。初於言下大悟。遂曰：他後向無人烟處不蓄。

●炎歷天

一粒米不種一莖菜接待十方往來盡與伊抽釘拔楔拈却灸脂帽子脫却鵝吳布衫教伊灑灑地作個無事衲僧豈不快哉曰你身如椰子大開得如許大口初便禮拜即日辭去北抵襄漢住洞山示衆言無展事語不投機乘言者喪滯句者迷祖自風穴避地往郢州

州守延祖於郡齋陞座曰祖師心印狀似鐵牛之機去即印住住即印破祇如不去不住印即是不印即是還有人道得麼時有盧陂長老出問學人有鐵牛之機請師不搭印祖曰慣釣鯨鯢澄巨浸却憐蛙步驟泥沙陂注思祖喝曰長老何不進語陂擬議祖便打一拂子曰還記得話頭麼陂擬開口祖又打一拂子維時州守曰信知佛法與王法一般祖曰見甚麼道理守曰當斷不斷反招其亂祖便下座

己酉後漢乾祐二年南漢晟乾和元年

首建雲門宗第一世大慈雲匡眞弘明祖示寂

祖住雲門廣主盡誠供養四月十日垂遺誠已端

坐而寂

安隱忍曰雲門說法天縱如新生驥駒不受控勒信乎開宗建始之大醫王也德山曰有言時踞虎頭收虎尾第一句下明宗旨無言時覲露機鋒如同電拂巖頭雪峯大闡明之至雲門與玄沙羅山輩益精深奧當時有問五祖演曰如何是雲門下事曰紅旗閃爍蓋兼得夫睦州雪峯之髓歟其於衲子淘鑄聖凡情見盡淨不留絲忽是故嗣其法者七十餘人臨生死若門開相似率多坐脫德山密洞山初香林遠巴陵鑒四老其超類者也初之示衆曰言無展事語不投機承言者喪滯句者迷雲門家風大都如此

庚戌乾祐三年是年漢亡

佛滅後一千九百年

勅賜汝州新寺名廣惠

辛亥後周太祖郭威廣順元年

祖先因避寇來郢州寇平汝州有宋太師者施第爲寶坊號新寺迎祖居焉法席冠天下學者自遠而至勅賜寺名廣惠

壬子廣順二年

癸丑廣順三年

旃檀佛像至汴京

甲寅周世宗柴榮顯德元年

乙卯顯德二年

九月周詔廢毀銅像以鑄錢

是時天下乏錢用。謂侍臣曰。佛以善道化人。苟志於善。斯奉佛矣。彼銅像豈所謂佛耶。且吾聞佛志在利人。雖頭目猶捨以布施。若朕身可以濟民。亦非所惜也。乃詔悉毀天下銅像。以鑄錢。廢天下寺院三千三百三十六。

祥符蔭曰。周世宗之言。似是而非也。頭目布施。在佛自行利濟則可。而乃藉以毀像。則失之甚矣。夫佛尚不有何有於像。像也者在以攝化衆生者也。衆生因像而知有佛。因佛以知有自性之真佛。安在像之非佛耶。佛無量劫中行難行之苦行。徧三千大千世界。無有如芥子許。不是曾捨身命。處爲求大法以度衆生。佛之恩德如此。今之得生人天。

中者皆盡承佛之慈光照。及不然。方三途沉溺之不暇。而何由出離苦趣乎。幸得爲一日之人。王於電光隙影中。不思酬恩報德。而乃謾加毀廢。所得無幾。墮陷無間。噫。如世宗者。亦可憫夫。

丙辰顯德三年

丁巳顯德四年

戊午周顯德五年南唐中興元年

己未顯德六年

法眼宗首建第一世清涼大法眼祖示寂

祖緣被金陵三坐大道場。化行異域。隨根悟入者。不可勝紀。七月十七日示疾。國王親加禮問。閏月五日剃髮沐身。告衆跏趺而逝。壽七十有四。臘五十四。緇素具威儀。公卿已下。素服奉全身塔於江甯縣丹陽鄉。謚大法眼。

宋姓趙氏。代周而有天下。以火德王都汴京。

太祖諱匡胤。在位十七年。

太祖庚申建隆元年

禪師雪竇延壽遷靈隱

壽字冲玄。餘杭王氏子。嗣通玄。詔出世雪竇學者。

歸之是年吳越王見靈隱傾廢請壽中興之

禪師九峯下吉州禾山無殷寂

殷九峯虔嗣福州吳氏子僧問習學謂之聞絕學謂之鄰過此二者謂之真過如何是真過殷答曰禾山解打鼓曰如何是真諦答曰禾山解打鼓問即心即佛則不問如何是非心非佛答曰禾山解打鼓曰如何是向上事答曰禾山解打鼓臨寂集衆曰後來學者未識禾山即今議取於是泊然而化

辛酉二年

詔誕聖節京師及天下命僧陞座祝壽聖始此禪師法眼下永明道潛寂

潛法眼嗣四衆士女入院次眼問曰律中道隔壁聞鈸釧聲即名破戒見前金銀合雜朱紫駢闐是破戒不是破戒潛曰好個入路眼曰汝向後有五百義徒爲王侯所重潛後於衢州古寺閑藏宴坐中見文殊見形詣阿育王禮塔見舍利飛動行三七日普賢懺見普賢乘象在塔寺三門亭下後住

永明九月十八日寂入棺之際白光晝發火浴舍利不可勝紀有屠者自惟惡業展襟就火聚乞求須臾獲七顆

靈隱延壽補住永明

永明虎席吳越王請壽住持衆至二千時號慈氏下生上堂僧問如何是永明妙旨曰更添香著曰謝師指示曰且喜交涉僧禮拜壽曰聽取一偈欲識永明旨門前一湖水日照光明生風來波浪起

壬戌三年

詔每年試童行通蓮經七軸者給祠部牒披剃試經給牒此始

癸亥乾德元年

禪師大滙下大隨開山神照法真寂

真嗣大滙安住大隨木禪菴蜀王三詔不起就錫紫衣寺額堅却不受僧問劫火洞然大千俱壞未審這個壞不壞真曰壞曰怎麼則隨他去也真曰隨他去七月十五日辭衆端坐而化

甲子二年

禪師光祚住智門

祚浙江人入蜀參香林遠受心印回住隨州智門上堂山僧記得在母胎中有一則語今日舉似大眾諸人不得作道理商量還有人商量得麼若商量不得三十年不得錯舉

法師義寂重興天台教於螺溪

寂永嘉胡氏子母初懷姙不喜葷血出家受具學止觀於清竦嘗慨天台教文屢經兵火傳者無憑乃懇國師韶曰智者之教年祀浸遠率多散落惟新羅國其本甚備非和尚慈力孰能致之韶聞於吳越王王乃遣使及責韶書往高麗國繕寫備足而還王爲寂建寺螺溪賜號淨光

曹洞宗第四世鳳棲志祖宗統止於是年

曹洞宗第五世祖

諱緣觀住朗州梁山

乙丑三年

曹洞宗第五世朗州梁山祖嗣宗統約三十年

僧問如何是和尙家風祖曰資楊水急魚行澀白鹿松高鳥泊難

禪師奉先下廬山蓮花峯祥菴主寂

祥得旨於奉先深爲雲門第三世住菴蓮花峰每拈拄杖示衆曰古人到這裏爲甚麼不肯住前後二十年無有契其機者示寂乃自代曰爲他途路不得力復曰畢竟如何又以杖橫肩自代曰柳標橫擔不顧人直入千峯萬峯去言畢而逝

丙寅四年

禪師惟善住福昌

善參雙泉寬得悟住荊南福昌寺爲人敬嚴秘重法道初住時屋廬十餘間殘僧數輩善晨香夕燈陞座說法如臨千衆十餘年而弟子方集諸方畏服

丁卯五年 三月五  
星聚奎

戊辰開寶元年

己巳二年

詔天下僧長春節上表入殿廷試賜紫衣號  
庚午三年 辛未四年 廷試賜衣始此

壬申五年

禪師廬山歸宗道詮以偈止試經

詮延壽輪嗣乾德初結茅廬山是年洪帥林仁肇請住筠陽九峯賜大沙門號時僧徒例試經業詮以禪衆多習禪乃述一偈聞於州牧偈曰北擬忘言合太虛免教和氣有親疎誰知道德全無用今日爲僧貴識書州牧閱之曰旃檀林中必無雜樹特奏免試經

禪師法眼下天台德韶寂

韶住天台吳越王申弟子禮示衆偈曰通玄峯頂不是人間心外無法滿目青山六月二十八日集衆言別跏趺而逝時謂智者預求

癸酉六年

臨濟第四世風穴祖示寂

八月旦日先陞座示偈曰道在乘時須濟物遠方來慕自騰騰他年有叟情相似日日香烟夜夜燈至望日跏趺而化前一日手書別檀越閱世七十有八坐五十九夏

歷年表曰自臨濟首建宗旨於唐大中三年己巳至宋開寶六年癸酉中間五宗諸祖迭興互相闡化一花五葉夙識芳疏震旦宗乘渾成大備譬之世治文章禮樂猗歟三代之隆玉振金聲展也大成之雅維時諸藩列鎮肅稟金湯吳越閩廣均標旂鼓醍醐甘露漉羣黎於熱惱之中心地性天示斯民於分崩之際垂慈至矣利物弘焉五宗盛化凡一百二十四年

宗統編年卷之十八

宗統編年卷之十九

臨濟第五世祖

諱省念萊州狄氏子受業於本郡南禪寺纔具尸羅徧遊叢席常密誦法華經衆稱爲念法華晚於風穴嗣法歷住首山廣教寶應  
宋太祖甲戌開寶七年

臨濟第五世首山祖嗣宗統二十  
年  
祖住汝州首山

示衆曰。諸上座。不得盲喝亂喝。尋常向你道。賓則始終賓。主則始終主。賓無二賓。主無二主。若有二賓二主。即是兩個瞎漢。所以我若立時你須坐。我若坐時你須立。坐則共你坐。立則共你立。雖然如是。到這裏急著眼。始得若是。眼目定動。卽千里萬里。何故如此。如隔窗看馬騎。相似擬議。卽沒交涉。祥符蔭曰。若能作賓。方能作主。若能作得賓中賓。方能作得主中主。今之一等知識。只知在賓全正。令而忘立。主要須圓。所以只知步步登高。不解從空放下。只知坐斷千佛頂額。不解隨一切衆生。腳跟轉。只成主中主。不成賓中賓。若槩以賓主歷然混之。此中正自饒。侗不少一喝分賓主是也。全在照用一時行眼目。定動卽沒交涉。師子象王。半身全體。豈容擬議於其間哉。

禪師法眼。下第三世杭州報恩永安寂

安韶國師。嗣住報恩。告衆問答。踟躕而逝。茶毗舌。

根不壞柔軟如紅蓮花

乙亥八年

禪師法眼。下第三世永明智覺延壽寂

壽乘願爲震旦法施主。居永明十五載。度弟子一千五百人。入天台山度戒。萬餘人。常與七衆授菩薩戒。夜施鬼神食。朝放諸生類。六時散花。日夕修持。百八事。寒暑無替。聲被異國。高麗遣僧航海問道。受師印記者三十六人。其國王投師叙門弟子之禮。是年十二月示疾。二十六日辰時焚香告衆。踟躕而化。塔全身於大慈山。壽以賢首慈恩天台三宗互相冰炭。不達大全。館其徒之精法義者於兩閣。博閱羣籍。更相質難。壽以心宗之衡準平之。又集大乘經論六十部。西天此土聖賢之言三百家。證成維心之旨。爲書一百卷。目曰宗鏡錄。吳越王錢俶序而行之。

祥符蔭曰。沙門行道。須是福慧二嚴。若永明壽方無愧忝眞震旦法檀大乘龍象也。

丙子九年十二月太平  
興國元年

太宗名匡義太祖之弟  
在位二十二年

太宗丁丑太平興國二年

禪師雲門下第二世韶州雙峯竟欽寂

欽雲門嗣住雙峯三月謂門人曰吾不久去矣可砌個卵塔五月二十三日工畢欽曰後日子時行矣及期適雲門爽溫門舜諸老夜話侍者報三更欽索香焚之合掌而化

禪師清溪下廬山圓通道濟緣德寂

德嗣清溪進住圓通宋齊邱至僧衆趨迎德閱經自若邱問看甚麼經德舉經以示邱異之曹翰統兵入寺德宴坐如平日翰至不起翰怒曰汝不聞殺人不眨眼將軍乎德熟視曰汝安知有不懼生死和尚耶翰警悚欽歎問曰禪者何爲而散德曰擊鼓自集翰遣裨校擊之無至者德曰公有殺心故爾因自起擊之禪者乃集翰拜問決勝之策德曰非禪者所知德住持無所事事惟頽然默坐而學者自成規矩平生著一裙裙夜申其裙以當被十月七日陞堂告衆而化謚道濟

戊寅三年

詔改曹溪爲南華寺

知禮從法師寶雲義通傳天台教觀

禮字約言四明金氏子父母艱嗣禱於佛夢僧携童子授之曰此佛子羅睺羅也出家具戒學於寶雲通傳天台教旨

己卯四年

庚辰五年

辛巳六年

壬午七年

詔立譯經傳法院於東京如唐故事

沙門贊甯奉勅修撰高僧傳

靈隱禮曰臣僧之稱始於贊甯清規一書多受更竄自後臣僧之稱遵行勿失雖英邁俊傑如妙喜亦無能挽回風運其氣象亦止似與兩宋名臣碩儒相頡頏欲如南陽忠國一欽懶殘黃檗一輩尊宿確乎以師道自守相去遠矣信乎唐宋一代人文迥不相及雖出世大士亦不能不受域也與時偕行又何疑乎

祥符陰曰雲門大師遺表有云伏念臣跡本寒微

生從草莽之語是稱臣不始於贊甯也。但更竄大智清規爲蔑裂從上法式耳。然雲門法中特起之王南漢乃偏霸之主。似不應稱臣存之以藉疑云。癸未八年。

禪師善昭來參於祖言下大悟。

昭器識沉邃。少緣飾。有大智歷參諸方。知識七十。一員皆妙得其機用。最後至首山。一日祖陞座。昭出問曰。百丈捲席意旨如何。祖曰。龍袖拂開全體。見昭曰。師意如何。祖曰。象王行處絕狐踪。昭於言下大悟。拜起曰。萬古碧潭空界月。再三撈捉始應知。服勤久之。遂付正法。

甲申雍熙元年

乙酉二年

祖住寶安山廣教禪院

入院上堂有僧問曹溪一句。天下人聞廣教一句。什麼人聞。祖曰。不出三門外。僧曰。爲什麼不出三門外。祖曰。舉似天下人。元璉來參。領悟。

13

璉參舉一日。問學人親到寶山。空手回時如何。曰。家家門前火把子。璉當下大悟。曰。某甲不疑天下老和尚。舌頭也。曰。汝會處作麼。生與我說來看。璉曰。祇是地上水碓砂也。曰。汝會也。璉便禮拜。禪師法眼。下第三世杭州五雲山華嚴志逢寂。

逢得法於韶國師。一日宴坐。有神人跪膝於前。逢問汝其誰乎。曰。護戒神也。師有一小過。凡折鉢水。每傾棄之。非所宜也。逢自此洗鉢水盡飲之。凡遇退飲食及涕唾便利等並宜喝指默念呪發施心而傾捨之大將凌超於五雲山創院奉供。逢每出携大扇乞錢買肉飼虎。虎每迎之。載以還山。

丙戌三年

歸省參祖領悟言下

省參祖。祖一日舉竹篋問曰。喚作竹篋。卽觸不喚作竹篋。卽背。喚作甚麼。省掣得擲地上曰。是甚麼。祖曰。瞎省於言下大悟。

丁亥四年

楚圓生於全州李氏

禪師雲門下益州香林澄遠寂

遠綿竹上官氏依雲門十八年爲侍者門不許學者記持語言遠以紙爲衣凡有言句皆密書之初住西川迎祥寺復住青城香林大振雲門法道將寂辭知府宋瑤曰老僧行脚去通判曰這僧風狂八十歲行脚去那裏宋曰大善知識去住自由歸謂衆曰老僧四十年方打成一片言訖而逝

法師中興天台教觀螺溪義寂寂

初荆溪五傳至清疎疎傳義寂志因

自後分爲兩宗寂傳義通通傳知禮禮傳式志因傳晤恩恩傳洪敏源清清傳智圓慶昭昭傳繼齊咸潤各師其說知禮關爲山外宗云

戊子端拱元年

詔撰三教聖賢事跡

贊甯撰集宋高僧傳成

傳凡三十卷分爲十科一譯經二義解三習禪四明律五護法六感通七遺身八讀誦九興福十雜科本傳五十三人附見一百三十人表上詔褒答之賜絹三千疋令編入大藏  
祥符陰曰甯既未達禪宗文筆亦復冗雜詮次闕

茸備覽而已

性宗法師寶雲義通寂

通受學螺溪住寶雲精研教觀茶毗得舍利五色

建塔

沙門遵式苦學感疾入台疾愈

發明書之以爲力行延壽者勸

式四明人母夢吞明珠而生受學於寶雲通苦學

感疾幾殆乃入天台自誓曰若教興在我則疾有

廖否則畢命持呪滿七七日間空中聲曰十方諸

佛增汝福壽是夕見巨人持金剛杵擬其口觀音

大士垂手於其口引出數蟲復注甘露疾頓愈

己丑二年

祖住寶應

祖徇衆請入寶應禪院

爲南院第三世

三處法席海衆雲

臻

智嵩來參有省

嵩參祖問如何是佛法的大意祖曰梵王城畔

汝水東流嵩有省

庚寅淳化元年

禪師雲門下洞山宗慧寂

僧問如何是佛答曰麻三斤七月無疾踟躕而化

禪師鏡清下衢州烏巨山開明儀宴寂

宴禪定深入太宗加禮詔延不起錢忠懿王錫號

開明壽一百十五闍維白光燭天舍利五色

僧師善昭遊遊湘河

長沙守張茂宗以四名刹請擇居昭一笑而去襄

陽守劉昌言恨見之晚時洞山谷急諸名利皆虛

席前後入請堅臥不答

禪師雲門下洞山守初寂

初嗣雲門住洞山四十年道及天下秋無疾而化

禪師洪謹隱迹南嶽

護翼水尾氏子遊方禮祖言下大悟乃入南嶽山

隱於三生藏

辛卯二年

禪師雲門下第四世南安嚴尊者自嚴寂

嚴契心法於西峯雲谿頗著異跡有沙彌無慧而  
事嚴謹愿嚴惑之作偈使誦偈曰大智發於心於

心何處尋成就一切義無古亦無今久之世間章

句吾伊上口正月六日集衆曰吾此日生今正是

時右脇而化

壬辰三年

祖上堂示衆

十二月四日上堂示衆曰今年六十七老病隨緣

且遣日今年記却來年事來年記却今朝日

祖示綱宗偈汾州

偈曰咄哉拙郎君汾州素巧妙無人識運機非

打破鳳林關蕩盡玲瓏性著靴水上立塵泥咄哉巧女

兒妙智理攬校不解織無間功看他鬪雞人旁觀

不自傷水牛也不識全力能負背陰山子向陽多

葉縣省曰南來北住意如何不墮有若人問我西

來意從來無東海東面有新羅大地不

安隱忍曰汾州葉縣注綱宗三偈徹法源底惟雪

竇得其體裁後世未有繼之者或曰達摩不立文

字豈有禪宗加註釋乎譬如愚人傲慢王憲曰我  
欲法羲皇耳

慈聰來參領悟

聰參祖問學人親到寶山空手回時如何祖曰家  
家門前火把子聰言下大悟

禪師智嵩住并州承天

癸巳四年

臨濟第五世汝州首山祖示寂

十二月四日上堂示衆曰白銀世界金色身情與  
無情共一眞明暗盡時俱不照日輪午後是全身  
言訖安坐日將昃而逝闍維舍利五色

臨濟第六世祖

諱善昭太原龔氏子

甲午淳化五年

臨濟第六世汾州祖嗣宗統三十

祖至汾州沙門契聰排闥請之

發明創牘者道俗  
千人排闥而

起之者聰也  
故書法如此

首山祖寂西河道俗千餘人協心創牘遣沙門契  
聰迎請住持汾州太平寺院祖閉關高枕聰  
排闥而入讓之曰佛法大事靜退小節風穴懼應

識憂宗旨墜滅幸而有先師先師已棄世汝有力  
荷擔如來大法者今何時而欲安眠哉祖矍起握  
聰手曰非公不聞此語促辦嚴吾行矣既至宴坐  
一榻足不越閭者三十年天下道俗仰慕不敢名  
同曰汾州

安隱忍曰生死之大事不了不容不遍參生死之  
大事觀破不容不休去惟師匠而後我之生死根  
株頓斷不容不起荷法之心此昭祖入辭住持而  
末上欣然肯來也祖接人下刃處有大方便故得  
慈明等大士出其門皆氣宇如王至楊岐白雲五  
祖而濟上宗風益振今而知汾陽爲中興也

祖示十智同眞

上堂示衆曰夫說法者須具十智同眞若不具十  
智同眞邪正不辨縑素不分不能與人天爲眼目  
決斷是非如鳥飛空而折翼如箭射的而斷絃絃  
斷故射的不中翼折故空不可飛絃壯翼牢空的  
俱微作麼生是十智同眞與諸上座一一點出一  
同一質二同大事三總同參四同眞志五同徧普

六同具足。七同得失。八同生殺。九同音吼。十同得入。又曰。與甚麼人同得入。與阿誰同音吼。作麼生是同生殺。甚麼物同得失。阿那個同具足。是甚麼同徧普。何人同真志。孰能總同。參那個同。大事何物同一質。有點得出的。麼點得出者。不吝慈悲。點不出來。未有參學眼在。切須辨取。要識是非面目。見在。

徑山杲曰。汾陽老子末後。若無個面目。見在一場敗闕。雖然如是。未免喪我兒孫。喝一喝。頌曰。兔角龜毛。眼裏栽鐵。山當面勢。崔嵬。東西南北。無門入。曠劫無明。當下灰。

祥符蔭曰。臨濟六傳而至汾州。百二十餘年。大綱要旨。流播彰彰。在人耳目。若非汾州祖密提樞紐。括剔玄微。主賓玄要。蚤同土籠。瓦鼓供人描邈矣。是以祖嘗有頌曰。三玄三要。事難分得意忘言。道易親。一句明明。該萬象。重陽九日菊。花新。故善提挈。變化臨濟氏之道者。莫如我汾州祖也。

乙未至道元年

禪師警玄至梁山頌旨

玄江夏張氏子十九爲大僧。聽圓覺了義。問何名圓覺。曰。圓以圓融。有漏爲義。覺以覺盡。無餘爲義。玄笑曰。空諸有。無何名圓覺。講者嘆曰。是兒齒少。識卓如此。我所有何足以益之。政如以穢食置寶器。其可哉。遊方謁梁山。問如何。は無相道場。祖指觀音曰。這個是吳處士。畫玄擬進語。祖急索曰。這個是有相底。那個是无相底。玄遂有省。便禮拜。祖曰。何不道取一句。玄曰。道卽不辭。恐上紙筆。祖笑曰。此語上碑去。在。玄呈偈曰。我昔初機學道迷。萬水千山覓見知。明今辨古終難會。直說無心轉更疑。蒙師點出秦時鏡。照見父母未生時。如今覺了何所得。夜放烏雞帶雪飛。祖稱謂可與洞上之宗。禪師法眼。下第三世溫州瑞鹿寺遇安寂。

安嗣天台韶破句讀。楞嚴經悟道。將寂辭衆。澡身易衣。安坐令舁棺。至良久。自入棺。經三日。門人啓棺。觀安右脇吉祥而臥。四衆哀慟。安乃再起。陞堂說法。誠衆復入棺而寂。

丙申二年

丁酉三年

分天下州軍爲十五路  
京東京西河北河南陝西江東江西浙東浙西淮南京湖福建劍南東劍南西廣南

禪師澄湜住棲賢

湜嗣百丈恒住棲賢性高簡律身精嚴動不違法

三終藏經以坐閱爲未敬立誦行披之

禪師清涼下雲居道齊寂

齊嗣清涼欽擊鐘集衆笑敘出家本末揖謝輔佐

叢席者而化

眞宗名恒在位二十五年

眞宗戊戌咸平元年

己亥二年

曹洞宗第五世朗州梁山祖示寂

曹洞宗第六世祖

諱警立祥符中避國諱易爲警延江夏張氏子

嗣梁山山寂辭塔出山至太陽

庚子三年

曹洞宗第六世郢州太陽祖嗣宗統二十八年

祖住太陽明安

祖辭梁山祖塔出山至郢州太陽主席堅禪師欣

然讓法席請主之退處偏室祖受其請上堂曰諸

禪德須明平常無生句妙立無私句體明無盡句

第一句通一路第二句無賓主第三句兼帶去一

句道得師子頤呻二句道得師子返擲三句道得

師子踞地縱也周徧十方擒也一時坐斷正當恁

麼時作麼生通得個消息若不通得個消息來朝

更獻楚王看

辛丑四年

禪師蘊聰住谷穩

壬寅五年

癸卯六年

甲辰景德元年

禪師元璉住汝州廣慧

楊億字大年建甯人幼舉神童及壯負才名而未

知有佛一日過同僚見讀金剛經笑且罪之彼讀

自若億疑之曰是豈出孔孟之右乎何倭甚因閱

數葉茫然始少敬信後會翰林李維勉令參問及

由秘書監出守汝州。首謁璉於言下。脫然無疑。作偈曰。八角磨盤空裏走。金毛師子變作狗。擬欲將身北斗藏。應須合掌南辰後。

乙巳二年

丙午三年

清剖顯如參太陽俱悟旨

剖參太陽祖得悟。作園頭有僧問。剖妙竭出海乾。坤震觀面相呈事。若何。曰。金翅鳥王當宇宙箇中。誰是出頭人。曰。忽遇出頭時。又作麼生。曰。似鶻捉鳩。君不信。鬪體前驗。始知真。曰。恁麼則又手當胸。退身三步也。曰。須彌座下烏龜子。莫待重遭點額。回羅浮山顯如參祖。祖問汝是甚處人。曰。益州。曰。此去幾里。曰。五千里。曰。你與麼來。還曾踏著麼。曰。不曾踏著。曰。汝解騰空耶。曰。不解。騰空曰。爭得到這裏。曰。步步不迷。方通身無辨處。曰。汝得超方三昧耶。曰。聖心不可得。三昧豈彰名。曰。如是如是。汝應信。此即本體全彰。理事不二。善自護持。

丁未四年

沙門道原纂傳燈錄成曰景德傳燈錄

起自七佛終於咸平三年庚子。濟宗止於汾州洞宗止於太陽。共諸方廣語凡三十卷。

祥符陰曰。宗門師匠絕迹忘言。向上全提。與人相見而禁記持言句。所以傳燈一書久無人纂。道原因寶林傳聖胄集纂成傳燈錄。翰林楊億員外李淮等共爲校定。眞宗撰序頒入大藏。可謂法門文獻足徵之典。但以一人而定五宗世系。容有擇而不精。語而不詳者。史之闕文。孔子以吾猶見爲幸。則甚矣立言之難也。寶林傳文字鄙俗。序致繁亂。明教嵩嘗言之矣。又豈無舛漏之失乎。

戊申大中祥符元年

楚圓出家

圓少爲書生。連眉秀目。頎然豐碩。年二十二依湘山靜隱寺出家。其母有賢行使之遊方所。至忽繩墨爲老宿所訶。圓崖柴而笑曰。龍象蹴蹋非驢所堪。嘗蒙骨董箱以竹杖荷之遊襄沔間。禪師法眼下第三世溫州瑞鹿寺本先寂。

先韶國師嗣住瑞鹿。足不歷城邑。手不度財帛。不設臥具。卯齋終日。宴坐申旦。三十年如一日。二月謂上首如晝。曰可造石龕。中秋望日。吾將順化。及期。遠近趨仰。先參問如常。至午坐方丈。手結寶印。與如晝問答。罷奄一日微視而逝。

己酉二年

禪師洞山道詮移住棲賢。以曉聰繼席。

聰。曲江杜氏子。少出家。頭角嶢然。一帔閱寒暑。周遊荆楚。飫厭保社。由雲居至洞山。依詮座下。詮移棲賢。以聰繼其席。示衆一大藏教。是個之字。祖師西來。是右字。作麼生。是正義。良久曰。天晴蓋却屋。趣閑打却禾。輸納王租了。鼓腹自高歌。聰凡見僧來。有所問。輒瞋目視之曰。我擊虎衛汝。不會去。衡嶽謠住神鼎。

謠隱衡嶽二十年。有湘陰豪貴來遊。福嚴見謠氣貌閑靜。一鉢挂壁。餘無長物。傾愛之。遂拜跪請曰。師甯甘長客於人。亦欲住山乎。神鼎乃我家植福之地。久乏宗匠。願師俱往。謠笑曰。諾。乃以已馬迎。

謠還謠至神鼎。設魚鼓粥飯。如諸方。一年成叢席。十年有衆三十輩。

禪師歸省住葉縣

省住持。嚴冷枯淡。法遠義懷。往參時。方寒雪。省訶罵驅逐。至以水潑地。僧皆怒而去。惟遠懷整濕衣。安坐省曰。你更不去。我打你。遠曰。某二人數千里來。參和尚。豈以一杓水潑便去。即打殺也不去。省乃令掛搭。續命遠充典座。衆苦枯淡。遠乘省出竊取油麪。爲衆僧造五味粥。省知。算所值。罰遠估衣鉢。還訖。打趁出。因寄居廊房。省出見。復索租錢。遠持鉢於市化錢。還之。省乃曰。遠真有意參禪。乃呼之歸。

祥符陰日。神鼎葉縣皆當時明眼尊宿。其高風冷韻。乃如此。後世喜行平易。徇門庭者。或未之思。夫庚戌三年。

楚圓至汾州

圓與守芝谷泉俱結伴入洛中。聞汾州祖望爲天下第一。決志親依。時朝廷方問罪河東潞澤。皆屯

重兵多勸其無行圓不顧渡大河登太行易衣類  
斷養竄名火隊中露眠草宿至隴州遂造汾陽祖  
壯之先是祖預告首座非久有與僧至傳持吾道  
一日忽率首座出山曰接待者去果逢圓至

祥符陰曰寒梅雪冷翠竹霜清其與芳草繁花低  
徊於和風甘雨之下者風韻自異矣求師者如圓  
芝之造汾州煅鍊來學如葉縣之待懷遠方有少  
分禪子風規校他煖室商量淨几安排者相去夫  
何如哉

辛亥四年

異僧至汾州請法

并汾苦寒祖暫罷夜參有異比丘振錫而至謂祖  
曰會中有大士六人奈何不說法言訖騰空而去  
祖密記以偈曰胡僧金錫光請法到汾陽六人成  
大器勸請爲敷揚時楚圓守芝慧覺智圓  
谷泉齊舉等在座下

禪師楚圓悟道

圓每詣祖祖揣其志必詬罵使令者或毀詆諸方  
及有所訓皆流俗鄙事一夕訴曰自至法席已再

夏不蒙指示但增世俗塵勞念歲月飄忽已事不  
明失出家之利語未卒祖熟視罵曰是惡知識敢  
裨販我怒舉杖逐之圓擬伸救祖掩其口圓大悟  
曰乃知臨濟道出常情

祥符陰曰眞師成就學者如天地陶冶萬物造化  
無痕和風甘雨亦且不得已而用之況迅雷掣電  
手觀祖之於圓可見今之打七坐香扭捏人家鼻  
孔者皆第二三等接人者也謂之門庭施設則可  
若云行此出情之道則未也然學者豈盡能如圓  
哉則今之門庭施設正自不可少也金將火試王  
將石攻宗師垂手接人不出常情之外學者不離  
常情之中會歸出情之道方不負參學邊事也

居士李遵勗謁谷隱參悟了截居士中  
無如易者故書之

都尉李遵勗謁谷隱聰問山家事聰舉徑山欽答  
崔趙公話出家乃大丈夫事非將相之所能爲勗  
於言下大悟說偈曰學道須是鐵漢著手心頭便  
判直趨無上菩提一切是非莫管

壬子五年

癸丑六年

重顯參北塔祚得其道

顯遂甯李氏子。浮沉荆渚間。橫經講席。無有抗其鋒者。嘗與客太陽。與客論趙州宗旨。時有苦行名韓大伯者。貌寒癯。侍其旁。輒匿笑而去。客退。顯數曰。我偶客語。汝笑何事。曰。笑知客智眼未正。擇法不明。顯曰。豈有說乎。對以偈曰。一兔橫身當古路。蒼鷹才見便生擒。後來獵犬無靈性。空向枯椿舊處尋。顯陰異之。結以爲友。北遊至復州。北塔參光祚。卽伸問曰。不起一念云何。有過祚召顯近前。顯纔近前。祚以拂子薰口。打顯。擬開口。祚又打顯。豁然開悟。留止五年。盡得其道。

甲寅七年

乙卯八年

丙辰九年

丁巳天禧元年

禪師楚圓受祖記。囑造洞山爲第一座。

圓服役七年。同守芝。辭祖。祖曰。此行不可以戒臘推聽。吾傷曰。天無頭。吉州城外起戈矛。將軍匹馬林下過。員州城裏鬧。啾啾圓遽出。班曰。楚圓何

人敢受和尚如此記。荆祖囑之曰。吾在先師處親證三昧。汝今已得宜。往南方大興。吾道先是祖謂圓曰。我偏參雲門。兒孫特以未見聰爲恨。圓以母老。乃辭祖歸筠州。於路訪唐明嵩。與楊億。李遵勗。機語投契。尋造洞山。聰陞堂請居第一座。安隱忍曰。汾州參善知識者七十一人。猶以不見聰老爲恨。慈明已悟出情之道。又依聰三年。可謂朝宗百川。故爲當世仰重如此。

戊午二年

禪師守芝住大愚

芝自受汾陽心印。辭遊南方。住高安大愚。僧問。如是佛。芝曰。鋸解稱錘。

禪師重顯出世翠峯

顯自得法智門。乃復徧參洞山大龍南嶽大愚諸宗匠。初學士會。會與顯厚善。相值淮上。問顯何之。顯曰。將遊錢塘。絕西興。登天台。雁蕩。會曰。靈隱天下勝處。珊禪師吾故人。以書薦顯。顯至靈隱三年。陸沉衆中。俄會奉使浙西。訪顯於靈隱。無識之者。

時堂中僧千餘。使吏檢牀歷物色。乃至會問向所附書。顯袖納之。曰。公意動然。行脚人於世無求。敢希薦達。哉。會大笑。嘲奇之。吳江翠峯。虛席舉顯出。世燒香法嗣北塔。

### 神鼎謹說法智度

謹住神鼎。枯淡無比。一朽木牀。夜則謹坐其上。三十輩環聽。其誨智度。寺沙門本。延請謹夜語。還謂郡守曰。謹公所謂本色老宿。惜陸沉山中。郡以禮請開法。謹辭不得。乃陞座說法。道俗歡呼。得未曾有。於是謹名聲普聞。

己未三年

庚申四年

### 禪師楚圓開法南源

圓在洞山。首衆三年。辭去。遊仰山。楊億以書抵宜春。守黃宗旦。請開法南源。

### 禪師法遠至太陽受祖付託

遠來太陽關係洞宗法脉故書至喜之之詞也

遠初謁三交。嵩次謁汾州。次謁葉縣省。受記。荆天禧中。遊襄漢。至郢州。太陽與祖機語相契。祖會下。

●本國譯

有承剖兩衲子。皆先卒。祖歎無可繼。洞宗者。欲囑累遠。以大法遠。以業有師。承辭祖曰。吾老矣。洞上一宗。遂竟無人耶。以平生所著直裰皮履示之。遠曰。當爲持此衣履求人付之。如何。祖囑記曰。他日果得人出吾偈爲證。偈曰。楊廣山前草。憑君待價烹。異苗翻茂處。深密固靈根。書其尾云。得法者潛衆十年。方可闡揚。遠拜受辭去。

鶴林門曰。太陽嚴以清佛祖之源。遠公厚以護佛祖之統。余嘗歎二老當失常處變之際。各有精微深遠之意。存乎其間。以匡法門。非太陽不啓遠公之篤義。非遠公不副太陽之重託。故其高風峻德。至今存焉。嗚呼。古人之心。誠難及也。代之一字。古人以之絕。蓋今人以之開。蓋相去不天淵哉。

祥符蔭曰。古今人不相及。時爲之也。古人灼見法運汗隆之際。不妨嚴以杜其蓋。今人誠有見於接續之重。故不得不代以存其脉。總之從法道起見。而無庸心於其間也。

辛酉五年

台宗法師省常往生淨土

常字造微。淳化中。住昭慶嘉廬山。之風易蓮社。以淨行與士大夫結淨行社。丞相王旦爲之首。一時公卿牧伯百二十人。比邱千人。皆稱淨行社弟子。正月日端。坐念佛有頃。厲聲曰。佛來也。泊然而化。衆見地皆金色。移時方沒。

壬戌乾興元年

台宗法師孤山法惠智圓寂

圓字無外。號中庸子。又稱潛夫。傳台宗於奉先。清居西湖孤山。與處士林和靖爲友。王欽若出撫錢塘。慈雲遣使邀圓同遊。之圓笑謂使者曰。錢塘境上。且駐却一僧。蚤嬰瘵疾。又號病夫。講道吟詠未嘗倦。預誡門人曰。吾歿後。毋厚葬我。毋建塔以詛我。毋謁有位求銘。以虛美我。宜以陶器二合而瘞之。立石志名字年月而已。二月十七日寂。壽四十七。門人如所誡。後十五年。積雨山頽。門人啓視陶器。肉身不壞。爪髮俱長。乃更襲新衣而重瘞之。撰著甚富。諡法惠大師。

仁宗名禎。在位四十一年。

仁宗癸亥天聖元年

南源圓訪神鼎

圓居南源三年。棄去訪神鼎。謠謠望尊。一時衲子非人類。精奇無敢登其門者。住山三十年。門弟子氣吞諸方。圓髮長不剪。弊衣楚音。通謁稱法侄。一衆大笑。謠遣童子問長老。誰之嗣。圓仰視屋曰。親見汾陽來。謠杖而出。顧見頽然問曰。汾州有西河師子否。圓指其後。絕叫曰。屋倒矣。童子返走。謠回顧相嬰。鑠圓地坐。脫隻履而視之。謠忘所問。又失圓所在。圓徐起整衣。且行且語曰。見面不如聞名。遂去。謠遣人追之。不可數。曰。汾州乃有此兒耶。自是名重叢林。

翠峯顯移住雪竇

曾會守四明。延顯住雪竇。既至。宗風大振。天下龍蟠鳳逸。衲子爭集座下。號雲門中興。臨濟第六世汾州祖示寂。

龍德府尹李侯請主承天。使三反不起。使者受罰。

復至曰必欲俱往不然有死而已祖笑曰老病業已不出山借往當先後之何必俱耶使曰師諾則先後惟所擇祖乃令設饌且假裝告衆曰老僧去也誰人隨得一僧出曰某甲隨得祖曰汝日行幾里僧曰五十里祖曰汝隨我不得又一僧出曰某甲隨得祖曰汝日行幾里僧曰七十里祖曰汝也隨我不得侍者出曰某甲隨得但和尚到處某甲即到祖曰汝却隨得老僧言訖謂侍者曰吾先行矣停箸而逝侍者即立化闍維收舍利起塔

宗統編年卷之十九

宗統編年卷之二十

臨濟第七世祖

諱楚圓全州清湘李氏子嗣汾陽

仁宗甲子天聖二年

臨濟第七世潭州石霜慈明祖嗣宗統七年

祖住道吾禪師方會佐之

定林沙門本延有道行雅爲士大夫所信敬神鼎對延稱祖知見可興臨濟會道吾虛席延白郡守請主之法令嚴肅忘軀爲法者集焉自南源徙道吾及石霜會皆佐之總院事上堂曰一喝分賓主照用一時行要會個中意日午打三更遂喝一喝曰且道是賓是主還有分得者麼若也分得朝打三千暮打八百若也未能老僧失利

乙丑三年

丙寅四年

丁卯五年

曹洞宗第六世郢州大陽祖示寂

七月十六日祖辭衆又三日以偈寄王曙侍郎停筆而化年八十五

考定

按洞宗第七世祖投子青以熙甯六年遷龍舒道俗請住白雲海會寺計其得法之歲至此適十年以符太陽之記是投子青祖受法於浮山時乃英宗治平初年也顯以是年紹統從天聖五年至嘉祐八年癸卯中間三十七年洞上宗統闕焉職籍昭然書以存信

戊辰六年

性宗法師四明延慶法智知禮寂

禮傳台教於寶雲。通住承天。遷延慶學徒。如林日。本國師遣使詢法要。撰指要妙宗二鈔。大悲懺儀。并金光明普門諸記。行世。學士楊億。駙馬李遵勗。薦錫紫衣。師號正月五日寂。

七年己巳

祖受慈明師號并紫衣

都尉李遵勗奏。祖道行賜徽號及紫衣。

庚午八年

法師子璿重振相宗於長水

璿嘉禾人。從法師洪敏學楞嚴。至動靜二相了然。不生有省。聞鄰瑯覺。道風趨參。值陞座。遂問。清淨。本然云。何忽生山河大地。覺抗聲曰。清淨本然云。何忽生山河大地。璿豁然了悟。擬留嗣之。覺謂曰。汝宗不振久矣。宜勵志扶持。以報佛恩。璿依教住。長水衆幾一千。以賢首宗旨。述楞嚴疏等行世。

禪師雲門下第四世瑞州洞山曉聰寂

聰嗣文殊真手植萬松於東嶺。而恒誦金剛般若。經。山中人名其嶺曰金剛。比部郎中許式出守。

南昌過蓮華峯。祥公謂曰。聰道者。雲門兒孫人天。眼目也。聰遊方時。在雲居作燈頌。因備開酒。洲大聖因甚。却向揚州出見。聰曰。君子愛財。取之以道。祥公聞之大驚曰。雲門兒孫猶在中夜望雲居拜之。可往訪之。許作詩寄之曰。語言渾不滯。高躡祖師蹤。夜坐蓮雲石。春

栽帶雨松。鏡分金殿燭。山答月樓鐘。有問西來意。虛堂對遠峯。聰一日上堂辭衆。畢復述頌末曰。唯有饅頭知我意。栽松時復上金剛。言訖而寂。

祥符蔭曰。神鼎一見石霜霜。即名重叢林。雅相稱揚。使主法席。蓮華峯菴主。聞洞山片語。即驚歎其爲雲門兒孫。中夜拜之一見。許公亟相稱道。嗚呼。古人何等眼目。何等心行也。

禪師自寶繼住洞山

寶五祖戒嗣。爲人廉謹。持戒精嚴。參五祖主寺事。一日戒病。令侍者於庫司取生薑煎藥。寶叱之。戒令將錢回買。方取與戒。心重之後。至洞山特加敬重。聰歿遺言。令繼其席。適郡守亦以書囑戒。舉所知者戒曰。寶生薑漢住得也。寶遂說法洞山。

辛未九年

壬申明道元年

祖住石霜

祖自道吾遷石霜。贊元來參祖。一見曰。好好著槽。廠元遂作驢鳴。祖曰。眞法器耳。俾爲侍者。助春破薪。泯泯混衆十年。

台宗法師天竺慈雲遵式寂

式字知白。母夢嚙明珠而生。受業於四明。力行四三昧。淳化初。住慈雲。講演不倦。十月十日。誦佛而逝。靈異之迹。具於本傳。

祥符蔭曰。天台一宗。機至綫斷。幸螺溪訪求於異域。得寶雲四明慈雲相承。以力行三昧。誓持之。嗚呼。弘道詎不在於人哉。

癸酉二年

監院方會悟道受囑

會總院事久。每咨參祖曰。庫司事繁。且去他日。又問祖曰。監寺異日兒孫遍天下。在何用忙。爲一日祖適出。雨忽作。會偵之。小徑既見。遂擲住曰。這老漢今日須與我說。不說打你去。祖曰。監寺知是般

事。便依語未卒。會大悟。卽拜於泥途。問曰。狹路相逢時。如何。祖曰。你且躲避。我要往那裏去。會歸具威儀。詣方丈禮謝。祖訶曰。未在祖上堂。會出問。幽鳥語喃喃。辭雲入亂峯。時如何。祖曰。我行荒草裏。汝又入深村。會曰。官不容針。更借一問。祖便喝。會曰。好喝。祖又喝。會亦喝。祖連喝兩喝。會禮拜。祖曰。此事是個人。方能擔荷。會拂袖而出。

安隱忍曰。後代悟緣。非強作主宰。便屬依通。如此等悟處。千中無一。

祥符蔭曰。汾州之於石霜。霜之於楊岐。方爲脫略繩墨。具眼者辨取。

甲戌景祐元年

善侍者坐夏金鑾。可眞禪師還石霜。得徹悟。

眞自負親見慈明。天下無可意者。至金鑾。同善侍者坐夏。善與語。知其未徹。一日同山行。舉論鋒發。善拈一片瓦置石上曰。若向這裏下得一轉語。許你親見老師。眞左右視。擬對善叱曰。佇思停機。情識未透。何曾夢見。眞大愧還。石霜祖見來。叱曰。本

色行脚人必知時節有急甚事夏未了蚤至此眞泣曰被善兄毒心終礙塞人故來見和尚祖遽問如何是佛法大意曰無雲生嶺上有月落波心祖詰曰頭白齒豁猶作這個見解如何脫離生死眞悚然求指示祖曰汝問我真理前語問祖祖震聲喝曰無雲生嶺上有月落波心眞於言下大悟祥符陰曰廊侍者不惜手脚於華嚴鹿門今善侍者以一片瓦去却翠巖眞心所礙塞使之再向祖言下大悟兩侍者可謂眼目諸方者矣鹿門特爲煎茶告衆曰參學龍象直須仔細入室決擇不得容易遠得個語便以爲極則道我靈利被明眼人覷破却成一場笑具圖個甚麼只爲我慢無明不能回轉親近上流賴得明眼道人不惜身命對衆證據此恩難報噫痛定思痛眞藥石之言哉

禪師悟眞補住道吾

眞參祖嗣法

禪師谷泉住保眞

泉放浪湖中訪祖於道吾登衡嶽頂住懶瓚殿移

芭蕉又移保眞乃衡湘至險絕處一夕地坐祝融峯有大蟒盤繞泉解衣帶縛其腰中夜不見明日遍山尋之衣帶纏枯松上嘗以杖荷大酒瓢往來山中人問瓢中何物曰大道漿也

禪師汾陽支下大愚守芝寂

芝住大愚翠巖兩山衆未嘗登三十輩屋老以木拄將傾處過者疑將壓焉提笠日走城郭村落寺如傳舍粥飯亦有不繼嘗作洞山麻三斤偈曰橫眸讀梵字彈舌念眞言吹火長尖嘴柴生滿竈烟又示衆沙裏無油事可哀翠巖嚼飯饒嬰孩他時好惡知端的始覺從前滿面灰

乙亥二年

祖住南嶽福嚴書記慧南入室領悟

南玉山章氏子幼不苟葷不遊戲棄家受具坐必跏趺行必直視依泐潭澄令分座接物名振諸方文悅見之歎曰南有道之器也惜未授本色錯錘耳會同遊西山夜話雲門法道悅曰澄公雖是雲門之後法道果矣南問所以異曰雲門如九轉丹

砂點鐵成金。澄公如藥。永銀徒可玩。入銀則流去。南怒以枕投之。明日悅謝過。又曰。雲門氣宇如王。甘死語下乎。澄公有法授人。死語也。死語其能活人乎。卽背去。南挽之曰。若如是。則誰可汝意。曰。石霜圓手段。出諸方子。宜見之。不可後也。南默計曰。悅師翠巖。使我見石霜。見之。有得於悅。何有哉。遂造石霜。中途聞祖不事事。慢侮少叢林。乃登衡嶽。謁福嚴賢。賢命掌記。俄賢卒。郡守以祖補之。南心喜。且欲觀其人。祖既至。貶剝諸物件。數爲邪解。勸潭密付旨訣。皆在所斥中。南爲氣索。念悅平日之語。翻然改曰。大丈夫心膂之間。其可自爲疑礙乎。遂造其室。祖曰。書記已領徒遊。方借有疑。可坐而商略。南固辭。哀懇愈切。祖曰。書記學雲門。禪必善。其旨如曰。放洞山三頓棒。是有喫棒。分無喫棒。分曰。有喫棒。分祖色莊曰。聞三頓棒聲。便是喫棒。則從朝至暮。鵲噪鴉鳴。皆應喫棒。祖卽端坐受南炷香。作禮。祖復問。脫如汝會雲門。意旨則趙州道臺山婆子。我爲汝勘破了也。且那裏是他勘破婆

子處。南汗下。不能答。趨出。次日又詣祖。詬罵不已。南曰。罵豈慈悲法施耶。祖笑曰。你作罵會。那南於言下。大悟。失聲曰。泐潭果是死語。呈偈曰。傑出叢林。是趙州老婆。勘破沒來由。而今四海明。如鏡行人。莫與路爲讐。祖以手指沒字。南爲易有字。祖領之。遂留月餘。辭去。問祖曰。大事畢竟如何。祖呵曰。著衣喫飯。不是畢。竟。屙屎送尿。不是畢。竟。

丙子三年

居士李遵勗集廣燈錄成帝製序

禪師首山玄下汝州廣慧元建寂

建初依招慶覺誦維摩經次覺問曰。經在這裏。維摩在甚麼處。茫然無以對。涕泣曰。大丈夫漢。被人一同。無詞可措。豈不愧哉。於是歷參五十餘員。尊宿不能契旨。遂趨首山。領悟正月二十六日。示四圓相。自書虎狗鼠牛字於中。揭方丈門。遂至九月二十六日。寂。景德間。宗師爲高名士大夫所尊服。而又享有高壽。預知報謝。建其冠也。

丁丑四年

祖住興化

上堂曰。山僧居福嚴。祇見福嚴境界。晏起蚤眠。有時雲生。碧嶂月落寒潭。音聲鳥飛。鳴般若臺前。娑羅花香。散祝融峯畔。把瘦筇坐盤石。與五湖衲子時話。玄微灰頭土面。住興化。祇見興化家風。迎來送去。門連城市。車馬駢闐。漁唱瀟湘。猿啼巖麓。絲竹歌謠。時時入耳。復與四海高人。日談禪道。歲月都忘。且道。居深山。住城郭。還有優劣也。無試道看。良久曰。是處是慈氏。無門無善財。

禪師承古往薦福

古少爲書生。博學有聲。出家從太陽。玄遊又謁南嶽。雅雅許入室。遊廬山。居宏覺塔院。號古塔主。說法芝山。范仲淹守饒。迎古住薦福。

戊寅寶元元年

祖至京會李都尉

都尉遵勗遣使邀祖曰。海內法友。唯師與楊大年耳。大年棄我而去。僕年來頓覺衰落。忽死以一见公。仍以書抵潭帥。敦遣之。祖惻然。舟而東。下道過

瑯琊。爲覺作牧牛歌。覺默得其遊戲三昧。至京與李都尉會。月餘而李果歿。臨終問答偈語。皆聞之。嘉歎有旨。賜官舟南歸。中途得風痺疾。

己卯二年

庚辰康定元年

臨濟第七世石霜慈明祖示寂

世壽五十四。臘三十二。銘行實於興化塔全身於

石霜

臨濟第八世祖

諱方會。袁州宜春冷氏子。嗣石霜

臨濟第八世楊岐祖嗣宗統年一十

祖住楊岐

祖還九峯。萍實宜春。令請住楊岐室中。問僧栗棘蓬。你作麼生。吞金剛圈。你作麼生。透初住。老屋敗椽。適隆冬。雪霰滿牀。居不遑處。衲子投誠。願充修造。祖却之曰。我佛有言。時當滅劫。高岸深谷。變遷不常。安得圓滿如意。自求稱足。汝等出家學道。做手脚未穩。已是四五十歲。詎有閒工夫事。豐屋耶。

竟辭之翌日上堂曰楊岐乍住屋壁疎滿牀盡撒雪珍珠縮却頂暗嗟吁翻憶古人樹下居

辛巳慶歷元年

二月京師雨寒

壬午二年

癸未三年

禪師慧南開法同安

甲申四年

禪師守端來參領悟

端依茶陵郁禪師披削來參祖祖一日忽問受業師爲誰端曰茶陵郁和尚祖曰吾聞伊過橋遭擲有省作偈甚奇能記否端誦曰我有明珠一顆久被塵勞關鎖今朝塵盡光生照破山河萬朵祖笑而趨起端愕然通夕不寐黎明咨詢之適歲暮祖曰汝見昨日打毆難者麼曰見祖曰汝一籌不及渠端愈大駭曰何謂也祖曰渠愛人笑汝怕人笑端大悟都因楊岐化主爲學百尺竿頭進步難盡究遺跌有省走謁祖印可之後亦嗣祖

乙酉五年

丙戌六年

祖自楊岐遷住潭州雲蓋山

丁亥七年

戊子八年

大士法華志言寂

宋詳法嗣

言壽春許氏子仁宗始不豫國嗣未立大臣請擇宗室賢者居京師仁宗夜焚香默禱曰翊日化成殿具齋虔請法華大士俯臨無却左右莫聞也清旦道衣凝立而待俄侍衛奏言法華自右掖門直趨寢殿禁兵呵止不得仁宗笑曰吾請之來耳及至竟陞御榻而坐仁宗以儲嗣爲問索筆大書三十三數行擲筆去至英宗卽位乃濮安懿王第十三子也十一月二十三日將化謂人曰吾從無量劫來成就逝多國土分身揚化今南歸矣言畢右脇而逝

禪師大相國寺德章入對延春閣

章嗣石霜祖九月一日詔章於延春閣下齋宣問佛法

己丑皇祐元年

禪師仁勇造雲蓋頓悟

勇容止淵秀幼通台教更衣謁雪竇顯顯意其可任大法誚之曰央庠座主舅憤憐下山望雪竇拜曰我此生行脚參禪道不過雪竇誓不歸鄉卽往湧潭逾紀疑情未泮聞祖移雲蓋能鈐鑊學者直造其室一語未及頓明心印

後從塔祖盤所極玄與出世兩住保寧

臨濟第八世楊岐祖示寂

洪覺範曰臨濟七傳而得石霜圓圓之子一爲積翠南一爲楊岐會南之設施如坐四達之衢聚珍怪百物而鬻之遺簪墮珥隨所探焉駸駸末流冒其氏者未可一二數也會乃如玉人之治璠璣賦秋廢矣故其子孫皆光明照人克世其家蓋碧落碑無質本也

禪師德章復入內奏對

禪師法眼第四世杭州淨土院惟正

一作寂

正幼從錢塘本如受業郡人欲啓帑以度牒施正歎曰古之度人以清機密旨今反是去古遠矣吾隨三寶數當有其時遂跪謝不受如問故正曰彼非知我者特以師之言旋百千於一童子保其終

◆新羅篇

◆土歸土

身能施物不責報乎如來世尊大願度生則有慈蔭今妙法蓮華經是也當折節誦持恩併歸一於義爲安如益奇之年十八爲大僧獨擁義袍且雙復有願輪歲時用度俾繼院務正復謝曰聞托鉢乞食未聞安坐以享歷謁諸祖未聞廢學自任況我齒茂氣完正在筋力爲禮非從事屋廬之秋也遂遊方受心法於惟素董功臣山淨土院正輔相之久而繼席內翰葉清臣迎正論道一日語正曰明日有客集願師來灑以甘露正諾之明日遣邀正以一偈授曰昨日曾將今日期出門倚仗又思維爲僧只合居巖谷國土筵中甚不宜竟不往嘗跨一黃犢出入軍持巾鉢悉掛角上故俗呼爲正黃牛侍郎蔣堂出守杭州與正爲方外交正每往謁至郡庭下懷談笑終日而去正律身精嚴冬不擁爐以蘆花作毬納足其中客至共之夏秋好玩月吟笑達旦率以爲常或問師以禪師名乃不談禪何也曰徒費言語吾懶甯做曲折但日夜煩萬象爲敷演耳言語有間吾此法無盡所謂造物

無盡藏也。孟夏日語衆曰。夫動以靜對。未始有極。吾一動歷年六十。有因今靜矣。然動靜本何有哉。

於是泊然而逝。

損園蔭客金陵廬龍山房題政黃牛圖贈巢山至和尚詩曰。有宋山

林朝市。然緣締。丹詔白雲邊。高人視此如蜩。漚然自適。吾之天愛。騎黃犢。衡華。建軍持書卷。挂角顛風。流翰墨。驚名賢。隻字單詞。爭愛。與來隨。意山水。前長歌大嘯。傲雲烟。馳逐不用。珊瑚鞭。豈如養駿黃金。驕青松。千樹夕陽。懸茅庵。歸去草芊芊。高情非爲。爾其偏。逸韻千古。爭喧傳。以今視宋。更天淵。吾師寄託。事後先。誅茅縛屋。師山巖。蕉團一瓢。詩幾編。欲買黃。懷向無錢。畫圖晤對。夫何嫌。蒼葭我問。秋林陵。船一庭。秋雨濕。苔磚。指點壁間。筆墨妍。茶鐺窗外。響紅泉。夫根山下。五湖連。烟波一葉。可忘年。蒲芽。款米手烹。鮮。漁翁舟子。誰何焉。大盆弄月。潮淪連。鷗羣鷺友。兩纏綿。吾師肯來。撥書眠。秋花擁足。疎寒肩身。入圖畫。作。唐仙鳴呼。身入圖畫。作。瓊仙至。蜀靈隱。隱金陵。獅山時高。其風操。

臨濟第九世祖

諱守端。衡陽葛氏子。幼事翰墨。冠依茶陵郁山。

主得度。參楊岐祖嗣法。

庚寅皇祐二年

臨濟第九世白雲祖嗣宗統三十年

祖住承天寺

祖遊廬阜。圓通訥禪師薦住承天。聲名籍甚。僧問如何是佛。祖曰。鑊湯無冷處。曰。如何是佛法大意。

祖曰。水底按葫蘆。曰。如何是祖師西來意。祖曰。烏飛兔走。

禪師德章乞終老山林。詔住杭州靈隱。賜號明覺。

禪師江州圓通。居訥辭詔住淨因。舉書記懷璉。自代訥梓州蹇氏子。試經得度。以講學冠兩川。耆年多下之。因禪者策發出蜀。放浪荆楚。至襄州洞山。榮智門。座下留止十年。嗣其法。後遊廬山。太守程師孟請住歸宗。遷圓通。汴京自周朝毀寺。太祖建隆間。復興兩街。止是義學而已。士大夫聰明超軼者。皆默聞名。相而少林。一宗尙未大行。翰林楊億。晁迥。首發明之。內侍李九甯奏旋汴宅一區。創興禪席。勅賜額曰十方淨因禪院。帝聞訥名。特詔開法。以目疾堅辭不赴。舉本院書記懷璉。自代。於是詔璉。璉至。引對佛法大意。稱旨。傳宣效南方禪林儀範。開堂演法。賜璉號大覺禪師。訥號祖印禪師。禪師贊元住蔣山。

元侍石霜祖久。祖歿。元廬塔種植八年。出世住蔣山。丞相王安石。丁母憂。讀經山中。與元遊如昆弟。

問祖師意旨。元不答。石益扣之。元曰。公有般若之障。三有近道之資。一更一兩生來。或得純熟。石曰。願聞其說。元曰。公受氣剛大。世緣深。以剛大氣。遭深世緣。必以身任天下之重。懷經濟之志。用舍不能必。則心未平。以未平之心。持經世之志。何時能一念萬年哉。又多怒而學問。尙理於道爲所知。愚此其三也。特視名利如脫髮。甘淡薄如頭陀。此爲近道。且當以教乘滋茂之可也。石再拜受教。

辛卯三年

佛滅後二千年

廬山歸宗。火方丈慧南禪師入獄。獲智證。

發明火寺

不書此書以兩禪師在獄得三昧證也。

南住歸宗。寺火一夕而燼。大衆譁動。山谷南安坐。如平時。僧洪準欲掖而走。南叱之。準曰。和尚縱厭世間。慈明法道何所賴耶。因徐整衣起。火已及坐榻矣。入獄。郡吏發其私。悉拷掠。百至絕口。不言。惟不食而已。兩月後得釋。鬚髮不剪。皮骨僅存。可眞迎於中途。見之泣下曰。師兄何至是也。南叱曰。這

俗漢眞不覺下拜。他日謂門弟子曰。我在獄證法華經。菩薩遊戲三昧。經曰。菩薩遊戲神通淨佛國土。心不好樂呵小乘也。以其不能成就衆生耳。弟子請聞其說。南曰。凡獄吏之治有罪者。察見其情。僞必痛加捶楚。欺詐之實盡則自釋。雖有酷刑不能申也。罪至於死。亦所甘心者。智盡情枯故也。今禪學者。馳求之狂。欺詐之病。不以知見之慧。鍛之何由而釋。

禪師倚遇住法昌

遇遊西山。瞻雙嶺深邃棲息三年。始應法昌之請。法昌在分甯北千峯萬壑古屋數間。遇至。止刀耕火種。殊安樂之。衲子不堪其枯淡。多棄去。坐此成單丁。

壬辰四年

祖住圓通

訥以圓通讓祖。自處東堂。祖時年二十八。自以前輩讓名。席責已甚重。敬嚴臨衆。以公滅私。宗風大振。

禪師雲門第四世明州雪竇明覺重顯寂

顯初遊方時謁廬山林禪師拂其機一衆股栗林  
諭衆曰此如來廣大三昧非汝等以取捨心可了  
別也駙馬都尉李遵勗奏賜紫方袍侍中賈公奏  
錫號明覺六月十日夜辭衆盥浴整衣側臥而  
逝門人惟蓋文軫等哀集提唱拈頌諸錄行世  
祥符蔭曰從上佛祖機語如乳之於水醒醐之在  
酥酪自雪竇發其精微剔其肯綮而乳與醍醐擇  
之不待驚王味之消除雜毒拈頌之於來學開通  
心眼不少蓋其精脫融洽悟與辯才兼無礙者也  
癸巳五年

甲午至和元年

祖從法華

闕疑

謂初學祖住承天又通居東堂辭  
詔學徒書記自代蓋虛懷無我盛

德尊宿也祖退圖通  
一節故闕而不書

道隆賜號應制明悟禪師

發明

隆以夢召偈句闕  
倡留宿禁林故書

法如

隆廣慧璉嗣遊京客景德寺日縱觀都市歸常一  
鼓一夕不得入臥於門之下帝夢至寺門見龍蟠

地遣中使視之觀隆熟睡驚翼問名歸奏帝聞道  
隆名喜曰吉徵也明日召至便殿奏對詳允帝大  
悅偈句相酬絡繹於道或入對留宿禁中禮遇特  
厚賜號應制明悟禪師會詔大覺璉於化成殿說  
法召隆問話機鋒迅捷帝大悅侍衛皆山呼隆即  
疏奏舉璉自代禁林待問秘殿談禪乞歸廬山帝  
覽表不允有旨建華嚴禪院令開堂後年八十餘  
寂於盛暑安坐七日手足柔和

歸宗南結庵積翠

南結庵黃檗溪上曰積翠學徒奔湊雖飽參老宿  
至則憮然自失就弟子之列潘興嗣嘗問其故南  
曰父嚴則子孝今日之訓後日之範也譬諸地爾  
隆者下之窪者平之彼將登於千仞之上吾亦與  
之俱困而極於九淵之下吾亦與之俱伎之窮則  
妄盡而自釋也又曰灼之軀之春夏之所以生育  
也霜之雪之秋冬之所以成熟也吾欲無言得乎  
室中嘗問僧曰人人盡有生緣上座生緣在何處  
我手何似佛手我脚何似驢脚學者莫測脫有酬

者南無可否歛目危坐興嗣又問故南曰已過關者掉臂徑去安知有關吏從關吏問可否此未透關者也

禪師法遠住浮山

遠初住舒州太平興國次住姑蘇天平是年住浮山一日與待制王質論道遠畫一圓相問質曰一不得匹馬單鎗二不得衣錦還鄉鵲不得喜鴉不得殃速道質罔措遠曰勘破了也

乙未二年

祖住白雲

祖在法華滂子至無所容士大夫賢之住白雲海會示衆若端的得一回汗出來也向一莖草上便見瓊樓玉殿若未端的得一回汗出縱有玉殿瓊樓却被一莖草蓋却且道作麼生得汗出去良久云自有一雙窮相手不會容易舞三臺淨因懷璉乞歸山不允賜龍腦鉢對使焚之

璉進偈曰六載皇都唱祖機兩曾金殿奉天威青山隱去欣何得滿篋唯將御頌歸帝和頌不允仍

持疑師

宣諭曰山即如如體也將安歸手再住京國且與佛法璉再進頌謝既而遣使賜龍腦鉢璉謝恩罷捧鉢曰吾法以壞色衣以瓦鐵食此鉢非法遂焚之中使回奏帝嘉歎不已

祥符蔭曰宗師格外明機往往踏毗盧頂上行道隆懷璉等遊於帝王之廷雖不失其爲道然親近國王大臣究非本色宗持所宜觀其對使焚鉢凜凜猶有衲僧風規校今山林中人倖邀天眷如恐不及者風趨日下可勝道哉

丙申嘉祐元年

開先善暹舉禪師慧圓住洞山積翠南出山見之還初依雪竇顯舉住金鷲暹題偈於壁而逸後住廬山開先後學多所成就圓嗣雪竇依暹於開先會洞山虛席暹舉應筠人之請時南住黃檗因出邑相見南默無所言但焚香相向危坐而已自申時至三鼓圓即起曰夜深妨和尙安息趨出明日各還山南問承首座汝在廬山識今洞山老否曰不識止聞其名久之進曰和尚此回見之如何人

南曰奇人永退問侍者汝隨和尚見洞山夜語及何事侍者以實吾永曰疑殺天下人

丁酉二年

禪師法秀出世四面山

秀參天衣懷嗣其法出世淮四面山杖笠之外衣具而已衲子追逐秀哀祖道不振以身任之

戊戌三年

浮山遠退居會聖巖

遠退休會聖巖作九帶敘佛祖宗旨歐陽修聞遠名造其室會客棋遽敗局請遠因棋說法遠命搥鼓座曰若論此事如兩家著棋相似何謂也敵手知音當機不讓若是綴五饒三又通一路始得有一般底只解閉門作活不會奪角衝關硬節與虎口齊彭局破後徒勞連幹所以道肥邊易得瘦肚難求思行則往往失粘心羈而時時頭撞休誇國手謾說神仙贏局輸籌卽不問且道黑白未分時一著落在什麼處良久曰從來十九路迷悟幾多人修大嘉歎

乙亥四年 歐陽修等修唐書成修又撰五代史七十四卷將舊唐史所載釋道之事並皆刪去

祥符蔭曰修之刪去釋氏力爲排詆乃其維持名教之苦心但未知佛法耳晚年致仕居洛中聞禪師修頤德業一日延頤遽問曰浮圖之教何爲者頤乃歎論指揮微妙修竦然曰吾初不知佛書其妙至此易簣時召子弟切誡之曰吾生平以文章名當世力詆浮圖今此衰殘忽聞與義方將研究命也奈何汝等勉旃無蹈後悔修乃捐酒肉撤聲色灰心默坐令老兵近寺借華嚴讀至八卷安坐而寢是修之桑榆晚照未嘗不歸命覺天也今士大夫家未知修晚詣之所造而徒效其前途之所爲於佛法無纖毫之損而自已失邱山之益亦何樂而爲此哉

禪師義青至浮山

青青社李氏子七齡穎異試經得度習百法論未幾入洛聽華嚴五年忽猛省曰法離文字甯可講乎即棄去遊方至於浮山時圓鑑遠居會聖嚴夢

得俊鷹畜之既覺而青屈日至遠以爲吉禮延之令看外道問佛不問有言不問無言因緣

庚子五年

禪師谷隱下潤州金山達觀臺顯寂

顯首謁太陽次參谷隱聰太尉李端愿延居園齋時夏竦王曙歐陽修與愿兄端慤等咸扣玄關聰錄其語曰登門集晚住金山嘉祐四年除夕遣侍馳書別揚州刁景純學士曰明旦當行不暇相見厚自愛景純開書大驚曰當奈何復書決別而已中夜候吏報揚州持書船將及岸顯欣然令搗鼓陞座敘出世本懷謝裨贊叢林者勸修勿忘下座讀刁書畢大衆擁步上方丈跏趺揮令各遠立良久而化

圓通訥舉書記了元住承天

元二歲能誦論語諸家詩五歲誦詩三千首閭里咸稱神童制染受具遊廬山謁開先暹大稱賞之又詔圓通訥驚其翰墨曰骨格已似雪竇後來之俊也遂命掌記會承天虛席訥以元當其選那

守見而少之訥曰元齒少而德壯雖萬耆禱不可折也於是元住承天

辛丑六年

禪師義青於浮山悟道

青在浮山經三載遠一日問曰汝記得話頭麼試舉看青擬對遠掩其口青了然開悟遂禮拜遠曰汝妙悟玄機耶青曰設有也須吐却時資侍者在旁曰青華嚴今日如病得汗青回顧曰合取狗口若更叨叨我即便歐

禪師契嵩詣闕上書進傳法正宗記

十二月六日杭州靈隱永安蘭若傳法賜紫禪師契嵩詣闕上書進傳法正宗記十二卷祖圖一面輔教編三冊內翰王素爲之表闡嵩字仲靈號潛子藤州鐔津李氏子受記於洞山聰居杭之西湖三十年閉關不妄交夜則頂戴觀音像誦其號必滿數萬聲乃寢自是世間章句不學而能

壬寅七年

勅收傳法正宗記輔教編編入大藏

書留政府七十一日時韓公琦覽之以示歐陽修修方以文章自任見其文謂琦曰不意僧中有此郎耶當一識之與語終日大悅上讀至爲道不爲名爲法不爲身之句嘉歎久之三月十七日有旨宣傳法院收入大藏勅賜嵩師號明教大師辭讓不允

癸卯八年

禪師義青於浮山續嗣曹洞宗統

青領悟後復經三載遠時出洞下宗旨示之青悉妙契遂付以太陽衣履曰代吾續洞上宗風善自護持無留此間令見圓通秀

曹洞第七世祖

諱義青青社李氏子從浮山圓鑑悟旨嗣續太

陽正脉初住海會次遷投子

曹洞第七世投子祖嗣宗統

十九年

祥符蔭曰興滅繼絕大道爲公古今盛德事也青祖時方閱藏於廬山至熙寧六年方住龍舒海會實繼白雲端祖之席又八年移投子茲卽嗣統者

以洞上正脉旣已有在不可久曠也  
禪師天衣下天鉢重元寂

元參天衣懷悟旨懷管目之曰此吾家千里駒也潞公文彥博出鎮魏府請住天鉢寺示衆曰時當缺減人壽少有登六七十汝輩入我法中整頓手脚未穩須臾衰病老死至前去幾何尙復悠悠何不初中後夜純靜去一日別博曰入滅去博親往臨視執上所賜白琉璃瓶祝曰佛法果靈願舍利填吾瓶果如所願博自是竭誠內典精修淨業

英宗名曜在位四年

英宗甲辰治平元年

禪師翠巖下南嶽雲峯文悅寂

悅短小粹美有精識年十九策杖遊江淮至筠州大愚見屋老僧殘荒涼如傳舍悅無留意將行而雨雨止芝陞座曰大家相聚喫莖藿喚作一莖藿入地獄如箭射下座無他語悅大駭夜造丈室芝曰來何所求曰求佛法芝曰法輪未轉食輪先轉後生趣有色力何不爲衆乞食我忍饑不暇暇

爲汝說法乎。悅不違。卽請行。及還。移住西山翠巖。悅又往依之。夜詣丈室。芝曰。又欲求佛心法乎。汝不念。乍住屋壁疎漏。又寒雪。我日夜望汝來。爲衆營炭。我忍寒不能。能爲汝說法乎。悅又不敢違。入城化炭。還時。維那缺。悅夜造丈室。芝曰。佛法不怕爛。却堂司一職。今以煩汝。悅不得語。而出。明日鳴犢椎堅。請悅有難色。拜起。欲棄去。業已勤勞。久因中止。然恨芝不去心。地坐後。架架下。束破桶。盆自架而墮。忽開悟。頓見芝從前用處。走搭伽黎上。寢堂芝迎笑曰。維那且喜大事了畢。悅再拜汗下。不及吐一詞而去。服勤八年。而芝歿。東遊三吳。所至叢林。改觀雪竇。尤敬畏之。每集衆。茶特設榻。以示禮異。出世南昌翠巖。未幾。住法輪。給春監刈。皆自董之。見挾幘負包而至者。則喜見。荷擔者。蹙頰曰。未也。更三十年。跨馬行脚也。俄遷雲峯。陞座。辭衆泊然而化。闍維得五色舍利塔於禹溪之北。

禪師雪竇下天衣義懷寂

懷嗣雪竇願自鐵佛至天衣五遷法席皆荒涼處

懷至必幻出樓觀四事成就。退居吳江聖壽。晚居池州杉山。門弟子智才住佛日迎歸。侍奉才如蘇城。未還。懷促其歸。及踵門懷曰。時至吾行矣。才曰。師有何語示徒。乃說偈曰。紅日照扶桑。寒雲封華嶽。三更過鐵圍。拶折驪龍角。才問。卵塔已成。如何是畢竟事。懷舉拳示之。遂就寢。椎枕而寂。

禪師宗本出世瑞光

本無錫管氏子。體貌豐碩。言無枝葉。年十九。師事蘇州承天永安道昇。昇道價重。叢林歸之者如雲。本襲衣垢面。探井臼。典炊爨。以給衆。夜則入室參。究昇曰。頭陀荷衆良苦。亦疲勞乎。對曰。若捨一法。不名滿足。菩提實欲此生身證。其敢言勞。昇陰奇之。歷十年。方剃髮受具。又服勤三年。乃辭昇遍參。至池陽景德。謁禪師義懷。懷言下契悟。爲侍者。衆未有知者。喜寢鼻息。勦勦聞者。厭之。白懷。懷曰。此子吾家精進幢也。汝輩他日當依賴之。無多談。懷居壽聖時。漕使李復圭過。懷夜語及曰。瑞光法席虛。願得有道衲子主之。時本在坐。懷指曰。無如此道。

人也。圭遂請本出世瑞光開堂。日衆集擊鼓。鼓旋於地。圓轉震響。衆驚。却有僧出曰。此法雷震地之祥也。言畢失僧。所在法席日盛。衆恒五百。

禪師石霜下翠巖可真寂

真將寂示疾甚苦。席藁於地。轉側不少休。詰侍者垂泣曰。平生訶佛罵祖。今何爲乃爾。真熟視訶曰。汝亦作此見解耶。卽跌坐。呼侍者燒香烟。起入寂。乙巳二年。

禪師法演自瑞光抵浮山。遂參祖。領悟分座。

演巴西鄧氏子。少落髮。受具。遊成都。講席習百法。唯識窺其奧。置之曰。膠柱安能鼓瑟乎。負笈出關。所至無足當其意者。謁瑞光。本舉古今因緣會盡。惟不會僧問。與化四面八方來時如何。化云。打中間底。僧作禮。化云。我昨日赴箇村齋。中途遇一陣卒風暴雨。却向古廟裏避得。過請益。本本曰。此是臨濟下因緣。須是問他家兒孫。始得。遂謁浮山。遠請益。前話遠曰。我有箇譬喻。你一似三家村裏賣柴漢子。把箇匾擔向十字街頭立地。問人中書堂。

◆之疑一

今日商量甚事。演默計曰。若如此大故。未在這知。演根器異。一日語曰。吾老矣。恐虛度子光陰。可往依白雲。此老雖後生。吾未識面。但見其頌。臨濟三頓棒話。有過人處。必能了子大事。演潯然禮辭。至白雲。祖一見曰。川蟲直汝來耶。遂舉僧問南泉摩尼珠話。請問祖。叱之。又祖示以世尊有密語。迦葉不覆藏。因緣久之未契。一日自廊趨上法堂。疑情頓息。獻投機偈曰。山前之片閑田地。叉手丁寧問祖翁。幾度賣來還自買。爲憐松竹引清風。祖特印可曰。栗棘蓬禪。屬子矣。令掌磨事。一日有僧見磨轉遽指以問曰。此神通耶。法爾耶。演褰衣旋磨。一匝。僧無語。未幾祖至。語演曰。有數禪客自廬山來。皆有悟入處。教伊說。亦說得有來由。舉因緣問伊。亦明得。教伊下語。亦下得。祇是未在這。於是大疑。私自計曰。既悟了。說亦說得。明亦明得。如何却未在這。遂參究。累日忽然省悟。從前寶惜一時放下。走見祖。祖爲手舞足蹈。演亦一笑而已。演後曰。吾因茲出一身白汗。便明得下。載清風。祖一日示衆曰。

古人道如鏡鑄像成後鏡在甚麼處衆下語不契學以問演演近前問訊曰也不校多祖笑曰須是道者始得乃命分座開示方來

祥符陰曰古人眼明心公不欺後學觀雪峯古佛

之於風穴

風穴在雪峰時請益臨濟四賓主峯曰我當時與巖頭欽山結伴參臨濟值濟

已遷化上座要知這話須問他家人兒孫始得後

風穴舉似南院院嘆曰雪峰古佛乃遙望禮拜

光本之於五祖可以想見其青天白日之襟懷古人一言半句之間徹見其人生平觀蓮華峯庵主

以一轉語識雲門兒孫浮山遠公以一頌知白雲

有過人處可以想見其紫電清霜之眼目至演已

投機而下載清風乃明得於出身白汗之後甚矣

悟之不可不透而大法之不可不明也總之不自

欺方不欺一切佛祖者不自欺而不欺一切之人

也學道豈有他哉

丙午三年

稽翠南遷黃龍

克文首衆慶閑典客慧元爲侍者德普以兩川義

虎自綿州棄講來參彬彬集一時之盛追媿馬祖

百丈

淨因璉再乞歸山詔許之

璉復上疏乞歸獻偈曰千簇雲山萬壑流歸心終

老此峰頭餘生願祝無疆壽一炷清香滿石樓上

付以劄子曰大覺禪師懷璉受先帝聖眷累錫宸

章屢貢欵誠乞歸林下今從所請俾遂閑心凡經

過小可菴院隨性住持或十方禪林不得逼抑堅

請璉携之東歸鮮有知者四明郡守迎致育王衆

建宸奎閣蘇翰林軾知杭州以書問之曰承要作

宸奎閣碑謹已撰成衰朽廢學不知堪上石否見

參寥說禪師出京曰英廟賜手詔其略云任性住

持不知果有否切請錄示全文欲添入此一節璉

終藏不出逮委順後獲於篋笥

丁未四年

十二月杜鵑  
禪宗 諱頊在位  
一十八年

神宗

神宗戊申熙寧元年

己酉四年

禪師石霜支下隆興黃龍慧南寂

三月一日四祖演通法嗣書南上堂。山僧才輕德薄。豈堪人師。蓋不昧本心。不欺諸聖。未免生死。今免生死。未出輪迴。今出輪迴。未得解脫。今得解脫。未得自在。今得自在。所以大覺世尊。於然燈佛所。無一法可得。六祖夜半於黃梅。又傳箇甚麼。乃說偈曰。得不得。傳不傳。歸根得旨。復何言。憶得首山曾漏泄。新婦騎驢阿家牽。翼日午時。跌坐示寂。闍維舍利五色塔於前山。南同翠巖悅參。福昌惟善。時適病寒。服藥出汗。悅從禪侶徧借。被咸無有焉。有紙衾者。皆以衰老。亦可數相與太息曰。善公本色住山人也。南盛化時。荆湖江淮。禪子奔趨恒百里。無托宿。且多爲盜劫。住興化禪師紹銑。半五十里爲館。令僧主之以接納。俾得宿食而去。諸方高其風。銑北禪賢嗣。寂後闔維目睛不壞。二腸屈折如鐵。

祥符陰日。黃龍證三昧於獄中。以三關把斷天下。要津。憧憧走英。禪如鷲與楊岐。祖號二甘露門。然非雲峯。悅極力指之。幾何其不流爲棄。永銀乎噫。

師友之成就。詎可泯也。

禪師祖心補住黃龍

心初參雲峯。悅三年。難其孤硬。造黃藥得旨。南寂衆。請心補住。心欲舉圓瑛代之。瑛掉頭徑去。心遂繼其席。慧元住吳江壽聖寺。遣僧投黃龍嗣。法書南視其款識曰。吾偶忘此。僧謂專使曰。書未欲開。可令親來見老僧。專使反命。元卽腰包而來。次南昌。聞南已化去。因留歎息。適祖心出城相會。與語奇之。曰。恨老師不及見耳。

禪師慶閑住吉州隆慶院

閑出家遠遊。所至自處罕與人接。有卽之者。一舉手而去。師事積翠南南。甚重之。廬陵守張鑒請居隆慶院。

禪師行偉住仰山

偉初受賢首宗。於太三藏。因同學勸發。棄講謁南。坐夏積翠。有省。住仰山。法席冠江淮。平昔同參知名者。皆集偉蒞。事有法度。管造化。十二輩以其名付維那。使明日俱來受曲。折及會茶。輒失一人。偉

問爲誰曰永泰偉方經營中首座曰泰遊山去請以他僧備員偉然之俄有告者曰泰實在首座匿之以欺衆耳偉色莊使搜得之泰自陳怯弱擢失所受事首座實不知也偉令鑿鐘集衆曰首座已分座授道又老師所賞識味心罔衆他人猶不可乃甘自破壞乎遂與泰俱出院諸方服其公

禪師黃龍下隆興勸潭洪英寂

英閱華嚴十明論發明心地趨積翠印旨又見翠巖眞一時學者趨向住勸潭六月知事紛爭止之不可初九日謂衆曰領衆不肅正坐無德吾有愧黃龍呼維那鳴鐘集衆敘行脚始末曰吾滅後火化以骨石藏普通塔明生死不離清衆也

庚戌三年

禪師元祐闢潭州道林爲師席

發明

禪林與嚴不書此書以祐

能得宗師體裁也

祐嗣黃龍南智辯自將氣出流羣南寂去遊湘衡潛子追隨聲重荆楚謂師直守潭州欲禪道林之律居盡禮致祐爲第一世祐欣然肯來道林蜂房

蟻穴疊見層出像設之多冠於湘西祐夷廟之爲虛堂爲禪室以會四海之學者役夫不敢壞像設祐自鋤棄諸江曰昔本不成今安得壞吾法尙無凡情存聖解乎六年而殿閣崇成

辛亥四年

禪師雲門下第五世廬山圓通祖印居訥寂

訥住圓通二十年移住四祖開元兩刹所至叢林號稱第一既老休居於寶積嚴訥臨衆簡嚴不妄言笑嘗習定初叉手自如中夜漸升至層侍者每視以候雞鳴其精進如此三月無疾而化

壬子五年

禪師克文開法聖壽

文陝府鄭氏子裂纓披出家棄講南遊謁雲居舜不契聞雲峯悅之風兼程而往至則悅已寂嗟曰既無其人吾何適而不可山水雖佳未暇遊也坐夏大瀉遂造黃龍初到不契乃曰此老只是個修行僧不會我語遂去見香城順得見南用處復同黃龍爲首座嗣其法高安太守錢弋請出世聖壽

文方飯於州民家。使至遁去。繫同席數十人。有見於新豐山寺者。因叩首泣下。曰。師不往。吾黨受苦矣。文曰。以我故累君輩如此。因受之。遂闡法焉。

禪師道光主法平江靈巖

光道行卓絕。遠近尊禮。住持日。荆公王安石送以詩云。百花深處寺猶指。舊吳宮。事往人何在。香消徑已空。今朝送師去。茲地闡宗風。別意兼鄉思。依依雲樹東。

禪師雲門下第五世佛日明教契嵩寂

嵩居佛日退老永安蘭若。寂後闔維。眼舌童真。頂骨不壞。舍利紅白晶潔。大如菽。

臨濟第九世白雲祖示寂

祖住白雲。應化龍門興化六坐道場所。至衆如雲。集壽四十八。

宗統編年卷之二十

宗統編年卷之二十一

臨濟第十世祖

諱法演嗣白雲

神宗癸丑熙寧六年

臨濟第十世五祖祖嗣宗統三十一年

祖住舒州四面山雙泉禪院

已菴顏曰。演祖初住四面山。子然獨處。凡二年。始

有一道士來問道。乃請作知事。又三年。僧寶良來。與道士朝夕參叩。皆得法。於是祖之道寢爲人知。而四方學者始稍有至者。雖其後門人之盛稱天下。然終身不過數十衆。

青祖住白雲海會寺

祖從廬山還。龍舒道俗請住白雲山海會寺。實繼端祖之席。上堂。僧問。師唱誰家曲。宗風嗣阿誰。祖曰。威音前一箭。射透兩重山。曰。如何是相傳底事。祖曰。全因淮地月。得照鄆陽春。曰。恁麼則入水見長人也。祖曰。祇知荆玉異。那辨楚王心。僧禮拜祖。

以拂子擊之

甲寅七年

乙卯八年

禪師法泉住衢州南禪居士趙抃從之參悟

泉雲居舜嗣趙抃字悅道號知非子至知中爲侍御居嘗以一琴一鶴自隨晝之所爲夜必焚香告天與天鉢元爲方外交會泉居衢之南禪抃日參扣泉未嘗容措一詞後牧青州政事之餘多宴坐忽大雷震即契悟作偈曰默坐公堂虛隱几心源不動湛如水一聲霹靂頂門開喚起從前自家底舉頭蒼蒼喜復喜刹利塵塵無不是中下之人不得聞妙用神通而已矣果聞笑曰趙悅道撞彩耳抃嘗答富弼書略曰抃伏思西方聖人教外別傳之法不爲中下根機之所設也上智則頓悟而入一得永得愚者則迷而不復千差萬別惟佛與祖以心傳心其利生接物而不得已者遂有棒喝拳指揚眉瞬目拈椎豎拂語言文字種種方便去聖逾遠諸方學徒忘本逐末棄源隋波滔滔皆是斯

所謂可憐憫者矣抃不佞去年秋初在青州因有所感既已稍知本性無欠無餘古人謂安樂法門信不誣也此蒙太傅侍中俾求禪錄抃素出恩紀聞之喜快不覺手舞而足蹈之也伏惟執事富貴如是之極道德如是之盛福壽康寧如是之備退休閑逸如是之高其所未甚留意者如來一大事因緣而已今茲又復於眞性有所悟入抃敢爲賀於門下也

杜衍與張方平皆致政居睢陽衍每笑平佞佛對賓客必嘲之平但笑而已有朱承事者以醫學遊二老之間謂平曰杜公天下偉人惜未知此事公何不勸發之乎曰君與此老緣熟勝我我止能助之耳一日衍召朱切脉甚急朱謂曰汝先往白相公但云看楊震未了使者隨白衍默然久之乃至衍曰老夫以君疏通解事不意近亦爾爾其如所謂楊震何等語乃爾就著聖人微言無出孔孟捨此取彼是大惑也朱曰相公未讀此經何以知不及孔孟以某觀之似過之也袖中出其首卷曰相公試閱之衍取默看不覺終軸忽起大驚曰世間何從有此書耶遣使盡持其餘來遍讀之捉朱手曰君眞我知識安道知之不以告我何哉即命駕見乎平曰譬如人失物忽已尋得但當喜其得不必悔其晚也僕非不相告以公與朱君緣熟遣之耳雖佛祖化人亦必藉同事也衍大悅衍字世昌慶歷中號清白宰相封祁國公

禪師淨端住湖州西余

端吳興邱氏子出家受具習天台教聽楞嚴經至

七徵八還以頌自詭曰七處徵心徵不遂懷懂阿  
難不暫地直教徵得見無心也是泥裏澆土塊八  
還之教傳來久自古宗風各分割假饒還到不還  
時也是鰓跳不出斗遂作偈別本講曰彎彎曲曲  
以門鉤一番拈起一番愁不如做個禪和子參到  
無心即便休參齊獄於室中默契即出庭下翻身  
自擲獄印可之後見弄師子益有警悟遂合綵爲  
師子皮披之因號端師子住西余西余去湖州密  
邇每雪朝著彩衣入城小兒爭譁逐之從人乞錢  
得卽以施貧者嘗誦法華經又好歌漁父詞有狂  
僧號回頭以左道惑衆與潤守呂公方食肉端徑  
趨至指曰正當與麼時如何是佛回頭窘無以對  
端捶其頭推倒而去又有妖人號不托掘秀州城  
外地有佛像建塔其上傾城敬信端見擄住問曰  
如何是佛不托擬議端趨之而去

丙辰九年

丁巳十年

祖住太平

示衆將四大海水爲一枚硯須彌山作一管筆有  
人向虛空裏寫祖師西來意五字太平下坐大展  
坐具禮拜爲師若寫不得佛法無靈驗僧問如何  
是臨濟下事祖曰五逆聞雷曰如何是雲門下事  
祖曰紅旗閃爍曰如何是曹洞下事祖曰馳書不  
到家曰如何是瀉仰下事祖曰斷碑橫古路僧禮  
拜祖曰何不問法眼下事曰留與和尚祖曰巡人  
犯夜問如何是佛祖曰露胸跳足曰如何是法祖  
曰大赦不放曰如何是僧祖曰釣魚船上謝三郎  
戊午元豐元年

禪師道楷至海會領悟

楷幼學辟穀隱伊陽山後試法華得度謁青祖於  
海會乃問佛祖言教如家常茶飯離此之外別有  
爲人處也無祖曰汝道寰中天子勅還假堯舜禹  
湯也無楷欲進語祖以拂子撼楷口曰汝發意來  
蚤有三十棒也楷卽開悟再拜便行祖曰且來闍  
黎楷不顧祖曰汝到不疑之地耶楷以手掩耳後  
作典座祖曰厨務勾當不易楷曰不敢祖曰羹粥

耶蒸飯。耶楷曰：人工淘米著火行者，羹粥蒸飯。祖曰：汝作甚麼？楷曰：和尚慈悲，放他閑去。一日侍祖遊菜園，祖度拄杖與楷接，得便隨行。祖曰：理合恁麼？楷曰：與和尚提鞋挈杖，也不爲分外。祖曰：有同行在？楷曰：那一人不受教。祖休去，至晚問楷：蚤來說話未盡。楷曰：請和尚舉。祖曰：卯生、日戌生、月楷，卽點燈來。祖曰：汝上來下去，總不徒然。楷曰：在和尚左右理合如此。祖曰：奴兒婢子，誰家屋裏無楷？曰：和尚年尊，缺他不可。祖曰：得恁慇懃，楷曰：報恩有分。

己未二年

禪師承皓住太陽

皓眉州王氏子，見北塔廣發明心，要得遊戲如風。大自在三昧，製犢鼻褌，書列代祖師名而服之，曰：唯有文殊普賢較些子。且書於帶，諸方以皓布視呼之，有僧効之，皓見而叱之，曰：具何道理？敢爾當吐血？無及其僧。未半年，果嘔血死。張商英奉使京西南路，聞其名，請住郢州太陽時，皓首衆谷隱隱。

大喜曰：我山中首座出世，盛集縑素，請陞座以爲歆豔。皓陞座曰：承皓住谷隱十年，不曾飲谷隱一滴水。嚼谷隱一粒米，汝若不會來，太陽與汝說。携拄杖下座，不顧而去。

庚申三年

禪師淨因道臻應詔說法，薦慈聖光獻太后。

臻古田戴氏子，一鉢徧參，得旨於浮山遠北，謁淨因。踵首衆座下，踵歸遂繼其席。開堂之日，中使降香賜紫方袍，覺照師號京都好惡萬端，貴人達官盈門。臻一目之，萬口異詞，咸以爲本色道人，莫不加敬。春慈聖光獻上賓詔，至慶壽宮說法，設廣座聽人問答。上下左右聞法，得未曾有，歡聲動宮闕。更賜淨照禪師。

聖壽文移洞山

上堂：洞山門下，要道便道，要用便用，救得眉毛失却鼻孔，乃喝云：久雨不晴，參。

太陽皓移玉泉

皓住太陽數月，知荆南李審言轉運使孫景修同。

請住當陽玉泉景德禪院。皓機鋒孤峭。學者不能  
湊泊。時闕首座維那曰。某人某人曾於某處立僧  
爲禪衆所歸。宜依諸方例。請充皓叱。曰。杜杜又曰。  
孟八郎。孟八郎。一日皓從厨前過。見造晚麪。問曰。  
有客過耶。對曰。衆僧造藥石。皓呼知事。稱之曰。吾  
昔參禪。爲人汲水舂米。今見成米麪。蒸炊造作。與  
供諸佛菩薩羅漢無異。飽喫了。並不留心參學。百  
般想念。五味馨香。餵飼八萬四千戶蟲。開眼隨境  
攝合。眼隨夢轉。不知主祿判官。掠刺大王。隨從汝  
抄劑消鑿。祿料簿教。汝受苦有日。在於是。徒衆不  
堪寂寥。譖之於縣令。曰。長老不能安衆。惟上來下  
去點檢。寒碎縣令召皓。至縣責之。曰。大善知識。不  
在方丈內端坐。兩廊下山門來。去得許多。皓曰。大  
通智勝佛十劫坐道場。佛法不見前。不得成佛。道  
長官以坐是佛耶。坐殺佛去也。長官茫然益敬禮  
之。

### 黃龍心退居西園

心謝事居西園。以晦名其堂。且曰。吾所辭者世務

耳。今欲專行佛法事也。榜其門以示禪學。謝景溫  
守潭州。虛大瀉以致心。三辭不往。景溫請其放心。  
曰。馬祖百丈已前。無住持事。道人相尋於空閑寂  
寞之濱而已。其後雖有住持。王臣尊禮爲天人師。  
今則不然。挂名官府。知有戶籍之民。直遣伍伯追  
呼之耳。此豈可復爲也。景溫乃不敢以院事屈願。  
一見心心。至長沙。景溫受法訓。聞所未聞。

詔革東林律居爲禪晦堂。心舉潯潭常總禪法。

總往來黃龍之門。凡二十年。出世住潯潭。是年詔  
革東林律居爲禪席。學士王韶出守南昌。欲延祖  
心主之心。舉總自代。總知宵遁。韶檄諸郡所在訪  
求之。新涂窮谷中。遂應命。天下藉子望風而集。其  
徒相語曰。遠公有識。記吾滅七百年後有肉身大  
士。革吾道場。今符其語矣。

禪師省聰住聖壽

聰嗣圓照本住聖壽。蘇子由轍謫高安。謁聰有省。  
繼參洪州順順。示以搐鼻。因緣。轍言下大悟。呈偈。  
曰。中年聞道覺前非。邂逅相逢老順師。搐鼻徑參

覓面目掉頭不受別鉗鎚枯藤破衲公何事白酒  
青鹽我是誰慚愧東軒殘月上一杯甘露滑如飴  
禪師黃龍下仰山行偉寂

偉律身甚嚴住仰山夏夜坐深林袒以飼蚊蚋會  
陽毒作十日不愈以刀絕之尺許血流不止門人  
泣曰師獨奈何不少忍曰爲其障我行道蒲伏牀  
上無所和於物得死不愈於生乎十一月日說偈  
而化闍維得五色舍利骨石桎索勾連塔於寺東  
辛酉四年

青祖自海會移住投子山

祖自白雲海會移住投子學徒益進潛通密證者  
甚衆果符異苗翻茂之識初開山大同有記曰吾  
塔若紅是吾再來邦人偶修其塔作瑪瑙色未幾  
而祖領院事

禪師慕詰自嶽麓遷大瀉

詰臨川聞氏子翠嚴真遠方時詰能識之真好暴  
所長以蓋人號真點胸詰與之周旋二十年無失  
禮真謂人曰三十年後詰其大作佛事真歿塔於

西山心喪三年乃去遊湘中一鉢雲行鳥飛去留  
爲叢林重輕謝景溫守潭州迎住嶽麓俄遷大瀉  
衆二千指無所約束人人自律惟粥罷受門弟子  
問道謂之入室諸方纔月一再而詰講之無虛日  
放參罷詰自役作使令者在側如路人晨香夕燈  
十有四年夜禮拜持茅視殿廡燈火倦則以帔蒙  
首假寐三聖堂

禪師黃龍下隆慶慶閑寂

三月七日入寂茶毗烟氣所至東西南北四十里  
凡草木沙磧之間皆得舍利如金色計其所獲幾  
數斛蘇轍欲爲作記而疑其事方臥店夢有訶者  
曰閑師事何疑哉疑卽病矣轍夢中作銘有云稽  
首三界尊閑師不止此憫世決劣故聊示其小者  
禪師北禪下法昌倚遇寂

遇事北禪賢最久嗣其法住法昌孤冷之風諸方  
共仰英勝二上座及黃龍南大甯寬寶覺心俱往  
訪之法韻鏗鏘琅琅扣擊龍圖徐禧爲布衣交將  
化前一日作偈別禧曰今年七十七出行須擇日

昨日問龜哥報道今朝吉禧大驚呼惟清俱往遇方坐寢堂以院務付監寺曰吾住此山三十年以護惜常住故每自蒞之今行矣汝輩著精彩言畢舉杖子曰且道這箇分付阿誰禧與清皆屏息遂擲於地投牀枕臂而化

祥符陰日遇與興化銑同嗣北禪賢爲雲門五世遇以峻峭之風老屋單丁持其道於千巖萬壑而銑有才量收千衆如數一二大作佛事於荊湖之間波及蠻貊皆慕道向化章惇開梅山邀銑往蠻父老聞銑至皆合爪聽約束荊蠻以定銑之力也一孤冷一圓融共樹北禪之幟而二本亦以是時盛化南北韶陽之道於以大振自後式微凌替則漸不可問矣吁道之汗隆詎不以人夫

壬戌五年

禪師道楷北還沂水

楷辭投子還沂居馬鞍山出世住沂之仙洞

瑞光本自淨還吳穹窿

本住瑞光法席曰盛武林守陳襄以承天興教二

利令本擇居蘇人擁道遮留又以淨慈堅請移文諭道俗曰借師三年爲此邦植福一住九載是年待制曾孝序載歸以慰蘇人之思住穹窿福臻禪師普孜自太平遷東京華嚴

孜建陽謝氏子幼舉進士有聲棄去出世後謁浮山遠得法舒人請居甘露徙太平道譽大播都人士請居東京華嚴寺

禪師懷志隱居衡嶽

志初業講席參洞山文順悟文曰子禪雖逸格惜緣不勝耳志識其意拜辭而行菴於衡嶽二十餘年士大夫造其居不甚顧答人問故曰彼富貴人辯博多聞我粥飯僧口吻遲鈍無可說自然憨癡去偈曰萬機俱罷付癡憨蹤跡時容野鹿參不脫麻衣拳作枕幾生夢在綠蘿菴問師住山有何旨趣志曰山中住獨掩柴門無別趣三塊柴頭品字煨不用援毫文彩露

從悅謁洞山文

悅首衆道吾領數請謁雲蓋智智與語未數句盡

知所蘊乃笑曰觀首座氣質不凡奈何出言吐氣如醉人耶悅面熱汗下曰願和尚慈悲智復與語雖劑之悅茫然遂求入室智曰老僧無福道不取信於人脫受首座禮拜異日定取謗於某乃問悅曰曾見法昌遇和尚否曰曾看他語錄自了可也不願見之曰曾見洞山文和尚否曰關西子沒頭腦拖一條布裙作尿臭氣有甚長處曰你但向尿臭處參取悅乃謁洞山深領奧旨

癸亥六年

曹洞宗第七世投子祖示寂

祖五位敘曰長天一色星月何分大地無偏枯榮自異是以法無異法何迷悟而可及心不自心假言象而提唱其言也偏圓正到兼帶叶通其法也不落是非豈關萬象幽旨既融於水月宗源派混於金河不墮虛凝回途復妙四月末示微疾以書辭檀護陞座說偈辭衆坐脫闍維舍利五色塔於寺之西北

雲溪擬曰浮山遠已嗣葉縣復從太陽盡得回互

之旨遂作九帶明正偏兼帶來由太陽以皮履直襪寄之後得投子青乃嗣正法浮山可謂一點水墨兩處成龍矣

曹洞宗第八世祖

諱道楷沂水崔氏子嗣投子

甲子七年 司馬光表進所編書賜名資治通鑑

曹洞宗第八世芙蓉祖嗣宗統

三十五年

自仙洞遷西洛龍門上堂曰喚作一句已是埋沒宗風曲爲今時通途消耗所以借功明位用在體處借位明功體在用處若也體用雙明如門扇兩開不得向門扇上著意不見新豐老子道峯蠻秀異鶴不停機靈木迢然鳳無依倚直得功成不處電火難追擬議之間長途萬里

詔闢相國寺禪師宗本應召 發明

闕寺爲禪律嘉帝能知道也

帝下詔闢相國寺六十四院爲入禪二律召本爲慧林第一祖既至上遣使問勞閱三日傳旨就寺之三門爲士民演法翌日召對延和殿問道賜坐本卽跏趺帝問本受業何寺奏曰蘇州承天永安

帝大悅。賜茶。本卽舉盞長吸。又蕩而撼之。帝曰。禪宗方興。宜善開導。本奏曰。陛下知有此道。如日照臨。臣豈敢自怠。卽辭退。帝目送之。謂左右曰。眞禪慧僧也。

祥符蔭曰。佛制出家。一鉢乞食。樹下塚間。一宿遺形學道。一無顧戀。東震與西竺風土既別。乞食未便。更爲瓊飯。入根脆弱。未能露寢。創立叢林。雖非謀食求安。然權宜之法。已非佛制矣。時風愈下。佛制不遵。應赴子孫羣居。盤踞名山大剎。化爲蟻穴蜂房。梵宇精藍。有同肉林酒舍。禪學宗風。閭然無聞。蒿目寒心。誰能整理。神宗闢相國寺爲禪爲律。誠末法帝王尊道重法。不負靈山付囑者。故特書之以示世焉。

### 詔蔣山法秀開法法雲

秀自四面遷棲賢。蔣山長蘆。皆千衆時號秀鐵面。汴京新創法雲寺。成詔秀開山爲第一世開堂之。日中使降香并磨納。皇弟荊王致敬。壓下仍傳聖語。表朕親至之禮。賜號圓通士大夫。日夕問道。時

司馬光方登庸。以吾法太盛。方經營之。秀曰。相公聰明人。類英傑。非因佛法。不能爾。遽忘願力乎。溫公意因少懈。李伯時麟工畫馬。秀訶曰。汝士大夫。以畫名。矧又畫馬。期人誇以爲妙。妙入馬腹中。亦足懼。麟自是絕筆。秀勸畫觀音像。以贖其過。黃庭堅作豔語。人爭傳之。秀亦訶曰。翰墨之妙。甘施於此。乎堅笑曰。又當置我於馬腹中耶。秀曰。汝以豔語動天下人。淫心不止。馬腹忍生泥犁耳。堅懺謝。祥符蔭曰。溫公初不知佛法。特以主持名教之心。切耳曾見其論佛曰。夫佛蓋西域之賢者。其爲人也清儉而寡欲。慈惠而愛物。故服弊補之衣食。蔬糲之食。巖居野處。斥妻屏子。所以自奉甚約。而憚於煩人也。雖草木蟲魚。不敢妄殺。蓋欲與物並生而不相害也。凡此之道。皆以涓潔其身。不爲物累。蓋中國於陵子仲焦先之徒近之矣。溫公之言如此。毋怪乎其不知佛法。而欲經營之也。溫公所見特佛始棄世。榮入山學道時之所示見耳。豈知佛之廣大法之淵深。三賢十聖。尙未能測。而於陵焦

先之徒能近之乎。以有下劣寶几珍御。以有驚異。驚奴白牯佛之脫珍御著弊垢者。爲度生也。佛豈如是哉。然溫公後來因富韓二公。聞法於圓照本。默有所契於范鎮之論空相。以詩戲曰。不須天女散。已解動禪心。又曰。賤子悟已久。景仁今復迷。又曰。到岸何須後。揮鋤不用金。浮雲任來往。明月在天心。若然則溫公末路決應不復作前此之言矣。人之見識與時消長。溫公既未深知佛法。而遽秉筆國史。肆行誣削。以致疑誤後人。墮正見而墮迷網。其謗毀正法之失。又可辭乎。後之君子。幸毋一時酌蠡持籌。妄自量天測海。而爲虛名劫持可也。  
清遠至太平參祖

遠臨叩李氏子。初讀法華。至是法非思量分別之所能解。質其講師。不能答。遠歎曰。義學名相。非所以了生死大事。遂南遊徧參。至太平見祖。旋丐於廬州。偶雨仆地。煩懣問。聞二人交相惡罵。諫者曰。你猶自煩惱。在遠於言下。有省及歸。凡有所問。祖卽曰。我不如你。你自會得好。時遠年十七。

禪師天衣下延恩法安寂

安臨川許氏子。受天衣懷旨訣。歸臨川住黃山。如意院敗屋破垣。無以蔽風雨。十年大厦如化成。棄去住武甯延恩寺。草屋數楹。敗牀不簀。安殊樂之。令尹糾豪右謀爲一新。安笑曰。檀法本以度人。今非其發心而強之。是名作業。不名佛事也。安與法秀昆弟。秀嘗以書招安。安讀之笑曰。吾始以秀有精彩。今而後知其癡也。夫出家兒。寧樹下辨那事。如救頭然。今無故於八達衢頭。架大屋養數百閑漢。此真開眼尿牀。吾何復對語哉。然吾宗自此益微矣。七月命弟子取方丈文書聚焚之。以院事付一僧。八月示寂。

禪師黃龍下石霜琳寂

琳在黃龍南座下。機鋒顯脫。名振叢林。與文關西。英邵武等齊名。開法石霜時。眞淨文在洞山。琳不相識。而心敬之。以偈送僧。有曰。憧憧四海求禪者。不到新豐也是癡。三月八日。淨髮沐浴。說法端坐。而寂。闍維舍利五色。

乙丑八年

洞山文至金陵丞相王安石請住報寧

文謝洞山事東遊三吳至金陵時王安石居定林  
聞文至倒屣出迎恨相識之晚聞法大悅因捨宅  
爲寺曰報寧延文開山請於朝賜號眞淨士大夫  
往來無虛日文不堪勞遂還高安菴於九峯之下  
曰投老學者自遠而至

哲宗諱煦

哲宗丙寅元祐元年

祖自太平移白雲海會

上堂說佛說法拈槌豎拂白雲萬里德山入門便  
棒臨濟入門便喝白雲萬里然後恁麼也不得不  
恁麼也不得恁麼不恁麼總不得也則白雲萬里  
或有個漢出來道長老你恁麼道也則白雲萬里  
這箇說話喚作矮子看戲隨人上下三十年後一  
場好笑且道笑箇甚麼笑白雲萬里清遠適自淝  
川持鉢回慨然曰吾事始濟復參往一荒縣安能  
究決已事耶遂作偈告辭祖送以偈曰皖伯臺前

送別時桃花如錦柳如眉明年此日凭闌看依舊  
青青一兩枝

禪師玉泉下慧力善周寂

周嗣玉泉芳十二月望日沐浴淨髮說偈曰山僧  
住瑞筠未嘗形言句七十三年來七十三年去言  
畢趺坐而逝三日後鬚髮再生

禪師慈明下蔣山贊元寂

元住蔣山熙寧初王安石拜相贊震天下無月無  
耗元未嘗發石弟安上問佛法大意元曰佛祖無  
所異於人所以異者能自護心念耳岑懷之木必  
有本本於毫末滔天之水必有源源於崑崙清淨  
必中無故動念危乎岌哉甚於岑樓浩然肆橫甚  
於滔天其可動耶佛祖更相付授必叮嚀曰善自  
護持曰佛法止此乎曰至美不華至言不煩夫華  
與頃去道遠甚而流俗以之申公論治世之法猶  
謂爲治者不在多言願力行何如耳況出世闡法  
乎安石罷政府舟至石頭士大夫車騎填山谷人  
寺已二鼓元出迎一揖而退石坐東偏從官賓客

滿座石環視問元所在侍者曰已寢久矣嘗饌客俄報厨庫火且及潮音堂衆吐飯蒼黃蜂窘蟻闖而元啜啖自若高視屋梁食畢無所問又嘗出郭有狂人入寺手刃一僧卽自殺尸相枕左右走報交武於道自白下門羣從而歸元過尸處未嘗視登寢室危坐執事側立冀元有以處之而斂目如平日於是稍稍隱去卒不問一日忽曰吾欲還東吳促辦嚴俄化

禪師玉泉下聖泉紹燈寂

燈參玉泉謂芳悟旨住聖泉道法大振一日陞座證偈曰吾年五十三去住本無貪臨行事若何不用口喃喃儼然入寂兩日後聞鐘聲忽然復醒自後四大輕安身常頻出舍利大旱禱雨輒應

丁卯二年

慧林本還吳住靈巖

本以老求歸退慧林出都日王公貴人送者車騎相屬本誨曰歲月不可把玩老病不與人期惟勤修勿怠是真相爲聞者莫不感動至吳迎居靈巖

閉門頽然而學者貢相望於道

禪師從悅住兜率

悅受洞山文旨訣後寓鹿苑於老宿清素處得透徹是年住龍安兜率

禪師純白開法昭覺

白參黃檗惟勝勝歸蜀白負巾鉢從會成都師棄改昭覺爲十方勝舉白開法

戊辰三年

禪師圓瓊住翠巖

瓊受黃龍密記荷擔叢林不知寒暑墾田蒔松守一職十年不易晦堂心欲以繼黃龍席瓊遁去曰先師誠我未登五十不可爲人客歸宗時年四十八佛印元勸應謝景溫之請住洪州翠巖

己巳四年

禪師善本補住淨慈

本董仲舒之後謁慧林本本特顧之善本默契其旨出世雙補淨慈時稱大小本道林祐遷雲居

王安上嘗問法於祐。延住雲居。祐曰。爲携此骨歸葬峯頂耳。

禪師系南補住道林

南參祐於道林。獲印可。祐移雲居。以南繼席。

庚午五年

芙蓉祖遷太陽

九峯文住歸宗

文居高安六年。移住歸宗。顯謨朱世英從之。問佛

法大意。文答以書。

禪師雲門下第五世育王大覺懷璉寂

璉嗣湧潭。澄無疾而化。壽八十一。

禪師雲門下第六世法雲圓通法秀寂

將入滅。呼侍者更衣。安坐說偈曰。來時無物去時

空。南北東西事。一同六處住。持無所補。秀良久。監

寺惠當進曰。和尚何不道末後句。秀曰。珍重珍重。

言訖而逝。

祥符陰曰。雲門氏之遺六傳。至圓通秀而大振秀

所居莊嚴妙天下。說法如雲雨。其威光可以爲人

接羽翼而天飛。然其同門延安方笑之。以爲癡噫。道固若是。其不在門庭。恢闢乎日中。則辰水滿。則傾行道。猶然。況其他乎。演祖之空山荒縣。終身衆不滿百。芙蓉之抗詔嬰謫。投老湖菴。不可謂非任重致遠之資也。

宗統編年卷之二十一

宗統編年卷之二十二

哲宗辛未元祐六年

祖自海會移東山

入院。祖師塔燒香。以手指云。當時與麼全身去。今

日重來。記得無復。云以何爲驗。以此爲驗。遂禮拜。

黃梅邑宰請開堂。垂語曰。譬如水牯牛過窗欄頭。

角四蹄都過了。因甚尾巴過不得。

雲蓋智退居西堂

智住雲蓋十年。日荷鋤理蔬園。疾禪林便軟煖道。

心淡薄來參者掉頭不納。退居西堂。湘中衲子聞其接納堂室爲滿。

禪師黃龍下東林廣惠照覺常總寂。

總劔州施氏子。自受黃龍密記。決志大掖濟北之宗。住東林。名聞天子。詔住相國智海總固稱山野。老病不能奉詔。凡兩月而得旨如所乞。就賜紫衣。師號廣惠。又賜覺照。蘇軾遊廬山宿東林。與常總論無情話。有省。黎明呈偈曰。溪聲便是廣長舌。山色豈非清淨身。夜來八萬四千偈。他日如何舉似人。總肯之。總於衲子有大緣。綈拂之下。衆恒七百。叢席之盛。一時未有。九月二十五日浴罷而化。

禪師寶峯下兜率真寂從悅寂。

悅嗣寶峯文住兜率室中。設三問以驗學者撥草瞻風。只圖見性。卽今上人性在甚麼處。識得自性。方脫生死。眼光落地時。作麼生脫。脫得生死。便知去處。四大分離。向甚麼處去。張商英漕江西時。謁東林總總印可之。且曰。吾有得法弟子住玉溪。乃慈古鏡也。可與語。英按部分甯諸禪。迓之首致敬。

於慈最後問兜率悅曰。聞師聰敏善文章。悅笑曰。從悅臨濟九世孫。若對運使論文章。政如運使對從悅論禪也。英默識之。問玉溪去此多少。曰。三十里。問兜率曰。五里。乃過兜率。先是悅夢手搏曰。輪覺語首座曰。日輪轉運之象。張運仗且過此。吾當深錐痛剜之。座曰。士大夫惡拂已者。或起別。覺悅曰。正使煩惱只退得我院也。遂與語。次英亟稱總公悅未肯其說。語至更深。論及宗門事。悅起焚香。請十方諸佛作證。曰。東林既印可運使。運使於佛祖言教有少疑否。曰。有。曰。疑何等。語曰。疑香嚴獨脚頌。德山托鉢話。曰。既於此有疑。其餘則是心思意解。何嘗至大安樂境界。且如巖頭言。末後句是有耶。是無耶。曰。有。悅大笑。歸方丈。閉却門。英一夜睡不穩。至五更下牀。觸翻溺器。忽大悟。扣方丈門曰。已捉得賊了也。曰。賊物在甚麼處。英無語。悅曰。都運且去來。日相見。翼日遂呈頌曰。鼓寂鐘沉托鉢回巖頭。一拶語如雷。果然只得三年活。莫是還他受記來。悅乃謂曰。參禪只爲命根不斷。依語生解。

如是之說公已深悟然至極微細處使人不覺不知墮在區宇乃作頌證曰等閑行處步步皆如雖居聲色情滯有無一心靡異萬法非殊休分體用莫擇精麤臨機不礙應物無拘是非情盡凡聖皆除誰得誰失何親何疎拈頭作尾指實爲虛翻身魔界轉脚邪途了無逆順不犯工夫邀悅至建昌有卜頌叙其事英號無盡居士後著護法論以見志是年冬悅浴訖集衆說偈曰四十有八聖凡盡殺不是英雄龍安路滑奄然而化英執政時遣文致祭請於朝敕諡眞寂大師

禪師雲門下第五世玉泉承皓寂

玉泉寺宇廣大鑿漏前後主者以營葺爲艱皓曰吾與山有緣與僧無緣修今世寺待後世僧耳悉壞而鼎新之皓住山無筆硯文字箱篋無兼衣囊錢遣人至江西口白張商英曰老病且死得百丈肅爲代可矣英以喻肅肅不願往十二月日說偈示衆而寂蘇軾徵服求見皓問尊官高姓曰姓秤乃秤天下長老底秤皓喝一聲問曰且道這一喝

重多少孰無對

禪師黃龍下禾山德普寂

普住禾山一日謂衆曰諸方尊宿死叢林必祭吾以爲徒虛設吾若死汝曹當先祭乃令從今辦祭衆以其老又好戲語乃曰和尚幾時遷化曰汝輩祭絕即行於是輶廬堂坐普其中置祭讀文跪揖上食普飲餐自如自門弟子下及莊力日次爲之祭絕曰明日雪晴乃行至時晴忽雪雪止普安坐焚香而化

禪師黃龍下報本慧元寂

元住承天因持鉢至湖州湖人曰禪師到處爲家何獨愛姑蘇乎固留不使還乃住報本冬月陞座說偈而化元平生作止規法南公脇不至席者三十年

台宗法師龍井元淨寂

淨住上天竺凡一十七年元豐間辭而復往又三年平坐精修淨業嘗與僧熙仲同食仲視淨眉間有光如螢攬之得舍利又於臥起處得舍利將示

寂入方圓菴宴坐止言語絕飲食謂參寥道潛曰  
吾淨業將成若七日無障吾願遂矣七日出偈示  
衆吉祥而逝

壬申七年

克勤復來東山參祖徹悟爲侍者慧懃繼至留掌翰  
勤彭州駱氏子兒時日記千言偶遊寺中見佛書  
三復悵然如獲舊物曰予殆過去沙門也卽去家  
祝髮授楞嚴俄得病瀕死歎曰諸佛涅槃正路不  
在文句中吾欲以聲求色見宜其無以死也遂棄  
去徒步出蜀謁玉泉皓金鑾信大滙詰黃龍心僉  
指爲法器最後見祖祖嘗曰諸方參得底禪如瑠  
璃瓶子相似愛護不捨第不莫教老僧見將鐵鎚  
一擊定碎也祖一日問有句無句如廢倚樹汝作  
麼生會勤便喝或下語盡其機用祖皆不諾祖曰  
須是情識淨盡計較都忘處會勤便於無計較處  
胡言漢語總不契祖意勤謂強移換人出不遜語  
忿然而去祖曰待你著一頓熱病打時方思量我  
在到金山傷寒困極以平日見處試之無得力者

在屋所

追繹祖言乃自誓曰我病稍間卽歸五祖祖一見  
喜曰汝復來耶卽令參堂便入侍者寮勤一日問  
祖曰二祖云覓心了不可得畢竟如何曰汝須自  
參始得這些好處別人爲汝著力不得後半月會  
陳提刑詣祖問道祖曰提刑少年曾讀小豔詩否  
有兩句頗相近頻呼小玉元無事只要檀郎認得  
聲提刑應諾諸祖曰且仔細勤適自外歸侍立次  
問曰聞和尚舉小豔詩提刑會否曰他只認得聲  
曰祇要檀郎認得聲他既認得聲爲甚却不是曰  
如何是祖師西來意庭前柏樹子響動忽契悟遽  
出見雞飛上闌干鼓翅而鳴復自謂曰此豈不是  
聲遂袖香入室通在得呈偈曰金鴨香銷錦繡幃  
笙歌叢裏醉扶歸少年一段風流事只許佳人獨  
自知祖曰佛祖大事非小根劣品所能造詣吾助  
汝喜祖乃徧謂山中耆舊曰我侍者參得禪也自  
此所至推爲上首一日請益臨濟四賓主怎生祖  
曰也祇是個程限是甚麼閑事又云我這裏却似  
馬前相撲倒便休懃舒州汪氏子卅歲得度每以

惟此一事實餘二則非真味之有省乃徧參名宿  
往來祖之門有年志祖不爲印據與克勤相繼而  
去及勤還侍祖得徹證而慙忽至意欲他往勤勉  
令挂搭且曰某與兄相別月餘比舊相見時如何  
曰我所疑者此也遂參堂一日聞祖舉僧問趙州  
如何是和尙家風州曰老僧耳聾高聲問將來僧  
再問州曰你問我家風我却識汝家風了也慙卽  
大豁所疑曰乞和尙指示極則祖曰森羅及萬象  
一法之所印慙展拜祖令掌翰墨

淨慈本應詔住法雲賜號大通

石塔戒受蘇軾疏請

戒嗣慧林冲住揚州石塔時軾知揚州戒告退軾  
率僚佐同至石塔令擊鼓集衆袖中出疏使冕無  
咎讀之曰大士何曾說法誰作金毛之聲衆生各  
自開堂何關石塔之事去無作相住亦隨緣惟戒  
公長老開不二門施無盡藏念西湖之久別亦是  
偶然爲東坡而少留無不可者一時稽首重聽白  
椎渡口船迴依舊雲山之秋色來雨過一新鐘鼓

之音戒乃重住石塔

癸酉八年

芙蓉祖自太陽遷大洪

祖自太陽遷隋州大洪勸誘皆一時名公卿洞上  
宗風大振西北

禪師浮山下淨因淨照道臻寂

臻性靜退似不能言奉身甚約一布裙二十年不  
易居都城頽然不出戶三十年如一日無所嗜好  
雪方丈之西壁請文與可掃墨竹曰吾使遊人見  
之心目清涼此君可代我說法耳時上念佛法之  
清憫名相之弊卽相國寺爲慧林智海二刹凡主  
法必自臻擇之八月十七日語門人曰吾更三日  
行矣及期沐浴說偈跏趺而寂壽八十  
甲戌紹聖元年

清遠還東山典謁領悟

遠參歸宗文不契乃至蔣山還推清謁曰此見  
都下一尊宿語句似有緣清曰演公天下第一宗  
師何故捨而事遠遊耶所謂有緣者蓋知解之師

與公初心相應耳。遠然之踰年遠海會。祖令看殺父殺母。佛前懺悔。殺佛殺祖。向甚處懺悔。雲門云。露這公案。後命典謁。適寒夜孤坐。撥爐見火一豆。許恍然自喜。曰。深深撥有些子。平生事只如此。遽起。閱几上傳燈錄。至破竈墮。因緣忽大悟。作偈曰。刁刁林鳥啼。披衣終夜坐。撥火悟平生。窮神歸破墮。事般人自迷。曲淡誰能和。念之永不忘。門開少人過。克勤因詣其寮。舉青林搬柴話驗之。且謂古今無人出得你如何。會曰。也有甚難。曰。只如他道鐵輪天子裏。中旨意作麼生。曰。我道帝釋宮中放赦書。勤退語人曰。且喜遠兄便有活人句也。

大瀾詰頌詔住智海

京師士大夫想見風裁。叢林以詰靜退畏。闢不敢必其來。詰受詔欣然。俱數弟子至。解包之曰。傾都來觀。至謂一佛出世。院窄而僧曰。增無以容。則相枕地臥。有請限之者。詰曰。僧佛祖所自出。厭厭佛祖也。安有名爲傳法而厭佛祖乎。安得不祥之語哉。

禪師普聰住投子

聰得法靈巖。本住投子。時年八十餘。有監寺者。一夕爲盜所殺。副寺白聰。聰曰。我已知其人矣。副寺聞官而吏至。聰如前語。吏詰之。聰曰。殺監寺者。老僧也。吏卽以聰繫獄。聰無異詞。楊傑爲憲。按部至州。境夜夢神人云。此州有肉身菩薩。枉坐縲絏中。傑訪問聰事。釋之後。十年有行者患迦摩羅疾。而自首云。昔日殺監寺者我也。

禪師元靜居東山南堂

靜徧參名宿。無當意者。聞祖機峻。欲抑之。遂謁祖。茫然溟滓。莫之測。退參歷三載。入室徵詰。不契。乃曳杖渡江。適大水泛漲。因留四祖。儕輩挽歸。又二年。祖方許。可嘗商略古今。執靜手曰。得汝說。須吾舉得汝舉。須吾說。今而後。佛祖秘要。諸方關鍵。無逃子掌握矣。遂創南堂居之。

禪師黃龍下香城景福順寂

順西蜀人。得法黃龍。南然緣薄。所居皆遠方。小利學者。過其門。莫能識。順亦超然自樂。視世境如飛。

埃過目壽八十餘。坐脫於香城山。

乙亥二年

禪師克勤爲第一座

三佛侍祖於一亭上。夜話及歸。燈已滅。祖於暗中曰。各人下一轉語。佛鑑曰。彩鳳舞丹青。佛眼曰。鐵蛇橫古路。佛果曰。看脚下。祖曰。滅吾宗者。克勤耳。又一日。相謂曰。老和尚祇是乾爆爆地。往往說心說性。不得因請益。佛身無爲。不墮諸數。祖曰。譬如清淨摩尼寶珠。映於五色。五色是數。摩尼是佛身。圓悟謂二老曰。他大段會說。我輩說時費多少工夫。他祇一兩句便了。分明是個老大蟲。祖聞之。乃曰。若說心說性。便是惡口。又曰。貓有歃血之功。虎有起屍之德。所謂驅耕夫之牛。奪饑人之食。若不如是。盡是弄泥團。漢開聖覺。初參長蘆。夫錢。腳久無所得。聞祖法道。徑造席下。一日室中。問云。釋迦彌勒。猶是他奴。且道他是阿誰。覺云。鬚張三。黑李四。祖然其語。舉似勤座。元勤云。好則好。恐未實。不可放過。更於言下。搜看。次日入室。垂圓如前。覺云。

昨日向和尚道了。祖云。道甚麼。覺云。鬚張三。黑李四。祖云。是不是。覺云。和尚爲甚。昨日道是。祖云。昨日是。今日不是。覺於言下。大悟。覺後出世。住開聖。見長蘆法席太盛。乃鬪夫不原。所得拈香時。忽覺胸前如搗。遂於痛處發癰。成瘰。以乳香作餅塞之。久而不愈。竟卒。

祥符蔭曰。宗門法喜之樂。無如三佛之於五祖。然皆從曲折頓挫中得之。蓋祖本色。鉗椎脫盡。窠臼。而圓悟輩。鏗鏘激揚。大雅元音。非同細響也。

禪師黃龍下雲居元祐寂

祐疾諸方死。必塔者曰。山川有限。僧死無窮。他日塔將無所容。於是於開山宏覺塔之東。作卵塔曰。凡住持者。非生身不壞。火浴雨舍利者。皆以骨石填於此。其西又作卵塔曰。凡僧化。皆以骨石填於此。謂之三塔。七月七日。夜集衆說偈。而化世壽六十有六。坐四十有二夏。

禪師翠巖下智海真如慕詰寂

詰凡驗學者。舉趙州洗鉢話。上人如何。會僧擬對。

詰以手托之曰。歇去。自始至終。未嘗換機。十月初八。無疾而化。

丙子三年

歸宗文遷石門禪師慧洪從遊悟旨

文移居石門。禪子扣問必瞑目危坐。見來學則往治蔬圃。時文準參隨已十餘年。謂同行曰。老漢無意法道乎。一日準舉杖決渠水。濺衣忽大悟。走敘其事。文詬曰。此乃敢爾。蓋直耶。洪瑞州喻氏子。字覺範。少出家。日記數千言。十九試經。得度。遊方謁歸宗文。及隨文遷石門。掌記室。文患其深聞之弊。每舉玄沙未徹語。發其疑。凡有所對。文曰。汝又說道理耶。一日有客問文。洪上人參禪如何。曰。也有到處。也有不到處。客退。洪不自安。卽詣文求決所疑。文學風穴頌曰。五白貓兒爪距狷。養來堂上絕蟲行。分明上樹安身法。切忌遺言許外甥。且作麼生。是安身法。洪便喝。文曰。這一喝。也有到處。也有不到處。洪忽有省。及遊東吳。寓杭州淨慈。以頌發明風穴意。寄呈文曰。五白貓兒無縫罅。等閑拋出。

今人怕翻身。跳擲百千般。冷地看他成話。彌如今也解弄些些。從渠歡喜。從渠罵。却笑樹頭老舅。翫。只能上樹。不能下。又作玄沙。永徹偈曰。靈雲一見。不再見。紅白枝枝不著花。耐釣魚船上客。却來平地。攪魚蝦。文見乃爲助喜。洪自後閱汾陽語錄。至三玄頌。薦有所證。又嘗菴於高安九峯之下。因僧問臨濟賓主話。洪方欲酬。其問頓見三玄三要之旨。

禪師圓照下筠州逍遙省聰寂

聰歷住真如開善。晚退聖寧。敝衣糲食。安於戒律。與蘇東坡頴濱兄弟。善元豐中。蘇轍謫官高安。與聰遊。歡相得。元祐末。轍再謫高安。聰往見曰。老僧比夢與公遊於山中。知公當復來。此去來皆宿緣。無足怪者。高安之人甚敬愛之。而言有如聰禪師。而不坐道場者耶。聰曰。吾未始不坐道場也。杖策入逍遙山。九月戊申入滅。

丁丑四年

禪師報恩住大洪

愚黎陽劉氏子永冠舉方略擢上第後厭塵境請於朝乞謝簪紱爲僧上從其請遂遊心祖道至投子參青祖未久卽悟心要青祖曰汝再來人也宜自護持後住隨州大洪山與張商英友善英嘗以書問三教大要曰清涼疏第三卷西域邪見不出四見此方儒道亦不出此四見如莊老計自然爲因能生萬物卽是邪因易曰太極生兩儀太極爲因亦是邪因若謂一陰一陽之謂道能生萬物亦是邪因若計一爲虛無則是無因今疑老子自然與西天外道自然不同何以言之老子曰常無欲以觀其妙嘗有欲以觀其微無欲則常有微則已入其道矣謂之邪因豈有說乎易曰一陰一陽之謂道陰陽不測之謂神神也者妙萬物而爲言寂然不動感而遂通天下之故今乃破陰陽變易之道爲邪因撥去不測之神豈有說乎望紙後批示以斷疑網故也恩答曰西域外道宗多塗要其會歸不出有無四見而已謂有見無見亦有亦無見亦有非無見也蓋不卽一心爲道則道非我有故

名外道不卽諸法是心則法隨見異故名邪見如謂之有有則有無如謂之無無則無有有無則有見競生無有則無見斯起若亦有亦無見非有非無見亦猶是也夫不能離諸見則無以明自心無以明自心則不能知正道矣故經云言詞所說法小智妄分別不能了自心云何知正道又曰有見卽爲垢此則未爲見遠離於諸見如是乃見佛以此論之邪正異途正由見悟殊致故也故清涼以莊老計道法自然能生萬物易謂太極生兩儀一陰一陽之謂道以自然太極爲因一陰一陽爲道能生萬物則是邪因計一爲虛無則是無因嘗觀論之夫三界惟心萬緣一致心生故法生心滅故法滅推而廣之彌綸萬有而非有統而會之究竟寂滅而非無非無亦非非非有亦非非有四執既亡百非斯遣則自然因緣皆爲戲論虛無真實俱是假名矣至若謂太極陰陽能生萬物常無常有斯爲衆妙之門陰陽不測是謂無方之神雖聖人設教示悟無方然既異一心豈非四見何以明

之蓋虛無爲道道則是無若自然若太極若一陰一陽爲道道則是有常無常有則是亦有亦無陰陽不測則是有非無先儒或謂妙萬物謂之神則非物非物則亦是無故西天諸大論師皆以心外有法爲外道萬法惟心爲正宗蓋以心爲宗則諸見自亡言雖或異未足以爲異也心外有法則諸見競生言雖或同未足以爲同也雖然儒道聖人固非不知之乃存而不論耳良以未卽明指一心爲萬法之宗雖或言之猶不論也如西天外道皆大權菩薩化之所施爲橫生諸見曲盡異端以明佛法是爲正道此其所以爲聖人之道順逆皆宗非思議之所能知矣故古人有言緣昔眞宗未至孔子且以繫心今知理有所歸不應猶執權教然知權之爲權未必知權也知權之爲實斯知權矣是亦周孔老莊設教立言之本意一大事因緣之所成始所成終也然則三教一心同途異轍究竟道宗本無言說非維摩大士孰能知此意也

禪師悟新住翠巖

新曲江黃氏子狀魁岸黑面如梵僧以氣節蓋衆好面折人初謁圓通秀後造黃龍心大悟自譽曰天下人總是參得底新是悟得底心笑曰選佛得甲科何可常也因號死心叟住翠巖法堂後有齊安王祠鄉人祈禳無虛日新令知事毀之懼不敢乃躬自拆祠建丈室設榻燕寢俄有巨蟒盤臥觸叱去復來夜以爲常一夕夢神告曰弟子爲師所叱不違安處欲之廣南假莊夫六十人新夢中諾之未幾莊夫疫死者如其數嘗問學者曰且道果有鬼神麼道有又不打殺死心道無莊夫爲什麼却死者皆不契適元首座至答云甜瓜徹蒂甜苦瓠連根苦新大喜之

戊寅元符元年

禪師開先下雲居佛印了元寂

元字覺老生饒州浮梁林氏嗣開先遷圓通訥舉住承天自承天遷淮之十方廬山之開先歸宗潤之金山焦山江西之大仰又住雲居凡四十年間德化縉素縉紳之賢者多與之遊東坡謫黃州廬

山對岸元居歸宗。酬酢妙句。與烟雲爭麗。及其在金山東坡。釋還東。吳次丹陽。以書抵元曰。不必出山。當學趙州。上等接人。元得書。徑來坡迎。笑問之。元以偈答曰。趙州當日少謙光。不出山門見趙王。爭似金山無量相。大千都是一禪牀。坡抵掌稱善。李公麟爲寫照。元令作笑容。正月四日與客語。有會於心。軒渠一笑而化。

己卯二年

禪師天衣下靈巖圓照宗本寂

本院住蘇州靈巖十二月甲子將入滅沐浴而臥。門弟子環擁請曰。和尚道遍天下。今日不可無偈。幸強起安坐。本熟視曰。癡子。我尋常尙懶作偈。今日特地圖箇甚麼。尋常要臥便臥。不可今日特地坐也。索筆大書五字曰。後事付守榮。擲筆愁臥。若熟睡。然撼之已去矣。門人塔全身於山中。閱世八十。坐五十二夏。嗣法修頤住少林時。富鄭公罷謁之。值陞座。以目顧視左右。弱因之有省。時圓照方率詔住慧林。弱以詩寄謝曰。因見頤師悟入深。

緣傳得老師心。東南謾說江山遠。目對靈光與妙音。

祥符陰曰。全機無間。觸處皆通。本與頤一同旋顧視間。能使學者豁然悟入。謂非全體是道而能然乎。圓照法雲大雲門之道。於東南聲光照映。攝受廣大。曾不數傳。而宗祧中止。以此知傳持正脉。眞風綿互。不在乎道行之隆替也。余嘗登靈巖拜慧林祖塔於披雲臺畔。登圓照堂。仰其當日風規。不禁三太息焉。退翁儲住靈巖曰。關堂而名之曰圓照。構亭象山之半。而題之曰落紅。爲述富鄭公見投子。頤得悟及作偈寄圓照一段。昭示來茲千古道韻。巖壑不磨。後之君子。甯無目對靈光與妙音者乎。是將觀面遇之矣。

庚辰三年

禪師黃龍下晦堂寶覺祖心寂

心以生長極。南少以宏法棲息山林。方太平時代。欲觀光京師。以餞餘年。乃至京師。駙馬都尉王誡晉卿盡禮迎之。菴於國門之外。久之南還。再遊廬。

山嘗有偈曰不住唐朝寺。閑爲宋他僧。生涯三事。納故舊一枝藤。乞食隨緣去。逢山任意登。相逢莫相笑。不是嶺南能。可想公之標致也。臘既高。益移菴深入。棲絕學者。又將二十餘年。以十一月十六日中夜而寂。黃庭堅主後事。茶毗鄰峯秉炬。火不續。堅乃願悟。新曰此老師有待於吾兄也。新以喪拒堅。固強之。新乃執炬曰。不是餘殃累及我。彌天罪過不容誅。而今兩脚消空去。不作牛兮定作驢。以火炬打一圓相曰。只向這裏雪。屈擲炬。應手而燕。賜號寶覺。

禪師惟清自太平補住黃龍

清字覺天。自號靈源。叟生洪州武甯陳氏。方垂髫日。誦書數千言。有異。比邱見之。引手熟視。驚曰。菴蒲有此兒耶。告其父母。令出家。年十七爲大僧。初謁延恩法安。願留就學。安曰。子他日洗光佛。日照耀末運。苦海法船也。我尋常溝瀆耳。黃龍心禪師。是汝之師行矣。無自滯清。至黃龍。泯泯與衆作息。問答茫然不知端倪。夜書諸佛前曰。倘有省發。願

盡形壽以法爲檀。世世力弘大法。初閱玄沙語。倦而倚壁起。經行步促。遺履俯取之。乃大悟。以所悟告心心。曰。從緣入者。永無退失。然新得法空者。多喜悅致散。亂令就侍者。房熟。麻心鍾愛。至忘其爲師。議論商略如交友。諸方號清侍者。如趙州文遠。南院守廓。分世住舒州太平。學者爭趨。規矩不嚴。而自肅。江淮叢林號第一。元符二年。心春秋高。江西轉運使王桓迎清歸黃龍。欲以繼席。清亦不辭而往。

禪師慧勲由東山第一座出世太平

清赴黃龍。舉勲於舒守補處太平。時勲居東山第一座。祖遂付法。令往禮辭。祖告之曰。大凡應世。略爲子陳其四端。雖世俗常談。在力行何如耳。一勢不可使盡。二福不可受盡。三規矩不可行盡。四好語不可說盡。何故。好語說盡。人心易之。規矩行盡。人必煩之。福若受盡。緣心孤。勢若使盡。福必至。勲再拜服膺而退。辭清曰。住持當以拄杖包笠懸挂方丈屋壁間。去住如衲子之輕。則善矣。

徽宗名信

徽宗辛巳建中靖國元年

禪師淨因惟岳等應詔就文德殿爲皇太后陞座

二月皇太后上昇五七日詔淨因惟岳智海智清等六禪長老於文德殿登座說法

禪師東京法雲佛國惟白續燈錄成

白靖江人法雲秀嗣住東京法雲後住天童續燈錄三十卷上進帝爲製序

黃龍清移疾居昭默堂

清住黃龍未久卽移居昭默堂頽然宴坐一室人莫能親疎之然見者各得其歡心或得其片言隻句如獲拱壁嘗語洪覺範曰今之學者未脫生死病在什麼處在偷心未死耳然非其罪爲師者之罪也如漢高帝給韓信而殺之信雖死其心果死乎今之宗師爲人多類此古之學者言下脫生死效在什麼處在偷心已死然非學者自能爾實爲師者鉗鎚妙密也如梁武帝御大殿見侯景不動聲氣而侯景汗下不敢仰視退謂人曰蕭公天威

逼人吾不可以再見也景未嘗死而其心已枯竭無餘矣古之宗師爲人多類此今諸方所說非不美惡要之如趙昌畫花逼真世傳爲寶非眞花也祥符蔭曰不涉世緣方成道業寶覺靈源住黃龍未幾俱移疾居晦堂昭默棧絕學者然學者得其片言隻句如獲拱壁嗚呼久默斯要此鍵椎之所以妙密也

壬午崇甯元年

禪師自覺應詔住東京淨因

覺青州王氏子幼以儒業見知於司馬溫公然事高尚而無意功名一旦落髮從芙蓉遊履踐精密契悟超絕出世住大乘是年詔居淨因

禪師黃龍下寶峯雲菴眞淨克文寂

文退居雲菴十月十六日中夜沐浴更衣跏趺辭衆泊然而寂闔維五色成燄白光上騰烟所及皆成舍利道俗千餘人皆得之

徑山杲曰黃龍南下五祖只肯晦堂眞淨而已

癸未二年

禪師慧洪住臨川北禪

洪得眞淨之道辯博無礙顯謨朱世英請出世臨川之北禪先是寺有古應眞十六軸久亡其一洪至以詩嘲之未淹辰而應眞見夢所匿之家丐歸寺中因得之世以謂尊者猶畏其嘲而歸

甲申三年

禪師慧洪遊金陵居清涼以事入制獄

洪退遊金陵漕使吳正仲請居清涼未閱月爲狂僧誣以度牒冒名旁連訕謗事入制獄鍛鍊久之坐冒名著縫掖

芙蓉祖應詔住東京十方淨因禪院

祖應詔住淨因禪師齊璉首衆座下萬指時天下大興崇甯寺精擇傳法者永興經略使王序都轉運薛紹彭奏禮致璉開法崇甯

臨濟第十世五祖祖示寂

六月二十五日上堂辭衆曰趙州和尚有末後句你作麼生會試出來道看若會得去不妨自在快活如或未然這好事作麼說良久曰說卽說了也

祇是諸人不知要曾麼富嫌千口少貧恨一身多珍重時山門有土木之役躬往督之且曰汝等勉力吾不復來矣歸方丈淨髮澡身迄旦吉祥而化是夕山摧石隕四十里內巖谷震吼闔維設利如雨塔於東山之南

宗統編年卷之二十二

宗統編年卷之二十三

臨濟第十一世祖

諱克勤參五祖嗣法

徽宗乙酉崇甯四年

臨濟第十一世昭覺祖嗣宗統三十一年  
祖住成都府崇甯萬壽禪寺

成都師翰林郭知章請開法陞座一向目視雲霄壁立千仞則孤負諸聖一向拖泥涉水灰頭土面則埋沒自己如今恁麼也得不恁麼也得且貴正

眼流通。委悉麼。直饒高步毗盧頂。不稟釋迦文。婢視聲聞。奴呼菩薩。底來也。須亡鋒結。舌自餘故。是出頭不得。所以道三世諸佛。只言自知。歷代祖師。全提不起。一大藏教。詮註不及。明眼衲僧。自救不了。若據本分草料。猶是節外生枝。不涉化門一句。作麼生。道陣雲橫海上。拔劍攪龍門。

丙戌五年

禪師清遠住舒州崇甯萬壽

遠得法後。隱四面大中庵。時天下一新崇甯萬壽寺。舒守王渙之請開法。未幾遷龍門道望。頗振

丁亥大觀元年

芙蓉祖應詔住天甯

書法已而應之也

冬詔祖自淨因移天甯。差中使押入。不許辭免。

芙蓉祖表辭師號編管緇州

開封尹李孝壽奏。祖道行卓冠叢林。宜有以褒顯之。即賜紫伽黎號。定照禪師。祖上表辭。上令孝壽躬諭。明廷旌善之意。而祖確然不同。上怒。收付有司。有司知祖忠誠。而適犯天威。問曰。長老枯悴。有

疾乎。祖曰。平日有疾。今實無。又曰。言有疾。即於法免罪。譴祖曰。豈敢僥倖稱疾。而求脫罪。譴乎。更太息。於是受罰著縫掖。編管緇州。都城道俗見者。流涕。祖氣色閑暇。至緇州。僦屋而居。學者益親。祥符陰曰。宋時奉勅開堂。賜衣錫號。雖屬朝廷崇法旌善之意。然沙門釋子。離世間相。以道爲尊。若染世榮。何名出世。芙蓉祖躬矯其弊。足爲法門一振清風。但大道無方。初非一定。隨機接引。亦在乎人人境兩忘。則又無可不可。拘拘執礙。反致自成。過咎毫釐之間。不可不辨也。

宗杲遊歷諸方

杲生宣州奚氏。年十三。方從學鄒魯。未半月棄去。出家。已如有宗門中事。遍閱諸家語。尤喜雲門。睦州。嘗疑五家宗派。元初只是一個達摩。因什有許多門庭。然性俊逸。不羈。父母勉令參學。歷明教太陽。見元首座洞山微和尚。盡得洞上宗旨。又至真如。詰座下入慶藏主賢蓬頭之室。往黃龍東林。俱不合。復謁心印。珣秀。鐵面高第。與語大奇之。欲

留會下而果不樂。因指令參寶峯準至寶峯機辯縱橫而準無可意。嘗曰：汝做得座主。奴又一日語曰：果上座。我這裏禪你一一理會得。教你說亦說得。只有一件事未在你。還知麼？果曰：未審是什麼事。準曰：你只欠因地一下。如何敵得生死？果曰：正是某疑處。果職書記一日準見其指甲長顧之曰：書記東司頭禪子想不是汝洗的。果遂求作園頭。九月後對衆曰：我指甲稍長一裁許。湛堂先師便向十指爪上出見。

雲巖新移黃龍

新自積翠領雲巖建經藏太史黃庭堅作記有以其親墓記錢於碑陰者。新恚罵曰：陵侮不避禍。若是語未卒。電雷擊碑析而中分之。遷黃龍學者雲委。

戊子二年

祖結庵於芙蓉湖

祖在緇州詔放自便庵於芙蓉湖中不下山不赴齋不發化。主將本庵莊課一歲所得均作三百六十分。日取一分用之。更不隨人添減。新到相見茶湯而已。

禪師道甯住潭州開福

甯歙溪汪氏子。參五祖顓徹法源。潭師席震請住開福。衲子景從。

己丑三年

禪師德洪復僧服

洪遊京師。丞相張商英特奏復僧服。改今名太尉郭天民。奏賜槌服號寶覺。圓明自稱寂音尊者。

禪師圓照下東京法雲大通善本寂

本凡三住。大剎玉立孤峻。儼臨清衆如萬山環天。柱讓其高寒。王公貴人填門問道。寶坊地湧塗金。縷碧未嘗以言徇物。以色假人。嘗示衆曰：上士聽法以神中士聽法以心下士聽法以耳。且道更有一人來將什麼聽。乃卓拄杖曰：高也著低也著落。落圓音徧寥廓。十方內外更無他。不用無繩而自縛。晚請於朝。歸老西湖龍山杜門却掃。士大夫想其高風。願見而不可得。十二月甲子屈三指。謂左右曰：止有三日已而果寂。本臨衆三十年未嘗笑。或問之本曰：不莊嚴無以蒞衆。所至見畫佛菩薩。

行立之像不敢坐伊蒲塞饌以魚戲名者皆不食其真誠敬事防心離過類如此平居作止直視不瞬及其陞堂說法則左右顧如象王旋同學者多因之悟入時以名與圓照同呼爲小本

庚寅四年

黃龍慧南詔證普覺大師

辛卯政和元年

禪師慧勲應詔住東都智海

禪師德洪配海外

時張商英罷政事坐交張郭又左司陳瑩中撰尊堯錄當軸者嫉之謂洪頗助其筆削十月禪僧伽

黎配海外

壬辰二年

祖住夾山禪師安民爲第一座

禪師紹隆來參領悟

隆和之含山人九歲辭親居佛慧院踰六年得度受具又五年謫長蘆信略沾法味有傳祖語至者隆讀之歎曰想醉生液雖未澆腸沃胃要且使人

慶快第恨未聆警欽耳遂由寶峯依湛堂客黃龍叩死心來謁祖一日入室祖問曰見見之時見非是見見猶離見見不能及舉拳曰還見麼隆曰見祖曰頭上安頭隆聞脫然契證祖叱曰見個甚麼隆曰竹密不妨流水過祖肯之傳掌藏教有問祖曰隆藏主柔易若此何能爲哉祖曰瞋睡虎耳

癸巳三年

禪師德洪赦歸

春赦歸冬復證獄於并州

禪師開福道甯寂

甲午四年

祖徙道林樞密郭子常奏賜紫衣師號

禪師德洪歸湘西明白庵

洪得還筠州往來九峯洞山野服蕭散以詩文自娛將自西安入衡湘依法屬以老復爲狂道士執以爲張懷素黨下南昌獄治百餘日非是蓋謬以張天覺爲張懷素也會赦免歸湘西之南臺治所居榜曰明白庵自爲之銘有曰一庵收身以時臥

起語默不味絲毫弗差蒙雜而著隨乎於嘉於是著疏經論發揮秘奧解易作僧寶傳三十卷林間錄二卷高僧傳十二卷智證傳十卷志林十卷冷齋夜話十卷天廚禁燭一卷石門文字禪三十卷語錄偈頌一編法華合論七卷楞嚴尊頂義十卷圓覺皆證義二卷金剛法源論一卷起信論解義二卷並行於世

闡提居士許顥智證傳後序曰昔人有言切忌說破而此書挑剔示人無復遺意吁可怪也罷參禪伯以此書爲文字教禪而見詆新學後進以此書漏泄已解而見憎孔子作春秋曰知我者其唯春秋乎罪我者其唯春秋乎嗟哉猶未若此書有罪之者而無知之者也頃辛丑歲余在長沙與覺範相從彌年其人品同學道業知識皆超妙卓絕過人遠甚喜與賢士大夫大人遊橫口所言橫心所念風駛雲騰泉湧河決不足喻其快也以此塵縈福證略不介意視一死不足以驚懼之者守此以歿不少變節大抵高者忌其略已下者恥其不逮

玷於死亡不足以償人意謗蹟百出而覺範無纖毫之失奉戒清淨世無知者今此書復出於歿後竊度此意蓋慈心仁勇愍後生之無知邪說之害道犯昔人之所切忌而詳言之者也甯使我得罪於先達獲謗於後來而必欲使汝曹聞之於佛法中與救鵠飼虎等於世法中程嬰公孫杵臼貫高田光之用心也烏乎資哉頭保甯現嗣祥符蔭曰寂音尊者豈是欲以語言名世然以羅身多難不得大行其志庵居著述以老識者雖爲一時惜不可不爲千古慶也圓悟祖稱其筆端具大辯才爲不可及信夫至智證傳世有罪之而無知之者當時已有明言之者矣

乙未五年

禪師慧懃退智海勅屠蔣山

禪師雲庵下勸潭湛堂文準寂

準嗣雲庵文律身以約掃地煎茶皆躬爲之時宗杲在座下值其病問曰某向後當見何人準曰有個勤巴子我不識渠汝可見之當能辦子大事七

月二十日更衣說偈而化。闍維設利晶圓光潔。暗窗數珠不壞。宗杲謁丞相張天覺求塔銘一言而契。留下榻名其庵曰妙喜。且言吾必助子見川。勤諫議洪駒父序其錄。名士李商老撰次逸事。同門覺範洪述其行實。其高道碩德可想見云。

雲居收日出關走江淮。閱三十年。參一十八人。善知識於中。無出佛果。佛眼。死心。靈源。湛堂。五大士而已。蓋真正宗師考其全才如此之難。若佛果。佛眼。死心。靈源之嗣。固已光明於世。獨湛堂開法日淺。未有繼其高躅者。然覽其遺編。想其胸次。信餘子未易企及也。覺範稱準於真淨之門。所謂家名辯才氣宇逸羣者。抑知言哉。

禪師芙蓉支下西京天甯禪誦寂

誦蔡州宋氏子嗣芙蓉祖。初住韶山。次住天甯。丹霞九月四日忽召主事。令以楮囊分而爲四。衆僧童行常住津送各一。既而復曰。丹霞有個公案。從來推倒扶起。今朝普示諸人。且道是個甚底。顧視左右曰。會麼。曰。不會。誦曰。偉哉大丈夫。不會末後。

句遂就寢右脇而化

考定

幻寄指月錄誤以誦此一段安淨因覺下今依續傳燈考正

禪師黃龍死心悟新寂

新晚屬疾。退居晦堂。訃聞。諸方衲子爲之嗚咽流涕。

丙申六年

丁酉七年

芙蓉庵賜額華嚴禪寺

禪師士珪出世和州天甯

珪嗣龍門遠

禪師應端住百丈

端謁真淨文機。不契。至雲居會靈源分座。爲衆激昂。端扣其旨。然以妙入諸經。自負源痛割之端。乃援馬祖百丈機語及華嚴宗旨爲表源笑曰。馬祖百丈固錯矣。而華嚴宗旨與個事喜沒交涉。端憤然欲他往。因請辭及揭簾忽大悟。汗流浹背。源見乃曰。是子識好惡矣。馬祖百丈文殊普賢幾被汝帶累。由此譽望四馳。士大夫爭挽出世。皆不就。太

史張司成以百丈堅請不得已始應之嗣靈源清

禪師黃龍昭默堂靈源惟清寂

禪師五祖支下舒州太平佛鑑慧懃寂

律師錢塘靈芝寺元照寂

照字湛然精台教究羣宗以律爲本南山一宗蔚

然大振嘗曰化當世莫若說法垂將來莫若著書

撰述甚富跌坐而化

戊戌重和元年

禪師清遠奉勅住和州褒禪樞密鄧洵奏賜師號紫

衣

曹洞第八世芙蓉祖示寂

祖示門風偈其一曰妙唱非干舌其二曰死蛇驚

出草其三曰解針枯木吟其四曰鐵鑄舞三臺其

五曰古今無間各系以偈五月十四日無疾而寂

祖初以授子所付太陽皮履直褻付洞山道徽微

退洞山還浙東歿於雙林祖取以還鹿門山付嗣

法法燈建閣藏之曰藏衣

存考 芙蓉法嗣二十六人 發明法嗣不書近因洞上世次

疑案故書芙蓉丹霞長蘆以存考

丹霞道 香山法成 大智齊璉 淨因自覺  
資聖南 白水修已 石門元易 洞山道微

韶州禧誦 龍門南 鹿門法燈 寶峰惟照  
普賢善秀 招提寶 大洪 恭 智

靈巖應 合川鑑 少林江 景山居  
慧日南 齊州善應 西京尼道深 太傳高世則

朝請崔居士 提刑楊居士 共二十六人十三人有錄行世

曹洞第九世祖

諱子淳劔州賈氏子弱冠爲僧徹證芙蓉之室

嗣法

曹洞第九世丹霞祖嗣宗統

上堂曰乾坤之內宇宙之間中有一寶秘在形山

肇法師恁麼道祇解指踪話跡且不能拈示於人

丹霞今日劈開宇宙打破形山爲諸人拈出具眼

者辨取以拄杖卓一下曰還見麼驚鷺立雪非同

色明月蘆花不似他

禪師清了至丹霞契悟

了左綿雍氏子襁褓入寺見佛喜動眉睫咸異之

年十八得度出蜀至漢沔叩丹霞之室祖問如何

是空劫已前自己了擬對祖曰你開在且去一日

登鉢孟峯。豁然契悟。徑歸侍立。祖掌之曰。將謂你知有了。欣然拜之。

丹霞祖住大洪禪師。正覺爲第一座。

覺隲州李氏子。幼有道韻。出家具戒。謁香山成一見。器重。聞僧誦蓮經。警然有省。令造丹霞祖。問如何是空劫以前自己。覺曰。井底蝦蟆吞却月。三更不借夜明簾。祖曰。未在。更道。覺擬議。祖打一拂子。曰。又道不借。覺言下釋然。祖住大洪。覺掌牋。記遂命首衆。

己亥宣和元年

詔改僧爲德士。佛稱大覺金仙。法師道永抗疏不聽。

發明書詔見詔之謬妄也。永不書貶不予其貶也。

禪師住常德府文殊院。心道。聞詔上堂曰。祖意西來事。今朝特地新。昔爲比邱相。今作老君形。鶴鷺披銀褐。頭包焦葉巾。林泉無事客。兩度受君恩。所以道欲識佛性義。當觀時節因緣。且道。卽今是甚麼時節。毗盧遮那頂戴寶冠爲顯眞。中有俗文殊老叟身披鶴鷺。且要俯順時宜。一人既爾。衆人亦

然大家成立叢林。喜得羣仙聚會。共酌迷仙酒。同唱步虛詞。或看靈寶度人經。或說長生不死藥。琴彈月下指。端發太古之音。碁布軒前。妙著出神機之外。進一步便到大羅天上。退一步却入九幽城中。祇如不進不退一句。又作麼生道。直饒羽化三清。路終是輪迴一幻身。

祖奉詔移蔣山禪師法泰居第一座。景元祖覺等來參學者無地以容。

禪師清了抵長蘆繼其席。

了遊五臺之京師。浮汴直抵長蘆。謁祖照。一語投契。命爲侍者。踰年分座。未幾稱疾退。閑命了繼席學者如歸。

曹洞第九世鄧州丹霞祖示寂。

五位敘曰。黑白未分。難爲彼此。玄黃之後。方見自他。於是借黑權。正假白。示偏正。不坐正。夜半虛明。偏不坐。偏天曉陰晦。全體卽用。枯木花開。全用卽眞。芳叢不豔。摧殘兼帶。及盡玄微。玉鳳金鸞。分疎不下。是故威音那畔。休話如何。曲爲今時。由人施。

設塔全身於大洪之南

存考 丹霞法嗣九人

長蘆清了 天童正覺 大洪慶預 治平潤  
武當佛巖 大乘昇 隨州修山 太陽滿  
歸宗明共九人  
四人有錄行世

存考

近有洞上知識新出祖燈大統查有鹿門覺

淨五世以鹿門覺直接芙蓉此蓋誤以淨因覺爲鹿門覺又誤以鹿門藏衣之故而遂謂鹿門覺爲親見芙蓉也淨因覺出青州王氏幼以儒業受知司馬溫公從芙蓉遊嗣其法崇寧初詔住東京淨因實芙蓉之先鹿門覺參天童淨青州辨參鹿門覺皆機語歷載在燈錄豈可隱改況丹霞長蘆天童雪竇以及長翁淨五世相承井然可按其間相去五十二年豈可截鶴續鳧因一時一語之差互而削去作史者所以貴闕疑而世次有無寧得混同筆削之例也

曹洞第十世祖

諱清了嗣法丹霞

庚子二年

曹洞第十世長蘆祖嗣宗統三十四年

詔復德士爲僧

詔僧復披剃祖在蔣山陞座曰先佛有頂顙一機如擊石火似閃電光祖師有末後一句吞栗棘蓬透金剛圈可以敵聖驚羣可以轉凡成聖云云

文殊心道禪師上堂曰不掛田衣著羽衣老君形相頗相宜一年半內閑思想大底興衰各有時我佛如來預識法之有難教中明載無不委知較量年代正在於茲魔得其便惑亂正宗僧改俗形帶更名字妄生邪解刪削經文鑿鉞停音鉢孟添足多般矯詐欺罔聖君賴我皇帝陛下聖德聖明不忘付囑不廢其教特賜宸章頒行天下仍許僧尼重新披削實謂寒灰再燄枯木重榮不離俗形而作僧形不出魔界而入佛界重鳴法鼓再整頹綱迷仙酒變爲甘露瓊漿步虛詞翻作還鄉曲子放下銀木簡拈起尼師壇昨朝稽首擎拳今日和南不審祇改舊時相不改舊時人敢問大衆舊時人是一個是兩個良久曰秋風也解嫌狼籍吹盡當年道教灰

禪師正覺至長蘆居第一座

祖初住長蘆時覺在圓通祖遣僧邀至大衆鳴鐘出迎見其衣冠穿弊且易之祖俾侍者易以新履覺却曰吾爲鞋來耶衆聞心服懇求說法居第一

座

禪師懷深應詔住相國慧林院

深壽春夏氏嗣長蘆信

禪師惟照詔補圓通

照幼超邁一日授書至性相近也習相遠也遽曰凡聖本一體以習故差別我知之矣即趨成都荆染師清泰令聽起信輒歸臥泰詰之曰既稱正信大乘豈言說所能了乃謁芙蓉祖於大洪一夜坐閣道適風雪震薄聞警盜者傳呼過之有省大觀中芙蓉嬰難照自三吳欲趨沂水僕夫迷道因舉杖擊之忽大悟歎曰是地非鰲山也耶至沂祖望而喜曰紹隆吾宗必子數輩矣因留躬耕湖上累年出住招提遷甘露三祖是年詔補圓通

禪師五祖支下舒州龍門佛眼清遠寂

書雲前一日飯食訖趺坐謂其徒曰諸方老宿臨終必留偈辭世世可辭乎且將安往乃合掌怡然趨寂塔於龍門

祥符蔭曰五祖門下三佛師資兄弟激揚鏗鏘極

法苑古今之盛近日唯三峯門下聖恩靈嚴靈隱一時三點成金玉壘聲振吳越庶幾似之噫難矣

辛丑三年

祖赴禪講千僧齋禪師淨因繼成囑退華嚴義虎太尉陳良弼設千僧齋延祖及法真慈受二大禪師并十大法師禪講千僧帝私幸觀之太師魯國公亦與焉有善華嚴者乃賢首宗之義虎也對衆問諸禪曰吾佛設教自小乘至於圓頓掃除空有獨證真常然後萬德莊嚴方名為佛嘗聞禪宗一喝能轉凡成聖則與諸經論似相違背今一喝若能入吾宗五教是爲正說若不能入是爲邪說諸禪視成成曰如法師所問不足三大禪師之酬淨因小長老可以使法師無惑也成召善善應諸成曰法師所謂愚法小乘教者乃有義也大乘始教者乃空義也大乘終教者乃不有不空義也大乘頓教者乃即有即空義也一乘圓教者乃不有而有不空而空或作空而不有而不空義也如我

一喝非唯能入五教。至於工巧技藝諸子百家。悉皆能入。成震聲喝。一喝問善曰。聞麼。曰。聞。成曰。汝既聞此。一喝是有能入。小乘教須臾又問善曰。聞麼。曰。不聞。成曰。汝既不聞。適來一喝。是無能入。始教遂顧善曰。我初一喝。汝既道有。喝久聲銷。汝復道無。道無則元初實有。道有則而今實無。不有無。能入終教我有一喝之時。有非是有。因無故有。無一喝之時。無非是無。因有故無。卽有卽無。能入頓教。須知我此一喝。不作一喝用。有無不及。情解俱忘。道有之時。纖塵不立。道無之時。橫徧虛空。卽此一喝。入百千萬億喝。百千萬億喝。入此一喝。是故能入圓教。善乃起再拜。成復謂曰。非唯一喝爲然。乃至一語一默一動一靜。從古至今。十方虛空。萬象森羅。六趣四生。三世諸佛。一切聖賢。八萬四千法門。百千三昧。無量妙義。契理契機。與天地萬物一體。謂之法身。三界唯心。萬法唯識。四時八節。陰陽一致。謂之法性。是故華嚴經云。法性徧在一。切處。有相無相。一聲一色。全在一塵。中含四義事。

理無邊徧無餘。參而不雜。混而不一。於此一喝中。皆悉具足。猶是建化門庭。隨機方便。謂之小歇場。未至寶所。殊不知吾祖師門下。以心傳心。以法印法。不立文字。見性成佛。有千聖不傳底。向上一路。在善又問曰。如何是向上一路。成曰。汝且向下。會取善曰。如何是寶所。成曰。非汝境界。善曰。望禪師慈悲。成曰。任從滄海變。終不爲君通。善膠口而退。聞者靡不歎仰。皇帝顧謂近臣曰。禪宗玄妙深極。如此淨因才辯。亦罕有也。近臣奏曰。此宗師之緒餘也。

禪師德止錫號眞際居圓通

止金紫徐閔中之季子也。雙瞳紺碧。神光射人。強記過人。學文有奇語。弱冠夢異僧授四句偈。持念不忘。隨父漕西洛。一夕忽大悟。力求出家。父弗許。欲官之。止曰。某方將脫世網。出三界。豈復刺頭名利中耶。遂祝髮受具。印記於寶峯。照名振京師。賜號眞際。俾居圓通。

壬寅四年

癸卯五年

祖移金山禪師道元來參

元字徹菴。謁大別道看廓然無聖語。忽笑曰。達摩元來在這裏。道譽之參佛。鑑佛眼俱蒙賞識。依祖於金山。以所見告祖。未之許。後祖以拳擊之。元撫掌大笑而徹。

禪師黃龍下東京。天甯長靈守卓寂。

卓嗣黃龍清闍維。日上遣中使賜香。持金盤求設利。薰香罷。盤中鏗然視之。五色者數顆。大如豆。使者持還。上見大悅。

甲辰六年

祖奉勅住東京天甯。爲國開堂。曇玩侍行。禪師宗杲中仁等領悟。

玩徧參叢席。值朝廷改僧爲德士。與同志數人入頭陀巖。食松自處。久之。祖至巖頭。令去鬚髮。及祖住天甯。與玩偕行。命掌香水。海未幾舉杓擊鼓。頓明大法。凡有問。皆對曰。莫理會。故流輩咸以莫理會稱之。杲先至。候祖入院。晨夕參請。祖學諸佛出

身處東山水上行。令下語。杲參及一年。凡下四十九轉語。皆不契。一日。祖赴一達官宅。陞座。舉此公案曰。若有問天甯。只向道薰風自南來。殿角生微涼。杲聞。舉豁然。祖察其雖得前後際。斷動相不生。爲却反在淨裸裸處。語之曰。永也。子雖有得矣。而大法未明。但可惜死了。不能得活。不疑言句。是爲大病。不見道懸崖撒手。自肯承當。絕後再甦。欺君不得。因令居擇木寮。作不釐務侍者。因舉有句無句。如藤倚樹。詰杲。杲絕開口。祖便曰。不是。不是。如此者。半載。一日。問曰。見說和尚當時在五祖。亦曾問此話。不知五祖如何答。祖默不應。杲曰。和尚當時不可獨自問。須對大眾。前今說何妨。祖遂曰。我問有句無句。如藤倚樹時如何。五祖曰。描也描不成。畫也畫不就。又問。忽遇樹倒。藤枯時如何。五祖云。相隨來也。杲當下大悟。祖遂舉古今諸訛徵詰之。杲了無滯礙。祖拈掌稱善。自是縱橫踴厲。莫敢嬰其鋒。未幾。遂命首衆。仁初窮經論於宗門。未之信。謁祖。一見。服膺奮然。造前祖曰。依經解義。三

世佛冤離經一字卽同魔說。速道速道。仁擬對祖。劈口掌之。因墮一齒。卽大悟。東湖居士徐俯掛鉢。擇木寮。善見居士李彌遠等俱入室參叩。

祥符陰日。師資之間。問不容髮。古人眼明心公。造就來學。如春風秋露。時節因緣。自然成熟。不可強也。浮山遠未識白雲之面。決其能了演祖大事令。往依之。湛堂準未見勤祖。亦決其能辦杲之大事。囑以必當往見演祖與杲。卒如其言。而毫髮無爽。夫演祖與杲。當時在浮山湛堂座下。器局爲何等。二公豈不能撫而收之衣鉢。下然二公不以一己門庭之私。自欺欺人。惟演祖與杲亦決不肯輕易自欺受人欺。故能後來徹證造極。而成光輝盛大之業。演祖於浮山則潯然。禮辭杲於湛堂。歿後盡心喪。襄後事俱克踐其言。所以事之者亦至嗚呼賢矣。

禪師渤潭下天童普交寂

交幼穎悟。往南屏習台教。因爲檀越修懺。有問曰。公之所懺。爲自懺耶。爲他懺耶。若自懺。罪性何來。

若懺他。他罪非汝。烏能懺之。交不能對。易服造渤潭。乾足纔踵門。乾卽呵之。交擬問。乾卽曳杖逐之。一日忽呼交至。曰。我有古人公案。要與你商量。交擬開口。乾遂喝交。豁然領悟。於是名聞四馳。學者宗仰。掩關天童。却掃者八年。郡守請開法。恐其遁。預遣吏候於道。不得辭。上堂。曰。咄哉黃面老佛法。付王臣林下。無情客官。差逼殺人。三月二十日沐浴陞堂。說偈而寂。

乙巳七年

禪師紹隆歸省父母住開聖

禪師渤潭下二靈庵主知和寂

和玉峯張氏子。兒時嘗習坐。垂堂堂。傾父母意。其必死和。瞑目自若。因使出家。謁渤潭。乾乾問作甚麼。和擬對。乾便打。復喝曰。你喚甚麼作。禪和。薦領旨。隱雪竇之中峯。棲雲逾二十年。嘗有偈曰。竹筍二三升。野水松窗五七片。閑雲道人活計只如此。留與人間作見聞。和初與天童交。盟曰。他日吾二人宜踞孤峯絕頂。目視霄漢。作世外之人。不可作

今時藉名官府屈節下氣於人者交後爽盟住天童和絕不與接見住二靈居無長物唯二虎侍其側一日忽威於人以偈遣之四月十二日跌坐而逝異跡甚著

### 欽宗

欽宗丙午靖康元年

禪師正覺由長蘆第一座出住泗州普照

慧林深還吳住靈巖

深力請還山優詔不允命大丞相固留之不可拂袖出都遍遊江浙所至衆擁歡迎如一佛出世主靈巖化大行蔣山虛二禪席以請吳人遮道不放行乃留靈巖慰其意

### 高宗

高宗丁未

靖康二  
五月建炎元年

祖遷金山改住雲居宗杲居第一座

十一月初六日在鎮江浮玉山受劄召赴行朝十七日朝見奏對賜號圓悟奉勅住南康軍雲居真如禪院舉杲首座立僧舉端裕爲衆入室

### 曇華來參

華新州黃梅江氏子年十七出家於邑之東禪首謁隨州水南遂染指法味徧歷江湖所至激揚無不投契上雲居參禮祖一見拊勞痛與提策服勤趨走惟恐後

禪師紹隆結廬銅峯郡守李光延居宣州彰教

禪師宗珏首衆長蘆

足庵智鑑時在座下珏居第一座卽舉之

禪師智訥住靈隱

訥秀州夏氏十四得度練習戒行已如大僧歎曰修無上道而求之文句中是刻舟也謁長蘆信稱法中高第淮人敬愛之延住真州天甯鼎新法席幾至萬礎住靈隱獻皇后臨幸詔陞座說法賜號妙空大師

戊申二年

禪師芙蓉支下洪州寶峯闡提惟照寂

照復居泐潭正月七日寂闍維得設利如珠珎舌齒不壞

禪師真淨下筠州清涼寂音覺範德洪寂

洪才稟天然與士大夫游議論衰至必奪席黃山谷贈之詩有曰不肯低頭拾卿相又能落筆生雲烟恨東坡不及見之張無盡稱爲天下英物聖宋異人然工呵古人而拙於用已不能全身遠害嘗自謂識不知微道不勝習夏五月寂於同安門人建塔鳳棲山閱世五十有八

長蘆祖退席禪師正覺補住長蘆

覺至雲居祖有請長蘆覺禪師上堂法語

祖歸昭覺

宗杲辭居古雲門道元首衆晤堂慧遠入蜀參祖

曇華往謁彰教

祖入蜀指華見彰教

己酉三年

禪師紹隆徙虎邱曇華從

隆徙虎邱華爲之先馳未半載通徹大法頓明祖爲人處機用越格道聲藹然洽於叢林

庚戌四年

長蘆了祖遊四明主補陀入台州住天封綱目作甲子誤

祖既退長蘆東遊四明主補陀旋移台之天封相國李綱寄之詩曰煩師飛錫過天台爲問了公何事了又侍郎李彌遜投謁詩曰紅塵白髮不相投來就閑房借板頭未幾入閩住雪峯

長蘆覺住天童

禪師大瀉下和州光孝慧蘭火化

蘭詞大瀉諱嘗以觸衣書七佛名叢林稱爲蘭布視建炎末賊犯淮執蘭見會長長曰聞我名否蘭曰我所聞者唯大宋天子之名長惠令左右以鎚擊之鎚至輒斷壞長驚異延麾下敬事之經旬蘭索薪自焚無敢供者親拾薪成龕怡然端坐烟燄一起流光四騰賊跪伏多灼膚者火絕得五色舍利併靈骨北歸所執僧尼悉聽自便和人至今詠之

禪師宗杲入閩

杲避亂走湖南轉江右間關入閩築庵長樂洋嶼從之者彌光道顏等五十三人未五十日得法者

十三人後皆角立前此未之有也給事江少明請住小谿雲門庵

妙喜果竹庵珪集禪林寶訓

杲因亂隱古雲門遷珪同避地襄陽共集訓五十篇後東吳淨善續集成寶訓

辛亥紹興元年

壬子二年

禪師長蘆下蘇州靈巖慈受恒深寂

深住靈巖三年得包山廢院一新之嘗有偈示學人曰醜醜與毒藥萬味同一口美惡盡消融是故名慈受深住靈巖時登拔雲臺有懷藥山十詠古今人無古今而時有古今道苟同矣雖歷世千百如同乎其時如見乎其人不爾雖同堂遐乎千里遙也禮陽遺韻昭煥異代可謂無間然矣噫以古驗今以今觀昔安知異時不有懷吾慈受如慈受之懷藥山者乎退翁儲和尚住此山歲甲午建二閣於法堂之左右右曰慈受蓋取毒來慈受之義也已而諸閣前洗研池得石碣磨洗讀之乃深懷古十詠也慈受二字閣名先兆衆與之儲曰了菴欲公至正問住此山藥中有跋深禪師偈語云深公既退此席還老包山聞靈巖禪堂落成有我亦老來思舊隱異時還借板頭眠之句今禪堂上梁方四日此碣出深師所以靈禪堂之成也遂用其韻成十頌適中峰徹至各再和諸方門弟子咸有和章

禪師墨華住處州妙巖

華禮辭虎邱分座於處州連雲處守以妙巖請出世

靈隱訥住吳靈巖

咸安王韓世忠表請平江靈巖爲功德院薦先福請訥主之寺據絕頂而飲不給訥伐石鑿井出泉今號佛海泉

癸丑三年

禪師士珪奉詔開山鴈蕩能仁

珪紹興間奉詔開山鴈蕩能仁時眞歇了祖聞珪至恐緣法未熟特過江迎歸方丈大展九拜以誘温人由是翕然歸敬未到院有徒懼行規法深夜放火鞠爲瓦礫之墟珪就樹縛屋陞座曰愛閑不打鼓山鼓投老來看鴈蕩山傑閣危樓渾不見溪邊茅屋兩三間聽法檀那并力營建遂成寶坊甲寅四年  
禪師太平下何山守珣寂  
珣造太平參佛鑑懃隨衆參請邈無所入乃封其

袞曰此生若不徹去誓不展此晝坐宵立如喪考

妣逾七七曰忽慙上堂曰森羅及萬象一法之所

印。珣聞頓悟。慙曰可惜一顆明珠被這風顛漢拾

得。囑令護持。是夕厲聲謂衆曰。這回珣上座穩睡

去也。圓悟祖聞之。令人召至。因與遊山。偶到一水

潭。遽推珣入潭。忽問曰。牛頭未見。四祖時如何。珣

曰。潭深魚聚。祖曰。見後如何。珣曰。樹高招風。祖曰。

見與未見時如何。珣曰。伸脚在縮脚裏。祖大稱之。

勲移蔣山。命分座說法。出住禾山。後徙何山。及天

甯。解制日。退席謂雙槐居士鄭續曰。十月八日是

佛誕。忌則吾時至矣。迄還漳南。越三日雞鳴。端坐

如平時。侍者請遺偈。珣曰。不曾作得。言訖而逝。

長蘆了祖應詔主育王

乙卯五年

禪師五祖支下嘉州九頂山清素寂

四月二十四日書偈遺衆而寂

禪師五祖支下大隨南堂元靜寂

秋七月山中大雨雪有異象別衆遺誠而寂茶毗

異香徧野設利五色

臨濟第十一世成都昭覺寺圓悟真覺祖示寂

八月己酉示微恙。命首座道元補住昭覺。趺坐書

偈。投筆而寂。茶毗舌齒不壞。設利五色無數。塔於

昭覺。曰寂照證真覺禪師。

祥符蔭曰。祖說法如雲雨。璞玉渾金。奏希聲於天

闕。來學皆龍象。鞭雷策電。展逸足於天衢。觀白雲

之接演。祖五祖之於祖。祖之於虎邱。妙喜諸公。獅

子教兒。與老牛舐犢相去。夫何如哉。祖示隆知藏

果書記法語。尤爲獅乳醍醐。沾其味者。決不作盲

驢跛牛見解也。

臨濟第十二世祖

諱紹隆

臨濟第十二世平江虎邱祖嗣宗統二年

上堂曰。凡有展拓。盡落今時。不展不拓。墮坑落塹。

直饒風吹不入。水灑不著。檢點將來。自救不了。豈

不見道。直似寒潭月影。靜夜鐘聲。隨扣擊以無虧。

觸波瀾而不散。猶是生死岸頭事。拈拄杖畫一畫。

曰。割斷古人多年葛藤。點頭石不覺拊掌大笑。且道笑個什麼。腦後見腮。莫與往來。

長蘆了祖。徙溫州龍翔。復移徑山。

丙辰六年

臨濟第十二世虎邱祖示寂

五月八日乙亥。示微疾而寂。塔全身於寺之西南隅。

歷年表曰。自開寶七年甲戌。至紹興六年丙辰。凡

一百六十四年。二株嫩桂久蔭垂昌。五葉芳華方

秋。凝實首山汾州嚴冷。以全淨陀之令。梁山太陽

孤峻。而清洞水之源。石霜手段出諸方。而不事事

全心事之者。有兒孫徧地之楊岐。投子異苗翻秀

界。以再來脚下承之者。有面帶烟霞之定照。芙蓉楷錫

號定五祖起白雲之家。聲三佛極東山之法。喜丹

霞拈空劫以前自己。長蘆轉去來不滯位功。睡虎

風生。葛藤割斷其間。永明淨土。延法眼清涼之脉。

雪竇靈巖。振雲門匡真之緒。螺溪中興台教。而寶

雲繼之。靈芝復振律門。而南山永墜開堂結制者。

叢席之宏規。錫號賜衣。隆王臣之外護。楊李蘇黃。皆餐法味。江淮濂洛。盡仰禪風。宗門於焉極盛。法苑實以垂秋。此北宋之昌期。迄南渡之晚葉。時爲升降。法有醇漓者也。

宗統編年卷之二十三

宗統編年卷之二十四

臨濟第十三世祖

諱曇華字應菴。嗣虎邱

高宗丁巳紹興七年

臨濟第十三世歸宗祖嗣宗統

二十年

祖住衢州明果禪師感傑來參

住明果上堂曰。見聞覺知。無障礙。聲香味觸常三

昧。眼見如盲口說如瘧。蘇州人歎。常州人打野大

宋國裏。只有兩個僧。川僧浙僧。其他盡是子。淮南

子江西子。廣南子福建子。豈不見道父慈子孝道。

在其中矣。傑福州鄭氏子。其母夢廬山老僧入舍而生。自幼穎異過人。及壯。剃髮進具。遍參知識。遂謁祖。孤硬難入。屢遭呵遣。

禪師袁覺住眉州象耳。

覺嗣昭覺祖。嘗語客曰。東坡云。我持此石歸。袖中有東海山谷云。惠崇烟雨蘆鴈。坐我瀟湘洞庭。欲喚扁舟歸去。傍人謂是丹青。此禪髓也。又曰。我敲禪牀豎拂時。釋迦老子孔夫子都齊立在下風。禪師宗杲住徑山能仁。

丞相張浚在蜀時。圓悟祖爲言。杲真得法。隨及造朝。遂以臨安徑山延之。七月二十一日入院。法席之盛冠於東南。學者百舍重研。赴惟恐後。至無所容。乃建千僧閣居之。衆二萬指。

戊午八年

己未九年

祖住薦福

庚申十年

咸傑辭祖省觀

一日祖問如何是正法眼。傑遽答曰。破沙盆。祖頷之。未幾辭回省親。祖送以偈曰。大徹投機句。當陽廓頂門。相從今四載。徵詰洞無痕。雖未付鉢袋。氣宇吞乾坤。却把正法眼。喚作破沙盆。此行將省觀。切忌便垛根。吾有末後句。待歸要汝遵。

辛酉十一年

徑山宗杲遷衡州

杲住徑山。侍郎張九成。少卿馮楫等。一時名士大夫。俱問道座下。有神臂弓之語。當軸秦檜惡之。遂鋸拾毀衣。遷衡州安置。

壬戌十二年

癸亥十三年

祖住林東

甲子十四年

長蘆了祖應詔開法臯亭崇先

皇太后韋氏壬戌八月歸自金居慈甯宮。詔了祖開山臯亭崇先。太后垂簾聽法。

乙丑十五年

禪師道行住衢州烏巨

行參龍門遠悟旨

禪師芙蓉支下成都大智齊璉寂

璉晚居大智林樾岑蔚可以佚老德臘益高倦於  
應接忽語主事僧爲我置一籃輿吾將有所適遲  
明跌坐涉筆書偈泊然而寂火浴設利五色百餘  
粒

禪師保甯下育王淨曇寂

曇嗣保甯璉一日上堂曰本是深山臥白雲偶然  
來此寄閒身莫來問我禪兼道我是喫飯屙屎人  
夏辭衆書偈收足而化設利如霰

丙寅十六年

禪師龍門下温州龍翔竹庵士珪寂

珪次補江心七月十八日召法屬宗範付後事沐  
浴聲鐘集衆就座泊然而逝茶毗日送者均獲設  
利塔於鼓山

丁卯十七年

法師道永寂

戊辰十八年

禪師端裕住育王

裕自得旨昭覺徧住大利詔住徑山賜號佛海又  
移育王

己巳十九年

禪師法順住婺州廣教

順依龍門遠透明大法初住白楊後遷廣教示衆  
曰染緣易就道業難成不了目前萬緣差別祇見  
境風浩浩凋殘功德之林心火炎炎燒盡菩提之  
樹道念若同情念成佛多時爲衆一似爲己彼此  
事辦不見他非我是自然上敬下恭佛法時時見  
前煩惱塵塵解脫順律身清苦寂後火浴設利無  
算目睛齒舌數珠不壞

禪師龍門下黃龍牧庵法忠寂

忠幼習台教至龍門謁佛眼遠因觀水磨旋轉發  
明心要後至廬山枯坐樹中絕食宣和間湘潭大  
旱禱而不應忠躍入龍潭呼曰業畜當雨一尺雨  
隨至居南嶽每跨虎出遊儒釋望塵而拜十一月

枯坐或字  
倒數

望示寂塔於香原洞

祥符蔭曰普庵肅頗著神異乃發源於忠嘗有問  
忠如何是佛忠曰莫向外邊覓如何是心曰莫向  
外邊尋如何是道曰莫向外邊討如何是禪曰莫  
向外邊傳畢竟如何曰靜處薩婆訶定力冥證性  
真顯發有自來矣

庚午二十年

宗杲徙梅州

杲遷衡凡十年又徙梅州梅瘴癘寂寞之地禱子  
曇種從之雖死不悔

辛未二十一年

佛滅後二千一百年

壬申二十二年

癸酉二十三年

曹洞第十世長蘆悟空祖示寂

祖九坐道場四膺丹詔高宗宸翰贈答有云草深  
烟景重林茂夕陽微不雨花猶落無風絮自飛二  
月朔忽呼首座曰吾行矣踟躕跌屐頃而逝禪師月

明杲同嗣丹霞方作務聞之亦呵呵倚樹而寂  
悟空塔桐華塢

存考 長蘆法嗣一十三人

天童宗珙 長蘆妙覺 龜山義初  
保甯興譽 北山法通 壽山德初  
龍翔道暉 上藍祖卿 龍仁崇壽  
幽巖子詠 長蘆慧悟 神光道新  
雪竇鑑 五人見錄 八人無錄

曹洞第十一世祖

諱宗珙久依長蘆嗣法

甲戌二十四年

曹洞第十一世天童祖嗣宗統十四年

上堂曰劫前運步世外橫身妙契不可以意到真  
證不可以言傳直得虛靜斂氣白雲向寒巖而斷  
靈光破暗明月隨夜船而來正恁麼時作麼生履  
踐偏正不曾離本位縱橫那步語因緣

祖住歸宗

上堂曰參禪人切忌錯用心悟明見性是錯用心  
看經講教是錯用心行住坐臥是錯用心喫粥喫  
飯是錯用心屙屎撒尿是錯用心一動一靜一往

一來是錯用心。更有一處。用心歸宗。不敢與諸人說。破何故。一字入公門。九牛車不出。時杲在梅陽見祖。歸宗垂示語極口稱。以傷實。曰。坐斷金輪第一峯。千妖百怪盡潛踪。一來又得真消息。報道楊歧正脉通。先是瞎堂遠在衢州定業。有傳其語至者。杲駭曰。老師暮年有如是耶。因寓書通誠。并寄贈圓悟祖所付法衣。

祥符蔭曰。退翁儲和尚行三峯之道於天台。能仁時雪竇雲和尚在景星。以天童悟和尚所服伽黎致之。儲復書引妙喜歸宗語。噫。虎衷雅韻。藹然可想。古道照人。可稱法門盛德事也。

乙亥二十五年

禪師曉瑩集蘿湖野錄謝大慧杲

宗杲詔自便

丙子二十六年

禪師道顏住圓通

顏號已菴。久參圓悟祖。有省。泊祖還蜀。囑令依杲。仍以書致曰。顏川彩繪已畢。但欠點睛耳。他日未

可量也。杲居雲門及洋嶼。顏皆在焉。朝夕質疑。方大悟。丙子杲過九江。守請住圓通。三辭不獲。因畢顏補其處。

宗杲復僧服詔住育王

詔杲住阿育王山。十一月杲至明州開堂說法。裏糧問道者萬二千。指百廢具舉。冠於今昔。

丁丑二十七年

禪師丹霞支下天童宏智正覺寂

覺住天童。創闢一新。九月辭衆。十月八日沐浴更衣。端坐作書遺育王杲。請主後事。書偈擲筆而逝。禪師長蘆下平江靈巖佛海智訥寂。

訥前後凡五住靈巖。更二十餘年。尚書孫覲題其丈室曰。五至堂。每見訥所爲。輒歎曰。才智不下澄觀也。異跡炳著。觀銘其塔。

禪師靈隱下徑山藏叟善珍寂

珍諱妙峯。善於靈隱入室。悟旨。出世光孝。遷承天雪峯。詔移育王徑山。

戊寅二十八年

祖自蔣山徙天童

育王宗果詔復移徑山

杲再住徑山。道俗歆慕。如見其所親。普安郡王時在建邸。遣使入山請法。親書妙喜庵及製真讚賜之。

己卯二十九年

庚辰三十年

辛巳三十一年

杲退居明月堂

禪師印肅住南泉

肅號普庵。宜春余氏子。嗣牧庵忠。因閱華嚴合論。至達本情忘知。心體合豁。然遍體汗流。曰。我今親契華嚴法界矣。自此弘誓開化人天。

居士龍舒王日休述淨土文

日休字虎中。爲國學進士。端靜簡潔。博通羣書。訓傳六經諸子數十萬言。一旦捐之。曰。是皆業習。非究竟法。吾其爲西方之歸。自是一意念佛。年六十。蔬茹布衣。重趺千里。以是教人。風雨寒暑弗皇恤。閑居日課千拜。夜分乃寢。面目奕奕有光。見者知

爲有道之士。紹興辛巳。述淨土文十卷。刊行於世。刊時舍利流於板。

壬午三十二年

孝宗

孝宗癸未隆興元年

臨濟第十三世歸宗祖示寂

祖住天童。遠近奔湊。時宗杲住徑山。叔姪相望。往來憧憧。必至三大士之門。六月十三日。臨終。或以辭世偈爲請。祖曰。吾嘗笑諸方所爲。而自爲之耶。區區院事。纖毫不遺。奄然跌坐而化。祖於普說小參。問答勘辨之屬。皆從容暇豫。曲盡善巧。而室中機辯操縱殺活。尤號明妙。飽參宿學。一近樵拂亦汗下。心死。嘗領徒典刹者。俱晦匿名迹。以得寓巾鉢爲幸。至於行業高潔。每當住持。雖料理建置。小物細故。動爲無窮計。而纖毫不可意。卽飄然徑去。莫能回奪。嘗自言。衲僧家著草鞋住院。何至如蛇。蛇戀窟。勉勵徒衆。不許放逸。事事必身率之。其將示寂也。猶掛牌入室。至夜分。他日多類此塔。全身

於天童

臨濟第十四世祖

諱咸傑福州鄭氏子嗣歸宗華祖法

臨濟第十四世常州華藏祖嗣宗統二十二年

徑山宗杲詔號大慧禪師

禪師昭覺支下徑山明月堂大慧普覺宗杲寂

杲以老退居明月堂詔以明月堂爲妙喜庵八月十日親書遺奏封畢侍僧請留偈杲勸聲曰無偈便死不得也索筆大書曰生也只恁麼死也只恁麼有偈與無偈是什麼熱大投筆而逝上聞歎惜諡普覺塔於本山曰寶光

晉陵尤煇嘗題大慧語錄曰大慧說法縱橫諄厲如孫吳之用兵而廣闊宏深不可涯涘如大海水魚龍飲者莫不取足今舉平昔聞見二則朱文公少年不樂讀詩文因聽一尊宿說禪直指本心遂悟昭昭靈靈一著十八歲時從劉屏山屏山意其必留心舉業暨搜其篋只大慧語錄一帙爾次年登科故公平生深知禪學骨髓透脫關鍵此上根

利器於此取足者也煇蚤得於潘子善文云爾因取語錄讀之至老不放釋手往在春陵永嘉徐棘卿瑄亦貶是邦未幾忽遷象臺憂愁涕泣煇授以所携本徐卿亟取讀之達旦不寐次日欣悅忘憂與昨日復然二人也遂携以去手抄一本乃見還後三年徐歿於貶所臨終殆同遊戲不疾沐浴而逝此書之靈驗如此蓋煇之親觀也

虞山錢謙益曰佛祖闡教以言說法有宋最著者三家鍾津以孤亢崇教其文裁而辨石門以通敏扶宗其文奧而麗徑山以宏廣應機其文明而肆夫文而至於辨也麗也肆也其城壘日以堅其枝葉日以富其撈籠引接日以博浩浩乎厄言之日出而岌岌乎津梁之日疲也繁辭有之易之作也其於中古也作易者其有憂患乎豈不信哉

長蘆了明補住徑山

明豪邁蓋衆身長八尺腹大十圍所至人必聚而觀之妙喜謫梅州防送甚嚴嗣在不測明爲荷枷以行間關辛苦未曾少怠既至貶所禱子追隨問

道者衆明肩榜棹詣街坊日給參衆無不具足十七年如一日杲法嗣之盛在貶所接者居其半明之力也舉住投子遷長蘆所至衲子輻湊叢林敗觀及杲寂特詔明補徑山一日陽和王夢一異僧長大鰭腹緩行而言欲化蘇州一莊覺而異之未言也翼日明忽杖屨徒步而至門者呵不止以白王王出見之遙望明與夢中無異遽呼其眷屬出觀之並炷香作禮茶罷首言願大王施蘇州一莊以爲徑山供佛齋僧無窮之福王未有可否因令辦齋齋畢便出更無他語時內外閑傳施莊一事達於帝聽會王入朝帝曰聞卿捨蘇州莊與徑山朕當爲蠲賦稅王謝恩歸次日以書至徑山請明入城而明二日前先已坐化矣自是王宴居寤寐之際或少倦交睫即見明在前語曰六度之大施度爲先善始善終斯爲究竟王即以莊緣本山其疏略曰特來謁郡王故意丁寧說冷處著把火大家相暖熱兩堂坐禪僧真個修行徹心源湛如水脊梁硬似鐵等心供養渠因果豈虛設福慧自莊

嚴共出輪迴劫又偈曰做事還須烈漢拈起筆來便判若要功果完成切莫前思後算

甲申二年

禪師石室祖琇撰隆興佛運通論

乙酉乾道元年

丙戌二年

丁亥三年

祖住衢州乾明

八月初一日住衢州烏巨山乾明禪院上堂曰一箇葫蘆纔倒地滿地葫蘆盡傾倒欲識單傳直指禪今日鬪湊得恰好

禪師祖先來參領悟

先蜀之廣安王氏子從羅漢院德祥出家聞緣老宿住昭覺往參扣語契令奉圓悟祖香火一日從方丈前過緣問庵頭有人麼先云無人語未竟緣劈胸與一拳云你蠻先忽有省出峽依澧州德山涓祝髮受具徧扣諸方抵蘇之萬壽值雪夜坐自念行脚數年未得悟徹正悶悶間忽見鐘動趨後架舉首見照堂二字疑情頓釋既而見水庵一於

雙林。一曰師子尊者被罽賓斬却頭。且置你道西天鬚子爲甚麼無鬚。先曰非雙林不舉此話。一曰作家禪客。先曰心不負人。面無慚色。一遂以手拓開先曰勘破了也。迨水庵謝事來參祖。祖卽命典客。一曰祖對旁僧舉不是風動。不是旛動。語先聞豁然大悟。次日祖遇先於寮前。謂曰總不得作伎倆。試露箇消息來。先應聲曰方丈裏有客祖呵呵大笑。

### 禪師崇岳來參

岳處州龍泉吳氏子。天姿純篤。首造靈石。繼見大慧杲於徑山。杲陞堂。綱蔣山應菴祖爲人徑捷。岳聞不待旦而行。既至入室。未契退。愈自奮勵。朝夕咨請蔣山。舉世尊有密語迦葉不覆藏。岳曰鈍置和尚。蔣山厲聲一喝。岳有省。蔣山大喜。以爲法器。說偈勸使祝髮。隆興初。岳始得度於臨安西湖白蓮精舍。自是遍參諸大老。罕當其意者。乃入閩見乾元水庵永。一曰辭永。永舉有句無句如藤倚樹。岳云裂破永云。壞邪道好一堆爛柴。寶岳云矢上。

加尖如是應酬數反。永云吾兄下語老僧不能過其如未在他日拂柄在手爲人不得。驗人不得。岳云爲人者使博地凡夫一超入聖域。固難矣。驗人者打向面前。過不待開口已知渠骨髓。何難之有。永舉手云。明明向汝道。開口不在舌頭上。後當自知。逾年見祖於衢州之西山。隨問卽答。祖微笑而已。岳切於究竟。至忘寢食。

戊子四年

曹洞第十一世明州天童莊祖示寂

曹洞第十二世祖

諱智鑑。潯州吳氏子。兒時母與洗手。瘍因曰是甚麼對曰我手似佛手。長失恃怙。依真歇祖於長蘆。大休莊首衆。卽器之後。遯象山。百怪不能惑。深夜開悟。求證於延壽。然復見大休。嗣其法。住雪竇。

曹洞第十二世雪竇祖嗣宗統四年

祖住雪竇上堂曰。世尊有密語。迦葉不覆藏。一夜落花雨。滿城流水香。

己丑五年

祖自明果遷祥符

禪師牧庵下慈化普庵印肅寂

肅嗣牧庵忠住慈化隨宜說法廣作津梁神變莫測或問修何行業而得此肅當空畫曰還會麼曰不會曰止止不須說又嘗自贊曰蒼天蒼天悟無生法談不說禪開兩片皮括地該天如何是佛十萬八千七月日書偈於方丈西壁云乍雨乍晴寶象明東西南北亂雲深失珠無限人遭劫幻應權機爲汝清書畢跌坐而逝

庚寅六年

祖住蔣山太平興國

禪師慧遠應詔住靈隱

遠眉山金流彭氏子往成都習經論還峨嵋雲巖寺時徽禪師住焉徽黃龍南四世孫知見甚高遠初入門值徽飯罷於庭廡間閒行遠纔見卽放包問曰文殊爲七佛祖師未審甚麼人爲文殊之師徽云金沙溪畔馬郎婦時有起鐵拂者爲首座遠

亦往親近起嘗誘掖之兩歲未有所得一日靜坐次有僧獨行自語云假四大以爲覆蓋緣六塵而生心忍遇六塵頓息喚甚麼作心遠聞之忽有省遠起告首座首座可之上方丈告徽徽亦可之明日卽告行同志挽留遠不聽曰吾師以爲可而我終未釋然也時圓悟自雲居歸蜀住昭覺遠造焉每問話請益辭旨峭硬圓悟深器之一日圓悟普說舉龐居士問馬祖不與萬法爲侶者是什麼人馬祖云待汝一口吸盡西江水卽向汝道遠聞舉豁然大悟仆於衆中衆以爲中風共掖起之遠乃曰吾夢覺矣至夜圓悟小參遠出問曰淨裸裸空無一物赤骨律貧無一錢戶破家殘乞師賑濟答云七珍八寶一時拏遠曰爭奈賊不入慎家之門答云機不離位墮在毒海遠隨聲便喝悟以拄杖擊禪牀云喫得棒也未遠又喝圓悟連喝兩喝遠禮拜悟大喜以偈贈之有舊鐵舌轉關樞之語衆目之爲鐵舌遠自此機鋒峻發無所抵牾紹興乙卯春眉守延居象耳山不赴是歲圓悟祖示寂歎

曰哲人云亡繼之者誰乎乃扁舟下峽初抵淮南住龍蟠八年遷琅邪又移婺之普濟衢之定業遠自發明心要即得游戲如風大自在三昧俄遷光孝安定郡王趙表之與遠爲世外交侍郎曾開從妙喜遊甚久而未穎脫從遠參叩始盡餘疑乃延住湘江南臺時龍王璉方廣行皆月庵高第道著湖湘間私相語云此間壁立萬仞遠何所措足乎因請陞座設三十餘問皆諸訛險節關捩遠隨機開答辭旨深奧議論超詣始大歎服璉即率其屬環拜曰此膝不屈於人久矣未幾過天台歷住護國國清鴻福三寺乾道丁亥尙書沈德祿守平江以虎邱大道場比不得人力邀遠主之至則接物無倦法令整肅適丁荒歉雖齋粥不繼而戶外之屢常滿忘軀爲法者集焉道益顯著遂奉詔住阜亭山崇先寺再詔住靈隱開堂中使降香

如淨至雪竇參祖領悟

淨生而岐嶷不類常童長學出世法參足庵鑑祖於雪竇看庭前柏樹子話有省呈頌曰西來祖意

庭前栢鼻孔寥寥對眼睛落地枯枝纔踴跳松蘿亮鬲笑掀騰祖領之

辛卯七年

靈隱遠召對宣德殿

正月二十日遠召對於宣德殿賜坐問如何免得生死曰不悟大乘道終不能免曰如何得悟曰本有之性以歲月磨之無不悟者曰悟後如何曰悟了始知陛下所問與臣所奏悉皆不是曰一切處不是如何曰脫體見前了無毫髮可見之相上大悅遠復曰古德道無所是是菩提曰即心即佛如何曰目前無法陛下喚什麼作心曰如何是心遠正身叉手而立曰只這是上又問德山臨濟機緣遠一一陳之復曰悟後千句萬句乃至一大藏教只是一句曰是那一句曰好語不出門曰不與萬法爲侶可參乎曰老龐致此一問驚天動地驅山塞海超古今脫是非離言說絕依倚如陛下至尊至寶大道本然曰得道者誰曰覺道之人隨其器量淺深驗在意表得底人他亦自知時節學佛者

衆機緣亦廣恐勞聖聽不敢具奏

禪師可觀應丞相魏杞請住姑蘇北禪

發明觀清韻冷

然杞願力不昧故並書

觀字宜翁一室蕭然曰松風山月此我無盡衣鉢也丞相魏杞出鎮姑蘇請住北禪入院指法座曰胸中一寸灰已冷頭上千莖雪未消老步只宜平地去不知何事又登高杞擊節不已杞字南夫壽春人累官參知政事篤信佛法每發願祈來世爲僧一日命丹青寫爲僧相揭之高堂請德光禪師作贊曰身從果位中來位冠百僚之上只因熟處難忘故見此邱眞相後杞將卒命諸子曰吾已去當爲削髮著袈裟以僧相殮之諸子遵命以三衣一鉢投棺中

曹洞第十二世雪竇祖示寂

曹洞第十三世祖

諱如淨號長翁出世屢主名剎

曹洞第十三世天童淨祖嗣宗統三年

祖應詔住天童上堂曰雲門九天看彩鳳銜出且

道如何委悉急急如律令勅

禪師 覺來參領悟

覺來參值淨祖上堂舉靈雲見桃花悟道因緣頌曰一箇烏梅似本形蜘蛛結網打蜻蜓蜻蜓落了兩邊翅堪笑烏梅較鐵釘覺不覺失笑曰蚤知燈是火飯熟幾多時後承印記

壬辰八年

祖住常州褒忠顯報華藏

靈隱遠賜號佛海禪師

祖先還蜀祖付以偈

癸巳九年

曹洞第十三世天童淨祖示寂

祖六坐道場未言稟承衆以爲請祖曰我待涅槃堂裏拈出臨終果拈香曰如淨行脚四十餘年首到乳峯失脚墮於陷阱此香今不免拈出鈍置我住雪竇足菴大和尚并書辭世偈曰六十六年罪犯彌天打箇踉蹌跳活陷黃泉咦從來生死不相干擲筆而逝塔全身於本山

中杓歸的

存考 寶雲月函潛和尚洞宗世次疑問曰洞宗有  
一端其著者沒浮山之代續圖濟宗之兩祖而據青  
州塔記創去芙蓉楷下自丹霞淳至天童淨五世其  
沒浮山代續圖濟宗兩祖見聞者非之南潛亦非之  
而不疑者也其據青州塔記創去芙蓉楷下自丹霞  
淳至天童淨五世見聞者非之南潛亦非之  
驟決其是非者古越雲門顯聖寺散木湛然澄禪師  
語錄卷第一圖法門人明懷編萬曆甲寅二月吉日  
師開法於雲門傳宗廣孝寺正祐香云供養北京大  
覺堂上嗣曹洞正宗第二十六代清涼大和尚用翻  
法乳之恩乙卯開法顯聖寺住持嗣曹洞正宗第二  
十七代沙門圖澄撰如恒樂會疏諸書自序皆世次  
炳然今之非祖燈大統者以雲門澄和尚稱曹洞正  
派三十二傳為世數合美客五人然考之語錄則實  
鄭其本師為二十六代其自序題名則稱二十代  
使雲門拈香之是則祖燈大統之創五人不可非也  
使天下之大未必遂無一人下曹洞宗派不知當誰準  
向存未必遂無一字之證也南潛於是甚疑疑則見  
問敢述雲門拈香自序題名及孤陋疑而未定之見  
不敢深匿謹出而質於洞宗諸護法長者居士必有對  
諸尊宿與天下垂意兩宗諸護法長者居士必有對  
然之言為之約指時已中秋後五日○洞宗第三  
十五世法孫智拈戊子年刻出洞山正宗源流略記  
末云曹山一技今以斷絕諸方安有不知者據此論  
之洞山為洞宗第一代雲居第二代以及雲門乃三  
十二代百丈老人三十三代而我本師實三十四代  
也通而上之曹本師望遠摩為四十四世望遠為  
七十一世望遠迦文佛為七十二世再以此係世  
則三十四世更以青原論之則三十八世矣此係世  
系所傳載在洞山源流傳法正宗等書故云洞山正  
宗也拈於往年問侍本師於弁山因命發箭得百丈  
先翁手定稿即請梓行師止之曰此年謬說多端人  
之所厭今暫止之俟時可行然後行之可以洗法門

之謬氣即欲為之恐非其時也遂遵命止之今戊子  
夏師受潤州焦山請乃商較時事偶於狼籍堆中檢  
出一冊題曰洞宗源流正脈其文旨簡約世系不混  
亟請梓行師可之乃附尊稱達摩說及洞山正宗略  
云爾實雲潛云據此則後來所出洞宗源流世次乃  
瑞白禪師手定者也其間云此年謬說多端又言題  
曰洞宗源流正脈其文旨簡約世系不混亦可以想  
見當時立說之不一也○北京勝果寺曹洞源流碑  
曰佛祖源流曹洞門庭過去莊嚴劫千佛現在賢劫  
千佛未來星宿劫千佛至七佛西天二十八祖東土  
六祖下分五派曹洞臨濟雲門禪仰法眼曹洞正傳  
青原思石頭遷藥山儼雲巖最洞山外雲居騰同安  
丕同安志梁山觀太陽延投子青芙蓉楷龍門覺青  
州辯大明寶玉山體雪巖滿萬松秀雲庭裕少林泰  
少林遇少林才大覺葬已上祖佛各有  
傳法之偈正統十一年春三月吉日  
祥符蔭曰洞上一宗中興於雲門澄和尚雲門以  
前南北香邈兵燹頻仍而圖記散失不能具考澄  
參慈舟念祖入室付偈印證曰曹源一滴水佛祖  
相分付至今授受時大地分甘露咄五乳峯頭無  
鐵箭射得南方半個兒未見授以洞山源流所以  
澄和尚拈念祖香或稱三十一代翻刻散木湛然  
澄禪師語錄二本一本嗣法門人明孟重訂法孫  
添蟻淨符淨超重編錄凡四卷首拈香云一生辛  
苦半世殷勤撞著個沒眼睛的老和尚授我折脚  
鐺子特為拈出雖然家醜不可外揚也要人天證

三八三

0365

據供養北京大覺堂上傳曹洞正宗第三十一代清涼慈舟念和尚用酬法乳之恩。或稱三十代又一本參學門人能譯錄嗣法弟子弁山明雪編次錄凡七卷。題云古越雲門顯聖寺散木湛然澄禪師語錄。首拈香云供養北京大覺堂上嗣曹洞正宗三十代清涼大和尚用酬法乳之恩。或稱二十代原錄再拈香云供養北京大覺堂上嗣曹洞正宗第二十六代清涼大和尚又雲門湛然禪師語錄八卷。門人明海編正拈香云供養嗣曹洞正宗第二十六代清涼大和尚又一本嗣法弟子明雪編受業門人明聞校閱拈香亦云曹洞第二十六代清涼大和尚皆增減不一。後來門下移改翻刻亦無一定。此世次所以淆訛議論所以紛錯者也。洞山正宗源流略記定於瑞白雪和尚稱雲門乃三十二代而云比年謬說多端。俟時可行。然後行之。戊子年始於狼籍堆中檢而刻之。題曰其旨簡約世系不混。是洞宗世次斯時亦未有定據者也。近刻祖燈大統據青州塔記削去芙蓉楷下五

世與二十六代合。又北京勝果寺正統年間所刻曹洞源流舊碑亦無丹霞這五世與二十六代亦相合。似可據以定洞上之世次矣。但立言取信於天下後世不可稍涉一毫之私見。倘一毫涉私則餘皆不足取信。祖燈大統削去芙蓉楷下五世雖有二碑可據。然削去濟宗兩祖則實一時孟浪之見。至沒浮山代續公案則尤不得從上大公無我之旨者以此一端徵之則削去五世亦未遂可以二碑之文遽爲定案也。青州辨塔記真僞且不必論。勝果寺碑亦復茫昧可疑。洞山价作介鹿門作六門此等字面尙且不洽而況其他至大覺爇嗣少林才則傳燈世譜諸書並所未見。考世譜諸書這拙才下爲松庭子嚴其同條諸人曰佛嚴稔曰熊耳登曰華嚴遇曰益都亮曰音甯敬曰古蔡元曰奉先孝曰香嚴忍無所謂大覺爇者豈勝果寺碑記儼然而世譜反遺之耶。此亦一疑案也。疑則不可以必信。今且存之以俟後來公心明眼確有真實證見可以信及天下後世者考定而詳正焉。

佛祖法脉所繫久之自定正毋庸彼此喧惑紛諍也

### 曹洞第十四世祖

諱 覺姓氏生里闕

曹洞第十四世鹿門祖嗣宗統<sub>年五</sub>

住鹿門示衆曰盡大地是學人一卷經盡乾坤是學人一隻眼以如是眼讀如是經千萬億劫常無間斷諸人還看讀得麼如看讀得老僧請他喫箇無米油糍

禪師一辨來參領悟

辨精究內典來參祖問如何是盡乾坤是學人一隻眼祖曰汝被一卷經遮却也辨擬對祖搖手曰不快漆桶去辨言下有省

居士龍舒王日休往生淨土

自書曰課佛積計九百十二萬五百於壁又遍囑諸人勉進道業忽厲聲曰佛來迎我屹然立化

甲午淳熙元年

乙未二年

丙申三年

雪竇慧暉勅補淨慈

暉字自得會稽張氏子扣長蘆了祖微有所證謁天童覺許爲入室眞子紹興丁巳開法補陀徙萬壽及吉祥雪竇勅住淨慈

禪師靈隱佛海慧遠寂

正月十五日衆集遠廣方丈書偈付衆所馴畜一黑猿而寂

禪師德光應詔住靈隱冬入對選德殿賜號佛照

光新喻彭氏子母夢異僧入室驚寤有娠旣生乃祖曰吾家世積德是兒必光吾門因命名德光有術者相之曰是子伏犀貫頂出家必作法門棟梁力懇出家初謁月菴果歷參知識五十餘員末後見大慧果於育王嗣法詔住靈隱遣使降香開堂恩寵優渥是冬召對便殿問佛法大意光敷奏直截帝大悅留禁中觀堂五宿兩賜御頌特賜佛照禪師之號

禪師簡堂行機住江州圓通

機台州楊氏子嗣護國元

詔天台宗教同大藏流通

丁酉四年

祖住徑山禪師崇岳領悟

祖移蔣山華嚴徑山岳皆從之會祖入室次問旁僧不是心不是佛不是物岳侍側豁然大悟乃曰今日方會木菴道開口不在舌頭上自是機辯縱橫

圓通機移台州平田

松窗居士錢端履從護國景元發明已事丁酉秋示微恙修書召平田機及國清瑞巖主僧有訣別之語機與二僧詣楊次禮起跌坐言笑移時卽書曰淨世虎幻本無去來四大五蘊必歸終盡雖佛祖具大威德亦不能免這一著子天下老和尚一切善知識還有跳得過者無蓋爲地水火風因緣和合暫時湊泊不可錯認爲已有大丈夫磊磊落落當用處把定立處皆真順風使帆上下水皆可因齋慶讚去留自在此是上來諸聖開大解脫一

路涅槃門本來清淨空寂境界無爲之大道也今吾如是豈不快哉塵勞外緣一時掃盡荷諸山垂顧咸願證明伏惟珍重置筆顧機曰某坐去好臥去好機曰相公去便了理會甚坐與臥耶禮笑曰法兄當爲祖道自愛遂斂目而逝

曹洞第十四世鹿門祖示寂

曹洞第十五世祖

諱一辨嗣鹿門

戊戌五年

曹洞第十五世普照祖嗣宗統九年

祖住青州普照設百問勘驗來學遷東都萬壽燕

秦齊晉之間推爲尊宿

禪師寶來參領悟

問離四句絕百非請師直指西來意祖曰昨日有人恁麼問被打出去也寶曰今日又如何祖曰你得恁麼不識痛癢寶禮拜祖曰可惜許棒折也寶直得汗下忽然猛省

靈隱德光引對便殿

己亥六年

庚子七年

祖住靈隱

禪師德光歸老育王

淨慈智暉退歸雪竇

禪師楚明召對還徑山

明初參圓悟祖次謁徑山杲後依華藏民而徹悟。住雪竇召對上問曰三教聖人本同此理明曰譬如虛空。東西南北初無二也。上曰。但聖人所立門戶異耳。故孔子以中庸設教。明曰。非中庸何以安立世間法。華云。治世語言實生業等皆與實相不相違背。華嚴云。不壞世間相而治出世間法。上曰。今時士大夫學孔子者多只工文字語言不見夫子之道不識夫子之心。惟釋氏不以文字教人直指心源。頓令悟入不亂於死生之際。此爲殊勝。明曰。非獨後世學者不見夫子之心。當時顏子號爲具體盡平生力量。只道箇瞻之在前忽焉在後。如有所立卓爾。竟捉摸未著而聖人分明八字打開。

向諸弟子曰。二三子以我爲隱乎。吾無隱乎爾。以此觀之。當時弟子尙不識夫子心。況今人乎。張商英曰。吾學佛然後能知儒。此言實爲至言。上曰。朕意亦謂如此。上又曰。老莊何如。人明曰。只是佛法中小乘聲聞以下人。蓋小乘厭身如桎梏。棄智如糲毒。化火焚身入無爲界。正如莊子形固可使如槁木。心固可使如死灰。老子曰。吾有大患。爲吾有身。大乘人則不然。度衆生盡方證菩提。正如伊尹所謂予天民之先覺者也。予將以斯道覺斯民也。有一夫不被其澤。若已推而內之溝中也。上大覺賜號寶印。卽日詔住徑山。

辛丑八年

壬寅九年

癸卯十年

帝註圓覺經

二月遣中使賁賜徑山刊行詔。禪師楚明序之。

禪師宏智下雪竇自得慧暉寂。

甲辰十一年

祖住天童

乙巳十二年

曹洞第十五世普照祖示寂

祖示十六頌。一識自宗。二死中得活。三活中死。四不落死。活五背捨。六不背捨。七活人。八殺人。刀九平常。十利道。拔生十一言無過失。十二透脫。十三透脫不透脫。十四稱揚。十五降句。十六方入圓。雲溪挺曰。祖禪不了殃及兒孫。浮山遠嘗以此十六題拈示投子。投子至青州。凡九世絲絲相續。因為作頌。

曹洞第十六世祖

諱 寶嗣普照

丙午十三年

曹洞第十六世大明祖。嗣宗統四年

住磁州大明上堂曰。若論此事。如人作針線。針針相似。忽見人來。不覺失却針。祇見線這邊尋也不見那邊尋。也不見却。自曰。近處尙不見。遠處那裏得來。多時尋不得。心煩不好。昏悶打睡。拽衣就枕。方就枕時。驀然一剗曰。原來祇在這裏。

侍者 體省悟受印記

體爲侍者。偶於出生臺見雀捨食。雀飛去。祖在體背上打一掌。體驚顧。祖曰。還是雀子孤負你。你孤負我。體罔措。祖曰。自可憐生。却乃互相孤負。去體豁然。有省。從此執侍久之。秘重深嚴。一旦辭祖。或問祖曰。侍者何往。祖曰。諸方來。諸方去。何介意哉。又問參學何似。祖曰。道有參學。栽他頭角。道無參學。滅他威光。一衆方知已蒙印記。

丁未十四年

戊申十五年

徑山楚明退居別峯

禪師智策詔住徑山

己四十六年 朱熹大學章句或問成

曹洞第十六世磁州大明祖示寂

曹洞第十七世祖

諱 體嗣大明住王山

光宗

光宗庚戌紹熙元年

曹洞第十七世太原王山祖嗣宗統三

年

祖久隱太原西山當道請住王山示衆曰師子有三種第一超宗異目第二齊肩共鬣第三影響不

真若超宗異目者見過於師堪爲種草若齊肩共

鬣者減師半德落在今時若影響不真者狐狂猥

勢羊質虎皮發明按洞宗自青州至萬松皆王

勢更語錄失傳諸祖  
聯得其大要云爾

禪師 滿參祖領悟

滿初參普照祖祖曰兄弟年俊正宜叩參老僧當

年念念常以佛法爲事滿避席進曰和尚而今如

何祖曰如生冤家相似滿曰若不得此語幾何枉

行千里祖下禪牀握滿手曰作家那滿與勝默同

參嘗跪受呵斥或問其故滿曰今諸方師賣法屬

誣訟招讒蟲自食身中肉也某雖不肯敢復蹈

覆轍耶後造王山祖舉洞山觀影因緣滿大疑祖

曰不疑言句是爲大病子今既疑則病發也子知

此病卽子藥麼一日讀五位頌至折合終歸炭裏

坐忽然悟曰今日病病是藥也去呈祖祖曰料

掉沒交涉滿曰老和尚這回瞞我不得也

禪師華藏下寶印慈辯楚明寂

辛亥二年

禪師崇岳住饒州薦福

壬子三年

禪師教忠下青原信菴唯裡寂

裡嗣教忠光五月十九日書偈曰末後一句觀面

分付擬議思量世諦流布踟躕而逝

禪師雲巖下徑山智策寂

策號塗毒謁天游於雲巖道經雲居風雪塞路坐

閱四十二日午初版聲鏗然豁爾大悟及造門游

獨指策曰甚處見神見鬼來曰雲居聞版聲來曰

是甚麼曰打破虚空全無靶柄曰向上事未在白

東家暗坐西家厮罵曰嶄然超出佛祖他日起家

一腳足矣戊申詔住徑山七月將入寂陞座別衆

囑門人以文祭之策危坐傾聽至尙響爲之一笑

越兩日更衣說偈而寂

詔育王光穆徑山辭不允

曹洞第十七世王山祖示寂

祖示宗旨曰。既有尊貴之位。須明尊貴底人。須知尊貴底人不處尊貴之位。方明尊貴不落階級。

曹洞第十八世祖  
諱滿嗣王山住雪巖

癸丑四年

曹洞第十八世雪巖祖嗣宗統七年

上堂舉洞山解夏云。夏末秋初。兄弟或東去。西去。直須向萬里無寸草處去。良久曰。祇如萬里無寸草處。又作麼生去。石霜曰。出門便是草。太陽曰。直饒不出門。亦是草。漫漫地。三個老漢。雖然異口同音。未免撞頭磕腦。何也。一人大開口。了合不得。一人高擡腳。了放不下。一人緊閉門。了出不去。雪巖曰。不然。遍十方界。非外全在一微塵。在一微塵。非內遍十方界。祇者一微塵許也。須極盡。不可得向那裏安門。甚處入草。還會麼。休侵洞口。初秋草。請看疎山臘月蓮。

禪師行秀參雪巖祖付衣偈

秀河內蔡氏子。參祖經二十七日。不覺伎倆已盡。

祖曰。你但行裏坐裏。心念未起時。猛提起。覷見。即便見。不見。且却拈放一邊。恁麼做工夫。休歇也不礙參學。參學也不礙休歇。遂留記室。潭柘亭。過祖秀夜扣其門。告侍者燒香。請益亨便相見。秀問。如何是活句。如何是死句。亨曰。書記若會死句。也是活句。若不會活句。也是死句。秀自此參究。益力。一日見雞飛。乃大悟。曰。今日不惟捉敗沙老虎。亦乃捉敗岑大蟲也。走見祖。祖可之。乃付衣偈。

甲寅五年

師範登具戒

範蜀梓潼雍氏子。出家陰平山。經書過目成誦。多圖具。

甯宗

甯宗

甯宗乙卯慶元元年金章宗璟明昌六年

禪師祖先住臥龍

先至夔州。向書楊輔。以臥龍請。未幾辭去。復遊吳。

禪師師範坐夏成都

有老宿名堯者。範請益坐禪之法。堯曰。禪是何物。坐底是誰。範受其語。晝夜體究。一日如廁。提前話有省。

禪師行秀應金詔入禁庭說法

秀構萬松庵以自適。三河兩晉皆飲秀名。金章宗詔入禁庭。陞座躬自迎禮。聞法感悟。賜錦綺大衣。丙辰二年。

師範謁佛照光於育王

光問曰。何處人。範曰。劍州人。光曰。帶得劍來麼。範便喝。光笑曰。這烏頭子也亂做。範貧甚。無資糴。爰故以烏頭子目之。

丁巳三年金承安二年

薦福崇岳詔住靈隱。臥龍先首衆師範從之。有省。

臥龍先時居第一座。師範在座下一日。同先遊石筍庵。有道者問先曰。糊獃子捉不住時如何。先曰。用捉作麼。如風吹水。自然成文。範從旁有省。

禪師行秀應金詔住大都仰山棲隱寺

臨濟第十四世華藏祖示寂

祖晚居天童太白示寂塔於寺之中峯

宗統編年卷之二十四

宗統編年卷之二十五

臨濟第十五世祖

諱祖先嗣華藏

甯宗戊午四年

臨濟第十五世臥龍祖嗣宗統十四年

祖住常州薦福上堂曰。十五日以前明似鏡。十五日以後黑似漆。正當十五日又且如何。驚遷喬木。頻頻語蝶。變芳叢對對飛。

己未五年十二月諸庚申六年

存考

蜀中近傳大慧杲下福州西禪。鼎需傳鼓山安永。永傳淨慈。悟明傳苦口。益益傳。後溪慈慧傳一言顯顯傳小菴密傳。密傳二仰。欽欽傳。無念有有傳。荆山寶寶傳。鐵牛遠爲妙喜一支。未絕存之以俟詳考。

祥符陰曰。七佛以來不許無師自悟。佛祖付囑皆

人天衆前心法印證初祖東來必以袈裟表信示  
佛祖慈命重在傳持稍有淆訛則以訛傳訛誤人  
不小今世有傳雲門源流錄本者豈雲門兒孫猶  
在耶又有突出法眼宗卷子并妙喜源流記斷橋  
倫後續派雖繼絕爲盛德事然必確有真實證悟  
不違從上心眼機語方可以上質宗祖不然何容  
冒昧也

### 靈隱岳退居東庵

岳居靈隱六年法道盛行上章乞老詔許之

辛酉嘉泰元年

祖遷眞州靈巖

壬戌二年

禪師華藏支下東菴松源崇岳寂

發明書東菴與其退也

陸游號放翁官待制封渭南伯參岳問曰心傳之  
學可得聞乎岳曰既是心傳豈從聞得游領解呈  
偈曰幾度馳車入帝京逢僧一例眼雙青今朝始  
覺禪宗別說有談空要眼聽岳歷住平江澄照江  
陰光孝無爲治父饒州薦福明州香山平江虎邱

杭州靈隱退居東菴俄屬微疾猶不少廢倡道忽  
親作書別諸公卿且垂二則語以驗學者曰有力  
量人因甚擡脚不起開口不在舌頭上及貽書嗣  
法香山光睦雲居善開囑以大法因書偈曰來無  
所來去無所去警轉玄關佛祖罔措踟躕而寂實  
嘉泰二年八月四日也得年七十有一坐夏四十  
奉全身塔於北高峯之原

癸亥三年

金國學士屏山李純甫著鳴道集

甫字純之

號屏山參萬松秀祖有得因取迂叟司馬光橫渠張  
子厚程明道類伊川願謝上蔡良佐劉元城安世楊  
龜山時張南軒朱晦菴等諸儒語論析訂正  
融會性理指歸大道凡二百十七篇曰鳴道集

屏山曰儒佛之道原本一心其功用之殊或出或  
處或默或語便生分別以爲同異者何也如劉子  
翬之洞達張九成之精深呂伯恭之通融張敬夫  
之醇正朱元晦之峻潔皆近代之偉人也想見方  
寸之地既虛而明四通六闢千變萬化但其知見  
只以夢幻死生操履只以塵垢富貴皆學聖人而  
未至者其論佛老也實陽擠而陰助之蓋有微意  
存焉唱千古之絕學掃末流之塵迹將行其說於

世或自不得不爾如胡寅者詬訾不已噫其甚矣豈非翻著祖衣倒用如來印者邪吾恐白面書生輩不知諸老先生之心借以爲口實則聖人之道幾何不化而爲異端也伊川之學今自江東浸淫而北矣縉紳之士負高明之資者皆甘心焉余亦出入其中幾三十年嘗欲箋註其得失而未暇也今撤籬籬於大方之家滙淵谷於聖學之海藐諸子胸中之秘發此書言外之機道冠儒履同入解脫法門翰墨文章亦是神通遊戲姑以自洗其心耳或傳於人將有憐然而怒憫然而疑凝然而思釋然而悟啞然而笑者必曰此翁亦可憐矣又曰僕與諸君子生於異代非元豐元祐之黨同爲儒者無黃冠緇衣之私所以嘔出肺腑苦相訂正止以聖人之教不絕如髮互相矛盾痛入骨髓欲以區區之力尙鼎足而不至於顛仆耳或又挾其衆也譁而攻僕則鼎覆矣悲夫僕非好辯也恐聖人之教支離而不合亦不得已耳如膚有瘡疣膏而肉之壤有坑塹實而土之豈挾其肉而出其土哉

僕與諸君子不同者盡在此編矣

禪師大慧下育王佛照德光寂

光住天台鴻福天甯杭州靈隱明州育王臨安徑山慶承召對宣賜優渥住育王謂產薄不足贍衆遂以所賜及王臣長者所施之資置田歲增穀五千創數椽以自處號曰東菴掩關自娛接人不能時許請子入室三月告衆曰吾世緣將盡至十五間左右曰今日月半也左右曰然又二日索紙作遺書與平昔所厚者二十日蚤集衆敘別皆法門旨要無半語及他事索更衣大書曰八十三年彌天罪過末後殷勤盡情說破跌坐而逝塔全身於菴後勅證普慧宗覺塔曰圓鑒

禪師昭覺支下天竺伽堂中仁寂

仁住大覺遷中竺徙靈峯淳熙甲午詔對說法是年陞堂告衆而寂

甲子四年

禪師白雲下鄭州普照佛光道悟寂

悟蘭州寇氏子聞馬嘶大悟至能耳謁白雲海先

是人問海何不擇法嗣海作頌有芝蘭秀發獨出西秦之語比悟至夜聞空中人言來日接相公黎明海呼僧行令持香華接我關西弟子寺乃唐郭子儀建今渠自來住持也既至一言相契徑付衣孟寺前嘗有剽而殺人者來告急悟呼衆擒之曰卽汝是賊尋得其巢穴賊衆請命悟與要言而釋之數十年路不拾遺人以此益信是汾陽王云悟自後化行遠邇甲辰海遷寂悟出世鄭州普照復遷三鄉竹閣菴時著白衣跨牛橫笛於洛川人莫之測嘗謂人曰道我是凡向聖位裏去道我是聖向凡位裏去道我不是聖不是凡纔向毗盧頂上有些行履處五月日晚參畢呼侍者足未及門而逝方丈上有五色雲如寶蓋中有紅光如日者三乙丑開禧元年

丙寅二年 元太祖武皇帝十二月卽位于斡難河自號可汗

祖住蘇州秀峯穹窿禪師法薰來參

上堂舉楊岐乍住屋壁疎滿牀盡撒雪珍珠縮却頂暗嗟吁翻憶古人樹下居楊岐鬪勝不鬪秀

峯鬪秀不鬪勝秀峯乍住沒親疏箇箇盡懷滄海珠滿眼湖山看不足釋迦彌勒是他奴薰字石田慕祖道望來參祖一見器之

丁卯三年

禪師師範自瑞巖第一座領明州清涼

祖過天童掃密菴祖塔範偕往未幾至瑞巖分座忽夜夢偉衣冠者持把茅見授翼日明州清涼專使至範受請入院見所謂伽藍神茅其姓衣冠與疇昔所夢無異

戊辰嘉定元年

祖應陽和王請住湖州資福

己巳二年

祖應張約齋鑑請開山慧雲

清涼範遷焦山

庚午三年

旃檀佛像至金國迎供內庭

禪師可宣詔住徑山

宣蜀嘉定許氏子參華藏民悟旨詔住徑山遠近

幅湊宣悲夫重跡而來者窮其日力食息無所又於雙嶺之上築室百間爲接待菴濟其所不及費宗易化城一天字賜號佛日

辛未四年

禪師道生住妙果

臨濟第十五世臥龍祖示寂

祖時客徑山將示涅槃手書別交遊六月九日復書偈曰末後一句已成切怛寫出人前千錯萬錯書訖端坐而逝

禪師天童無用淨全寂嗣徑山果

止菴居士錢象祖錢塘人嗣無用全參護國景元元曰欲究此事須得心法兩忘乃可法執未忘契理亦非悟也曰觸涉層吻便落意思如何曰本自無瘡勿傷之也祖渙然有得守金陵日專修淨土創止菴高僧寮爲延僧談道之所嘉定元年拜左丞相辭歸益進淨業四年二月示微疾書偈曰菴菴香從佛國來琉璃地上絕纖埃我心清淨超於彼今日遙知一葉開後三日僧有問疾者祖曰我

不貪生不怖死不生天不爲人修求生淨土耳言

訖跏坐而逝同時有饒節字德操者臨川人以文

章著稱往來襄鄧間嘗令其僕守舍一日見僕歸

占對異常怪問之僕曰守舍無所用心聞鄰寺長

老有道價特往請一轉語忽爾開悟身心泰然無

他也節歎曰汝能是我乃不能何哉徑往白崖問

道與其僕祝髮爲僧節法名如璧僕名如琳節自

號倚松道人嘗勸呂紫微專意學道詩云向來相

許濟時功大似頻伽餉遠空我已定交木上座君

猶求舊管城公文章不療百年老世事能排兩頰

紅好貸夜窗三十刻胡牀跌坐究旛風發明爲

忘分有公叔同升之意故附書之

臨濟第十六世祖

壬申五年

臨濟第十六世徑山祖嗣宗統八年

祖自焦山遷雪竇別山祖智來參

自作障礙所以尋常西廊東廊見諸人和南問訊  
山僧便乃低頭相接其實無他只要諸人識得長  
老是西川隆慶府人氏智蜀之楊氏子年十四得  
度初聞僧誦華嚴經彌勒樓閣入已還閉恍如夢  
覺見祖於雪竇祖知是法器待之彌峻時或捧喝  
交下一語不少貸智擬對輒噤不能發由是知解  
都喪曰吾平生伎倆皆死法也今始行活路

癸酉六年

法師天竺北峰惠行宗印寂

發明講不背  
宗故事

印字元實生鹽官陳氏年十五具戒謁竹菴觀明  
教觀之旨凡諸祖格言必誦滿千遍講止觀深研  
學者支離名相之病立隱雷峯遷德藏超果圓通  
北禪所至宿弊前革道譽盛著學徒恒五百詔居  
靈山召對賜號惠行法師

甲戌七年

禪師靈隱大川普濟纂修五燈會元

濟字大川明州奉化人嗣徑山玟住靈隱自景德  
傳燈錄後有廣燈續燈聯燈普燈濟合五爲一曰

博覽擇

五燈會元至密菴傑祖止敘集詳明學者便之  
乙亥八年  
丙子九年  
祖被詔移育王了慧侍行

慧蓬州羅氏子垂髫與兒羣戲必搏泥沙爲佛塔  
像既長遂出家見祖自陳來歷祖呵曰熟睡去既  
而令充不釐務侍者一日祖謂慧曰覷不透處只  
在鼻尖頭道不著處不離脣皮上討之則千里萬  
里慧抗聲曰將謂有多少祖遷育王慧侍行

丁丑十年

戊寅十一年

己卯十二年

禪師道冲由徑山第一座應嘉禾光孝請尋遷蔣山  
冲號癡絕生而資性絕人少以進士業應詔受釋  
氏學於梓州妙音院遊成都暫經論出峽回翔荆  
楚間時松源岳唱密菴祖之道於饒之薦福徑造  
其廬以歲饑不受會曹源生出世妙果冲造其門  
有省俾侍香老拳痛棒不少貸平知見至是都無  
影響曹源徙龜峰侍行又三年以偈辭遊浙其言

生平下註說  
生字

有曰尙餘窮相一雙手要向諸方療處爬至京師  
松源主靈隱冲依焉嘉定己卯由徑山第一座應  
嘉禾光孝請嗣曹源生俊彦者宿多集會下道行  
聞於朝除蔣山瀕江易潯田多無秋冲忍饑鳴道  
行乞養士居十三年無倦色

曹洞第十八世雪巖祖示寂

曹洞第十九世祖

諱行秀嗣雪巖祖

庚辰十三年

曹洞第十九世萬松祖嗣宗統<sup>十七</sup>

辛巳十四年

祖移報恩洪濟示衆向上一機鶴冲霄漢當陽一  
路鷗過新羅直饒眼似流星未免口如扁擔

法薰出世蘇州高峯

高峯叢爾利薰勞苦戢縮以身率之未三年爲改  
觀

壬午十五年

禪師福裕參萬松祖印可之

裕太原文水張氏子五齡解語日了千言九歲入

學一日十行遭亂喪家道逢老僧令裕出家曰汝  
能誦得法華經則一生事畢裕曰佛法止此乎莫  
更有向上消息否老僧異之遂偕謁休林古佛於  
仙巖曰此子龍象種也得奉巾瓶他日必成大器  
林欣納之乃爲祝髮受具遂與雙溪廣同參者七  
年次參萬松祖祖一見便許入室問子從何得箇  
消息便恁麼來裕曰老老大大向學人納敗闕作  
麼祖曰老僧過在何處裕曰學人且禮拜暫爲和  
尙蓋覆却祖大喜遂爲印可

癸未十六年

高峯薰遷楓橋旋補鍾山

薰遷楓橋寒山寺衆繩繩然鍾山虎席廟堂精選  
擇旋以重補處

甲申十七年

理宗

理宗乙酉寶慶元年

祖被詔住徑山祖智分座了慧爲第二座

祖住徑山慧侍行將授藏主而有以力遷是職者

適訥侍者寂命藏主起龕怯衆一辭不吐祖即令

維那請慧侍者代之慧至龕前連喚訥侍者者三

乃曰三喚不應果然是訥門放出遠天鵲祖因

黜前藏主而以慧代其職未幾居第二座聲動叢

林慧先依妙峯善於靈隱兩廡壁面繪五十三參

相令禪衲各呈偈慧亦有而忌之者不以登卷善

閱卷問曰慧侍者何無曰有不足登卷善曰試學

看偈曰幸是十方無壁落誰將五彩繪虛空善財

眼裏生花翳去却一重添一重善親爲書之卷首

自此聲名爛熳後慧住天童創幻智庵別祠奉妙

峯用報知己發明書之以爲叢林忌才札衆者戒勸

丙戌二年

祖應詔慈明殿陞座

十月祖應詔入內上御修政殿引見祖奏對詳明

上爲之動色賜金襴僧伽黎仍宣詣慈明殿陞座

上垂簾而聽乃賜佛鑑禪師號是年徑山燬祖逆

知其數略不動容經意

鍾山薰遷淨慈

丁亥三年

禪師祖欽來參居侍司

欽婺州人初參天目禮令看臨濟三頓痛棒話一

日纔上蒲團忽覺有省後參祖於徑山因鑄鐘令

著語欽呈偈曰通身只是一張口百煉爐中輟出

來斷送夕陽歸去後又催明月上樓臺祖即俾居

侍司

戊子紹定元年

己丑二年

元太宗文皇帝即位

徑山寺成

發明寺之成殿不書此書嘉道棄無營也

祥符蔭曰禪林建立無非佛事自然成就則爲道

力所感若用意經營只成福業於道無預也徑山

燬而祖略不動意寺以成就閱六年又燬而祖不

驚不變多助如雲復以崇成謂非道感而能然乎

禪師妙倫參祖得悟

倫號斷橋黃巖徐氏子徧叩諸方而未透徹參祖

祖以狗子因何有業議令下語凡三十轉皆不契

庚寅二年

萬松祖復主中都萬壽至溫爲侍者

祖應元太宗詔復主萬壽大振洞上宗風上堂說偈曰蓮宮特作梵宮修聖境還須聖駕遊雨過水澄禽汎子霞明山靜錦蒙頭成湯也展恢天網呂望稀垂釣月鉤試問風光甚時節黃金世界桂花秋溫字其玉號全一邢州郝氏子幼聰敏異常兒六歲祝髮年十五參祖博記多聞論辯無礙祖命爲侍者凡祖偈頌法語一聞輒了遂得法焉常以侍者代應對機鋒不可犯太保劉秉忠長溫一歲少時相得歡甚忠厭世故思學道溫勸之爲僧後忠爲元世祖知遇薦溫可大用得召見與語大悅將授以官弗受曰天下佛法流通臣僧之願富貴

非所望也。憲宗命印簡主釋教。詔天下作資戒會。  
溫持旨宣布中外而輔成之。

辛卯四年

壬辰五年

萬壽祖退居從容庵禪師福裕補住萬壽

時元太宗破汴祖剎荒亂祖退居從容庵朝命以  
裕補之

癸巳六年

甲午端平元年

乙未年

徑山復燬

祖不驚不變而多助雲至

禪師育王下廬山妙峯之善寂

善生。執綺中。姿性高潔。年十三。卽辭家。祝髮。經論。一見。輒了大意。遍參諸大老。時佛照光唱道。鄮山。往參禮蒙印。可贈以偈曰。今日與君通一線。斬釘。截鐵起吾宗。自是辯慧融。釋然不以自足。遊衡湘。還入匡廬。卓錫妙高峯下面壁坐十年。一時學者。尊稱之曰妙峯禪師。分座鴈蕩。能仁出世。慧因洪。

福萬年諸利退居皋亭又十餘年復領明之瑞嚴蘇之萬壽常之華藏晚至靈隱亦非所樂靈隱密邇行闕輪蹄湊集善掩戶若不聞一無所將迎公卿貴人或見之寒溫而已會天童虛席時鄭清之秉鈞軸念非善莫宜居因勉善行善對曰老僧年踰耄矣尙夜行不休乎辭弗就鄭公益高之上堂曰應物見形如水中月信手拈來一時漏泄以拂子擊禪床左邊云者裏是鑊湯爐炭擊右邊云者裏是劍樹刀山前面是觀音勢至後面是文殊普賢中間一著還知落處麼又擊云毗婆尸佛蚤留心直至如今不得妙九月二十八日寂火浴舍利不可數計塔於靈隱之西岡鄭清之銘其塔

淨慈薰遷靈隱

丙申三年

侍者祖欽領悟

欽爲侍者十年每遇入室舉起衲僧巴鼻佛祖爪牙更無下口處一日偶佛殿前行擡眸見一枝古栢觸著向來所得境界和底一時颺下方始見祖

立地處

曹洞第十九世萬松祖示寂

祖於孔老莊周百家之學無不俱通三閤藏教恒業華嚴得法者一百二十人束髮執弟子禮者不可勝紀編祖燈錄三十二卷又撰淨土仰山洪濟萬壽從容請益等錄及文集偈頌釋氏新聞鳴道集辨宗說心經風鳴禪悅法喜集並行於世四月五日書偈曰八十一年只此一語珍重諸人切莫錯舉侍者驚報大眾足甫及門已圓寂矣壽八十一茶毗於通玄門外舍利無數諸方門人各建塔

雲溪挺曰萬松有語云雪巖先師嘗舉穴細金針纔露鼻芒長玉線妙投關此乃洞上血脉非其中人不易知也雲巖買鏡石頭參同千年桃核裏覓甚舊時仁空拳誑惑小兒祇要應箇時節兩刃交鋒唱出新豐一曲畢竟如何是回互潯雨過水澄禽泛子霞明山靜錦蒙頭莫謂萬松不道也萬松說法禁庭宮人羅拜甘露霄降祥雲繞空丞相湛

然居士親承授記語人曰吾見萬松巍巍若干仞  
峯滔滔如萬頃波莫能涯際當時人共稱之爲儒  
佛兼通宗說並到眞天人師也

曹洞第二十世祖

諱福裕嗣萬松

丁酉嘉熙元年

曹洞第二十世雪庭祖嗣宗統

雪庭祖奏對稱旨詔總領釋教

戊戌二年

高峯妙生

生於蘇之吳江徐氏母夢僧乘舟投宿而誕離襁  
褓輒喜跌坐遇僧入門輒愛戀欲從之

己亥三年

蔣山道冲應詔主天童

侍郎東獻曹公函帥聞冲道望以鼓山來聘未  
行雪峯驟至領事半年而天童詔下衆集如海法  
度修明雖宏智盛時殆不之過育王虛席攝住持  
事往來說法兩山間上堂曰天童用底來育王用

不著育王用底歸天童用不著雖然如是用不著  
處用有餘一箭雙鵰隨手落

庚子四年

辛丑淳祐元年

壬寅二年

元定  
宗立

癸卯三年

甲辰四年

禪師臥龍支下靈隱法薰寂

天童冲歸隱金陵

時有旨冲移靈隱而世故有不滿其意者伐鼓告  
衆歸隱金陵京兆尹遣屬官追挽至蘇臺不可朝  
命以虎邱俾養老不就留守虛齋趙公以蔣山起  
之不應

乙巳五年

丙午六年

禪師育王下北磻敬叟居簡寂

簡潼川王氏子閱已菴語有省後參育王佛照光  
機契迫隨甚久出世天台報恩光孝退居飛來峯  
之陰大參眞西山時爲江東部使者以東林雲居  
力致之高臥不起後奉旨還淨慈上堂識得一萬

事畢了事。請僧一字不識。直饒恁麼。未稱全題。禹力不到處。河聲流向西。是年春寂有北。彌集十九卷行世。

丁未七年

戊申八年

祖退居明月池上

祖端居徑山不數年。寺宇崇成。去寺四十里。築至數百楹。接待雲水。額曰萬年正續。正續西數百步。結菴一區。爲歸藏所。上建重閣。秘藏後先所賜御翰。散室東西偏奉祖師與先世香火。遇始生日。爲飯僧佛事。以贊冥福。蓋蜀亂。祖之先祀遂絕。故茲祠奉。以旌孝慕。云上聞而嘉歎。賜扁圓照。是秋祖築室明月池上。榜曰退耕。乞老於朝。上留之。不可乃退居。

己酉九年

臨濟第十六世徑山佛鑑祖示寂

祖居徑山二十年。海衆雲騰。信施豐積。法席爲東南第一。三月旦升堂示衆曰。山僧既老且病。無力

得與諸人東語西話。今日勉強出來。從前所說不到底。盡情向諸人面前抖擻去也。遂起抖衣云。是多少十五集兩班區畫後事。親書遺表及遺書十數函。言笑諧謔如平時。其徒以遺偈爲請。乃執筆疾書云。來時空索索去也。赤條條更要問端的。天台有石橋。移頃而逝。停龕二七日。遺表上聞。上遣中使降香。賜幣奉全身塔於圓照菴。

宗統編年卷之二十五

宗統編年卷之二十六

臨濟第十七世祖

諱祖欽嗣徑山

理宗庚戌嘉熙十年

臨濟第十七世仰山祖嗣宗統九年

辛亥十一年

元憲宗立

佛滅後二千二百年

金陵冲詔移徑山

冲隱金陵育王虎席朝論以大覺故家不輕畀付特召冲於隱所三返卒不奉詔徑山虎席復詔起之先是京兆尹趙公將逝冲來吳之法華而徑山之命繼至冲謂不赴法華則不信重違君命則不恭失恭與信何以爲後學法乃幡然而起留法華臘月卽登徑山

壬子十二年 圓潤大水

原妙出家

妙年十五懇請父母出家嘉禾密印寺名原妙

癸丑寶祐元年

祖住潭州龍興

上堂曰純清絕點正是眞常流注打破鏡來未免一場狼籍不若遇飯喫飯遇茶喫茶曉來獨立空庭外閑對寒梅幾樹花

甲寅二年

原妙圓具戒

乙卯三年

丙辰四年

祖遷湘西道林

丁巳五年

禪師慶壽下海雲印簡寂

簡甯遠宋氏子生而神悟七歲父授孝經開宗明義章遽問父曰開者何宗明者何義父異之俾侍中觀沼出家學佛一日侍沼行沼舉看他家事忙且道承誰力汝作麼生會簡將沼手一掣沼曰這野狐精簡諾諾沼曰更須別參始得元兵破甯遠四衆逃散簡侍沼如故沼曰吾迫桑榆汝方富有春秋何當玉石俱焚宜自遠遁簡泣曰因果無差死生有命安可離師苟免乎沼察其誠囑曰子向去朔漢有大因緣吾將與子北渡經年至赤城書偈曰七十三年如掣電臨行爲君道一綫泥牛飛過海東來天上人間尋不見偈畢忽無疾而逝闍維收頂骨舍利簡爲乞緣造塔供養一夕聞空中呼簡名簡警然有省復聞人告曰大事將成毋滯於此黎明遂策杖之燕過松鋪值雨宿崖下因擊

火乃悟曰。今日始知眉橫鼻直。信道天下老和尚。不寐語。明日至景州。見本無玄。玄問從何所來。簡曰。雲收幽谷。玄曰。何處去。簡曰。月照長松。玄曰。孟八郎。漢便恁麼去也。簡諾。諸趨出。初召臨終。簡問某甲。當依何人了此大事。召曰。賀八十去。迨入燕至大慶壽寺。乃省前識。於是謁璋嗣其法。兩主慶壽王臣尊信。啓導接引。衛法護世之功。不淺有孔子之後元措者。渡河謁簡。請復曲阜廟祀。簡微言之。乃復襲封閭。四月說偈畢。泊然而逝。茶毗。獲舍利無算。諡佛曰圓明大師。

戊午六年

元廷詔辨正焚燒道藏。僞經加雲庭祖師號。時有道流出一書曰。老君化胡成佛經及八十一化圖鑠板傳布其言鄙陋誕妄。意在輕蔑釋門。而自重其教。少林祖以其事奏聞。憲宗有旨。令僧道二家同詣上所辯析。二家自約道勝。則僧冠首而爲道。僧勝。則道削髮而爲僧。僧問道曰。汝書爲諭化胡成佛。且佛是何義。道對曰。佛者覺也。覺天覺

地。覺陰覺陽。覺仁覺義之謂也。僧曰。是殆不然。所謂覺者。自覺覺他。覺行圓滿。三覺圓明。故號佛陀。豈特覺天地陰陽仁義而已耶。憲宗特語近侍曰。吾亦先知仁義是孔子之語。謂佛爲覺仁覺義。其說非也。道士又持史記諸書以進。欲出多說。僥倖取勝。僧曰。此是何書。道曰。前代帝王之書。上曰。汝今持論教法。何用攀援前代帝王。僧曰。我天竺亦有此書。汝聞之乎。對曰。未也。僧曰。我爲汝說。天竺頻婆羅王贊佛偈曰。天上天下無如佛。十方世界亦無比。世間所有我盡見。一切無有如佛者。當其說是語時。老子安在道者。不能對。僧又問汝史記有化胡之說否。曰。無。又問老子所傳何經。曰。道德經曰。此外更有何經。曰。無。道德經中有化胡事否。曰。無。僧曰。史記中旣無道德經中又無其爲僞妄明矣。道者辭屈。尙書姚橐曰。道者負矣。上命如約行罰。遣近臣脫歡。將道者樊志應等十有七人詣龍光寺。削髮爲僧。焚僞經四十餘部。天下佛寺爲道流所據者。悉命歸之。祖加號光宗正法大師。

祥符蔭曰。化胡經妄撰於晉王浮。當時已明其謬。今復昭雪於祖龍一炬。良由五濁惡世人多邪倒。堂堂大路不肯行。偏向荆棘林中別生枝蔓。自取泥犁。良可悲也。老子清淨守玄。修之原不失爲善法。乃不善遵其教者。謬妄取戾。一至於此。佛慈廣大如太虛空。亦何所損失。而又何所不攝受之。但引人墮邪見坑中。失正知見。爲可懼耳。憲宗此舉。可謂崇正驅邪。而雪庭祖辯正之功。亦不少也。

原妙入淨慈立三年死關學禪

己未開慶元年

禪師原妙謁斷橋

妙請登斷橋。倫令參生。從何來。死從何去。話於是脇不至。席口體俱忘。或如廁。惟中單而出。或發函忘扇。鏑而去。時同參僧顯慨然曰。吾已事弗克辦。曷若輔之。有成朝夕護侍。惟謹。

庚申景定元年

祖寓北礪原妙來參

妙來北礪參祖。方問訊。插香。祖便打出。閉却門。一

再往始得親近。乃問。已前做處。妙一一供吐。祖當下悉與勦除。令看無字。自此日日參叩。祖忽問阿誰與你拖箇死屍來。聲未絕。卽打。如是者不知其幾妙扣愈虔。

辛酉二年

祖住處州南明原妙省悟

祖住南明上堂曰。有句無句。如藤倚樹。白鷺下田。千點雪。黃鸝上樹。一枝花。三千里外賣却布單。不遠而來。因甚放下泥盤。呵。呵。大笑。毗婆尸佛蚤留心。直至如今。不得妙原。妙從徑山歸。堂夢中忽憶斷橋所舉萬法歸一一歸何處。話疑情。頓發三晝夜。目不交睫。至第六日。隨衆詣三塔。諷經擡頭。忽覩五祖演和尚真贊末兩句云。百年三萬六千朝。反覆元來是這漢。驀然打破拖死屍之疑。解夏至南明。祖問阿誰與你拖箇死屍到這裏。妙便喝祖拈棒。妙把住云。今日打原妙不得。曰。爲甚打不得。妙拂袖便出。翼曰。祖問萬法歸一一歸何處。曰。狗舐熱油鎚。曰。你那裏學這虛頭來。曰。正要和尚疑。

善祖休去

壬戌三年

妙度夏江心過雪寶見希叟曇

曇問那裏來妙拖下蒲團曇曰狗子無佛性上座作麼生妙曰拋出大家看曇乃自送入堂

禪師徑山支下天童西巖了慧寂

慧參徑山祖居第二座蘇州守趙節齋請開法定慧寺遷東嘉能仁江州東林及明州天童咸有聲續佛涅槃日上堂拈拄杖召大眾云黃面瞿曇乃竺乾猛將以慈悲爲弓矢以智慧爲戈矛統百萬雄兵勇不可當布三百餘陣勢不可敵如是四十九年演出五千餘卷兵書雖流落人間而未嘗有一字漏泄因與生死魔軍爲冤爲對遂於跋提河邊築一巨城名爲涅槃於其城中先以紫磨金軀犒賞諸兵令其瞻仰取足再三撫諭而又散以八斛四斗珍珠其謀意無他必欲打破生死牢關普與盡大地衆生共行通天活路得到大安隱大解脫之場而後已豈謂二千餘載猶未遂其志而未

奏其功山僧既知其力盡計窮不免拔劍相助去也以拄杖畫一畫云四海浪平龍睡穩九天雲淨鶴飛高晚居幻智菴無疾而化

癸亥四年

禪師文泰參雪庭祖受囑

泰汾州陽城魏氏子禮本鄉智禪師薙染受業精修僧事服勤有年辭智遊學獨邁太行經入東魯初習教乘於演三藏德律師法席纔領大義次扣禪關廣參知識始參濟下宗師依雲峯恒參請累年親蒙授記仍付衣頌次參曹洞宗師後造太原深丈室復蒙印證後詣燕京大萬壽寺參雪庭祖祖問當機一句試拈出看泰擬開口祖曰家產被人籍沒了也還在這裏叫屈泰撫掌曰誰奈何何祖曰這風顛漢曰仁義道中且與一拜於是侍錫十載受囑

祖遷台州護聖

甲子五年

祖住湖州光孝

度宗

度宗乙丑咸淳元年

祖掛牌道場開法天甯原妙侍

丙寅一年

妙侍者入龍鬚山

祖一日問妙曰。日間浩浩時。還作得主麼。妙曰。作得主。又問。睡夢中作得主麼。妙曰。作得主。復問。正睡著時。無夢無想。無見無聞。主在甚處。妙無語。祖囑曰。從今日去。也不要你學佛學法。也不要你窮古窮今。但只饑來喫飯。困來打眠。纔眠覺來。却抖擻精神。我者一覺主人。公畢竟在甚麼處安身立命。妙遂奮志入臨安龍巖。自書曰。操一生做箇癡獸漢。決要者一著子明白。

丁卯二年

祖住袁州仰山

法席爲天下第一。僧問如何是五家宗旨。祖曰有口祇堪喫飯。曰若不借問爭達本源。祖曰未敢相許。曰如何是瀛仰宗。祖曰父慈子孝。曰如何是臨

濟宗祖曰。迅雷不及掩耳。曰。如何。是曹洞宗祖曰。三更不借夜明簾。曰。如何。是雲門宗祖曰。體露金風。曰。如何。是法眼宗祖曰。山自青。水自綠。曰。五家宗乘。蒙師指向。上宗乘事。若何。祖曰。頭頂天。腳踏地。

藏主集古尊宿語錄成

唐宋傳燈。嘗賜入藏。諸師之語。傳燈不能備載者。顧別集自大鑑一世而下。南泉趙州以及眞淨佛照二十餘家。計四十八卷。名之曰古尊宿語錄。育王大觀序之。

祥符陰曰古尊宿錄敘述眞奧博而不華實有裨於宗傳開後學之心眼傳燈之外必不可少者也微言不墜大意昭然藏主之功爲不淺矣

禪師萬松支下上都華藏普安至溫寂

溫堅持雅操  
不爲好爵所

一廉勝於秉忠  
籌故書忠

太保劉秉忠薦溫有經世才。世祖召見。與語大悅。留內庭三載。多有贊益。將授以官。堅辭還山。錫號佛國普安大禪師。五月示疾。右脇而逝。異香三日。

茶毗舍利無數

戊辰四年

己巳五年

元世祖貴供仰山致尊敬之禮

庚午六年 大旱

原妙聞墮枕徹悟

妙居龍鬚經五載。因同宿道友。推枕墮地。作聲廓然。大徹自謂。如往泗州。見大聖。遠客還故鄉。元來只是舊時人。不改舊時行履處。

辛未七年 大饑 壬申八年

癸酉九年

禪師從倫應元詔入對內殿

倫參萬松祖。見阿那律。得聞天眼。因緣忽有省。曰。設使五眼俱。瞎又能開我向上眼矣。因學似祖。祖問如何。是向上眼。倫曰。瞎祖曰。真箇瞎。倫復曰。瞎瞎祖。領之九月。詔入內殿。從容問辯。暮將退。帝曰。在先有問。皆言無說。今何却有說。耶。倫曰。理本無說。今且約事而言。帝曰。何故理無言。說。倫曰。理

與神會。如人食密中邊。皆甜。若問密之色。相紫白。可言。若論味之形容。實難訴說。

禪師持定力疾參悟

發明 定忘身苦。參得悟書之。以爲願。懸形骸者。鑑。

定清苦。剛介來。仰山參祖。爲衆持淨。六月。日衆患痢。委身事之。未幾。定亦疾。疾革。醫謂不可。乃取一罇。桶就屏處。危坐其上。漿飲禁絕。單持正念。目不交睫者七日。第七日夜。將半。忽覺山河大地。草木叢林。徧界如雪。於明月下。堂堂一身。乾坤包不得。久之。如聞擊木聲。驚醒。徧體汗流。疾亦愈。踴躍自慶。旦詣方丈。舉似祖。祖舉公案。詰之。酬答無滯。示偈曰。昭昭靈靈。是什麼。貶得眼來。已蹉過。剛邊。子放光明。直下元來。只是我。

甲戌十年

妙遷雙髻

妙隱龍鬚。九載縛柴爲龕。風穿日炙。冬夏一積。不扇不爐。日搗松和糜。延息而已。骨積雪沒。龕旬餘。路梗絕。烟火咸謂死矣。雪霽宴坐如初。有僧名若瓊。焚祠牒從妙於龍鬚。忽染病。妙曰。病中絕緣。正

好做工夫。汝臭皮袋。悉委之於我。但和病捱去。決不相賺。瓊病亟。索浴。俯見湯影。郎有省。喜笑如脫沉疴。信宿書曰。三十六年顛倒。今日一場好笑。娘生鼻孔。豁開放出。無毛鐵鵝。妙問如何。是娘生鼻孔。瓊豎起筆。妙曰。又喚甚麼。作無毛鐵鵝。瓊擲筆而逝。妙遷武康雙髻峯。

禪師如拱被旨住育王。

拱初參石田癡。絕於靈隱。疑礙無所入。聞天目禮居太白。往投以疑。禮舉南山筇。東海鳥。雙拱擬對禮打之。忽有省。遂留侍。斷橋倫住國清。延之典藏。倫遷淨慈。居第二座。尋陞第一座。丞相以厲蕩靈巖。表請出世。遷龍仁。退歸放牧菴。不應外緣。有旨授育王。不得已應之。

恭宗

恭宗乙亥德祐元  
元至元十二年

曹洞第二十世雪庭光宗正辨祖示寂

祖歸故里。創建精舍。日報恩祖。委顯悟三。閱藏教而成誦。誘掖後學。無倦色。通羣書。善翰墨。吟詠其

上堂。曾說幾十萬言。播在叢林。門人請梓之。祖聞而叱之曰。此吾一時遊戲所發。安可以形迹為哉。既老倦於接納。歸棲嵩陽。是年秋。示微疾。書偈告終。塔於寺之西隅。

祥符蔭曰。雪庭博洽融通。大展新豐之令於大河以北。為王臣尊禮。而辨正摧邪。功在法苑。不小與仰山祖同時。南北輝映。甘露雙垂者也。  
曹洞第二十一世祖

諱文泰。嗣雪庭法。雪庭之門時稱二泰。謂中林智泰。祖乃首推也。  
丙子德祐二五月以  
後端宗景炎元年

曹洞第二十一世少室祖嗣宗統一十四年

開堂少林。祖利上堂曰。塵劫來事。只在於今。河沙妙德。總在心源。試教伊覲面相呈。便不解當風拈出。且道。過在甚麼處。卓拄杖曰。祇為分明。極翻令所得遲。

禪師中竺雪屋珂辭靈隱

珂靈隱。薰關住中竺。上堂。枯桑知天風。海水知天寒。且道。請僧知箇甚麼。知道飯是米。做直饒恁麼。

閻羅老子紫飯錢有日在珂以宋鼎既遷即歸寺  
 事時金山默菴雅禪師導行時元兵下江南  
 默菴被總兵伯顏驅置幕中從至武林默菴言於  
 伯顏請珂住靈隱親持請疏扣門珂抽關露半面  
 問曰汝爲誰默菴曰故人某甲也珂落關曰我不  
 識你蓋珂離處世外而以忠自持故不屑靈隱之  
 命斷江恩有詩曰雪屋今亡四十年高風凜凜留  
 依然伯顏丞相拜牀下不肯爲渠來冷泉  
 祥符隱曰當宋鼎革遷元兵南下之時臨安羹沸  
 雪屋乃以世外緇衣折伯顏牀下之拜而不起其  
 高風清韻有足多者充其意亦世外之文山疊山  
 也時珂座下有首座某年八十餘歎曰我生於宋  
 老於宋乃不得死於宋遂絕粒而死應務檀林中  
 果無異嘆哉

丁丑二年

禪師妙峯下徑山藏聖善珍寂

禪師普度住徑山

度字虛舟江都史氏子初見鐵牛印於靈隱偏歷

諸方若天童晦巖光大慈石巖建虎邱石室廬皆  
 一見器異之參無得通於饒州薦福決志親依嗣  
 之這祐初出世金陵半山繼潤之金山潭之鹿苑  
 撫之疎山蘇之承天補中竺復詔陞靈隱被命住  
 徑山值火餘志圖興復將有緒而遽寂

禪師雲壑 瑞集心燈錄成

瑞續五燈會元集臥龍先祖以後宋季元初諸宗  
 語曰心燈錄 發明 心燈錄以援邱玄素塔銘證  
 然邱銘竟傳矣書成以見此書有 德山出馬祖下致阻抑不行  
 係法門獨私掩公者之失自見也

戊寅三月 戊寅三月 己卯祥興二年 宋亡

元 姓奇源溫氏太祖鐵木真子宋開禧二年自號  
 可汗得太宗窩闊台尊宗號實定宗貴田憲宗

蒙哥至世祖諱忽必烈國語曰薛禪即位開平於  
 宋景定元年庚申建元中統至宋景定五年甲子  
 改至元改開平爲上都己卯宋亡過一天下世祖  
 在位凡三十五年元制凡皇帝即位之始必先受  
 冊戒方登大  
 寶布告天下

世祖庚辰至元十七年

禪師妙高自蔣山遷徑山

高字雲峯長谿人家世業儒母夢池上嬰兒合爪

坐蓮華心手捧得之覺而生高因名夢池自幼嗜

書史允就釋典。固請學出世法。父母以夢故不忍。奪出家。受具首。參道冲。冲曰。此兒語。繩繩有序。吾宗瑚璉也。又參範祖。祖尤器重。擬充侍職。高歎曰。懷安敗名。吾不徧參。諸方不止也。遂之育王。見廣聞。入室掌藏。鑰一日。聞舉。譬如牛過窗。欄頭角四蹄都過了。因甚。尾巴過不得。高劃然有省。答曰。鯨吞海水。盡露出珊瑚。枝聞曰。也只道得一半。後出世南。與大蘆。屢遷至蔣山。歷十有三載。乙亥。寺被兵革。軍士有迫高求金者。以刃擬高。高延頸曰。欲殺即殺我頭。非汝礪刃。石辭色雍容。了無怖畏。軍士感動。擲刃而去。是年詔住徑山。徑山燬。高殫心興建。

帝師愛思八

此云寂聖壽

發明

元列朝皆有帝師。愛思八以樂其餘。凡天下

高僧師號皆錫自帝師

辛巳十八年

禪師原妙鍵死關西天目

妙住雙髻。丙子。學徒避兵。四去。妙獨掩關危坐。及安堵。啓戶視之。則那伽如故。於是戶屢彌夥。應接

不暇。乃以拄杖橫肩。顧左右云。大眾會麼。柳標橫肩。不顧人。直入千峯萬峯去。已卯。春。腰包背道直造天目。西峯有獅子巖。拔地千仞。崖石林立。妙樂之有終焉之意。未幾。慕羶之蟻復集。是年復造巖西石洞。營小室如舟。扁曰死關。上溜下淖。風雨飄搖。絕給侍屏服用。不澡身。不薙髮。截髮爲鑑。併日一食。晏如也。洞非梯莫登。撤梯斷緣。雖弟子罕得瞻視。設三關語以驗學者。云。大徹底人。本脫生死。因甚。命根不斷。佛祖公案。只是一箇道理。因甚有明與不明。大修行人。當遵佛行。因甚不守毗尼。下語不契。閉門弗接。

禪師報恩從倫奉詔再焚道藏偽經

道藏偽經前已燒禁。是年復有道流搆難。十月二十日有旨。就大都憫忠寺再勦焚燒道藏偽經。除道德經外。盡行燒燬。命倫舉火。倫陞座。以火炬打一圓相曰。諸仁者。祇如三洞靈文。還能證此火光三昧也。無若也。於斯會得。家有北斗。經人口保安甯。其或未然。從此灰飛烟滅。盡任伊到處覓天尊。

中書丞相耶律鐸翰林院唐方等奉勅撰碑紀其事

壬午十九年

癸未二十年

甲申二十一年

禪師行端來參

端臨海何氏子。世業儒。一切文字不由師授。自然通達。初參藏叟。珍於徑山。問汝是甚處人。端曰。台州。珍便喝。端展坐具。又喝。端收坐具。珍曰。放汝三十棒。參堂去。端於言下豁然頓悟。珍寂端以淨慈靈隱山水清勝。往挂錫焉。自稱寒拾。里人橫川瑛在育王。以偈拈曰。寥寥天地間。獨有寒山子。端竟不渡江。而謁覺菴。真於承天。遂參祖於仰山。祖問何處來。端曰。兩浙。祖曰。因甚。語音不同。端曰。合取臭口。祖曰。額徑橋。高集雲峰峻。未識書記在。端拍手曰。鴨吞螺。鰲眼睛突出。祖顧笑謂侍者。點好茶來。

乙酉二十二年

丙戌二十三年

丁亥二十四年

徑山還舊觀

原下疑脫妙字

祖授侍者原法印

妙在天目死關中。祖寄竹篋塵拂及綠水青山一

同授記與高峯原。妙以讚示曰。上大今已無人。雪

巖可知禮也。虛名塞破乾坤分付原。妙侍者

臨濟第十七世仰山雪巖祖示寂

臨濟第十八世祖

諱原妙嗣仰山

戊子二十五年

臨濟第十八世高峯祖嗣宗統八年

祖開法天目明本侍

緇素共築師子院。請祖開堂。適大仰寄到竹篋頂相。遂拈香上堂示衆曰。海底泥牛銜月走巖前石。虎抱兒眠。鐵蛇鑽入金剛眼。崑崙騎象鷺牽。此四句內有一句能縱能奪。能殺能活。若人檢辨得出。一生參學事畢。明本號中峯錢塘孫氏子。母夢無門開道者。持燈籠至其家。翼日遂生。本本神儀挺異。具大人相。纔離襁褓。便跏趺坐。能言。便歌。讀梵唄。凡嬉遊必爲佛事。年十五決志出家。禮佛然

指誓持五戒。日課法華圓覺金剛諸經。晝夜彌勵。困則首觸柱。以自警。期必得乃已。閱傳燈至菴摩羅女問文殊生不生公案。有疑。遂志在參決。往天目參祖。祖孤峭嚴冷。未嘗一啓齒。而笑獨見。本歎然欲爲祝髮。本以父命未許。祖曰。可舉。闔夜多尊者出家。因緣。喻汝父勿自沉溺。未幾誦金剛經至荷擔如來處。恍若開解。本自謂識量依通。非悟也。丁亥年二十五。遂剃染。侍祖開法天目。

詔集諸宗徒。廷辯禪師徑山妙高詣闕奏對詳明上大悅。

時詔立御講三十六所於江淮諸路。有譏毀禪宗者。有旨集諸宗徒。廷辯住徑山雲峯。妙高歎曰。此宗門大事。吾當不惜詣闕爭之上。問禪以何爲宗。高奏淨智妙圓。體本空寂。非見聞覺知思慮分別所能到。宣問再三。高歷舉西天東土諸祖。以至德山臨濟棒喝。因緣大抵。禪是正法眼藏。涅槃妙心。趨最上乘。孰有過於禪詞旨。明顯餘二千言。又宣進場前與諸者再復論難。諸者辭屈。上大悅。禪宗

安堵如初

徑山復災

住持高謂衆曰。吾宿負此山債耳。遂再營建。滙殿坡爲池。他屋以次落成。

禪師平江承天夢眞陞座說法。寢陞教班。居禪上之

旨

眞字覺菴。嗣雪竇謙住承天時。有華嚴宗講主某奏請江南兩浙名利易爲華嚴教寺。陞教班。資居禪之上。奉旨南來。抵承天。次日覺菴陞堂。就爲說法。博引華嚴一經宗旨。縱橫放肆。剖析諸師論解。是非若指諸掌。其時華嚴講主者聞所未聞。大霑法益。且謂承天小寺。長老尙如是。矧杭之鉅刹。大宗師耶。因回奏。遂寢前旨。

本侍者具戒

己丑二十六年

祖付侍者明本法印

本一日觀流泉有省。卽詣祖求證。祖打趁出。既而民間訛傳。官選童男女。本因問曰。忽有人來問和

尙討童男女時如何。祖曰：我但度竹篋子與他本。卽言下洞然徹法源底。陸沉衆中人無知者。於是祖書眞讚付曰：我相不思議。佛祖莫能視。獨許不肯兒。見得半邊鼻。且俾參徒詣本請益。

曹洞第二十一世少室祖示寂

祖於正月示寂。疾謂門人曰：古人坐脫立化。卽不無於衲僧分上。皆餘事也。言畢掩息。右脇而寂。禪師天目下育王橫川如珙寂。

曹洞第二十二世祖

諱福遇氏族闕

庚寅二十七年

曹洞第二十二世寶印祖嗣宗統八年

祖住寶印上堂曰：機先一句。越韻超聲。句後一機。彌乾蓋宇。衲僧家隨緣開拓。妙惠人天。祇如不落前後一句。作麼生道。昨夜西風惡。吹折案山松。

辛卯二十八年

禪師雲峯寺如意撰至元辨僞錄

先是有道士邱處機李志常等毀西京孔子廟爲

文城觀。謀占梵刹四百八十二所。傳襲王浮化胡僞經惑亂臣民。時少林裕祖詣闕陳奏對辯處機等辭屈。奉旨焚僞經。罷道爲僧者十七人。還佛寺三十七所。辛巳冬。復奉旨除道德經外其餘說。誑經文盡行燒毀。乃詔大都雲峯寺住持如意撰至元辨僞錄上諭曰：譬如五指皆從掌出。佛門如掌。餘皆如指。僞宜辨也。辨凡五卷。窮釋老之淵源。分邪正之眞僞。復勅翰林學士知制誥臣張伯淳序而行之。

壬辰二十九年

癸巳三十年

禪師淨慈下徑山雪峰妙高寂

甲午三十一年

成宗

成宗乙未元貞元年

四月蘭州河清三日上午三

百禪師東林悅堂闍應詔入對

發明成宗踐祚之初召問大法闍能

以道引導之故書

闍嗣雙林朋九江守錢眞孫請出世西林遷開先

又遷東林。召對稱旨。賜璽書號通慧禪師。并金襴法衣。

禪師牧潛圓至住建昌龍仁

至高安姚氏子。父兄皆名進士。至參仰山祖受記。前住龍仁所著。有牧潛集。明汰如河法師重刻六

臨濟第十八世高峯祖示寂

祖上疊拈拄杖。召大眾云。還見麼。人人眼裏有睛。不是瞎漢。決定是見。以拄杖卓一下云。還聞麼。箇箇耳裏有竅。不是死漢。決定是聞。既見既聞。是箇甚麼。以拄杖○見聞即止。只是六根未具之前。聲色未彰之際。未聞之聞。未見之見。正恁麼時。畢竟以何爲驗。以拄杖○吾今與汝保任。斯事終不虛也。以拄杖○三十年後。切忘妄通消息。靠拄杖下座。冬十一月。大覺寺祖雍師子院院主明初來省祖。竟以後事付囑。十二月一日。黎明辭衆曰。西峯三十年安談般若。罪犯彌天。末後有一句子。敢累及平人。自領去也。大眾還有知落處者麼。良久云。毫釐有差。天地懸隔。復說偈曰。來不入死關。去

不出死關。鐵蛇鑽入海。撞倒須彌山。泊然而寂。啓龜七日。端然如生。塔全身於死關。祖爲人至慈。勤懇誨人。善語和易。或繼以泣。及至室中行。祖令輟策。龍象盡情勘駁。絲粟無貸。嘗戒學者。今人負一知半解。不能了徹。參徒一詰。茫然莫辨。邪正句來。句去。如手搏兒。蓋得處幽莽。故也。直須大徹。親見親證。明得差別智。方解勘辨。殺活其機。用險峻不可湊泊。如此尤矜細行。崇戒律。雖創兩利目。未嘗親信士。全從進得所。剪髮朝夕。供禮舍利。累累如貫珠。天下議與不議。皆讚歎曰。高峰古佛。安隱忍曰。金剛王劍。佛祖不留。至虎邱應菴。十有二傳。如器注器。當時有與臨濟先後出世者。如石霜多枯木衆。以勝妙境界作究竟。至首座化去。不會宗旨。微九峯孰能反正之。厥後流爲默照邪禪。而眞淨五祖妙喜諸老宿。痛斥其非。追勝朝此病熾作。雖沼量大漢。不免從狐鼠蹊徑中來。賴是二老生鐵鑄成。終得正悟。雖悟後痛訴昔時之謬。往路之非。而學者就著恬寂。卒不能捨甚哉。邪法入

六字原本  
不明

人之深也。緣是國初至今多坐不語禪。南北甚行。牢不可破。天童三峯相並而出。十餘年中。撲盡黑。暗魔軍窠。白然而狂打。潑罵。記名泥跡之弊。不旋踵而生。末世說法其難如此。要當扇以淳風。感以至誠。驗以宗旨。擇以人類。復還馬祖百丈臨濟興化以來之元氣。根本全機。大用非徒囂囂然口舌爭也。若夫雪巖父子。拈提濟上綱領。下刀發藥。去古人實有間。設使施之今日。獨不可以稱良劑乎。故曰道歲也。聖人時也。

祥符陰日弘教集載元世祖實錄百餘篇。字字句句以宏法爲己任。蓋菩薩住初地作大功德主。以法化衆生者也。其時緣綿丹詔。絡繹雲林金刹香幢輝煌道路。而祖一關壁立於千仞雲霄之上。眞風徧界。攀仰無從此。所以能支渾沱欲倒之瀾。續少林面壁之旨。迄今三百年來。衰靡之極。猶有一線眞機存而未艾者。不可謂非祖持之之力也。

宗統編年卷之二十七

臨濟第十九世祖

諱明本嗣高峯

成宗丙申元貞五年

臨濟第十九世中峯祖嗣宗統二十年

學者輻湊歸之如水就下而祖深自韜晦一時宰相公卿上及天子每虛徑山靈隱諸大利齋幣迎祖卒不可致示衆曰今之參禪不靈驗者第一無古人真實志氣第二不把生死無常當做一件大事第三排捨積劫以來積習不下又不具久遠不退轉身心畢竟病在於何其實不識生死根本故也夫根本者性真圓明本無生滅去來之相良由不覺瞥起妄心迷失本源虛受輪轉以故迷之則生死始悟之則輪迴息當知山河大地明暗色空五陰四大動不動法皆是生死根本若不曾向真實法中脫然超悟更於悟外別立生涯不存窠臼豈堪向生死岸畔割脚或纖毫不盡未免復爲勝

具疑其

八疑入

妙境緣惑在那邊起諸異想雖曰曉了其實未然惟痛以生死大事爲己重任者死盡偷心方堪湊泊直下儻存毫髮許善惡取捨愛憎斷續之見則枝葉生矣可不慎乎

禪師晦機元熙出世百丈

熙豫章唐氏世業儒兄元齡登進士第熙年十九志不可奪從西山明祝髮將遊方其母憐之具白金爲裝熙謂財足喪志善辭謝母不持一錢以行至吳名宿皆欲出已座下不顧也聞物初觀闡化玉几往謁之觀與語大驚異之朝夕諮叩盡發其秘遂嗣法至元中有旨取育王舍利塔進人供養使者詣熙求記述舍利始末因招與俱熙辭曰我有老母兵後存亡不可知遂歸江西則元齡先以臨江通判從文丞相起兵死獨母在堂熙奉之以孝聞隱居里之霽山元貞二年出世應百丈之請居十二載而法席振興

丁酉大德元年

戊戌二年

己亥三年

祖居吳閭樓雲菴

祖晦迹三吳廬阜是冬憩吳閭西麓見松檜蔚然成林問名於居人則曰此鴈蕩也祖喜曰永嘉有鴈蕩山乃應真諸矩羅示見之所名與之同其般若之當與耶遂縛草菴三間以居扁曰樓雲問道者聯翩而至

庚子四年

祖結草菴平江名曰幻住

祖曰大覺世尊棄王位臥深雪夜觀明星與無邊有情同時涉入如幻三昧嗟乎衆生追今沉酣情妄而不自知我曹出家雖依此如幻三昧而住亦有未悟者於是所至結菴一名幻住

雲南玄鑑來參

鑑素聞教觀每曰吾聞大唐有禪宗使審是耶吾將從其學未嘗將易其宗旨俾趨教觀繇是與其徒來謁祖言下忽大悟後方圖歸倡道而歿於中吳鑑之徒畫祖像歸四衆迎像入城吳光從像燭天萬目仰觀翹勤傾信自是興立禪宗奉祖爲第

一祖

禪師行端出世湖州資福旋主天竺

端嗣藏叟珍住資福學徒奔湊名聞京國特旨賜慧文正辯禪師中書平章事張閭公任行宣政使首學端主中天竺開堂之日公率僚屬親臨座下

辛丑五年

壬寅六年

元長禮祖求示法要

長字無明一號千巖蕭山董氏子七歲諸書經目輒成誦出入蹈矩循矚有若成人其父喜曰是子當以文行亢吾宗乎年十七從諸父疊芳遊涉獵九流百氏之言已而曰此非出世法也薙髮受具走武林習律會行丞相府飯僧長隨衆入時祖亦在座遙見謂曰汝日用何如曰惟念佛耳曰佛今何在長方擬對祖厲聲叱之長遂胡跪作禮求示法要祖授以狗子無佛性話

相宗法師五臺山祐國寺眞覺文才寂

才少孤盡孝慧悟生知於書無不精究尤邃理學

善吟詠。平居敦樸。若無所知。或對客討論。如河漢莫窺其涯。溪徧遊。講席得賢。首之學。嘗曰。學貴宗通。言必會意。以意逆志。則得之矣。語言文字。糟粕耳。豈能開人之慧目乎。初隱成紀。築室樹松。號松堂。將終焉。世祖降旨。主洛陽白馬寺。成宗建祐國寺。詔爲開山第一世。鑄金印。署眞覺國師。帝師親貴。旨起之。辭不受。不得已而行。大弘清涼之道。至老無怠。九月朔。說法辭衆。端坐而寂。闍維舍利數百粒。塔於東臺之麓。

癸卯七年

時蔚生是爲萬峰

八月二十九日生於樂清金氏

甲辰八年

乙巳九年

悅堂闍遷靈隱

丙午十年

丁未十一年

武宗

武宗戊申至大元年

百丈熙遷淨慈

入寺之日。行中書省行宣政院官屬。俯伏迎請。發揚宗旨。四方英衲。一時輻湊。

己酉二年

庚戌三年

辛亥四年

革罷僧道衙門

祥符蔭曰。沙門封官爵。自秦魏始。梁唐繼之。宋世不廢。然但加銜食祿。未錫印信。設衙門也。至元世祖設立宣政院。僧錄綱正。錫以印信。行移各路。主掌教門。雖屬崇敬護持之意。然而冒蓋之流。奔競倥偬。汗羞不避。忘出世之謂。何復膠盆之刺。腦是何異。織女七襄。牽牛負輓者乎。武宗罷僧道衙門。可謂知其所貴。得崇護法門之大體也。

仁宗

仁宗壬子皇慶元年

天竺端遷靈隱

禪師淨慈下溫州江心一山了萬寂

萬幼業儒有聲出世。謁偃溪。聞荆叟。珣簡翁。敬皆

機契東叟。顯領南屏。延掌記嗣其法。開法天台。寒巖遷紫箬。疎山江淮。總統會諸山於靈隱。以廬山開先迎居之。升江心。少不滿意。輒棄去。徒衆追留之。不可。十一月更衣坐逝。舍利五色如菽。日晴頂齒不壞。時新豫章烏遮塔行省令以銀匣貯之。同佛舍利置塔中。

癸丑二年

元長徹悟祖付以法印

長自祖開示後。縛茅靈隱山中。隨順世緣。殆將十載。一旦忽喟然曰。生平氣志充塞乾坤。乃今作甕裏醢雞耶。踟躕危坐。脇不沾席者三年。因往望亭聞鵲聲。有省。亟見祖。具陳悟因。祖復斥之。長憤然來歸。夜將寢。忽鼠翻食貓之器。墮地有聲。恍然開悟。覺身躍起數丈。如蟬蛻汗濁之中。浮游玄間。上天下地。一時清朗。披衣待旦。復往質於祖。祖問曰。趙州何故云。無曰。鼠食貓飯。曰。未也。曰。飯器破矣。曰。破後云何。曰。築碎方甕。祖乃微笑。囑曰。汝宜善自護持。棲遯巖穴。時節若至。其理自彰。長遂隱居。

天龍之東菴

祖與大覺長老泰定書

衆請祖住大覺。祖力辭。舉參定應命。定嘗印證於一山。萬後復參祖。乃拈香欲嗣祖。祖以書却之曰。古人於法嗣嫡傳。所以深明宗系者。大法源委。不可誣也。世漓俗薄。奉金請拂。以院易嗣者。有之。某嘗痛心於此。夫大覺雖先師開山。然十方叢林。儘有尊宿。捨彼不取。而必欲某尸之。何識量之不廣也。某非畏住持。實畏嗣席於開山也。故退避力辭。而舉足下。以足下自師一山禪師。豈可徇世俗而易其所師哉。或欲徇俗易嗣。則某斷然不敢與足下一日相聚也。

甲寅延祐元年

詔祖不起。賜金襴袈裟。號佛慈圓照廣慧禪師。淨慈照遷徑山。未幾返仰山。

法師別峯大同出世。蕭山淨土寺。

同字一雲。號別峯。上虞王氏子。生時父見龐眉僧振錫而行。問僧來自何所。曰。崑崙山。竟排闥而入。

父急追之寂然無有。暨聞兒啼聲笑曰：兒豈向來浮屠也得度受具會春谷遇講經景德同往依之。遇陞寶林召問謂曰：子學精且博矣。恐滯於心胸以成癡執曷從事思惟修以剗滌之乎。同卽出錢塘參元熙舊所記憶者一切棄絕。惟存孤明耿耿。自照如是者閱六暑寒。俄參祖同將久留。祖曰：賢首之宗曰遠而曰微矣。子之器量足以張大之。毋久淹乎此也。爲贊清涼像而遣之。出世蕭山淨土禪師薦嚴竺元妙道詔住黃巖鴻福。

道嗣育王珙住慈源遷崑山薦嚴詔主鴻福。賜號定慧圓明淨慈靈隱兩刹交請俱不就。晚終紫箬法師秦州景福寺英辯寂。

辯傳法於栢林潭住秦州景福。摧伏異見樹正法幢。道行眞純如玉。含璞不加雕繪。人愛重之。雖悍卒武夫亦能敬其爲無佛世之佛也。世祖聞風降旨旌異。六月無疾而寂。

祖示居士趙孟頫心要

頫字子昂號松雪。宋宗室。年十二卽好寫金剛經。

與僧語親若眷屬。每受祖書必焚香望拜提舉江浙儒學時叩祖心要。祖爲說防情復性之旨。後入翰林遣問般若大意。祖有淨土偈一百八首頫作一百八贊手書之。

祖復居士馮子振問道書

振號海粟訪道祖。祖復書曰：今古利達之士靡不知三界是大夢宅。苟不曾一回親切警悟。則與此所知之心俱落夢寐。故曰所知障也。惟閣下於吾道信根未嘗不深。獨未見其於信處能脫略所知。否世間浮光幻影能幾何時。向者鄙偈中有披衣終日坐茅堂之句。曾蒙閣下許踐之。今日所謂貧人索舊債也。祖宗風廣播有識知歸儒門理學一經指示皆融通。同異洞徹淵源。時參祖者有胡長孺字汲仲。天台人。特立獨行。留心內典。著大同論曰：孟子沒一千四百年而周子出。周子之傳出於此。固壽涯禪師程子朱子皆得之。周子朱子後得張欽夫講究此道。方覺脫然元來此事與禪學十分相似。學不知禪。禪不知學。互相排擊。都不曾割。

善病處真可笑也。漚漚數十言。深明宗要。復有居士孟珙字璞玉號無菴。歸安人。留心宗門。力學不倦。參祖於言下。得大透徹。理宗朝爲制置卒諡忠襄。好周易而尤深於禪機。進則料敵設奇。輪刀上陣。退則掃地焚香。隱几危坐。遠貨色。絕滋味。自贊云。老拙愛遊戲。忙裏放癡愁。正當恁麼時。無處見無菴。臨終偈曰。有生必有滅。無菴無可說。踢倒玉豈。晝夜半紅日出。

乙卯二年五月秦州成紀縣山移

時蔚出家

蔚年十三從演慶昇法師受業。便知向上宗乘。

禪師徑山下湖洲何山鐵鏡至明寂

明嗣徑山偃溪。聞住何山十一月寂。

丙辰三年

勅建旃檀瑞像殿。詔翰林承旨程鉅夫撰文。發明。

瑞像承如來記。廣利震旦。歷代尊崇。以彰聖化。故書。

丁巳四年

勅加法師東林慧遠妙覺寂光宏辯大師。發明。

遠道德純備。累朝未崇師號。今勒特加宜也。

法師京都崇恩德謙寂

謙甯州楊氏幼學佛出世長遊秦洛。諮訪逾河而北。受殷若於邠州甯受圓覺於乾陵。一後受唯識於陝州。頤至京師。受華嚴圓旨於萬安。揀詔居萬甯。又詔居崇恩。前後一紀。道德簡於宸衷。流聲溢於衆口。未嘗以寵遇顯榮。改其素嘗。語人曰。畦衣之士。抗塵世表。苟不愧於朝聞夕死。可矣。尙何慕於外哉。退居幽隱。正月二十八日寂。皇太后賜錢五千緡。購葬有司。備儀衛茶毗。護舍利建塔。戊午五年。

禪師印原自日本來參

原字古先。日本國之藤氏子。藤爲日本貴族。原出世南詢初謁。無見觀於天台。觀指令來天目。參祖充給侍。發憤力究久之。領解祖囑曰。善自護持。己未六年。

藩王奉旨謁祖請法

九月六日駙馬太尉藩王王璋奉聖旨御香入山。

謁祖於幻住菴翼日請就師子正宗禪寺陞座

法師鳳山儀應潘王齋成禮而還

鳳山儀住下天竺延祐初賜三藏鴻臚卿號不受教門少有齟齬必整理之潘王就明慶寺設齋齋諸山住持省官以下躬董其事以潘王居中位講堂法座上衆官以次班法座下諸山列兩廡既坐而儀後至竟趨座上問王曰今日齋會何爲王曰齋諸山儀曰既齋諸山王爲主人而自處尊位諸山列兩廡至有席地而坐者與遷齋何異於禮恐不然潘王惶愧請謝卽下座前揖諸山分賓主而衆官退就兩廡齋畢王握儀手曰非吾師幾不成禮

禪師育王下大瀉佛智元熙寂

法師京都寶集寺妙文寂

文蔚州孫氏子遊學雲朔燕趙抵京師依大德明習圓頓教陸沉於衆十有一年衆請出世始陞座縱無礙辯若峽倒川奔及乎閑居簡默言不妄發遷薨之雲泉勤儉睦衆廩有餘粟以賑饑民懷其

德世祖召見顧謂羣臣曰此福德僧也詔居寶集斯時講席紛錮名相礙滯殊途文振以圓宗融通定慧晚修念佛三昧預知時至手結寶印稱佛名面西而逝

庚申七年

曹洞第二十二世寶印祖示寂

曹洞第二十三世祖

諱文才字溫拙氏里生年闕嗣寶印住香嚴

英宗

英宗辛酉至治元年

曹洞第二十三世香嚴祖嗣宗統<sub>三十</sub>年

祖住香嚴上堂曰滿盤打算了只有這一著最占便宜敢問諸人且道是那<sub>一</sub>著卓拄杖云切忌卜度僧問如何是道祖云針錐不容僧云如何是禪祖云車馬有路僧云和尚爲甚麼翻古人公案祖云舉直措諸枉

相宗法師五臺山普甯弘教了性寂

性號大林嗣眞覺才成宗徵居萬壽聲價隆起至

大間太后創寺臺山曰普甯。延爲第一代。性剛毅。不能倜儻於人。不入城隍。不謁權貴。嘗曰。苾芻弘法是務。餘復何求。時尊寵西僧名德諸師。多爲致禮。搢衣丐其摩頂。謂之攝受。性長揖而已。識者高之。九月三日寂。諡曰弘教。

壬戌二年 平江路南康建昌大水山崩

元叟端補徑山

先有道士伏章久不得報云。開天門還徑山四十八代住持。端適當其數。

端時退隱梁渚西菴。徑山虛席三宗四衆相率白於宣政院。以爲非端不可。至是凡三被金襴。至則足不越閭者幾二十年。慕其道者鱗萃。至無所容。相宗法師金陵天禧至德寂。

德號雲巖東昌鑑氏子。法照禧宏慈恩之教於龍興寺。從之盡得其蘊。世祖召見。賜紫命主天禧錫號。佛光居天禧三十年。一禱一履終身不易。過午不食。危坐達旦。歲儉糲食。舛餓者數萬。出衣鉢盡新殿廡。以律繩衆。有犯必罰。因苦誦喪明忽夢梵僧迎居內院高座。空中散華如雨。頃之安坐而逝。火浴舍利無算。趙孟頫銘其塔。

法師玉山普安寺寶嚴寂

嚴號幻堂。與大林性俱。嗣眞受才繼才之席。詔住普安。方寸湛如止水。瀟灑無僞表裏。大林共宏清涼之教。七月寂。

癸亥三年

臨濟第十九世中峯佛慈圓照廣慧祖示寂

祖居無定所。或船或菴。咸名幻住。有幻住家訓。僧俗爭相瞻禮。稱江南古佛。八月十五日說偈辭衆曰。我有一句。分付大衆。更問如何。無本可據。置筆安坐而逝。塔於天目中峯之西岡。

安隱忍曰。幻住老人。福寵三朝。道尊一世。兼殊方異域之俗。總戴髮含齒之民。見之則頭頂禮。敬聞之則神意崩悅。無老少無貴賤。自王公大臣以及奴隸工作孩童孺子。皆以江南古佛稱之。似宜衣被六銖食羅千品矣。師乃冬綿夏禪。未嘗求適非果位大士。乘願再世。以勵末世。其能如此哉。世傳師膚肉細極。不能衣布。雖下體槩以綾絹。余初謂或然。及考師行狀碑銘。而精苦尅勵出於天性。師

體既豐。嘗隆暑病渴。膚腠汗腐。有遺細葛褻衣者。師受而不著。則下體綖絹之言可知矣。今吳山雲居菴有師遺履補綴宛然。亦足爲證。余特表而出之。非敢以激近世之習。但欲朝誦暮詠。策所未逮耳。

### 臨濟第二十世祖

諱元長。嗣中峯

泰定帝

泰定帝甲子泰定元年

臨濟第二十世聖壽祖嗣宗統三十年

祖入伏龍山聖壽道場成

發明

祖志圖樣。通無心。營建而道緣乎感。

荒判重興成大伽藍。故書法如此。

祖受囑隱天龍之東菴。諸山宰護爭相勸請。祖逸至烏傷之伏龍山。卓錫巖際。誓曰。山有水。吾將止焉。俄山泉溢出。作白乳色。祖遂依大樹以居。初山有禪寺曰聖壽。荒廢已久。當祖入山。鄉民咸獲異夢。遂相率披蒙茸以訪見。祖晏坐不動。各獻飲食。共營起律。尋因舊號成大伽藍。朝廷三遣重臣降

香錫號佛慧圓鑒普濟大禪師。并錫金襴法衣上堂。僧問。如何是第一句。祖曰。有口如瘡。曰。如何是第二句。祖曰。有眼如盲。曰。如何是第三句。祖曰。棒折也未。放你在。乃擲下拂子。曰。此是老僧第二句。如何是第一句。便下座。

乙丑二年

丙寅三年

丁卯四年

祖示警世偈

祖居聖壽內而齊魯燕趙秦隴閩蜀外而日本三韓八番羅甸交趾琉球莫不奔走膜拜。咨決心要。祖警以偈曰。百年只是暫時間。莫把光陰當等閒。努力修行成佛易。今生蹉過出頭難。無常忽到教誰替。有債元來用自還。若要經閻老案直須參透。祖師關。

禪師天倫住廣德東泉

倫參晦機。熙於淨慈。居侍司。復掌藏。鑰歎曰。世降道衰。人根浮薄。宿師碩德。具大知見。猶不爲學者信服。無他。蓋表裏不純也。乃縛茅吳興之桃花塢。

一日灌園忽雲。驟雷疾風。拔木胸中。疑礙頓釋。出世東泉。遷明之佛。嚴笑隱。訢住龍翔。招居第一座。後住金陵保甯。

戊辰致和元九月  
改天歷元年

禪師大訢住金陵龍翔自如補中竺

訢字笑隱。參晦機。熙於百丈。淨慈俱掌記。出世湖之島。回遷杭之報國。中竺。文宗以金陵潛邸。爲大龍翔集慶寺。簡名德開山。訢首膺其選。號曰廣智。全悟大禪師。如字一溪。訢舉補住中竺。

文宗

文宗己巳二年

敕謚中峯祖曰智覺塔曰法雲。詔奎章學士虞集撰銘。

庚午至順元年

正月朝廷命趙世延世安纂修經世大典。加封孔子父齊國公叔梁

紇爲啓聖王母魯國太夫人。顯氏爲啓聖王夫人。顯子亮國復聖公。魯子鄭國宗聖公子。思沂國述聖公。孟子鄭國亞聖公。河南伯程頤。豫國公伊陽伯程頤。洛國公。

禪師嘉興大中祥符寺梅屋念常集佛祖歷代通載成

常華亭黃氏子。年十二出家。十四薙髮。受具。佛智熙自江西百丈遷杭之淨慈。常往參承熙。上堂舉太原孚上座。聞角聲悟道。因緣頌曰。琴生入滄海。太史遊名山。從此揚州城外路。令嚴不許蚤開關。常於言卜豁。然有省。投丈室。呈所解。熙領之。傳掌記室。迨熙遷徑山。常職後版。表率一衆。後奉旨選召出世。祥符集佛祖通載凡二十二卷。

祖復居士宋濂書

濂字景濂。號無相居士。金華人生時。母夢異僧。手寫華嚴經來。謂母曰。吾乃永明延壽願假一室。以終此卷。覺已濂卽生。因名曰壽。後更名濂。六歲日記二千餘言。九歲能詩。入青蘿。盡閱鄭氏所著書數萬卷。聞祖吐辭如奔雷。欲屈之。特往謁。相與詰難數千言。不契而退。復上祖書。祖答曰。前日承一宿山中。今日有書來報。無明讀一過。不覺失笑。笑個甚麼。笑景濂坐井觀天。又如貧兒拾得錫。說與人要做銀子賣。只是自不識貨。教別人不識貨。則不可何。以故景濂每嘗在塵勞聲色境界中。觀得

爛骨地熟了。思量計較文字語言。弄聰明業識多。  
了。乍聞吾輩說一個放下。可以做寂靜工夫。透脫  
生死。暫起一念厭離心。退步靜坐。乃見無思量。無  
語言處。便錯認作法身。喻如玲瓏八面窗。喻如須  
彌山。言說不得。這個只是暫時歧路。如何便罵得  
佛贊得。祖贊得。無明耶。贊罵憎愛心不除。但增長  
我見。我見未忘。目前只見別人過失。不知自家過  
失。要成辦透脫生死大事。難矣。景濂果欲辦這件  
事。只向無思量無言語處。仔細推窮。不用說向人。  
壽忽命根斷。偷心絕絕後。更甦欺君不得。却來求  
印。可亦不遲。

辛未二年

禪師清珙出住當湖福源

珙常熟溫氏子。首謁高峯祖。服勤三年。後參道場。  
信中途舉首見風亭。豁然請住當湖福源。堅臥不  
起。往返至再。勉就入院。後隱居霞浦山。清苦自持。  
不事干謁。苟絕食飲水而已。作為詩偈多警發語。  
誦之者心爽神慕。以為有古德遺風。高麗國師大

古愚嘗侍珙得旨。王聞欽仰。表達朝廷。刺證佛慈。  
慧照禪師仍請舍利歸國供養。

壬申三年

五月白虹並日出。長亘天。八月天鼓  
鳴于東北。

禪師紹大出世烏龍

大嚴州吳氏子。參虛谷陵於徑山。佩服心印。遍遊  
江湖。出住郡之烏龍。遷雲黃寶林。法席稱一時之  
盛。後坐化舍利如紺珠。

順帝

順帝癸酉元統元年

重修百丈清規

百丈德輝龍翔大訢奉勅重修

圓通訥曰。昔百丈大智禪師。建叢林立規矩。欲救  
像季不正之弊。曾不知像季學者。盜規矩以破百  
丈之叢林。上古之世。雖巢居穴處。人人自律。大智  
之後。雖高堂廣廈。人人自廢。故曰安危德也。興亡  
數也。苟德可將。何必叢林。苟數可憑。曷用規矩。  
祥符陰曰。圓通之言。為叢林行清規者言之也。曾  
不知修清規而主之行者。曲徇世典。大意不申。道

隨時替烏乎難哉

甲戌二年

正月汴梁雨血

三月彰德路雨毛如

禪師高峯支下天目正覺了義寂

義住師子正宗禪寺元統元年歲除日謂侍者曰。有一件事天來大你還委悉麼。良久曰。明日是年朝正月六日詣法雲塔西指空地曰。更好立箇無縫塔。其夕與禪者談笑如平時。至夜分乃曰。老僧明日天台去也。禪者曰。某甲隨師去。義曰。你走馬也趁我不及。翼旦跌坐而化。化之日雷碎雨射白晝晦暝。及葬雪華繽紛。林木縞素。送葬者數千人。悲動山谷。初中峯祖示寂會葬。齋次義謂衆曰。後十二年更爲老僧一會衆未深信。至是始驗。勅證佛慧圓明正覺普度禪師。

禪師時蔚來參居第一座

蔚參止巖於虎跑巖。示以南泉三不是語。因入明州達蓬山佛趾寺。側卓菴。晝夜力參。一日聞寺主舉瀉山。踢倒淨瓶。公案轟地觸發。說偈曰。顛顛倒倒老南泉。累我工夫却半年。當下若還親薦得如。

何不進劈胸拳。聞祖直造丈室。祖曰。將甚麼來與老僧相見。蔚豎起拳曰。者裏與和尚相見。祖曰。死了燒了。向何處安身立命。蔚曰。漚生漚滅。水還在。風息波平。月印潭祖曰。莫要請益受戒麼。蔚掩耳而出。明日普請砍松次。蔚拈圓石作獻珠狀曰。請和尚酬價。祖曰。不值半文。錢蔚曰。瞎祖曰。我也瞎。你也瞎。蔚曰。瞎瞎。卽呈偈曰。龍宮女子將珠獻。價值三千與大千。却被旁觀人決破。誰知不值半文。錢祖謂左右曰。蔚山主頗有禪僧氣息。遂命居第一座。尋卓菴於蘭溪之嵩山。

禪師瑞嚴下華頂真覺無見先親寂

觀仙居葉氏子。參方山寶於瑞嚴。盡得其法。要結茅華頂。學者雲集。道俗以爲無田不可蓄衆。往往持田券來施。皆却之。冬夏一粥。食惟充饑。遷化火浴。忽胸中清水逆出。如注。得舍利大如菽。光耀人目。勅號真覺塔曰寂光。

乙亥至元元年

禪師梵琦自海鹽天甯遷杭州報國

琦字楚石嗣元叟端出世海鹽福臻遷天甯復主  
杭州報國

丙子二年

正月宿松縣地震山裂南陽鄧州五月  
至八月霖雨澍河白河水災秦州山崩  
浙江自春至八月不雨民大饑

禪師高峯支下處州白雲空中 假寂

假嗣高峯祖棲白雲山四方禪衲聞風來赴履滿  
戶外夏一日援筆書偈曰地水火風先佛記掘地  
深埋第一義既免檀那數片柴又省人言無舍利  
書畢坐化

丁丑三年

六月京師大霖 八月京師地震

戊寅四年

四月京師雨紅沙晝晦 六月信州山  
震邵武路大水 十二月太白屢經天

禪師法林住靈隱

林字竹泉參元叟端於中竺掌藏鑰居淨慈蒙堂  
不出戶者九年丞相脫歡請住浙之萬壽遷中竺  
復遷靈隱宗風大振帝錫金襴法衣時元叟在徑  
山同時唱道五山傳爲盛事

己卯五年

六月汀州大水 七月常州宜興山水  
溢高一丈自七月至九月太白屢經天

禪師曇噩開山瑞龍

噩嗣徑山端初出世慶元保聖遷國清己卯瑞龍  
更禪刹請噩開山每戒諸徒曰研究空宗當外形  
骸忘寢食以消累劫宿習然後心地明明耳自是  
日唯一食終夜凝坐有重修歷代高僧傳行世  
庚辰六年

辛巳至正元年

禪師藏叟下徑山慧文正辯元叟行端寂

壬午二年

四月冀寧地震裂聲如雷惠州羅浮山  
崩

禪師惟則住吳閭菩提正宗寺

中峯本祖寂後諸名山屢請惟則主席則堅却不  
赴隱居華亭城北距城二里許至元辛巳客吳門  
幻住至正壬午門人相與築室於姑蘇城中師子  
林號菩提正宗寺奉則居焉

禪師了堂一住台州紫籙

一薦福道嗣住紫籙次遷天童上堂曰長嘴鳥芳  
樹不棲摩斯迦滄溟不入龍泉與鋤斧同鐵利鈍  
懸殊良驥與駑駘同途遲速有異以拂子畫一畫  
曰花須連夜發莫待曉風吹

禪師智及住昌國隆教

及字以中吳縣人俗姓顧初生時靈夢發祥祝髮受具往聽賢首法界觀末終章堯爾而笑曰一眞法界圓同太虛但涉言辭卽成臆法纔獲天雨寶華於我奚益哉遂走建業見大訢訢以文章道德傾動一世見及文彩彰露交相延譽有同袍訢曰子才俊爽若此不思負荷正法甘作詩騷奴僕乎無盡燈偈所謂黃葉飄飄者不知作何見解及舌際不能答卽歸海雲胸中如礙巨石目不交睫者踰月忽見秋葉吹墜於庭豁然有省於是登雙徑謁元叟端自列其所證甚悉端勸辯之及隨機參會不問一髮未幾命侍左右俄遷藏室及取教典益溫釋之宗通說貫若決江河出世昌國隆教

禪師輔良住嘉興聖壽

良字用貞號介菴范文正公十世孫誕鍾粹氣聰悟夙發見佛書輒躍然朗誦若所素習有相士謂父母曰是兒清淨恐非世間法可縛若使學佛必能弘大宗乘里多阿蘭若良曰與羣童遨遊其間

徘徊愛慕終日不忍去父察其志與相者言合乃曰昔范蜀公好與名僧交嘗勉圓悟勤參卽道要卒爲天下禪宗吾能惜爾而不使遂其志乎遂俾雍落受具卽慨然曰學佛將以明心心非師無以示肯綮終日牆面可乎去習天台教白雲杓誨之曰教乘固當學若沉溺不返如入海算沙徒自困耳何不更衣以事禪乎笑隱訢公見主龍翔其道大被東南盡往依焉良卽往參訢問答之際捧喝交馳一剎那間凡情頓喪久之遂契心法出世嘉興聖壽

禪師松隱茂住明州瑞雲

茂字實菴奉化鄭氏子幼嘗中夜跌坐母惡之推其使仆輒達旦不眠年十六剃染受具主僧使司米鹽細務茂歎曰離家爲求道耳有羈縻於此何異狗苟蠅營者耶乃潛行至江西見南澗泉泉命入室一夕聞巖泉泠泠微有覺觸遽往白泉泉曰此間不足發子大機大用古林茂乃橫川嫡嗣子當往依之茂卽趨謁古林林曰爾來欲何爲茂曰

生死事大。特來求出離耳。林曰。子明知四大五蘊。是生死本。何緣入此草囊耶。茂擬對林以杖擊之。茂遂悟。自是機辯峻絕。出世明州瑞雲。

癸未三年

祖招嵩山蔚復分座

蔚居嵩山。凡九載。雲水頌德。祖三爲手書殷重招之。復居第一座。尋返嵩山。

禪師徑山下雪竇石室祖瑛寂

瑛嗣徑山熙住。雪竇天童。晚得痿痺疾。造一龕。曰木襪。日坐其中。不涉世事。是年三月。見一衰衣婦人叩頭請瑛。應身爲國王。瑛曰。我不願生天王家。逾十七日。跌坐而化。臨終偈曰。五十三年弄巧成。拙踏破虛空赤脚行。萬象森羅笑不輟。

甲申四年 明太祖是年托身皇覺寺

禪師徑山下金陵龍翔廣智大訢寂

訢嗣徑山熙住。龍翔驛召赴闕。見上奎章閣。賜坐。諮問法要。及順帝御極。待遇益隆。後以老病求退。優詔不許。勅外臺護視。使安居。終老。五月示微疾。

作手書別交遊。囑其徒以兩朝所賜金幣作萬佛閣上報國恩。二十二日書偈。跌坐而寂。黃文憲潛撰塔銘。虞文靖集著行道紀。有四會語錄。蒲室集行世。

乙酉五年

丙戌六年

丁亥七年

禪師天甯下妙果竺源水盛寂

盛謁無能。教於無爲州之天甯。盡脫玄妙。知解隱居南巢。遷杭之西湖。妙果。槌拂之下。懸崖壁立。務期實證。實悟。示衆曰。凡學道人。當洞明諸佛心。宗行解相應。歲久月深。具大無畏。如透水月。華萬浪千波。觸之不散。方始不被生死陰魔所惑。

祖復答居士宋濂書

濂每致書論道。祖復答書曰。士林中來者。無不盛談左右。乃問氣所生。文章學問。絕出爲浙東羣儒之冠。且猶深於內典。欣羨無已。承敘自幼讀佛書。領其要旨。出入有無。空假中中。至於中且。不有有無。何在。三復斯言。此今之士大夫。執有執無。離邊離

中分彼此儒釋之異如左右儒釋一貫者能有幾  
人人言爲不虛矣張無盡云余因學佛然後知儒  
古德云居無爲界中而不斷滅有爲之法居有爲  
界中而不分別無爲之相暗合道妙不易不易審  
如是則有爲底便是無爲底左右已百了千常何  
處更有身心之慮未祛事物之來未息又何處更  
有真實工夫可做而後出離有爲了生死大事耶  
左右與山野交二十年會或劇談別或寄語未有  
如此書之至誠也人天之際唯誠朋友之道亦誠  
而已只如左右未動念未操觚拂紙未陳一言及  
寫在紙上了是有爲是無爲是生是死是生死法  
是出生死法這些子直是諸訛故孔子謂子路曰  
未知生焉知死孔子底說話莫道子路不知落處  
盡大地人都不知落處豈不見黃山谷訪死心死  
心云聞公會禪諸方皆印可是否答云不敢死心  
云我有一問問公公試答看彼此燒作一堆灰在  
甚處相見山谷茫然後參晦堂示吾無隱乎爾一  
言聞桂花香打破漆桶鼻孔撩天大丈夫欲成辦

箇事自有箇般時節山谷雖是一塊精金須入死  
心晦堂作家爐鞴緊辣鉗鎚始得這一隊漢若到  
無明門下更須一一勘過何也不是弄潮人休入  
洪波裏山野如是杜撰左右以爲如何  
報國梵琦錫號佛日普照慧辯禪師

戊子八年

己丑九年

嵩山蔚入吳

先是祖謂蔚曰汝緣在吳可往化導大振吾宗蔚  
遂入吳凡三築精藍方之鄧尉

庚寅十年

辛卯十一年

佛滅後二千三百年

曹洞第二十三世香嚴祖示寂

曹洞第二十四世祖

諱子嚴氏里失載嗣香嚴

壬辰十二年

曹洞第二十四世南陽萬安松庭祖嗣宗統三十  
年

祖韜光晦迹

祖躬耕南陽。嘗作力田偈云。晝拈塊石。驅山鳥。曉坐巢菴。逐野豚。腸斷秋風。頻擊柝。目窺夜月。更消魂。時比之鏡清風穴。

祖付首座嵩山蔚衣法

三月十四日。祖令源藏主寶法衣。頂相付首座時。蔚曰。老僧袈裟一頂。付與嵩山蔚長老。表叢林之道念。

癸巳十三年

甲午十四年

禪師高峯首座無象易寂

易字無象。將門之子。應襲父封爵。棄去出世。危坐禪定。屹如枯株。上天目謁高峯祖。機語契合。俾爲首座。至正初。至明州海會。端居一室。棧絕諸緣。年九十九。正月。禮佛告衆。趺坐泊然而逝。闍維舍利無算。

師子林。惟則錫號。佛心普濟。文慧大辯。禪師兼賜金襴法衣。

則不住山居。恒隨機開導。行省平章咸禧。領執弟子禮。屢起江浙諸名山。堅却不起。遁跡吳湘間。繼

素就吳中構地結屋。名師子林寂。後塔於水西源。

乙未十五年 六月明太祖起兵太平路

禪師徑山下靈隱竹泉法林寂

林嗣徑山端。二月二日。集衆叙平生行脚本末。且誡之曰。佛法下衰。無甚於今。宜各努力。索筆書偈。曰。七十二年。虛空釘橛。末後一句。不說不說。遂化。葬全身於松源塔西。其時塔前古桂。富春吐華。清香滿路。見者歎異。

丙申十六年

台宗法師杭州普福弘濟寂

濟字同舟。號天岸。餘姚姚氏子。從舜田滿出家。卅時。驟發絕倫。持律不違繩尺。依半山全習台教。悉通其旨。一日。定中觀四明尊者。付以犀角如意。自是談辯無滯。泰定元年。出世萬壽。明年。鹽官海岸。毀居。民朝夕惴惴。恐爲魚鱉之宅。丞相脫驩甚憂之。乃禱觀音大士於上天竺。令濟卽海岸建水陸。

八疑入

大會濟人慈心三昧取海沙誦大悲呪率衆遍撒其處凡足跡所及岸皆復固遷集慶萬壽有旨主杭之普福濟以年高八十堅臥不起門弟子強之受詔未幾退歸舊隱三月十日書偈而逝濟凡講法華一百十會天雨寶華者再三

丁酉十七年

禪師清欲住吳靈巖

欲字了菴嗣古林茂住靈巖上堂石門巖嶮鐵關牢學目分明百仞高四十年中重到此始終不隔一絲毫

臨濟第二十世聖壽圓鑑普濟祖示寂

六月十四日示微疾沐浴更衣集衆說偈曰平生饒舌今日敗闕一句轟天正法眼滅投筆而逝弟子用陶龕奉全身瘞於青松菴

安隱忍曰佛祖之道不言福德操行要非無福德操行者所能傳持但恐偏墜而入道不精耳自應菴華藏以後臨濟之道日就浸溺餘波末流無所不有欲求高峯之履踐中峰千巖之福智以振起

末運焉可多得哉臨濟正法眼藏至祖之世已若太羹玄酒備而不用久矣厥後天奇祖翁只以一誰字誨人至於廣通輩遂明目張膽數渾沌一法爲奇名異相法運之變否亦甚矣而天童之棒三峯之宗旨恰恰乎激揚於是豈徒然哉

宗統編年卷之二十七

宗統編年卷之二十八

臨濟第二十一世祖

諱時蔚嗣聖壽祖初住蘭溪嵩山後開法萬峯戊戌至正十八年

臨濟第二十一世萬峯聖恩祖嗣宗統二十四年  
祖開法萬峯

祖卓錫蘇州鄧尉山衲子奔集遂成叢林上堂舒兩手云大開方便門便從這裏入復握雙拳云閉却牢關說家裏話且道不開不閉一句又作麼生

道良久歛僧伽黎下座解制上堂曰一葉落天下  
秋一塵起大地收解開布袋口請僧得自緣脚頭  
脚底風雲起撒土揚沙觀入流逼塞虛空無影像  
啼鶯元在柳梢頭畢竟作麼生取用喝

禪師德然繼住聖壽

然嗣聖壽祖嘗參石屋琪書松隱二字授之因以  
爲號刺血書華嚴經足不踰閭者三載有天華滿  
庭之異感居民爲建寶坊泊祖遷化衆請繼席

禪師徑山下文敏宏覺古鼎祖銘寂

銘嗣元叟端貌寒寢因精修二十年忽化爲福德  
之相住徑山十二年錫號慧性文敏宏覺普濟禪  
師將遷寂遺書囑丞相外護復書偈曰生死純真  
太虛純滿七十九年搖藍繩斷擲筆而逝茶毗舌  
根數珠皆不壞舍利無算

禪師普仁應明詔住夔州智者寺

發明明朝詔宗  
師開法之

始故  
特書

仁智者義嗣明太祖是年親帥六師至婺州幸智  
者寺詔仁主之後遷淨慈

禪師古林下平江定慧大方火化

方嗣古林茂住平江定慧不檢細行跌宕自如謝  
院事寓靈巖老宿華公房與郡守周義卿善屢入  
山訪之方云某此月十四日卽此山火化矣其爲  
我證明周戲諾之乃措薪爲棚與衆僧訣說偈陞  
柴棚火發烈燄熾然於火聚中祝香云云度數珠  
學華云聊當遺念火燄到處多得設利周聞之驚  
歎不已

己亥十九年 十一月元大都冇杜鵬

庚子二十年 正月丙辰五色雲見

禪師崇裕出世太平光孝遷圓通

裕笑隱訢嗣三十載脇不沾席住太平日圻人填  
壁壁中隆然有物函挾之獲悉達多太子像乃佛  
牙所刻成裕召工傳以黃金金迸裂舍利從中湧  
出雕小香殿奉之尋遷九江圓通

辛丑二十一年 十一月黃河清凡七日

禪師天童下雪竇無印大證寂

證參洞宗雲外岫於天童典教藏機甚契嗣其法

至治間詔天下善書者金書藏經事竣賜織金屈  
昫南還丞相脫驢請住衡之南禪繼領光孝遷信  
之祥符移明之定水升雪竇九月寂閣維舍利明  
瑩牙齒數珠不壞

壬寅二十二年

癸卯二十三年 十月山東  
赤氣千里

甲辰二十四年

明太祖建國號  
曰吳稱吳元年

禪師慧曇住蔣山

曇天台楊氏子十六嗣笑隱訪明太祖定鼎南京  
曇謁上上一見歎曰眞福德僧也命主蔣山時大  
內新成詔曇引千二百衆披閱大藏曇陞座說法  
上親帥羣臣幸臨瞻聽曇法音洪暢妙契皇情山  
內帑帛以施遠邇學徒聞風奔赴堂筵至無所容  
凡祖庭規矩曇備行之觀者喑喑曰三代禮樂無  
以加焉

乙巳二十五年

禪師寶金賜衣號詔住海印

金字壁峯乾州永壽石氏六歲出家徧歷講席後  
精禪定嗣縉雲眞入五臺山秘魔巖建靈鷲菴僧

俗趨風常至萬指召入內廷值大雪夜有紅光自  
金室中直透霄漢上驚歎賜金襴伽黎明年禱雨  
輒應勅賜寂照圓明大禪師號詔住海印寺

丙午二十六年 二月黃河北徙

丁未二十七年 正月絳州天鼓鳴

禪師天童下天界孚中懷信寂

信嗣天童坦至正間住天童御史臺奉疏命主龍  
翔及明兵下金陵僧徒竄散信宴坐一室高皇帝  
親幸嘉之勅改龍翔爲大天界寺一日晨興沐浴  
更衣趺坐謂左右曰吾歸去矣遂瞑目侍僧遽之  
請說偈信瞋目叱之復哀請遂握筆書曰平生爲  
人列聖七十八年漏洩今朝撒手便行萬里晴空  
片雪書畢復瞑時帝統兵江陰夢信謁見問信來  
何爲對曰將西歸告別耳帝還聞信遷化與夢符  
異之詔出內府帛幣助喪且命卜藏龜之地於伏  
牛舉龜之日帝親致奠送出都門茶毗舍利如菽  
貯以寶瓶光發瓶外

戊申至正五十八年 是歲  
大明洪武元年 元亡

明姓朱

太祖高皇帝

諱 以壬辰起兵歷十有七年至戊申正月文武羣臣百司衆庶

合辭勸進尊爲皇帝以統一天下即位於南郊定有天下之號曰大明建元洪武

太祖己酉洪武二年

禪師梵琦曇璽等應詔主蔣山法會

發明 法會之建不書

興朝方新崇重法化諸山禪宿一時雲衆彬彬盛事翻載文明故書之

元年秋詔徵江南高僧十人建普度大會於蔣山

二年春復建法會海鹽天甯梵琦應詔至京名居

第一親承顧問再召說法賜伊蒲館於文樓瑞龍

曇璽既奏對上憫其老放還清泰子楸淨慈智順

定水來復曇隱元潯萬壽至仁徑山福報福林智

度等俱應詔至京上親臨勞問請法具饌同主蔣

山普度大法會天界善世宗泐奉勅撰獻佛樂章

進呈御署曰善世昭信延慈法喜禪悅徧應妙濟

善成凡八曲勅太常歌舞以節奏之

禪師天台雲峯祖燈寂嗣法未詳

燈住雲峯苦行自給影不出山者踰五十春秋人

多化之有以土田布施者辭曰先佛以乞食爲事

吾焉用此忽示微疾集衆說偈而逝火化異香襲人舍利不可勝計

禪師普明下宜興龍池弘教了悟永甯寂

甯字一源南通朱氏嗣普明無用寬寬囑曰汝緣

在南逢龍卽住遇池便居甯受命南還至治癸亥

宜興龍池疏請甯以名符懸記欣然赴之先是山

巔有池其深叵測龍出每大水居民苦之甯授龍

三飯戒遂不復出居久復至絕巘築室壁立如削

斷木爲棧棲板空中足不越限者三年帝師稔知

道行降號宏教普濟禪師尋召入京宣命龍光殿

陞座說法上大悅賜金襴法衣加號佛心了悟庚

子出領善權是年夏六月示微疾囑弟子裁紙製

内外衣且曰吾將逝矣命移龕至絕巘索筆書偈

日七十八年守拙明明一場敗闕泥牛海底翻身

六月炎天飛雪書畢吉祥而逝先一月池水忽竭

及甯順寂噴湧異常時黑白戀慕至有然頂灼臂

以供養者茶毗五色光燄齒牙舌輪珠皆不壞設

利無算門人分餘骨與不壞者就龍池太平齊山

紫雲麻蘇五所建塔藏焉

台宗法師杭州集慶寺士璋寂

璋字原環生。卽伏犀貫頂。雙眸炯如點漆。喜讀佛書。鄰寺僧請其父曰。此釋氏種也。盍乞師。我父怒曰。吾兒如芬陀花。非若倫也。遂令入傳法寺。薙染侍我菴。無於上竺。力學無怠。時有天心瑩者。高兀不服人。獨豔璋。相與切劘。時目雙璧。我菴無化去。東溟曰。補其席。璋復承陶治。至正十三年。住棲真。往來南竺。才演福繼二老之門。更臻玄微。嘗對衆曰。佛法教藏。渺如烟海。固非獨善所能究。盡使吾自畫而不進。其能免於孤陋之謂乎。元季兵亂。不以世難易其業。牧衆演法。無虛日。洪武初。詔江浙名宿。咸集天界。諸方雲集。莫知規繩。璋獨出方略。具有條叙。時十萬衆共聚。法制井然。是年六月。既望。預知時至。安然坐。蛻璋器度。瀟灑論議。慷慨操直道。而不徇流俗。所住之刹。誓不薙蓄一人。

相宗法師紹興寶林大同寂

同住蕭山淨土。遷景德及嘉禾東塔。改寶林寶林。

乃清涼國師肄業之地。同欲高臥不起。郡邑交疏。請至。再始投袂起。至則天下俊秀多從之。賜號佛心慈濟宏辯并金襴僧伽黎鍾山法會。同年八十預焉。召見。賜珍秘同神宇。超邁修偉。玉立而吐辭溫美。扶植宗乘。解紛排難。無自他猜忌之嫌。持律甚嚴。無一長物。然性至孝。遇父母。忌日必流涕。不已。十二月登座。說法端坐而化。同初謁春谷於講席。谷謂之曰。子之學精且博矣。恐滯心於羈執。但益多聞。縛於知見。非見性之本。宜潛修而滌之。乃見晦機。熙熙於其揮麈之間。夙習見聞一時蕩絕。惟存孤明。耿耿自照。復參中峯。祖祖贊勉之。還付春谷。谷命分座。

庚戌二年

克新奉詔招諭吐番

發明

沙門出世預人國家事。不可以爲調故新創書。

師譚

新字仲銘號雪廬博通內外典遊歷名山水交一時名流如楊廉夫顧仲瑛丁仲容程文張翥輩自稱江左外史上詔往西域招論吐番不得辭乃行梵琦宗泐等召對奉天門

秋七月朔上於奉天門召梵琦宗泐萬金妙聲等入見賜坐焚香供茶午就賜齋問以宗門大意琦泐等首以靈山付囑繼以迦葉傳化爲對次及鬼神之事琦等援經據論以對上感悅

禪師華頂下處州福林白雲智度寂

度嗣華頂親住福林己酉應詔建法會還至杭居虎跑秋趨華頂明年春示微疾仍回福林沐浴更衣索筆書偈曰無世可辭有衆可別太虛空中何必釘橛擲筆而逝闍維舍利五色牙齒數珠皆不壞

辛亥四年

禪師徑山小天甯寺梵琦寂於金陵天界寺

琦應詔至京館於天界寺七月二十一日趣左右具浴更衣索筆書偈曰眞性圓明本無生滅木馬

夜鳴西方日出書畢謂夢堂曰我去矣堂曰何處去琦曰西方去堂曰西方有佛東方無佛耶琦乃震聲一喝而逝上聞嗟悼久之時禁火葬以琦故特從闍維例火餘齒舌數珠不壞舍利五色紛綴遺骸弟子文晟奉及諸不壞者歸琦所築西齋建塔文憲宋濂爲之銘

虞山錢謙益曰卽學行高一世宗說兼通禪寂之外專志淨業作西齋淨土詩數百首皆於念佛三昧心中流出使人讀之恍然如遊珠網瓊林金沙玉沼間也

詔三宗名德復建大法會於鍾山

詔集三宗名僧千人及徒從二千人建普度大法會於鍾山住天界萬金總持其事冬十二月上御奉天殿集公侯百官宣踰建會之因禁天下屠宰上先齋戒一月

壬子五年

鍾山啓大法會

正月十五日三鼓時上御奉天殿集公侯百官奉

上佛表命禮部尙書齋赴鍾山啓建法會。焚之五鼓。上服袈裟乘輅輦赴法會。至日夕迎佛。上率公侯百官臨法筵。供佛行大禮。樂用善世等曲。天雨娑羅子。禪僧同菴爇簡。賦鍾山法會詩八首。紀事禪師縉雲下五臺壁峯寶金寂。

禪師聖壽支下婺州清隱德馨寂

癸丑六年

復召名德高僧

詔有道浮圖十人集大天界寺。徑山智及居首。以病不及召對。

禪師天寶下淨慈智順寂於天界寺

順嗣天寶樞初應詔建會。陞座說法。上幸臨慰勞。備至南還。主淨慈。是年復召入京。俄示微疾。沐浴說偈坐逝。

禪師徑山下象山瑞龍文懿夢堂曇噩寂

噩主浙東三名刹。錫號佛真文懿。禪師夏一日忽戒浴。易衣出器物分遺交友。集衆說偈曰。吾有一物無背無面。要得分明。涅槃後看言畢。危坐而逝。

烏斯道少從噩授文法。遂以名家。宋景濂序斯道之文。以爲經噩公之指授得其心印云。

禪師徑山下天界西白萬金寂

金吳郡姚氏子。初習台教。更衣謁古鼎銘於雙徑分座後堂。嗣其法。至正丁酉出世。蘇之瑞光效編蒲尊宿。作孤雲菴於城東。以養老。洪武改元起住持大天界寺。萬機暇時召入禁庭。奏對稱旨。四年春詔集三宗名僧十人及其徒二千建法會於鍾山。命總持齋事。承旨創建規式。金以母耄舉全室。勸自代復還菴。居五年冬復建會。大駕臨幸。詔金闡揚第一義諦。是年十二月一日示疾委順而化。甲寅七年。

禪師台州瑞巖恕中無愠赴闕以老病辭。日本請

愠臨海陳氏子。參竺元道。豁悟拈香。嗣之初住象山靈巖。遷黃巖。瑞巖一日謝事入松巖。萬山之巔。入跡罕至。嶄然獨處。衆泣哀請堅拒不出。是年夏日本國遣使入貢。嚮愠道風奏請往化其國。以水晶數珠峨山石硯爲贄。上召至闕。愠以老病辭上。

憫而不遣留處天界全室勸延致文室時宋景濂方在翰林詣愠劇談道妙是年冬奉詔東還住鄆之翠山四方叩謁者無虛日金齒大理僧至京特入翠山五十餘人拜牀下各求偈語而去智者寺普仁移淨慈

乙卯八年

禪師智及賜還穹窿海雲

發明與朝崇法不應召向不引退無以明山林之素志及與盟皆以病不及召對得賜還山其于出處之道兩全之矣

禪師龍翔下竹菴懷渭寂

渭南昌魏氏子嗣廣智訴住龍翔渭居座下得從名緒紳張起巖張翥危素輩遊歷主兩浙名利

洪武初一奉詔至鍾山退居錢塘之梁渚是年寂丙辰九年

萬峯道場成

萬峯山水相拱祖創建道場三十餘年道風遍布龍象駢集座下

禪師聖壽支下金華花山明叟昌寂

昌本郡浦江人縛茅於里之華山往謁千巖祖示

● 編纂

以入道旨要旋歸晝夜孳孳不息十月三日忽辭衆說偈曰生本無生滅亦無滅撒手便行虛空片月語畢端坐而逝

丁巳十年

祖付寶藏持法

持參祖於萬峯悟旨付法偈曰大愚肋下痛還拳三要三玄絕正偏臨濟窟中獅子燈燈續燄古今傳

宗泐奉詔同法師如玘箋釋心經金剛楞伽三經御製序文頒行天下

戊午十一年

禪師宗泐奉詔往西域求法

朝廷以佛經有遺佚詔天界寺宗泐禪師領徒三十餘人往西域求之

禪師徑山下愚菴以中智及寂

己未十二年

台宗法師上竺東溟慧日寂

日住天竺前後二十五年洪武改元詔見日年最

高白眉朱顏其班前列上親問以升濟沉冥之道。日備述其故上悅。願衆謂曰。邇來學佛者。惟飽食優游。沉狸歲月而已。如金剛楞伽諸經。皆攝心之要典。何不研窮其義。苟有不通。質諸白眉法師可也。數召見。字而不名。及建鍾山法會。請日說毗尼淨戒。辭歸上竺。日修西方安養之學。秋七月朔日。夢青蓮華生方池中。華色敷腴。清芬襲人。既寤。召弟子曰。此生淨土之祥也。吾去人間世。殆不遠乎。至四日。跌坐書頌。合爪而寂。藏全身於山之西峰。日驅幹修偉。眉長一寸餘。其白勝雪。目睛閃閃射人道。德餘光所照。不問髻倪。見日經行。輒曰。我白眉和尚來也。爭持香華以爲供養。居嘗顏面嚴冷。片言不妄發。雖對王公大臣。未嘗出一軟媚語。至於誘掖後進。色溫如春陽。

彝簡住大天界

庚申十三年

辛酉十四年

臨濟第二十一世慈光寂照圓明利濟萬峰祖示寂

祖隨機開導。不假雕琢。而道風遍布。嗣法門人有寶藏持雪山。熙仰山。學日照。慧寶峯。眞虎邱。圓海。舟。慈天界。華及果林。首座等十餘人。皆以偈印之。正月上元日。告衆曰。老僧時節至矣。至二十九日乙卯午時。囑門人曰。如今已得者。須向山間林下。鑽頭邊。接引一個半個。闡揚吾道。報佛恩德。不可攀高接貴。輕慢下流。逐利追名。迷眞惑道。末法將沉。汝等切須仔細。乃結跏趺坐。說偈曰。七十九年一味杜田。懸崖撒手。杲日當天。語畢而逝。春秋七十九。僧臘六十。停龕十三日。肢體溫如形容。儼若塔全身於寺西涅槃山。額曰永光菴溪花城隱士沈貫撰銘。

庵噴香雲外。錄明僧傳。首萬峰祖曰。臨濟正宗二十傳。至伏龍千巖長名。傾華域而邊方。諸國莫不感還。咨禮塵下。請徒恒數千指。惟萬峯禪師一人最稱首。貫嚴謂其純粹質樸。有古人氣象云。又曰。我明二百六十年間。禪源一脉。繩繩相武。有足嘉者。然根流既博。輯併誠艱。自宋景濂護法錄外。煩

乎耳目者必爲立傳。後有傳燈不無小補。如萬峰禪師龍蛇之生大澤。麟鳳之見明時。因列藉首。不獨以年壽稱也。

### 臨濟第二十二世祖

諱普持。字寶藏。嗣法萬峯。繼席爲第二代。

壬戌十五年

### 臨濟第二十二世聖恩祖嗣宗統

發明燈錄皆稱寶藏寶藏

乃祖號聖恩寺。賜額于正統八年。今以別前萬峯。故稱聖恩。洞宗松庭無方諸祖。皆以號行者。文獻之闕也。

### 祖繼住萬峯

### 禪師宗渤還自西域

三月。渤自西域還。求得莊嚴寶王文殊等經。授右街善世。尋以事。譴往鳳陽棲峯建寺。

### 詔道衍等十人同十王之國

發明衍等以世外而預人國家事故

削書  
禪師

### 禪師徑山下蘇州萬壽行中至仁寂

仁番陽吳氏子。嗣元叟。端蒲圻魏觀爲蘇守。見萬壽廢址。戚然有意。興復。聞仁寓虎邱。致書幣。凡三

往返而後應。是年三月。望示疾。十九日。同參如愚仲訊侯曰。師行矣。盍賜一言爲末後訓乎。仁曰。十方薄伽梵。一路涅槃門。曰。與師締交五十秋矣。此別直詣淨土。相見。仁厲聲曰。盡大千界是個淨土。何處不相見。良久泊然而逝。

癸亥十六年

### 萬安祖付凝然改法

改參萬安。嘗舉路逢死蛇。莫打殺。問祖曰。這箇莫是背觸不得的。意麼。祖曰。笑破山僧口。改罔措。祖曰。你在鬼窟裏討什麼碗。改愈不安。一日值祖上堂。次改通身汗下。釋然。祖乃付法。

### 曹洞第二十四世南陽萬安松庭祖示寂

祖洪武間。開法萬安王公以下。皆師尊之。

### 曹洞第二十五世祖

諱改字凝然。嗣法松庭。出世少室。

甲子十七年

### 曹洞第二十五世少室祖嗣宗統

祖出世少室上堂曰。莫向言中取。則直須句外明。

宗若能如是會徹古徹今自由自在

祥符蔭曰昔雲門雅不欲以言句流傳。禁學者記錄其語。蓋欲學者自悟忘言也。洞宗雪庭裕奉詔說法幾千萬言。時人欲爲刻行。裕叱止之。數傳以後。遂致語錄絕傳。又明初佛事雲興。化儀鼎盛。丹詔宸書。馳騁天下。而一二傳持祖脉者。冷然格外。獨振眞宗故聖恩。少室諸祖語錄失傳。然存大統於一絲。迄今昭然如十日並照。又何在非諸祖語錄之所流布也耶。

乙丑十八年

台宗法師松江興聖寺原眞寂

眞號用藏傳天台教觀戒行精潔博極羣書。禪坐達旦。隨緣演說。索浴書偈告衆而逝。

丙寅十九年

禪師古拙俊奉旨至繁昌剃度千僧

禪師薦巖下台州瑞巖空室無愠寂

七月示微疾。諄諄勉衆書偈端坐而逝。遺命閤維煨骨散水竹。間有二會語。山菴雜錄淨土詩行世。

丁卯二十年 戊辰二十一年 己巳二十二年

庚午二十三年

禪師道成奉詔考試天下僧徒

成字鷲峯。別號雪軒。洞上靈巖秋江潔嗣。歷住普照智藏。奉旨考試天下僧徒。進試卷奏對稱旨。賜金襴袈裟。命住持天界親灑翰墨。送之曰。不答來辭。許默然。西歸。隻履舊單。傳鼓鐘朔望。空王殿。示座。從前數歲年。傳懸之法堂。

辛未二十四年

壬申二十五年

禪師惟則上偈止籍僧

發明籍僧非制也。上因一時之見。而則能上偈

止之可謂以道事君者矣。故書

八月二十九日晚朝。上命凡天下僧人。但清理冊

文。上有名籍者。不問度牒。已給皆要他俗家餘丁

一人充軍。則時在京聞上命。進偈七章。其一曰。天

街密雨却煩囂。百稼臻成春氣饒。乞宥沙彌疎戒

檢袈裟。道在祝神堯。上覽偈罷籍僧。

癸酉二十六年 甲戌二十七年 乙亥二十八年

丙子二十九年 丁丑三十年 戊寅三十一年

建文皇帝

建文己卯建文元年 庚辰二年

辛巳三年 壬午四年

成祖文皇帝

成祖癸未永樂元年

禪師道成奉詔往諭日本

上以日本在鯨波萬里外俗尚佛乘以成道行尊

碩命捧璽書往諭之陛辭賜金鉢錫杖軍瓶等成

迴涉洪濤如踐平陸宣布朝廷恩諭闡揚佛祖宗

源自國王而下莫不俯伏臣化

禪師天童下徑山呆菴敬中普莊寂

莊仙居袁氏子嗣天童了堂一住撫州北禪雲居

徑山洪武初應詔說法稱旨後銜命祀廬山禮成

是年十月二十三日寂於不動軒

甲申二年

詔徵天下名僧纂修藏典

發明

佛法付囑國王纂修藏典誠為救世

先務故特書之嘉帝能尊法也

壁菴完如珪瑾指南車曉菴啓等應詔纂修

道成還自日本

乙酉三年

禪師永慈參太初原

慈字海舟蜀成都余氏子原籍秣陵歸虬見僧輒

喜棄俗趨彭縣大隋山景德禪寺投獨照月公剃

染月寂慈襲塔事舉入西山八載行脚首依太初

原於羅陽三峯一日問父母未生前那個是你本

來面目慈從東過西叉手而立

丙戌四年

丁亥五年

禪師慧岳參祖受法至安溪掩關

岳字虛白湖廣王氏子父為丹陽稅課司因家焉

母黃氏方娠夢僧頂包入門及產有異質警悟不

凡夢坐禪人中揮麈立論醒以告母母曰此高僧

說法像也他日令汝出家年十四禮邑之妙覺寺

湛然老宿求度湛問曰汝為何事答曰志願作佛

湛奇之為淨髮聞松隱囑道雲間往參叩有契至

一小菴禪定六日安祥而起舉目觸松豁然有省尋至聖恩見果林榮針芥相合指見祖具陳因由祖斥之曰佛法如大海轉入轉深那許泊住由是親炙座下一日問曰心不是佛智不是道汝云何會乃向前問訊叉手而立祖呵曰汝在此許多時還作這個見解因發憤忘寢食次日慕徹源底呈偈曰一拳打破太虚空百億須彌不露踪借問個中誰是主扶桑湧出一輪紅祖仍未點首久之盡得其道乃嗣法別去圓具昭慶隱杭州安溪古道山

戊子六年

禪師烏石下温州瑞安太初啓原寂

原日本源氏子九齡出家年十九與宗猷等十八人同誓請旨行求大法准賜繭紙度牒金欄袈裟及鉢孟錫杖等檄於輾轉遊參上國歷三年抵福州歷參知識四十五員後謁烏石恩嗣其法結茅廬阜復移石龍出世廣度遷羅陽三峰再遷護龍一日集衆說偈而逝

臨濟第二十二世聖恩祖示寂

臨濟第二十三世祖

諱慧因嗣聖恩持祖法隱杭州安溪遂成叢林宣德間賜額東明禪寺

己丑七年

臨濟第二十三世杭州東明祖嗣宗統三十一年

祖安溪掩關天下趨風素緇奔向誨迪獎勵未嘗少倦有疑而決者析以片言莫不泠然省解學徒恒集數百人

纂修藏典成

庚寅八年

禪師契斌參少室祖嗣法

斌字俱空睹秦封槐樹豁然省契參改祖祖嘗問曰趙州勘破婆子婆子敗闕在甚麼處答曰一對無孔鐵錘曰祇如趙州意作麼生答曰荊棘林中重加陷穿曰石頭道書亦不通信亦不達是何意旨答曰千里同風曰青原垂足又作麼生答曰禍事禍事遂嗣法

辛卯九年 壬辰十年

癸巳十一年

曹洞第二十五世少室祖示寂

祖晚歸二祖菴坐脫周王蜀王伊王修慈法潛故事登山敬禮一時歎所未有

曹洞第二十六世祖

諱契斌嗣少室出世嵩山

甲午十二年

曹洞第二十六世嵩山祖嗣宗統<sub>三十</sub>年

詔天下名德入京較對三藏大典

乙未十三年 丙申十四年 丁酉十五年

戊戌十六年

禪師徑山文琇增集續傳燈錄

琇字南石嗣虎邱中住吳靈巖遷徑山大鑑十八

世至二十世宗傳卓佚者增集續入成書曰增集

續傳燈 皇清庚子宗伯錢謙益出二書與虎邱儲一增集續傳燈一山菴雜錄附刻行之

己亥十七年 庚子十八年 辛丑十九年

壬寅二十年 癸卯二十一年 甲辰二十二年

仁宗昭皇帝

仁宗乙巳洪熙元年

宣宗章皇帝

宣宗丙午宣德元年 丁未二年

戊申三年

禪師道成乞歸天界之西菴

先是仁宗在青宮有忌成者構詞間之及登極謫海南宣宗嗣位召還入見慰勞甚至是年春乞歸南都天界寺之西菴以終老上從之詔金幣命中官姚忠驛舟護送

己酉四年

禪師佛妙寂

庚戌五年 十二月二十夜含曇星見

辛亥六年

禪師靈巖下天界西菴道成寂

成經事四朝四會說法臘八日寂上諭祭賜塔所

曰鷲峯禪寺

壬子七年

禪師竺曇下淨慈佛鑑簡菴希古師願寂

願嘉禾李氏子嗣時菴敷永樂中徵修大典願應詔事竣勅主淨慈是年月日忽語衆曰吾行矣沐浴更衣書偈曰須彌一掌大海一口海竭山崩鳥飛兔走危坐而寂

癸丑八年 八月戊午景星見

禪師永慈至金陵首衆靈谷

慈謁靈谷雪峯請充首座

甲寅九年

禪師永慈自金陵靈谷至東明

慈居靈谷第一座制解造武林遂至東明參祖

乙卯十年

安溪古道山道場成賜額東明禪寺

祖因衆集無以容乃拓基營繕遂成大叢林賜額

東明俾度僧

東明寺在餘不溪之西山中建文帝遜位南遊曾駐錫三年今御像在焉

英宗睿皇帝

英宗丙辰正統元年

永慈領悟受法

慈居祖座下經二年一日擬伸問祖掌之復擬開口祖復掌之乃豁然開悟展具珍重三拜而出祖

曰居古道山三十載今日只見得這僧遂付正法

丁巳二年 戊午三年

己未四年

祖自東明遷湖南淨慈

祖遷淨慈罄供施重建大雄殿

庚申五年

辛酉六年

禪師普慈自吳西洞庭來參旬日大悟

慈亦字海舟吳郡海虞錢氏子世業儒出家破山

寺往參鄧尉山萬峰蔚祖付以法偈遂結廬太湖

西洞庭山三十年不過湖聞虛白曰祖在安溪東

明說法親承萬峯祖遂往叩旬日大悟

見宗伯錢謙益傳

臨濟第二十三世東明祖示寂

六月二十七日祖命齋僧衆衆知祖意請留偈祖

曰一大藏教無人看著爭得這幾句閒言語至二

十九日晨寢言別疊跌而逝停龕七日形容如故

火煨獲設利如白珠者無數葬於山之東塢而塔焉禮部尚書毗陵胡濙撰銘

庵噴香雲外錄東明祖傳曰祖住世七十僧夏五十五弟子僅百人傳戒請益者數萬餘得契祖意乃海舟永慈秣陵人蓋師平昔隨機設變應病發藥若遇初根則恬言輒色使人醉心快意於春風和煦中也及勸宿學務必推窮蘊奧毫髮不容虛假苟有果於道者則解衣推食而勉至之雖屠彘之屬遇緣訓導無不改惡遷善惟其道力純固解行兼全身肩宗旨志在利生故能致人信向歸順之如是也

禪師普慈繼席東明

拈香有受恩深處便爲家  
有乳方知是阿彌之語

祥符陰曰近因文獻互見未之合考遂有海舟慈祖一二是非之疑謹按宗伯錢謙益海舟慈禪師傳歷歷明白宗伯以海虞人而傳海虞僧初非傳聞之訛此足徵先參萬峯後參東明居東明而承嗣其法者乃海虞之普慈也永慈祖原籍金陵生緣於蜀行蹟昭然詳於碑碣及雲外錄嗣法東明

而住金陵東山翼善寺與普慈兩人名號雖同履歷實相霄壤卽如近時海虞三峯先住者爲匡瀑戒青係豁堂岳之嗣於漢祖爲第四世後住者爲僧鑒曉青係退翁儲和尚之嗣於漢祖爲第三世若更百年後而稱述之均曰三峯青安所別其爲前後彼此乎又三峯前住爲槃菴正志後住爲碩揆原志百年後同稱三峰志不幾滋是非一二之疑如海舟慈祖者乎以是而推天皇天王之兩道悟亦猶是也其可以任行刪削哉

廬陵居士聶先樂讀續指月錄凡例第十二條曰信史有關疑之例傳燈有並載之條蓋以續佛慧命重在師承萬難以臆見刪削也瞿錄並載兩天皇悟因符碑邱碑各承宗派遂爲千秋疑案紛端久矣茲錄有兩海舟慈而昭然不疑者有說焉兩慈皆濟宗之人有一家言可按也一爲金陵翼善開法之海舟永慈一爲杭州東明繼席之海舟普慈其姓氏生里不同其長幼年歲有別其悟道機緣可證其付授時日甚殊普慈則有天真悟爲之

立傳花城沈貫爲之作拈頌序見在也永慈則有南澗問之續燈存稿靈巖之南嶽單傳錄見在也惟續燈萬峯嗣下削去海舟慈之沈貫問答一則另詳註於二十八世普慈章之後編年繕稿於癸亥夏續指月錄見於丙辰夏

宗統編年卷之二十八

宗統編年卷之二十九

臨濟第二十四世祖

諱永慈字海舟原籍金陵余氏生緣蜀之成都

韶年出家嗣東明法住金陵東山翼善寺

英宗壬戌正統七年

臨濟第二十四世東山翼善祖嗣宗統二十一年

癸亥八年

勅賜蘇州鄧尉山寺額聖恩禪寺

從僧道立奏請也

法師東白善啓寂

啓蘇之長洲人甫能言通佛典出家屏迹龍山見知於獨菴衍南洲洽應詔纂修大典校大藏經與瞿宗吉賦牡丹一韻往復殆將百首錢文通海銘其塔

甲子九年

曹洞第二十六世嵩山祖示寂

祖坐脫偈曰吾年八十七出夕復入夕撒手威音前金鳥叫天碧

曹洞第二十七世祖

諱可從字無方

乙丑十年

曹洞第二十七世西京定國祖嗣宗統二十九年

頒行大藏安置天下名山

勅賜常州府武進縣祥符禪寺聖旨曰朕體天地保民之心恭成皇曾祖考之志刊印大藏經典頒賜天下用廣流傳茲以一藏安置直隸常州府武進縣祥符禪寺永充供養聽所在僧官僧徒看誦

讚揚上爲國家祝釐下與生民祈福務須敬奉守護不許縱容閒雜之人私借觀玩輕慢褻瀆致有損壞遺失敢有違者必究治之諭

丙寅十一年

智瑄出家領悟

瑄姓范初爲梓人因營建創是間提誨而有志遂出家力參充火頭偶因火燄燎眉照鏡忽然大悟

丁卯十二年

戊辰十三年

己巳十四年

景帝

景帝庚午景泰元年

禪師萬峯支下東明普慈寂

辛未二年

佛滅後二千四百年

壬申三年

癸酉四年

甲戌五年

祖付智瑄正法

瑄依祖座下久得其道付法有段活由來總見成之記

乙亥六年

丙子七年

丁丑八年

禪師紹琦住蜀方山雲峯寺

琦字楚山別號荆壁叟唐安雷氏子九歲投玄極通出世究卽心卽佛語詣西岷孜孜不失一夕身心虛凝對境湛寂參無際悟聞淨板聲礙膺冰釋衆請主天成百廢具興衆四千指營與雲溪璞素虛理光澤惠大機用互相激昂至宗門極則處稍覺胸次未穩復加力行者四載浮漚細識始得滅盡一段孤明迴無瑕督再謁東普徵詰無礙普鳴鐘集衆以袈裟拂子付之復歸東山潛跡十載弟子曰琦曰佛法下衰禪林秋晚眞風委地吾師傳佛心印荷擔大柄當馭法利生豈可淹遲林壑孤付托以安眠哉琦幡然東下抵武昌過黃梅登東西二山禮諸祖遺像斬陽荆王飲道價召求心要至白門歷西浙由匡廬歸蜀所至大闡玄猷義徒臻萃韓都侯建方山雲峯寺延琦開法上堂以拂子打一圓相曰機前一著觀面全提復擊禪牀曰

句外一言和聲揭露箇裏不許停思顧慮豈容開口分疏只饒貶得眼來。劒去久矣。縱是佛祖到此攢眉有分。若是英俊衲僧。向未舉以前。自當點首一笑。嗟觀近世以來。人心不古。禪學之者。不務真參實悟。惟是接響承虛。以覺識依通爲悟。明穿鑿機緣爲參究。破壞律儀爲解脫。貪緣據位爲出世。以致祖風凋弊。魔說熾然。塞佛法之坦途。瞽人天之正眼。使吾教外別傳之道。於斯而委地。若是本色道流。以十方法界爲個圓覺期。莫論長期短期。百日千日。結制解制。但以舉起話頭爲始。若一年不悟。參一年。十年不悟。參十年。二十年不悟。參二十年。盡平生不悟。決定不移此志。直須要個真實究竟處。方是放參之日也。

睿皇復改八月改元天順

戊寅天順二年

詔嚴濫度僧徒

己卯三年

庚辰四年

辛巳五年

大明一統志成

禪師物外圓信諤廣善月幻

信字無念。金臺高氏子。別號物外九齡。謁大覺悅出家。慨然曰。禮佛轉法。僧途恒務。未明生死。稷稷何益。聞無際。悟演教於京都隆恩寺。特往請業。示以無字。猛力提究。忽爾話頭成片。身心凝然。悟曰。暫時靜念。不得認著。更衣入終南山。立限十年。聞火院破薪聲。有省。然自知未是徹處。更加逼拶。覺活潑潑地。脫灑無依。有偈曰。崑崙倒跨。清風舞淵底。泥牛鬪石虎。禪著蒼松眼。上眉蟪蛄踏破虛。空肚回牛山。縛茅晏坐。不臥滌盪餘習。乃詣繁昌八峰山廣善寺。叩月幻。幻爲臨濟下二十三世。問答契機。幻驪然一笑。撫之曰。善。自保護報佛恩。德乃付之衣法。復居山三十周。寒暑後開法。伏牛山。

壬午六年

臨濟第二十四世金陵東山翼善祖示寂

塔於寺側

臨濟第二十五世祖

諱智瑄字寶峰住南京高峰寺

癸未七年

臨濟第二十五世金陵高峰祖嗣宗統十六

甲申八年

憲年純皇帝

憲宗乙酉成化元年

丙戌二年

丁亥三年

戊子四年

己丑五年

庚寅六年

禪師弁山下碧巖空谷景隆寂

隆姑蘇洞庭龍山陳氏子初見懶雲安於弁山開示法要後於虎邱禮石菴祝髮會菴遷靈隱隆相隨七載因往天目禮高峰祖塔憩錫歲餘忽有省入造安求證安爲助喜後住碧巖僧問如何是佛法的大意隆曰此問最親切曰覲露堂堂時如何隆曰途路未爲真曰南人如問雪我道是楊花隆曰喚鐘作甕又爭得晚年於西湖修吉山卜地爲生擴築室以居隆機辯峻逸儒釋貫通所著空谷集尙直尙理編

辛卯七年

壬辰八年

癸巳九年

禪師方山下金陵高座寺古溪覺澄寂

澄山後蔚羅張氏子年十歲爲牧牛之童十四從雲中天暉景圓髻閱藏五載從默菴學禪機穎迅徹道聲鵲起景泰三年宗伯胡濙延住南陰香嚴寺自惟大事未明不一年而退登太岡山參月溪得其奧旨往西蜀謁方山琦久之大事了徹付法後辭琦南下天順五年住高座寺寺卽雨華臺東晉時西域僧開山後梁天監年間雲光法主講法華經天雨寶華故名其臺澄住後足不履城市者十載是年八月初九日端坐而化澄能文曰吾將藉此以明佛知見胡濙序其雨華集曰將與蒲菴全室逃虎嬾美於後

禪師惠通住寶禪寺

曹洞第二十七世西京定國祖示寂

曹洞第二十八世祖

諱文載字月舟初住少室後隱烟霞著洞上緒餘傳世

甲午十年

曹洞第二十八世嵩少祖嗣宗統四十

祖示衆引臥龍語云。道個正字蚤已落偏蓋。本位都無言說。但有言說。卽屬偏也。古人道。偏正不曾離本地。無生那涉語。因緣又道。不落今時句。妙在未聞前。不落今時。須虛一位。不得當頭道著。直須立行始解。相應半夜日頭出。日午打三更。皆是無語中有語。道個露地白牛。明妙法身。猶是文彩。須向文彩未生前。妙會始得。

乙未十一年 丙申十二年

丁酉十三年

禪師本瑞來參

瑞南昌鍾陵江氏子。隨父商。潁州偶厭世。相遂信步至荊門。禮無說能。剃染爲沙門。令看萬法歸一話。乃徧參耆宿。與全首座者同行。至襄陽道中。偶聞老嫗喚猪聲。全說偈曰。阿娘牆內喚哪。哪途路。師僧會也麼。拶破這些關。楸子阿娘依舊是婆婆。疑滋甚。一日病中。聞僧舉大慧臨滅因緣。頓明全

首座偈。意入蜀見楚山雪峯。多所發藥。益臻玄奧。末後至金陵。見祖。祖問曰。什麼處來。曰。北京祖曰。莫有別處去麼。曰。隨方瀟灑。祖曰。曾到四川否。曰。曾到。祖曰。見法鑑否。曰。曾見。祖曰。見楚山否。曰。曾見。祖曰。法鑑會下多少衆。曰。三十祖曰。楚山會下多少衆。曰。三十祖曰。且不一般。曰。本無差別。豈分彼此。祖曰。四川境界。與此間如何。曰。江山雖異。風月一同。祖豎拳曰。還有這箇麼。曰。無。祖曰。因甚。却無。曰。非某境界。祖曰。如何是你境界。曰。諸佛不能識。誰敢強安名。祖曰。汝豈不是著空。曰。終不向鬼窟裏作活計。祖曰。西天九十六種。汝當第一。瑞拂袖而出。遂留止。一冬機語甚契。

戊戌十四年

祖付本瑞正法

祖以袈裟拂子付本瑞。偈曰。濟山棒喝。如輕觸殺。活從茲手。眼親聖解。凡情俱坐斷。曇華猶放一枝新。

臨濟第二十五世南京高峰祖示寂

臨濟第二十六世祖

諱本瑞字天奇別號癸絕嗣金陵高峰祖

己亥十五年

臨濟第二十六世金陵祖嗣宗統三十

祖示衆曰汝等除去心中詬曲截斷人我貪瞋直教一念不生萬緣頓息然後向此乾乾淨淨處提個話頭字字明白念念相續看他是個甚麼道理務要討個分曉日久歲深不煉昏沉沉自退不除散亂散亂自絕純一無雜心念不生忽然會得如夢而醒覆看從前俱是虛幻當體本來見成萬象森羅全機獨露天上人間悉無別法蕩蕩然無拘無束坦坦地自由自在於這大明國裏也不枉爲人向此法門也不枉爲僧却來隨緣度日豈不暢哉

禪師東明支下天目活埋菴月江覺淨寂

淨姑蘇雙楊沈氏子嗣東明岳祖匿影天目活埋菴日惟一饅歲惟一粥醢酢不沾枕簟不御者六年愛茗溪清幽遂駐錫水心院歷二十稔道行精

峻世莫得而遠近之唯以法施未嘗少倦正月十

九日寂四衆皇皇如失慈父

庚子十六年 辛丑十七年 壬寅十八年

癸卯十九年 甲辰二十年 乙巳二十一年

丙午二十二年 丁未二十三年

孝宗敬皇帝

孝宗戊申宏治元年

己酉二年

禪師如香集禪宗正脉

香嘉禾人嗣空谷隆輯佛祖機語曰禪宗正脉

庚戌三年 辛亥四年 壬子五年

癸丑六年 甲寅七年

乙卯八年 十二月 天鼓鳴 丙辰九年

丁巳十年 五月各省 天鳴地震 戊午十一年

己未十二年 庚申十三年

辛酉十四年

禪師天界下樵陽君峰大闡惠通寂

通政和邵氏子年二十造歐甯斗峰禮寶積玉溪

得度出關參天界中久之付袈裟拂子常侍黃高扣法有省八月延至寶禪寺復捐貲建寺奏上賜額曰正法禪寺延通主法戊戌冬南還故山住邵武君峰是年寂

壬戌十五年 癸亥十六年 甲子十七年

乙丑十八年

武宗毅皇帝

武宗丙寅正德元年

祖付明聰正法

聰邵武光澤縣人姓奚母吳氏將誕前一夕有病僧告宿吳辭之夜半遂生聰而病僧是夜道亡里人咸謂此僧再來十七從隱菴得度二十受具精毗尼兼修止觀深究唯識等論一日遊百丈山逢一老宿問聰曰大通智勝佛十劫坐道場佛法不見前不得成佛道此理如何聰依文對老宿詬罵而去聰疑情頓發一日聞馬嘶豁然大悟乃曰如斯之事如來明見無有錯謬往謁金陵祖久之付正法印

丁卯二年

少室祖奉詔說法伊鄭諸王往來問道

戊辰三年

臨濟第二十六世金陵祖示寂

祖得法弟子三百四十有奇未及百年湮沒殆盡

獨無聞聰祖傳持正脉至今

雲外香曰天奇老人徹底爲人老婆心切當時法

運庶幾稍振自茲以降景逼桑榆雖有魯陽之戈

烏能挽其萬一者哉

臨濟第二十七世祖

諱明聰字無聞別號絕學嗣金陵瑞祖住隨州

闕子嶺龍泉寺

己巳四年

臨濟第二十七世隨州龍泉祖嗣宗統

三十五年

庚午五年

辛未六年

壬申七年

禪師古音淨琴住瑞巖

琴閣之建溪興賢蔡氏子晚號玉芝老人幼敏逸

每日歎云。世間所求皆是苦。不如蚤覓出身途。年二十五出家。歷參樵陽大闢。將樂性空。泉南靜晃。虎林印宗。皆當世宏道之士也。最後往巫山叩壽堂松遂。蒙印可。回闔隱雙峰三十年。四方懷道之士。踵至。是年應瑞巖請。後於斗峰重創。大刹宏化。一方所著有醒醐集三卷。

德寶生於金臺吳氏。是為笑巖祖。

癸酉八年 甲戌九年

乙亥十年

曹洞第二十八世嵩少祖示寂

偃享挺曰。當宏正嘉隆時。九鼎單絲。祖道不絕。如綫緒餘一冊。萬少祖著有洞上緒餘。山堂滄載列人天眼目。播在叢林。沿襲舊聞。未為無補。然烏焉成馬。已經三寫之訛。曾參殺人。徒聞市上之口。今日拈來。好與他禪板蒲團一齊焚却。

曹洞第二十九世祖

諱宗書號小山初住少林遷宗鏡

丙子十一年

曹洞第二十九世宗鏡祖嗣宗統三十

丁丑十二年 戊寅十三年 己卯十四年

庚辰十五年 辛巳十六年

世宗肅皇帝

世宗壬午嘉靖元年

勅開萬壽戒壇。詔選宗師為十座首。發明如來滅後戒乃

大師自唐麟德年間。詔律師道宣開戒於終南山後。歷代聖君。每見舉揚。以宏遺範。今世宗登極之初。即有勅開戒壇。選師傳授之詔。可謂不負靈山付囑者矣。故特書。

詔開戒壇。選宗師為十座首。宗林等應詔演說毗尼。多所利益。上時奉玄林上書。規勸請宏護大法。上不以為忤。林字大章。餘姚宋氏子。棲隱於杭之安隱淨慈間。薄遊都下。屏跡香山。乃膺詔選。

癸未二年

笑巖寶出家

寶年十二。偶至禪林。聽演華嚴大疏。至十地品。世尊作轉輪王。布施國城妻子身命等。廓然如釋。枉結數曰。千古猶今。同一夢幻。於是決志披緇。禮本境廣慧寺大寂。能為師名德寶號笑巖。

禪師果斌住南京天界

斌字半峰與顧華玉談禪和詩題王十岳山寮避

暑詩云小隱空山絕四鄰野雲孤鶴自相親誰知

一徑深如許猶有敲門看竹人

甲申三年

正月五星聚于營  
室南畿諸郡大饑

乙酉四年

丙戌五年

禪師無相圓應中丞毛垵請住天池華山禪寺重修

大殿

華山寺爲晉時古剎峰前天池一泓湛碧高僧注

經於此池中三見青蓮有鉢孟翠屏諸勝中峰本

祖建石殿安置藏經歲久荒圯垵字貞甫讀書殿

側見石柱流光之瑞遂發心重修延無相圓主席

說法有手記及詩文述其事

丁亥六年

五月京  
師雨錢

戊子七年

己丑八年

庚寅九年

禪師如遷圓佐謁宗鏡祖於立雪庭

遷鳳翔岐山李氏子首參悅菴喜指示向上一路

尋入青峰山弔影單棲有所開悟同天然佐來少

室謁書祖入室陶鎔機契俱蒙印可

辛卯十年

禪師如進通玄同謁宗鏡祖

進字隱菴廣平永年陳氏子玄字古風鄴下王氏

子同謁書祖於少室一見期以龍象久之俱付衣

法

壬辰十一年

禪師德寶至龍泉參祖

寶偏參名宿一日渡溪失足墮水衣履俱濕更衣

呂家店默坐忽聞婦人責子有省遂造關嶺謁龍

泉祖呈所得明旦入室祖曰上座昨日許多絡索

向甚處去也寶擬對祖笑曰鷄子過新羅寶復問

曰十聖三賢已全聖智爲甚不明斯旨祖曰如何

是斯旨下語皆不契因臨泉洗菜忽一莖菜墮水

逐水園轉捉之弗得遂豁然喜躍來歸祖舉玄沙

未徹語勘之寶曰賊入空房祖曰不得草草寶便

喝拂袖而出旋辭祖入楚

癸巳十二年

禪師常忠謁書祖於嵩山

忠字蘊空。生緣建昌。爲儒時。嘗講姚江良知之學。出世後。聞中州小山祖道風。卽往參謁。祖問來爲何事。忠云。爲生死求出離法。祖曰。生死在何處。要你出離。忠無語。祖曰。且去務下著。一日。忠又問。如何得見性成佛。祖曰。你喫飯也未。忠云。已喫了。祖曰。舌在你口裏。還見麼。忠云。畢竟如何。得成佛。祖曰。佛是乾屎橛。汝咬得破麼。忠擬再問。祖搖手曰。是不是。忠益心疑之。乃辭祖。遍參諸方。

甲午十三年

乙未十四年

丙申十五年

書祖自少室遷宗鏡

祖謝少林事。往往北京宗鏡時。蘊知忠徧訪諸方名宿。有省乃徹見祖作用。復返嵩山。隨侍住宗鏡。服勤三載。祖付以偈。

丁酉十六年

祖付德寶法印

寶入楚參大覺圓覺齒高儀貌豐碩辭音如鐘住

山數十年不與人事。禪門巨匠也。寶侍覺數月。朝夕扣擊。舉拈放風。轉方便莫測。一日室中學外道問佛。不問有言。不問無言。世尊良久。外道便悟。覺曰。既不涉有無。良久亦是閑名。正當恁麼時。外道悟箇甚麼。寶擬對覺以手掩其口。曰。止止。猶挂齒在。寶曰。可謂東土禪僧。不若西天外道。遂作偈曰。一自當年畫模。則幾番紅了幾番黑。如今謝主老還鄉。那管平生得未得。覺爲助喜。未幾回關嶺。祖付以法印。諭出世。

戊戌十七年

己亥十八年

庚子十九年

辛丑二十年

禪師常潤參宗鏡祖付法

潤字幻休。別號大千。南昌進賢王氏子。初謁萬松林於徑山。復參大方蓮後。參宗鏡祖。力行二年。愈益精進。祖舉洞山我今不是渠。詰之曰。旣不是渠。畢竟是何人。潤領悟。以偈答曰。若要識此人。有箇眞消息。無相滿虛空。有形沒踪跡。曾爲佛祖師。嘗作乾坤則。龜毛拂子。清風生。兔角杖頭。明月出。祖

曰子無勸說更須自入悟門。潤曰尙不借緣從何門入。祖曰既不借緣何爲至此。潤曰因不借緣所以至此。祖曰就不借緣一語於意云何。潤曰彩鳳翻飛身自在。鐵牛奔吼意常閑。祖曰善哉。明日辭行。祖付偈曰。定作人天主。當思少室秋。潤曰常潤是甚麼人。安敢當此。祖囑曰。吾道不振久矣。豈宜袖手耶。潤唯唯。

壬寅二十一年

癸卯二十二年

臨濟第二十七世龍泉祖示寂

宗統編年卷之二十九

宗統編年卷之三十

臨濟第二十八世祖

諱德寶金臺吳氏子嗣龍泉祖

世宗甲辰嘉靖二十三年

臨濟第二十八世圓通祖嗣宗統三十年

祖居圓通

仲夏朔祖入都居圓通寺上堂拈拄杖曰。有麼。有麼。時有一僧出作禮。祖劈脊便打曰。多口。作麼。曰某甲一言未措。何爲多口。祖復打曰。再犯不容。

乙巳二十四年

祖結夏圓通

四方禪侶終南南岳伏牛五臺等處聞祖道風皆來參禮

丙午二十五年

曹洞宗統止於是年

按洞宗宗鏡書傳少室潤廩山忠隱菴進大方遷古風玄天然佐五人少室潤傳清涼念無言道智

空齋。蒼谷銀無疑信。五人廩山忠傳。經昌經一人。清涼念傳。雲門澄一人。壽昌經傳。博山來東苑鏡。鼓山賢。黃龍鑑四人。無言道傳。少室喜金山肇二人。雲門澄傳。茗溪徹。明因懷。佛日方。愚菴孟。東山渡。弁山雪。六人。博山來。後有雪關。閭檀度。密華首。獨金陵嚴四人。東苑鏡傳。天界盛一人。鼓山賢。後有鼓山沛一人。諸家傳持。正在繁衍。從此至本朝。諸師之出世行蹟。年月有徵者。書焉。宗統之歸。須俟後定。

幻休潤和尚繼席少室

發明  
洞宗宗統已虛諸師皆稱和尚後詳諸方

紀事

宗鏡祖示寂。會議繼席。非潤不可。潤執意謙退。再請。再却。衆乃舉祖付囑之偈。潤遽墮淚。不復言辭。乃住少室。潤體貌豐碩。聲若洪鐘。與諸學人甘澹泊。而襟度夷曠。力荷大法。朝夕乾乾。無少倦色。告香入室者二百七十人。

下未二十六年 戊申二十七年 己酉二十八年

庚戌二十九年 辛亥三十年

佛滅後二千五百年

壬子三十一年

癸丑三十二年

隱菴進和尚應請北遊

進自得法於小山書祖。後養道於大匠之興國寺。影不出山。足不蹈閭者數載。久之開堂說法。機如走珠。口似懸河。衲子肩摩踵接。趨謁如狂。一日應請北遊。途宿三教堂。主僧進曰。此中向有慈布袋。像供西壁。後爲羽士居。此於頂上安雙髻。改呼爲鍾離仙。遷供東壁。每每緇衣黃冠。爭衡代位。至今葦酒淫祀妖孽一方。死爲怪事。求和尚除之。進以拄杖指其像曰。者塊泥團。變怪多端。不守本分。惱亂人間。髡頭佛祖。了髻神仙。出乖見醜。魔魅閭閻。彼此搬弄。東那西遷。妄生喜怒。暮四朝三。不遇老僧行正令。多年冷地。受牽纏。四大各復返本還源。從此一方齊物論。即刻送汝上長安。咄咄連棒粉。碎而邪孽從茲肅清。

甲寅三十三年

祖辭衆南遊

仲秋祖辭衆南行有答三際禪人問法語

蘊空忠和尚棲隱廬山慧經從之出家

旰江之新城有廬山去郭二十里八面秀拔忠遊喜之因結菴樓止者二十年不與人接諸士紳故人多來相訪唯默坐而已羅近溪鄧潛谷與論性命之學皆超出情見及舉宗門向上事人多未能領略經撫州崇仁裴氏子誕時難產祖父誦金剛般若經而嬈因名經初生顛異長貌蒼古九歲入鄉塾便問浩然之氣是箇甚麼塾師異之嚮忠道行高峻特求出家常疑金剛四句偈必有指據偶見傳大士頌曰若論四句偈應當不離身不覺釋然遂辭忠隱峨峯嘗登絕頂顧盼而作偈曰踏上雲頭第一峯眼中廣博小虚空當時欲見無由面今日相逢處處同結廬三年人無知者

乙卯三十四年

丙辰三十五年

禪師方念參少室休和尚於立雪庭受付

念字慈舟別號清涼古唐楊氏子十歲投金臺義公出家自念生死事大受具參方一日聽古道法師講楞嚴經至七處徵心後頓知緣生不實茫無下落乃遍歷講席精研性相宗旨終不肯往少室參幻休潤於立雪庭禮拜次潤問甚處來念曰北方來潤曰北方道法與此方如何念曰水分千派流出一源潤曰怎麼何用到此念曰流出一源水分千派潤見念言辭迴邁命充維那時提大事因緣激發之念曉夕體究至忘寢食一日至五乳峯前初祖面壁處忽然契悟亟詣潤呈偈曰五乳峯前好箇消息大小石頭塊塊著地潤可之囑曰從上佛祖以自己所證遍相承襲欲令一切衆生知有此事余得之小山先師十餘年矣今將從上佛祖心印源流付囑於汝汝當上體佛祖之心爲心以續慧命燈燈相繼毋令喪失然雖如是尙宜晦跡林泉乘時一出付以偈曰無上涅槃心佛祖相傳付吾今授受時雲淨風頭露

丁巳三十六年

禪師伏牛下徑山萬松紹林寂

林仁和沈氏子。幼入法輪出家。習瑜珈教。林慨然曰。是豈生死大事所竟耶。趨天目謁平野老人。獲聞心要。翺翔講律。研窮玄奧。者久之。嗣伏牛大休。實入川峽。登峩嶻。復歸虎林。逖迹徑山。道風彌著。問法者響至。書偈而化。

雲外香曰。萬松老人。操履真潔。立宗幽邃。近代主匠不多。指屈其於徑山。踞師子座。過塗毒鼓。法筵非暫也。世諦非促也。度生非簡也。傳法非一衆也。及考山志。列諸法侶。類中而不入祖位。何所然耶。吁。異哉。明眼人前不妨舉似。

戊午三十七年 己未三十八年

庚申三十九年

禪師吉菴下嘉興天甯法舟道濟寂

濟秀州張氏子。嗣吉菴。初住龍淵。景德移鹽官。俱胝故院。院有靈泉甘美。且利浴。繭因產婦觸穢。致震雷墜石。要以百祀矣。濟謂衆曰。院破可完。井覆可啓。以密語禱之。石徙其半。至今有半井之稱。

尋移武康雙髻有池蛙聽經。才異嘉靖初。中貴張

永請出世。秣陵安隱。由陽羨開堂。禾之天甯。復開爐鞴於靈光精器。諸刹乃浮舟南湖。信風所如。三年棄去。居湖之弁山。是年秋寂。濟氣宇遐暢。禮度閑逸。律身惟謹。造次瑣屑必規。檢寒暑屋漏亡改。替性沉靜。素無干謁。隨緣轉化。先後二十餘所。解包之後。足不越戶庭。旦晚持秘密伽陀。嚴甚燕暇。則孤坐泊然。似不能言者。錢帛蔬果必均同。在諱義無礙。如春風披拂。不自知其意之消也。

辛酉四十年

壬戌四十一年

癸亥四十二年

禪師天童下天池玉芝法聚寂

聚鹽官富氏子。兒時恒籍地趺坐。折草念佛。出世後結廬澈湖。習靜芝產座下。因號玉芝。嗣天童碧峯。顯移錫武康天池。構玉芝精舍。提唱宗乘。隨機明捷。如太阿發穴。秋水生寒。不犯鋒鋦。任情磴磳。二十餘年之間。歸誠縑素。鑑覺一大事。因緣者琳琅輝映。有語錄六卷。五月十九日寂。

甲子四十三年

祖復北遊寓寶禪

乙丑四十四年

禪師正傳參祖於北京寶禪

傳溧陽呂氏子年十九從善權樂菴薙髮看父母  
未生前話無所入刻苦歷二七日一夕經行纔就  
坐聞琉璃燈光輝耀豁然有省乃曰古人所謂虛  
空粉碎大地平沉一人發真歸源十方虛空悉皆  
銷殞非虛語直造燕都參祖通所得語未竟祖忽  
趨出隻履曰向這裏道一句看傳無語立簷下自  
夕達旦祖出見喚傳傳回首祖翹一足作修羅障  
日月勢傳乃大悟

禪師智空赴天界請

空字妙有雲南太和葛氏子出家後往雞足山然  
一指偕友往南嶽下煉魔場卓菴仰山日唯一食  
西踰江浙訪諸祖遺跡閱藏天目頓明大旨謁萬  
松林於雙徑遂受記蒞是年應天界請

丙寅四十五年

圓悟生  
是為天童

十一月十六日生於常州宜興蔣氏

穆宗莊皇帝

穆宗丁卯隆慶元年

禪師瑞巖下禺川真慧寂

慧雉城符氏子事母以孝聞却姻出世書法華十  
二部以報罔極力參有悟往印於玉芝聚首衆飛  
雲院烏程令不崇三寶陷之於獄體無完膚同事  
數人咸謂非麴蘖榮衛不可以生慧獨毅然曰酒  
爲大過犯吾佛首禁生死等幻耳毋多言至夜說  
偈而逝

戊辰二年

己巳三年

祖付正傳法印

傳悟後服勤數載禮辭南歸祖書從上源流付之  
臨行覆以一笠曰無露圭角  
慈舟念和尚掩關五臺

念掩關五臺晝則一食夜則孤坐久之自念差別

智不可不明。乃肆遊諸方。一切苦行人所類。蹙者皆身親歷。後至石城精廬。過分雙目。忽盲。念曰。幻身非有。病從何來。將身心一時放下。硬坐七日。雙目復明。

庚午四年

辛未五年

壬申六年

憨山德清參祖

清全椒蔡氏子。出家長干大報恩寺。大殿燬。清與雪浪。恩矢志興復。乃北遊京國。尋之五臺。以慈山自號。謁祖。祖問何處來。清曰南方來。祖曰記得來時路否。曰一過便休。祖曰子却來處分明。清作禮侍立。請益。祖開示向上數語而出。

神宗顯皇帝

神宗癸酉萬歷元年

法藏生  
三是爲

十月七日。生於常州無錫蘇氏。

甲戌一年

禪師天竈下大雲雲谷法會寂

會嘉善懷氏子參法舟濟於天甯寢食俱廢一日食盡不知碗忽墮地陡然省徹得受記荊韜迹香林見明教嵩日課遂效行之徐魏國公延於叢桂庵請住三藏殿會危坐不越閭者三載誅茅棲霞千佛嶺陸儀部光祖訪之機洽欲爲建寺力辭之嘉靖丙寅集五十三人結禪期於天界壬申吳吏部默泉鄭刑部旦泉等請還故山達觀可扣華嚴宗旨爲發揮法界圓融之妙歎未曾有會定力攝持住山四十餘年如一日晝夜端坐前置一爐香烟不斷終身禪誦無間眞末法精進幢也當江南禪道梗澀之時出入滅裂之地始終無一議之者其操行可知已正月五日四方之衆觀會住處談發及明趨視而會已寂住棲霞時有開示袁文學了凡行功過格語載本傳

乙亥二年

無明經徹悟

經閱傳燈見僧問興善。如何是道。善曰。大好山。日夜提撕。至忘寢食。一日因搬石次。堅不可舉。極力

八  
入

推之豁然大悟。即述偈曰。欲參無上菩提道。急急  
疏通大好山。知道始知山不好。翻身跳出祖師關。  
遂往廩山呈偈。忠即爲印可。始許薙髮受具。

丙子四年

勅法師覺遠等校訂續八大藏經典

丁丑五年

戊寅六年

祖自五臺回至京結菴西城柳巷

己卯七年

庚辰八年

禪師萬松下蒼山妙有智空寂

空威儀豐偉望之儼然一應真住天界遷超果晚

居余山寂徐階銘其塔

禪師東塔下敬畏如空寂

空香水施氏子嗣野翁曉

雲外香曰。斷橋倫傳方山寶寶傳無見。親親傳白

雲度度傳古拙俊。再四傳至寶芳進進傳野翁曉

曉傳敬畏空。傳古湛冲冲之後遂斬無傳衣偈

留車奚菴

辛巳九年

臨濟第二十八世圓通祖示寂

正月十九日寂塔於城西之小西門

禪師無念深有住龍湖

臨濟第二十九世祖

諱正傳字幻有嗣圓通

壬午十年

臨濟第二十九世禹門祖嗣宗統

癸未十一年 甲申十二年

乙酉十三年

曹洞三十世西京萬壽幻休潤和尚寂宗鏡書

發明潤當嗣宗統以俟後定故書法如此

順德鵲山天然佐和尚寂曹洞三十世宗鏡書祖嗣

佐隱鵲山有請說法者堅辭之十月預知時至浴

畢坐逝

丙戌十四年

詔頒藏經施天下名山

國初刻藏有北方撰述諸經未入藏者詔補入之。  
勅頒十五藏散施天下名山。

慈舟念和尚南遊普陀禪師湛然圓澄參謁受印證。  
念遊普陀歸由越之止風塗衆請說法湛然澄來。  
參念問止風塗向青山近越王城畔滄海遙時如。  
何澄曰月穿滄海破波斯不展眉念復舉洞上宗。  
旨逐一問澄澄乃說偈呈似曰五位君臣切要知。  
箇中何必待思維石女慣弄無鍼線木偶能提化。  
外機井底紅塵騰靄靄山頭白浪滾飛飛誕生本。  
是無功用不覺天然得帝畿念閱曰語句綿密不。  
落終始真當家種草也遂召入室印證曰汝後開。  
兩片脣皮截斷天下人舌頭有分在即付偈曰曹。  
源一滴水佛祖相分付至今授受時大地爲甘露。  
咄五乳峯頭無鏃箭射得南方半個兒。

慈舟念和尚住嘉禾東塔

念應請住嘉禾之東塔遷豫之雲居匡廬後欲投。  
老臺山越中緇白力挽歸寶林道場。  
汰如河法師  
續高僧傳稱  
師爲清涼  
國師後身  
示寂後法嗣湛然澄迎龕塔於顯聖南

山之麓

丁亥十五年

禪師萬松下嘉禾東禪千松明得寂

得號月亭以嗣萬松易號千松烏程周氏子始參。  
百川海不契單衣芒屨徧歷叢席備嘗艱苦所遇。  
皆外道法事自念般若緣薄益奮勵投上竺哀籲。  
普門大士祈妬明師乃謁萬松林泫然請決凡十。  
載無所入一日閱楞嚴經至清淨本然云何忽生。  
山河大地恍若雲散長空寒蟾獨朗呈偈松領之。  
松住雙徑得爲衆負米縛薪不憚艱苦獨行撲藪。  
間遇虎橫踞得卓錫正立虎俛首避去時咸異之。  
適覽棗栢合論至十地品午夜隱几而坐夢遊兜。  
羅綿世界闡華嚴奧旨至於結座乃說偈曰從本。  
已來無今日何曾有一毛頭上見虚空笑開口喝。  
一喝寤白松松撫之松寂後懸鐘守塔者千有餘。  
日乃孑身趨凌霄峯結茅孤坐衣草食木苦行精。  
研一夕跌坐心境豁爾疑滯氷釋自此道價嶢嶢。  
義徒輻湊陸五臺率衆請法吳司寇韞菴請說法。

於靈隱管會。憲東溟請闡法於天池。沈儀部觀願。請住圓證寺。世方崇事真武。比邱有披法服而膜拜者。得見悉叱曰。此北方一水神耳。教中謂毗沙門天王。願與神力爲佛外護。爾授七佛袈裟而禮何謬倒。乃爾往往改像設而更廟宇。俾學者專心正道。得爲人修。餘玉立性度伉直。以勝法爲自重。以傳道爲己任。福患不苟避。憾喜不形色。至於登座白椎。則慈雲鬚然三千柄。著八萬森嚴七衆無不渥其沛澤而醉心者夥矣。所遇公卿未嘗降禮作卑諂態。羣小咸憎詬之。百折不回。是冬示疾吉祥而逝。

相宗法師蘇州華山祖住寂

住字幻依號麓亭。丹徒朱氏子。八龍蟠山出家。受法華華嚴諸大部。自謂覺識所依非關眞際。遊少室依大章五載。復至伏牛依高安十二夏。次遊都下。謁松秀二法師。盡得清涼之旨。淮安胡給諫延住鉢池山。造大藏經作無遮會。訪無極於南京。居第二座。鉗錘之暇。卽入衆作務。演華嚴於京口。萬

壽寺至入法界品。地震天雨甘露寶華。時無極妙峯承印亦居座下。萬歷甲申。懇錫蘇州蓮華峯下。建精舍居之。立三不留軒。謂不留骸骨不留衣鉢不留徒衆也。九月告衆而逝。異香積時不散。塔全身於蓮華峯之陰。王世貞銘其塔。住持常不輕行提獎孜孜所至皆成寶坊。

戊子十六年 歲大饑

己丑十七年

沙門眞可募刻方冊大藏

可字達觀號紫栢。嘗復楞嚴寺以大藏京板印購煩難欲易梵筴爲方冊便於流通。上首道開法本慨肩鉅任。馮夢禎陸光祖等共相倡舉布告天下。今之嘉禾楞嚴藏經是也。

庚寅十八年

無言道和尚住嵩山少室

道字無言新建胡氏子。嗣幻休潤嵩山四衆請住少室祖庭。周藩國主迎道說法。主大開悟。汝甯王聞之亦迎道至。世子病足倚杖而視道。乃引之周

行七轉汗流如注而足卽瘳僧問外道問世尊曰  
不問有言不問無言世尊良久意旨如何道曰動  
容揚古路不墮悄然機道機鋒敏捷襟懷平實後  
寂塔於少室祖塋

禪師儀丰方家安禪蓮居

彖達州羅氏子出家太平興國參鬼神顯不破之  
機三年有省南詢結茅雙徑鵬搏峯蒿糝不給深  
究立要之旨棲止清平山一日聞午炊作聲徹去  
疑滯返與國葺故宇薦至杭那時蓮居首啓禪期  
一時究心之士咸集請彖說法因秉鼓鼓示衆法  
要

祥符蔭曰白馬彖禪師眞參力究密證宗乘秘重  
大法不以禪師自居神廟時蓮居開禪期臯亭永  
慶闢枯木堂儀丰開谷二大師實以禪攝講淨而  
不滯理致不墮名言者也

辛卯十九年

法藏出家

藏得度於邑之五牧德慶院命名

壬辰二十年

沙門眞可禮石經於雷音寺感舍利放光

可書法華經以報二親薦入都門復潭柘古刹西  
遊峩嶇由三晉歷關中踐棧道禮普賢大士順流  
下瞿塘過荆襄一登太和住錫匡阜重新歸宗故  
址自皖公山北上探問石經遺跡掃琬公塔院啓  
石室佛座獲一寶函中有佛舍利若干出視光燭  
林壑適慈聖太后曩歲拜爲弟子命近侍致齋供  
乃紫伽黎可以偈辭有云自慚貧骨難披紫施與  
高僧福更增因請舍利進宮三日修敬出帑金重  
固於石窟慈山德清記之以文

癸巳二十一年

沙門南岳伏虎巖眞清寂

清字彖先湘潭羅氏子依伏虎巖寶珠得度參無  
字因舟觸岸有省戒行精嚴道聲藹著慈聖太后  
錫金紋紫方袍以褒崇之復慈雲禪刹是歲正月  
二十九日往生淨土

甲午二十二年

乙未二十三年

祖住龍池圓悟出家侍行

悟正月詣顯親禮祖爲師。祖以悟學道勇銳志期徹悟。命名圓悟。是春祖應太常唐凝菴請住龍池。悟爲荷囊而往。身任衆務。以至鬻薪陶器負米百里之外。雖刻苦事衆而參究益力。

愚山德清戊雷陽

清因前頒藏使者觸上怒併及之下鎖撫獄以私創牢山寺院遣戍雷州。清乃謂衆曰。佛爲一切衆生不捨三途。今東海戍戾車地素不聞三寶。名今予教化十二年。三歲赤子皆知念佛捨邪歸正。予願足矣。第以重修本寺志未酬。可痛心耳。乃離卽墨士民傾城涕泣追送下獄時。京城諸刹皆爲誦經禮懺保護。謂子中有然香煉臂水齋持呪以加護之者。在獄八閱月。冬十月發遣朝士大夫多褻服策蹇相送。安肅鄭大司馬範溪公子在金吾素未相識時。設燕會在朝。縉紳請救以至涕泣訴其無妄。

丙申二十四年 丁酉二十五年

戊戌二十六年

圓悟始納僧服

先是悟出家時。祖卽命雜染而苦願終身苦行。供僧役。故祖上下舟車悟隨行。有類厮養。後嘗正色語衆云。老僧三十一上侍先師參禪學道。都在作務裏辦。汝輩要安坐修行。耶。老僧不願叢林遺此法式。是年四月八日始納僧服。

無明經和尚住寶方元來參謁契悟

經省悟後服勤左右。日夕溫研影不出山者二十

四年。出住寶方時年五十一矣。

經住山日有僧問住山前曾見何人

經曰。總未行脚。僧激之曰。豈以一隅而小天下乎。經善其言。遂徧參。連池宏達觀可慈山清語各投契。

來廬州舒城沙氏子生而白衣重包。輩酒性絕年

十六。禮五臺靜菴通公。修空觀五年。參壽昌經於

峨峯。不契。復謁於寶方。經問蟻子解尋腥處。去蒼

蠅偏向臭邊飛。是君邊事。是臣邊事。來曰。臣邊事

經曰。大有人笑。你在來曰。先所論皆是。到這裏因

甚不是。經曰。此一不是。彼一切都不是。一日如廁

沙門眞緣焚身供舍利塔

。是月二十五日。茶毘於寺後之塔山。用綿纏體。

使心開意解。近代如君山永隆禪師。救免沙彌北

地花子觀音議開戒壇及緣三人一者爲佛一者爲法一者爲僧吁彼三師者若非多生成熟即是再來菩薩良由一切色身三昧利及無量有情而見於是也

己亥二十七年

悟掩關龍池

庚子二十八年

元謐謁無明經和尚於寶方

謐字圓然一字見如詣寶方一見傾服求剃度經難之遂抵撫州禮法師鐙祝髮來寶方充火頭屢呈所見經皆不許經遊勘諸方謐隨行後往金樓峯力參歲餘一日因推磨失手有省詣經呈偈曰累我多年繞處尋無端石塊解翻身老儂問我何緣故眉目依然面上橫經曰前三句卽不問後一句是如何謐云不堪雪上更加霜經曰今日且放過夜坐菜園偶聞蝦蟆聲當下身世一空無法可喻偈曰虛空逼塞一聲蛙水鳥含靈共一家十字街頭閑意思自歌自唱哩蓮花

辛丑二十九年

藏乞戒雲棲

時朝廷戒壇未開先授息慈戒

元鏡參經和尚於寶方

鏡字晦臺號湛靈建陽馮氏子參寶方力究諸祖誦訛公案偶閱圓覺隨順覺性章豁然冰釋經印以偈

勸山德清興復曹溪祖席

先是清與達觀可共念禪席陵幾皆由本源壅蔽欲往曹溪以澹法脉而清遣戍至雷陽制府戴觀察任南韶道任皆感服清德化延入曹溪時曹溪四方流棍集於山門開張屠沽穢汚之甚積弊百餘年矣墳墓率占祖山僧產多侵之且勾合外棍挾騙寺僧無敢正視者清歎曰此心腹之疾也苟不去則六祖道場終將化爲狐窟往白制臺戴戴曰無難也試爲公力行之卽下令本縣坐守限三日內盡行驅逐不留一人山門積垢一旦如洗開關路徑重修祖殿一二年間百廢具舉

祥符陰曰大師嘗曰吾師佛聖人出家學道乃止雪山修行蓋雪山清涼處也衆生爲五欲煩惱之火晝夜燒煮而欲其出離非置之萬仞冰雪之中使之徹骨嚴寒又何以止烈燄免銷鑠哉大師初行脚卽決志登五臺向清涼絕頂於慈山冰雪堆中撥出老屋數椽子然居之一日經行立定忽覺萬境澄湛唯一大光明藏圓滿如大圓鏡山河大地影見其中自覓身心了不可得從前疑會當下頓消出定視釜已生塵矣從此以淨光明幢到處作大佛事乃至荷戈投荒入炎瘴饑癘之鄉身坐尸陀林而心遍作清涼散今讀其從軍詩有曰火宅誰堪避清涼自可求則知師雖乘願入此熱惱叢中布慈雲灑甘露然非從冰雪懸崖一迴撒手過來亦何能法法無生得大自在也至潛復曹溪一段公案則又法苑一大快事而以逆緣得之所謂順逆皆方便也師真可謂大雄後勁矣他日詠大雪則又曰回想六年饑餓處令人不覺鼻頭酸噁痛定思痛難矣哉

居士幻寄瞿汝稷集指月錄成

錄凡三十二卷始自七佛終於大鑑下第十六世節次詳明旨要該悉雖儒門所集而衲子使之壬寅三十年

祖移錫燕都圓悟監龍池院

是時講席盛行衲子相見不齒向上祖孤任單提儼然汾州嘗舉門前冷落車馬稀老大嫁作商人婦語辨驗方來衲子士大夫罕契其機無異來和尚住廣信博山

癸卯三十一年

圓悟銅官山悟道

秋過銅官山豁然大悟昭昭靈靈之境一時打徹情與無情煥然等見覓纖毫過患不可得

漢月藏詣龍池

藏徧參諸方求真師走荆溪見祖至龍池下院知祖北遊見祖自題頂相而還

真可寂於詔獄

可庚子歲將往曹溪以潛禪脉泊湖口值權使紛

梗南康守吳寶秀被逮可驚詫曰其如世道何即策杖入都多方調護秀得末減妖書震發遂下詔獄金吾訊鞫對曰礦稅不止則我救世一大負傳燈未續則我出世一大負時忌者欲死之可乃沐浴端坐而逝次年秋塔於雙徑可氣宇雄毅面稟嚴肅中懷慈愍接機利物不假常情一棒之下頓欲勦絕是故歸誠甚夥而親詣者甚希然性耽山水若雲行鳥飛所受檀信四事紛然而服無餘衣重輿梵刹一十五所而居無常處除刻大藏凡古尊宿語錄及所著經論文集世所不聞者盡搜出流行喜蘇長公易解閱歷書必加額而後啓四十餘年脇不契席恒誦毗舍浮佛半偈曰假借四大以爲身心本無生因境有每每示人曰吾持二十餘年已熟句半若精二句死生了然矣有內外集行於世

祥符陰曰禪宗至神廟間波靡極矣得雲棲五乳及可一鼓作氣而後天童萬峰兩祖乘願崛興可尤秉真實心凜然以大法爲己任惜時無黃檗睦

州一流宗師縱奪之遂使可不能如臨濟雲門吁此今古之所以貴師承也可深慨五家綱宗不振後學茫茫無從趨正亟欲輯續傳燈辨明真偽乃以世緣掛礙貴志長往噫汨沒而至今日更自難言安得大乘氣象如可者一樹精進幢哉

甲辰三十二年

乙巳三十三年

弘儲生是爲靈巖

二月八日生於南通州李氏

悟監院入京省覲

四月偕圓修入燕京覲祖冬十月始達普照寺祖聞悟來先使人待之國門及至便問有新會處麼悟曰有祖曰有什麼新會處悟曰一人有慶萬民樂業祖曰汝又作麼生悟即問訊曰得得來省覲和尚祖曰念子遠來放汝三十棒悟便出

丙午三十四年

祖較空印正量論

晉僧肇依三諦立宗破小乘凡外妄見作四論一

曰物不遷二曰不真空三曰般若無知四曰涅槃  
無名大意謂本無實相法性性空緣會一義耳時  
有講師空印作正量論駁肇論故祖直駁空印之  
非

丁未三十五年

悟辭祖南還

戊申三十六年

正月南京天鵬聲  
如講錄旬餘乃止

無明經和尚住壽昌元賢從之剃染

經是年開塔壽昌賢建陽蔡氏子幼補邑庠讀書  
僧寺聞僧誦經至我於爾時爲見清淨光明身不  
覺心大歡喜閱之又茫然意旨乃往問經經勉看  
乾屎橛話年四十親歿棄家往投經剃染一日經  
自田間歸逆問曰如何是清淨光明身經振衣而  
立賢曰只此別更有麼經拂衣便行賢隨入方丈  
不及啓口經連打三棒曰向後不得草草

己酉三十七年

律師古心如馨開戒法於金陵靈谷法藏從之圓戒  
時戒壇久闕馨開南山法門戒儀一新藏得圓戒

庚戌三十八年

禪師法藏住海虞三峯

藏徧求真師時禪風絕響乃遊方至海虞北麓見  
烟一穗起深樹間藏曰此有隱者撥草而進豁流  
繞門鑿鏘然古院沉寂主僧曰師氣宇非常人三  
峯集東南靈秀師宜住此山藏曰我亦樂之院久  
廢藏攜四五苦行力參如風穴當年

辛亥三十九年

祖自燕京還龍池

祖付圓悟衣法

祖自北歸南遊越窮天台龍湫諸勝庚戌歲杪還  
龍池祖一日陞座召悟悟近前祖舉起拂子曰諸  
方還有這箇麼悟震威一喝祖曰好喝悟連喝兩  
喝歸位祖顧悟曰更喝一喝看悟卽出法堂明日  
擣鼓上堂以大法印付之

三峰法席成

五乳弟子包福明十餘人破家成三峯叢席額曰  
清涼禪院

慈山德清敕還

壬子四十年

三峯藏悟道

二月朔藏八百日不語死關才上蒲團忽眩暈歐痰一斗遂放身熟睡如墜千尺井中求出相似手足都無攀攪至第五日已間方深睡窗外二僧夾籬拗折大竹聲若迅雷頓見虛空粉碎大地平沉人法俱消一真不立盡大地覓纔毫過患了不可得無有譬喻能喻揭開從前文字但見紙墨義理了不關照端坐終夜如彈指頃無思惟中觸著趙州云我在青州做領布衫重七斤凡古栢樹子乾屎橛新婦騎驢阿家牽八角磨盤空裏走至雲門扇子踴跳上三十三天種種三昧一時見前因勘破向來橫說豎說行棒行喝總未是向上全提在所以雲門道盡大地無纖毫過患猶是轉句不見一色始是半提直得如此須知更有向上全提時節儻臨濟不會得黃檗佛法無多子德山尙疑天下老和尚舌頭何能棒下成等正覺喝下成等正

覺耶後復深研立要之旨從梅花菴當時閉關疽發於背不自覺忽推窗見黃梅墮地千門萬戶劃然天開

癸丑四十一年

甲寅四十二年

湛然澄和尙開法雲門

慈山清返初服

臨濟第二十九世禹門祖示寂

二月十二日圓寂

禹門祖付天童悟磬山修雪嶠信抱朴蓮四人諸家法脉正在繁衍書則不勝定則未可年紀止於禹門宗統之歸須俟後定

歷年表曰自宋高宗丁巳紹興七年至明神廟甲寅萬歷四十二年凡四百七十八年其間正宗法脉時汙時隆大道機宜若顯若晦南渡晚葉猶重法以尊師理學名儒或內秘而外見元廷隆禮遇於尋常明時尊崇著之令典碩德耆縉盛行南北英流俊納不減宋唐鬱鬱以興繼繼相成但以兵

焚頰仍雲山深隱微言妙義多霧晦以烟消斷簡殘編每蛛絲而蠹篆禪林文獻遂致渺茫法苑誦訛因之流播然真傳大意授受明之機緣正續雄風紹述後先之次序皎然如冰輪霜洗光藹徹乎中天儼爾似靈蟄春回聲隱蟠於大地高峯中峯之冷嚴而韜晦萬松雪庭之圓敏以精持皆所以深培厚蓄而伏隆隆振振之緒於未艾圓通禹門凜乎太華之雪照晨曦嵩少宗鏡冷然玉井之泉流夜壑此其九鼎之繫縹緲未墜單絲千鈞之機舉發方期鉅力焉矣

宗統編年卷之三十

宗統編年卷之三十一

諸方略紀上

臨濟宗統止於禹門曹洞宗統止於宗鏡從明季至

皇清康熙二十八年己巳其間諸方之出處大段有年月可徵見聞所及者附書年甲之下曰略紀俟後之宗統定而詳系焉

乙卯萬歷四十三年

正月悟和尚心喪伴松龍池傳祖臨寂命悟繼住悟歛銘闋彩三年泯泯心喪山頂高寒焚香却坐簡古公案近二百則爲之頌發明法王宗統如化寓方君前臣名示至尊無外也故凡皆書名宗統未定諸方名分不一通書和尚從法門稱謂也七月四日雲棲株宏蓮池大師寂宏仁和沈氏子年十七補邑庠每書生死事大四字於案頭一日失手碎茶甌有省作七筆勾見志投西山性天和尙祝髮北遊參徧融後謁笑巖祖於柳巷南歸過東昌道中聞譟樓鼓聲忽悟偈曰二十年前事可

疑三千里外遇何奇焚香擲戟渾閑事魔佛空爭  
是與非重復雲棲古刹以淨業普攝三根汲汲孜孜  
專精無間以法利生縑素咸稱古佛問參禪念佛  
可得融通否答曰若是兩物用得融通著半月  
前預知時至西向而逝

丙辰四十四年

十二月悟和尚奉傳祖骨入塔

丁巳四十五年

七月京師怪風  
八月宣府天陽地震

四月望日悟和尚嗣席龍池心喪既畢衆請開堂  
同門初若易之一陞座衆屈服爲之改觀

慈山清大師自五乳抵雙徑弔紫栢可大師襄舉  
塔事入雲棲弔蓮大師留二旬發揮大師生平密  
行至有聞而泣者銘其塔旋至吳藏和尚同錢受  
之太史延至三峯

寒灰聞谷二老宿以徑山法席久虛同諸士大夫  
請藏和尚藏辭之

戊午四十六年

正明十七日壽昌慧經無明和尚寂經住寶方峨

峯壽昌三利別建庵院二十餘所七旬尚混勞侶  
耕鑿不息丈室蕭然惟作具而已益王嚮德深加  
褒美每歎曰去聖時遙幸遺此老十三日示微疾  
至十七日蚤取水盥漱拭身曰不必再浴索筆大  
書曰今日分明指示擲筆端坐而逝茶毗火光五  
色頂骨諸牙不壞卽於本寺方丈建塔

己未四十七年

庚申萬歷四十八年  
泰昌元年

熹宗愍皇帝

辛酉天啓元年 壬戌二年

癸亥三年

悟和尚住通玄開堂演法有通玄峯頂別是人間  
之語夏六月始定九旬安居之制深山曠野相依  
禪子十數輩多正因行脚之士而茹堂草榻不倦  
隨拂寅夕提策往往有開發者

黃山惟安普門大師寂安邵縣奚氏子幼孤賤苦  
行矢願精勤鍛鍊萬歷三十二年立黃山道場破  
雪登奇捫蘿陟峭得黃山之勝地賜額慈光寺兼  
滲金佛像天啓三年至夫椒祥符厨粟無炊七日

不餐。是時權璫播虐。人不聊生。安矢心化濁救民水火之中。挈杖而北。行至清源之乘願村。是安十年前所建。少傳蓼水朱公留結。夏六月十三日。跌坐說偈而逝。廣護居士中丞許鼎臣銘其塔曰。安志氣猛烈。從萬死一生中悟無生法。骨力挺堅。從斯養卑賤時。證尊貴性力。參涉險如少林五臺。太行諸處。不啻人烟一飯。少山雪獨行深。再上五臺。斷惑證真。前後際斷。禮空印呈。偈人爲無明用。安能用無明人受煩惱。使安能使煩惱初不識字。而字從心生。初不立言而言如泉湧。所過開設叢林。用棒喝以成上上之器。用煉魔以接中下之機。嘗曰。究心必集法。忘我必爲衆。無慧之福。癡無德之慧。狂以法破人。未嘗以人破法。有不像語。諸錄可謂苦行貫天地。大慈包古今者也。祥符陰曰。神廟之際。宗旨式微。如九鼎系單絲。其時諸方多以苦行持之。如火場水齋煉魔等。雖皆不無偏枯。然精神力用實足以祛救衰靡之病。如普門大師者。生平於逆風惡浪中操慈航以接人。可謂險夷一致。

其自敘行實。幼時鄙賤。一無所諱。黃山槃菴志和尚嘗曰。若普門大師者。可謂具大人知見者也。許青嶼侍御嘗述大師住祥符曰。先大中丞廣護公同張清惠二無公入山問道。丈室留餐。卽大衆黃蘗糠糲中丞公曰。弟子卽得張公初入道。恐未諳此蘗淡風味也。大師鄭糠糲起曰。我非以世法奉承檀護僧也。噫。今禪門鄙習已至不堪安得如大師者一力挽哉。

十月十一日。曹溪德清慈山大師寂清返僧服後。結庵五乳峯下。六時刻漏。專修淨業。居四年。復往曹溪沐浴焚香。集衆告別。危坐而逝。世壽七十八。僧臘五十九。清長身魁碩。氣宇堂皇。所至及物利生。機用善巧。所著有楞伽筆記。華嚴綱要。楞嚴懸鏡。法華鑿節。楞嚴法華通議。起信唯識解。觀老莊影響論。道德經解。大學中庸直指。春秋左氏心法。夢遊集。清興復。曹溪備載中興錄。建塔於曹溪之天峙岡。弟子吳應賓錢謙益銘塔。陸夢龍述傳并碑記。小師雲居觀衡作曹溪中興傳。靈巖擔雪儲。

贊序曰。昔吾通陳大司馬節制兩粵。歸對鄉先達。曰。仕宦不足道。我得見慈大師。視僧中之龍鳳。儲童子時聞此語。及脫白。寓峯月朔望雲集。必首禮五乳堂上大師。特上方丈。請示先師曰。曩者匡廬從遊慈山大師也。問其道品。則曰。果位人也。往來胸懷三十年於茲。盡發其書而讀之。恨不曾身侍五乳也。眼中見宗門稱師匠者。絕非大器。深夜敬禮先佛。世尊願得如五乳紫栢法王氣象者。荷綱宗於末法。茫然感歎。虞山宗伯所謂深山大澤。龍亡虎逝。則變怪百出。誠法門金石之論也。爲之贊曰。敬飯禮法中王。譬之材爲棟梁於過去。遠有光後世。思勿能忘。

三峯藏和尚集宏戒法儀成。自戒壇久闕。儀法亡失。藏以參禪者。務持律以固禪宗。受戒者。當參禪以求戒體。乃考求古規。會歸宗旨。爲諸說戒之儀式。曰宏戒法儀。諸方遵而行之。

甲子四年

七月朔封三界伏魔大帝  
神威遠震天尊關聖帝君

悟和尚開堂金粟山廣慧寺。四月到寺。冬結制衆。

盈千指破山。明石車乘瑞白雪。皆在座下。漢月藏爲首座。藏謁悟和尚於金粟。請示臨濟宗旨。來源和尚特上堂。學黃檗見百丈文舉。再參因緣。黃檗不覺吐舌。丈曰。子以後莫承嗣。馬祖去麼。檗曰。不然。因師舉得見馬祖大機之用。然且不識馬祖。若嗣馬祖。已後喪我兒孫。丈曰。如是如是。見與師齊。滅師半德。見過於師。方堪傳授。子甚有超師之見。故臨濟三度問佛法大意。三度被打。濟後出世。惟以棒喝接人。不得如何。若何祇貴單刀直入。藏出衆便喝。和尚曰。好一喝。藏又喝。和尚曰。汝試更喝。一喝看。藏禮拜歸位。和尚復喚顧藏。舉僧問古德。朗月當空時。如何。德曰。猶是塔下漢。僧曰。請師接上塔。德曰。月落後相見。且道月落後如何。相見藏便出堂。卽日請藏居第一座。制完辭行。和尚手書從上承嗣源流。并信拂付囑藏。

乙丑五年

丙寅六年

金粟冬制衆盈五百五峰。學爲西堂。

春三峯藏和尚開堂蘇州北禪冬住杭州安隱金粟悟和尚專使送法衣至

冬十二月紹興雲門顯聖圓澄湛然和尚寂

丁卯七年

梵伊致和尚繼席三峯致海虞陶氏子事三峯藏和尚爲侍者令參竹篋話時三峯初關支石爲牀縛籬爲壁值隆冬寒風砭骨乃詣庫司乞紙藏聞而怒曰汝不念歲月飄忽已事未明反瑣瑣牀席間希宴安耶後凡有所問卽詬罵不已一夕經行至五更時聞松濤大作有省復力參遂入堂與繼住三峰

毅宗烈皇帝

戊辰崇禎元年

三峯致和尚寂

己巳二年

春藏和尚結制海虞天甯制解四月到萬峯吳江令熊開元建說法堂請藏和尚開堂

八月金粟悟和尚受福建黃檗山萬福寺請九月

歸龍池掃傳祖塔還展先塋入鄧尉山天壽聖恩禪寺掃萬峯寶藏兩祖塔嗣法主席漢月藏率大中丞趙士譔孝廉周永年等請陞座郡之士矜皆齋候於城東之瑞光寺萬衆喧闐街衢巷陌爲之不通乃登塔之絕級一受瞻禮過虎邱掃隆祖塔闔寺辦嚴而譔逐愈甚遂不及舉七而還過松陵舟人不敢維舟近岸僅於中流受熊明府開元一齋

八月杲朴蓮和尚寂嗣龍池傳祖住湖州淨名

九月瑞白雪和尚住顯聖雪桐城楊氏子謁紫陌可授以毗舍浮佛渴禮雲門澄一日聞鐘聲大徹擢第二座參學時無被臥不解帶者十三年開法鍛鍊學者不假辭色

冬悟和尚結制衆一千學費隱容爲西堂

藏和尚開爐梁溪錦樹院付一默成問石乘在可證頂目徹有四雄玉兔出龍峯北禪寺迦葉尊者瞬目之瑞繼起儲投萬峯藏和尚出家破山明和尚住嘉禾東塔明蜀之遷氏子聽講楞

嚴至一切衆生皆由不知常住真心有疑出蜀偏參懃山清博山來雲門證皆不契乃住破頭山猛力參究一日立萬丈懸崖上自誓曰悟不悟性命在今日了辰時立至未時眼前唯一空明世界忽舉足墮崖損足至夜半翻身覺痛有省天明曰屈屈參悟和尚於金粟悟問內不放出外不放入正恁麼時以何爲界明日竿頭絲線從君弄不犯清波意自殊悟領之

問石乘和尚住焦山乘竟陵熊氏子初遊黃檗雲門金粟之門後參三峰藏和尚力究二載一日侍立次有僧問藏曰十方無壁落四面亦無門時如何藏震聲大喝乘從旁省悟乃歎曰和尚接人直如還丹一粒點鐵成金也服勤六載受付出住焦山楚王嚮道化致書幣請法

庚午三年

春悟和尚赴闍川黃檗請三月二十七日入院四月十五日開堂

頂目徹和尚繼席三峰徹字幻空金陵栢氏子少

孤失學知事佛嘗習業緇染家客吳門從古心律師受優婆塞戒二十四歲投三峯披剃乃乞戒藏和尚執收飯之役藏一日問曰出家奚事徹曰將學經藏曰循行得字頭已白矣其奈生死何徹駭然曰若爲卽得藏曰顧子如木石且持偈發慧去口授南轍偈俾持之徹繫念不輟三年不少懈一日忽覺風聲鳥語皆轉此偈自念至此何故不知此意因求進七日關力究之足纔跨門目前一進大地平沉頓省偈義亟趨方丈擬申問藏卽打趁旣而示一歸何處話徹罔解厥旨時值上元雪霽有擲雪羅漢於庭藏令衆僧作頌以驗悟解徹倩書以呈偈曰虛空一尊雪羅漢思惟盡處阿誰判一片冰壺難指擬恰來正是正月半藏嘉賞之乃曰惟爾幻空潛蛟伏虬若遇春雷倒嶽傾湫後一日聞竹椅倒地作聲豁然大悟藏爲助喜命字頂目遂繼三峯法席

漢陽方伯蕭伯玉并楚紳士請藏和尚住大別興國寺却之

秋博山元來無異和尙寂來住博山上堂曰博山今日不說有法不說無法不說亦有亦無法不說非有非無法離四句絕百非石人點頭青山皺眉深寒博得三春暖破霧披雲入翠微將示寂闍首座問和尙尊體如何來曰儘有些子受用座曰還有不病者也無來曰熱大作麼座曰來去自由請道一句來爲書歷歷分明四字投筆坐化塔全身於本山之西峰祥符陰曰博山雖未分明付授然雪關闍出世於瀛山嵩乳密闍化於檀度空隱獨開法於羅浮竹山嚴韜迹於獨峯皆拈香承嗣而法脉永湮蓋博山秘重密嚴而闍等久親實證各有所得不敢辜負非今之承虛接響者能藉口而望頂背也

東苑元鏡晦臺和尙寂鏡號湛靈建陽馮氏子嗣壽昌經開法於仙亭一枝山退隱武夷風韻孤峻儀部黃端伯銘其塔

八月悟和尙離黃檗

九月瑞白雪和尙住紹興延慶

辛未四年

元日悟和尙在吳北禪寺受明州司李黃端伯侍御祁彪佳請住阿育王寺上元日別吳門藏和尙侍送二月十五日到寺開堂三月過天童掃應菴密菴兩祖塔侍御李遵徐之垣等請主太白名山橋李太常吳中偉中丞徐從治給諫虞廷陞等請再主金粟兩郡交迎集衆決之衆譁主天童四月三日入院藏和尙自鄧山回立具德禮爲參首頂目微和尙住瑞光上堂有時電閃星馳金蛇尾後轟雷有時天高雲淨玉兔空中迷影有時入林不動草有時入海不揚波汝等諸人甚處見瑞光六月廬山開先智明若昧法師寂明海陵毛氏子驅烏揚之東隱少不檢將蹤迹天下名山水投宿潤州銀山見其經營嘈雜而方來懂懂不已怪問之曰將延三大師講楞嚴三大師者雪浪恩也視門勝曰楞嚴必稔前五卷者與牀歷急求楞嚴展誦不終日前五卷如建瓴下乃竟誦而恩至見之感切涕慕淋瀝不自禁誓將如今大師恩辯慧渴

澹無涯岸。愛明超逸。獨輸重奧。示精微。因綸貫諸部。納戒雲棲。叩禪紫栢。趨太行。伊闕。物色高人韻。士以淹洽百氏家言。囊中載寂音。僧寶傳。當山水佳處。出而吟哦。既而頓足。拊膺曰。嗟乎。我獨不得與此八十一人者同遊哉。則又泣復傲然挈之而往。陟匡廬。居古黃巖。遷開先生。平禪戒並急。而以首楞嚴爲講法之要。自謂於楞嚴有深證。叢林有味。楞嚴之稱。說法江楚吳越間三十年。身外無長物。四方遺問填門。隨手而散去。來不預計。意至則行。追隨者方喘急。而一笠翛然已莽蒼在望矣。手書別檀護誠門人。訖自詣龕室。跣趺笑謂衆曰。我且試耳。遂寂。山翁恣乃其手度。退翁儲從之。修東林淨業。

九月瑞白雪和尚住白雀

冬十月藏和尚赴揚州。天甯請士庶擁道。十一月浙人十復請結制安隱。繼起儲悟道。儲自期七日明道。至第六日危坐如塑像。堂中開靜。見兩行僧對問訊。噪然自落。積劫未明之事。徹底見前。亟趨

方丈。藏望見顏色曰。看箭。儲喝。藏曰。看箭。儲又喝。藏起立大呼曰。看箭。儲放身倒。時侍者于磐鴻燒香曰。儲兄何不禮拜。儲即下去。藏當晚小參。儲方作禮。藏問萬法歸一一歸何處。儲曰。恰恰今朝臘月初三。藏問與趙州衫子同別。儲曰。一滴水一滴凍。藏問如何是奇特事。適大殿撞鐘。儲曰。鐘聲咬破七條。

心空居士朱時恩集佛祖綱目。恩秀水人。凡四十一卷。起七佛終萬峰蔚祖。泛敘而不詳系。無當宗傳。

壬申五年

正月瑞白雪和尚經始弁山龍華

金山法肇縉雲和尚寂

癸酉六年

夏藏和尚住淨慈寺。藏受杭州兵轄蔡雲怡護法。聞子將殿印持忍公等請開堂。淨慈縉雲省發者。自豁堂岳燮雲璣前後二十五人入雲棲。掃蓮大師塔。衆請陞座。特示禪淨大旨。先是嘉禾人士請

住長水眞如寺吳門人不從至是大理朱大啓太僕李日華諸公力懇解淨慈制住眞如寺制中日提寂音尊者智證傳助顯第一義東園居士傳人華宏曇曰在昔余心嚮往三峰老人而恨未觀其書也有禪宿實視老人所提智證傳喜而驚嘆歎曰禪典中乃有是書耶立起如鄧尉咨決所疑老人多方垂手輾轉難擣一日請益問佛而答乾矢橛問西來意而答庭前柏樹子話推出樸子曰爭奈者箇何老人奮舉界尺劈破之曰百雜碎余嘗爾心開言下薦得馬祖以來拔地傾天用處於是以白衣執侍研究臨濟宗旨偶讀雲門錄至盡大地無絲毫過思猶是轉句不見一色始是半提直得如此須知更有全提時節胸中障礙頓釋乃知臨濟立法如舜在璿璣玉衡以齊七政千萬世天度範圍於斯雲門則夏正也中星之用未移故徹見雲門即透臨濟一句三玄三句一句臨濟雲門豈非均此全提時節也哉

少室心悅喜和尚應周藩請入汴寓給苑香林兵

憲曹應秋同諸士大夫問道無虛日  
破山明和尚住西蜀梁山太平寺

十月費隱容和尚繼住福州黃檗容福清何氏子初參壽昌經有省冒雨謁悟和尚於吼山便問覲面相提事若何悟以番菩提珠照頭便打容曰錯悟又打容便喝悟又打至第七打所有伎倆知見一時冰釋悟問熏風自南來殿角生微涼汝作麼會容曰水向石邊流出冷風從花裏過來香曰離了此又作麼生容曰放和尚三十棒曰除却棒又作麼生容便喝曰喝後響容曰更要重說偈言悟休去住黃檗上堂今朝初一好箇消息若還不會又是明日所以道舉一不舉得二放過一著落在第二山僧舉一了也是汝諸人如何委悉便下座問石乘和尚住楚九峯正覺寺

心空居士集居士分燈錄首維摩詰終宋景濂參禪學道分身應化師承有據者共七十二人

甲戌七年

磬山天隱修和尚住報恩修字天隱荊溪閔氏子

自幼失怙。鬻蔬奉母。弱冠聽講楞嚴。一切衆生。皆由不知常住真心。性淨明體。用諸妄想。此想不眞。故有輪轉。惕然知有生死大事。遂投龍池。幻祖出家。年二十四。得度。參父母未生前話。久未有入。一日。隨幻祖運磚。次有人說四大名山菩薩出見神通。廣大祖曰。這裏也不少。修便問。如何是這裏神通。祖曰。快度磚來。遂於言下。有省。一日。偶展楞嚴。至佛咄阿難。此非汝心。處打失本。參會幻祖北行。乃掩關龍池。力究雲門。扇子話。閱兩載。忽聞驢鳴。大悟。破關與同參密祖北覲。幻祖曰。別來三載。各呈似看。修進曰。人言北地寒。我說南方暖。寒暖不知。人窮人知寒。暖祖領之。次日入室。問歷歷孤明時如何。祖曰。待汝到這田地。與你道。修使喝。祖曰。汝還起緣心麼。修拂袖便出。命掌記室久之。印可。前後親炙一十八載。累命分座說法。皆辭遜。初入磬谷。值雪深五十餘日。炊烟懸絕。於饑禽野獸中安坐。晏如。次遷法濟。後住報恩。上堂曰。禪非解會。道絕功勳。妙體湛然。眞機獨露。不可以心思。不

可以意想。不可以言宣。不可以默照。不可以色見。不可以聲求。一念回光。便同本有。這裏透得。頓越三祇。坐斷報化。佛頭隨時著衣喫飯。還有向上一路在。

石雨方和尚住雲門顯聖明方武塘陳氏子。年二十二。因見雙塔僧行道威儀。有感。辭親出家。精修淨業。一日。擊木魚高聲誦佛號。有省。遂摘椎曰。不惟西方東土。亦不可生有一老宿聞而謂之曰。且莫草草。南泉三不是話。子作麼生。方茫無所置。答後閱楞嚴。至我真文殊。無是文殊。若有是者。則二文殊不覺身心世界打成一片。往參慈山清禪師。於匡阜往還叩擊。快說無生。後過雲門。時澄和尚爐韜洪開。方挾袂入堂。矢不語。刻期七日。徹證示必死無還生想。一日。聞澄上堂曰。放下著。頓覺通身慶快。即呈偈曰。平空一擲絕躊躇。轉眼風波徹。太虛會得竿頭舒。卷意放生原是釣。來魚澄痛加訶。斥揮之。而出一日。經行次。聞僧舉大慧淨剎菴枝話。遽豁然軒渠一笑。首座攬住曰。道道方曰。恰

值某甲持不語戒座奇之澄授斷拂一枝自號斷拂子退隱黃安錫子山俄面澄逝奔赴雲門復入天台一時四遠趨風王冢宰祁中丞請住雲門顯聖門庭日闢道望愈隆

天童悟和尚與萬峯藏書藏和尚提智證傳力闡綱宗諸方驚疑謗議競起悟和尚與之書曰祖師西來秉教外單傳別行一路自佛果作碧巖集大慧謂宗門一大變今吾徒提智證傳則臨濟宗至吾徒又一大變故老僧去夏與吾徒云當以本色本分者此也藏復書曰竊惟法門事大任荷自心者苟非深得祖宗的骨之髓那可承虛接響喪我兒孫中外洵洵之議何足知此血心哉蓋以法門建立之密千古萬古不能撲破藏謂宗旨未破則臨濟猶生也那可一時以舉揚之不易承接之無人便欲越過此宗別行坦路耶覺範曰此如衣冠稱孔門弟子而毀易繫辭三尺童子皆笑之其言痛切可爲寒心唯望和尚洞此至愚之誠鑒其玄要之請俾後世興起之人確有本分之據勿使狐

狠野狂瀾同獅吼則佛祖幸甚法門幸甚子孫幸甚靈巖儲重刻天童和尚七書三書序宏儲於崇禎癸酉在萬峯侍者寮見此錄歎曰大人哉用處乃爾爾丙子丁丑見此錄廣布鄉邑逮壬午以後問之來學禪林中流行漸少空山無事閒行至香乳寮復見此錄慮其日久湮沒隨命刷印房重梓流行宏儲生平逆順因緣一切消歸向上卽先三峰和尚前後復言慮不知者謂事襲於爭槩不行世茲刻蓋以昧昧然傳天童者唯恐是書之不行道豈有是非勝負乎哉祥符蔭曰佛祖綱要自神廟而後茫昧幾希而臨濟宗旨已同淪墜非天童祖一棒振其頽綱何以砥滔天之瀾然不得三峯祖力提血戰大聲而呼玄要主賓掃土盡矣是知非天童無以起臨濟之廣大非三峯無以盡臨濟之精微兩祖蓋互相成礪以逆爲用者也文殊起佛見法見世尊攝向二鐵圍山佛果作碧巖集大慧欲毀其板佛祖大機之用而可以聖見凡情測哉昧昧者分水火鑑左右祖則過矣

悟和尚却杭州靈隱之請

乙亥八年

天童祖席成。天童自晉義興開山。宋宏智中興以來。號江南第一法席。宋王安石有句云。二十里松行欲盡。青山捧出梵王宮。可想見之。滄桑代變。荆蘚荒涼。悟和尚自辛未夏。受請入院。至佛殿基。有虛空作殿。日月爲燈之語。乃作興修。偈曰。太白山下天童寺。洪水漂流殿如洗。普告四衆諸檀那。大家出手共扶起。至是年壽七十。天人師殿善法堂。寢堂丈室。皆莊嚴妙麗。如湧天宮。衆踰三萬指上。堂有不用材木殿閣。成見不勞斧斤。法堂本影不動。舌頭只向青天白。日下要轉便轉之語。

秋七月。臨濟三十一世嗣天童法三峰和尚法藏寂時。年六十三。春正月。吳江士大夫迎開堂聖壽寺。藏慨然曰。臨濟大師。至於今七百年。我鞠躬盡瘁。死欲倡明其道。而終不能大遂我志。今老且病。安能僕僕對世人。費口舌哉。終不忍其請。人曰。到寺告香。舉纜起宏儲潭吉宏忍立僧輪贊制完。

還山宗伯董其昌來謁於證心堂。自陳於臨濟無位真人語。有省藏。剔發痛露。宗伯躍然再拜。出語人曰。如出雲霧。四月朔。命侍司估倡衣鉢。設十方普會。齋撻鼓爲最後辭。衆上堂書從上源流并衣拂付囑。宏儲等五月朔。就證心堂設死關。自榜曰。歇處又自題云。佛法有人說。天山好自埋。天山晚年自號也。七月二十一日。泊然而化。十一月八日。奉全身塔於證心堂。後夜素光從塔起。直上如虹。亘天茂苑。相國文震孟祭文云。浩然剛大佛祖威。在其陶鎔。動若風雷。凡聖疇知其變化。倒日迴天。七百載宗綱未墜。茹荼集蓼六十年辛苦自知。讀者以爲得生平之概。宗伯董其昌撰塔銘。靈巖儲天山塔廟記曰。賢劫第四尊釋迦文佛直下六十九世。臨濟正宗淨慈藏和尚和尙望虎邱隆十九世。望楊岐會二十三世。望臨濟玄三十一世。不稱南嶽而專承臨濟。別四宗也。楊岐虎邱特表而出之者。石霜下出。圓頭道人南公。晚住積翠。有大名。稱當時與會祖爲二甘露門。嗣其法者晦堂真淨。

仰山雲蓋死心靈源草堂湛堂兜率法雲寂音諸老子孫赫然一時。我會祖得白雲端端得五祖演落落孤行五祖之子三佛佛果老人巍然號楊岐正脉佛果當時稱得人最盛。虎邱徑山傑出徑山負雄望如南公得記荊者九十餘人。楊岐正脉不私其子而偏歸我華祖。華祖爲虎邱單傳故虎邱之道獨尊。藏和尚波瀾如徑山峻拔如虎邱。生不逢諸老鷹驥之日。隆慶萬歷間法運衰涼。綱宗長夜和尚手捧日月安於九天。赤身支臨濟七百年已墜之業而猶慮威音已後無師自悟。遽爲師範則後學何所宗。承特請定宗旨於悟和尚師資道合響應。人天當是時。悟和尚之得和尚猶斷際之有慧照和尚。遂恣逸羣作略施無畏。具說將使一四天下合靈蠢動。昧略飛搖。同歸清涼寂滅法幢塗毒一聲魔宮震裂。至博通三藏之流支雲與瓶瀉之辨和威思聲南山之竹木佐其鞭笞。揚東海之怒濤。衍其流毒。悟和尚爲此懼。倒行逆。既百計奪之人不見其用。遂使及門之士恐道格綏行不

爾其父而爾其祖。嗟乎道之所在果如是耶。淳沱之言曰。第一句薦得堪與祖佛爲師。奈何奴呼菩薩婢視。聲聞而計名聞利養。以夫子之道反害夫子乎。當積翠徑山兒孫滿天下。我會隆二祖欲覓針鋒許插脚不可得。孰謂如來正法眼藏於是憑依。至於今遍照塵刹。我和尚之道光明無礙。踐履深嚴。靈骨所在龍神呵護。乾坤有毀天寶弗墜。道行詳傳銘不具載。稱淨慈藏和尚者和尚八坐道場而淨慈則五山之首。唐宋諸尊宿說法之席也。八月剖石宏璧和尚繼席萬峯。壁無錫鄭氏子。十七剎染坐閱華嚴五載。謁三峰藏得悟遍參諸方。見博山黃檗匡廬諸老。遊兩浙禮悟和尚於金粟。復歸三峰透徹臨濟綱宗付法。遂繼聖恩法席上堂曰。臨時眼目千古絕同。或縱或奪有始有終。電光莫及石火罔通若也。擬議白雲萬重。

丙子九年

春正月繼起儲和尚開法常州夫椒祥符禪寺。先是毗陵迎藏和尚住夫椒祥符藏願儲曰。汝既辭

萬峯可竭力於我父母之邦。宜主夫椒。到寺法堂。揭五宗要旨。室中出十二種日。旋三昧以驗。方來一時東南。諸子賢士大夫。目爲龍門。

二月。瑞光微和。尙開堂。金山龍遊寺。衆盈萬指。人皆謂圓悟再來。時值淮揚流寇將迫。微至寇遠去。先一夕。官守同感異夢。謂有肉身菩薩來。此地無恙矣。因是總戎領軍士裝束出迎。有司爭禮之。海岸居士黃端伯親見壽昌。不可一世。與微機緣相見。遂服膺。

七月。費隱容和尙遷建安蓮峯禪院。

潭吉忍和尙住杭州安隱忍。蜀之鄭氏子。少負才略。二十出家。自恨無真師。畏友乃汨沒於章句中。十有五載。每當山水友朋詩文適意之際。輒懷慚自責曰。我出家。甯爲此乎。卽道念勃興。發足南詢。至吳中。邂逅同鄉劉長情。孝廉見三峯語錄。不覺身毛卓豎。遂偕入山。請益藏。每詬詈不已。忍意失所求。遽辭去。往參天童。亦不契。後臥病武林。偶閱黃龍見慈明語。忽歎曰。古人笑怒皆方便也。亟還。

見藏於鄧尉。負病求入精進堂。衆以爲不可。藏曰。參禪致死。不愈於他病乎。師因激勵。神益旺。志益堅。或勸放參。自攝者。則避去。不欲聞。藏因忍聞。慧深入。恐猝不能枯。令究雲門折足因緣。有省。復舉。潞山有無句公案。徵詰研窮。久之。日臻玄奧。到寺日。拈拄杖卓一下。召衆曰。千佛列祖。頂顙與諸人一擊。洞開了也。設有撩起。便行底。脚下也好。與三十拄杖。掩關集從上列祖。悟由起。自釋迦終於天童三峯。凡六十九世。以盡臨濟一宗串珠。而下有建立者。有守成者。有扶救者。其間升降歷歷。可觀。使宗祖眼目不致委地。以待夫天下後世英傑者。出再振起之。曰。五宗教。凡十卷。祥符陰曰。五宗教一書。揭示佛祖精微。闡揚宗旨。肯綮實有。功於法門。但其間於天童三峯之際。只當論明道法。不當存諸形迹。諸方具眼者。以太虛圓攝之。而不分彼此。見斯爲善也。

九月。湖州聖日峯大香庵。曉法師寂香。吳洞庭名士吳鼎芳也。少工詩文。留心梵乘。鍵關闢藏。夢中。

感大士舒光印攝遂決志出塵年四十復因亡母感夢誠其出家以懺己罪乃宵征入雲棲雜染於蓮大師像前徧叩諸方志在扶教而於己躬下事實密證精微然不敢以禪自任開講說法道風秀出吳越之間所至一掃蕭如閑雲孤鶴不求伴侶而去住自如會心所至跌巖坐樹往往絕粒茶毗之夕旃檀香氣芬鬱累日不散遠近緇素禮敬得未曾有所有著有雲外錄明僧傳及道德經解等行世詩歌有皎然賁休之風持律冷然與世無忤孝廉夏元彬傳其生平塔於聖日峯之陰祥符陰曰唵嚩法師道韻風標足爲近今緇流坊表明僧傳摭拾見聞精核不膚後來有志燈傳者所宜參考也

冬十二月杭州真寂廣印聞谷大師寂印嘉善周氏子母夢玄武神仗劍率諸甲士擁護其門而生七歲嘗瞑目端坐父母送之杭州開元寺剃度後歸省親母誠之曰三朝新婦一世禪和子其勉之印每述其兩句終身受用不盡一日見壁間法界

圖問其師曰十界從心生心從何處生其師不能答時儀峯和尚結茅清平往叩之峰曰汝要會須妙悟始得印曰如何得悟去峰乃教看雲門露字印一聞使信直下挨拶至忘寢食尋上雙徑結茆白雲峯下看亮座主參馬祖因緣疑不能釋一日見黃瑞香花忽大悟曰却是虛空講得經祿磚瓦磔正堪聽向來扭捏娘生鼻錯認葫蘆作淨瓶於是往雲棲盡得蓮大師之益次參龍池幻祖機緣相契而不自肯祖曰更欲如何印曰視圓悟大慧爲多愧耳祖憮然曰當今學者未會先會那能得不自肯如子者乎老僧當避一頭地矣北遊五臺還真寂四衆懇請開堂堅持不允生平滴水滴凍不肯一念外馳洞透祖關終不以悟自居教律皆洞晰精微時或爲衆演說聞者靡不心服臘月辭衆告寂塔全身於孔青之陽

祥符陰曰龍門蓋觴砥定須憑天柱啓禪之間禪風以天童三峯兩祖而大振爲之先後左右者雲棲紫柏憨山三大士而外有真寂印鷺湖心儀峯

衆無念有諸公爲之防閑提挈。所以數十年來。令行吳越。幾欲復追唐宋盛時。今波流漸靡矣。安得挽回流俗者。一峻金堤之潰哉。

丁丑十年

春天童悟和尚。舉費隱容爲座元。時容自閩川解院事歸省也。六月。悟和尚却弁山圓證之請。

九峰問石乘和尚。應相國何芝岳請。住白門天隆。十月。天童悟和尚立朝宗忍爲西堂。忍常州陳氏子。

隱元琦禪師繼住黃檗。琦嗣費隱容。

冬十二月。荊溪禹門請悟和尚主法。辭之。

戊寅十一年

春二月。嘉興金粟遁乘石車和尚寂。乘金華朱氏子。閱龐居士問石頭因緣。有疑年二十六棄室出家。完具參天童悟豁然。侍悟七載。不惜勞苦。苦嗣法住金粟上堂。諸佛出世爲一大事。因緣達摩西來。指人見性成佛。金粟不諳老婆禪。祇要諸人棒下見血。若也恁麼會得。觸處逢渠。纖塵不立。垂手人。

●黃檗資

間和光化物。既然觸處逢渠。且道渠是阿誰。毫釐有差。天地懸隔。喝一喝。二月十二日。將示寂。僧問此後向甚處與和尚相見。乘曰。遍界不曾藏。僧作禮曰。恁麼則向這裏與和尚相見去也。乘曰。且莫錯認。泊然而逝。

三月。荊溪士紳以悟和尚臘高。宜歸桑梓。請住法藏寺。汪大心申狀略曰。和尚闡教海天。一切有情。皆得濟拔。唯荊溪乃和尚梓里。甘露未承。火宅難出。引領慈雲。有俟我後來之歟。吳洪裕狀曰。禪師爲法門龍象。海內瞻依。當此佛法傾頽。而師硬豎脊骨。肩此重任。所謂擠却一條窮性命。刀山劍樹也。須登非師而誰此大丈夫之事。非公侯將相之所能爲。興言及此。吾輩真當愧死。然度盡海內衆生。而於桑梓反怱然無情。冥然不顧。則法門所言平等者。果安在乎。此某某所以不能已於今日之請也。吾里中富貴者如油。入麪。永無解脫。賤者如北行南轅。愈趨愈遠。專望法席光臨。一爲指迷。謹此合詞。以請悟以衰病力却之。

五月十五日杭州安隱宏忍潭吉和尚寂塔全身於祥符寺之東山有安隱錄法嗣振西攢之入閩三遣於亂兵火寨中而獲存并五宗教行世

秋七月費隱容和尚補住金粟徵修傳燈錄明三百年間諸祖語錄散行字內多所亡失天童悟和尚遍求遺言如破菴無準寶藏東明寶峯本支祖錄皆無從考訂容住金粟念從上法脉所繫失今弗圖後彌不易乃啓行徵輯欲續五燈會元心燈錄後上下數百年間成一家言祥符陰曰會元濟宗至密菴傑祖而止心燈錄續其後未甚流傳以至元明以來文獻傳聞異同不一非唯定哀之隱桓幾等洙泗之杞宋矣費和尚住金粟徵修燈錄之舉可謂急所先務者也

具德禮和尚住雲門光孝禮會稽張氏子幼就立術長好空宗投普陀山薙髮旋遊講肆適聞三峯藏於安隱開法趨見之初究本來面目話一日窺鏡猛省藏未之許後充圓頭運糞下山因轉肩次匾擔連蹴豁然了悟機用橫出叢林有鐵紫之稱

既而遍參諸方仍依藏於鄧尉密契玄旨嗣法後住雲門光孝寺刀耕火種有古德風衲子爭依之己卯十二年

天童悟和尚會吳越護法及法孫三峯下諸山於橋李孫園三峰藏寂後一時僊逝者有三關七關之刻安隱忍因而作五宗教時天童和尚以修列祖塔與山鄰徐氏不合八月拂衣出山過虎林太史錢瑞星中丞洪清遠等咸執弟子禮留供養却之至吳出資囑方伯申青門解元楊維斗等修虎邱隆祖塔九月費隱容迎至金粟如橋李止孫集公園問道者如市有梅溪錄時舊檀護咸趨侍法孫三峯下祥符儲雲門禮等皆追隨護法王金如周君謨張二無邪季超等及天童諸尊宿共白和尚言法門不應異同當消釋之和和尚特上堂將從前葛藤一時斬斷祖孫父子一志同心迴挽道法十月和尚還天童舉林野奇爲西堂浮石賢和尚住青蓮賢平湖趙氏子父母爲娶室將親迎而逃於普陀剃染圓戒雲棲初參雲門澄

於東塔謁悟和尚於金粟付法

吳江華嚴宏鴻于磐和尚寂鴻毗陵蔣氏子性極聰敏少而失恃其父挈之登三峯求剌染俾之給侍久而有省藏一日上堂次鴻出作禮藏便打鴻曰已知神用且莫先施藏作鳴聲鴻曰當陽敵手請師進戰藏復以拄杖打三下鴻曰今日親見和尚便禮拜藏頷之溫研既久乃獲印記出住吳江華嚴嘗謂衆曰如今道眼不明出世者多也向高座上廣衆中拈起拄杖子胡亂打豎起拂子來欺謗人貪他恭敬利養如聾如瞽相似豈不賺煞人你道睦州一向閉門魯祖終年面壁是爲人耶不爲人耶臨寂謂門人曰吾滅後靈骨入普同塔中表生死不離大衆耳

冬十二月十五日少室慧喜心悅和尚寂

庚辰十二年

春閏正月悟和尚再却雪竇請先是丙子冬僧發光凡三請却弗赴至是復以宗伯顧錫疇之狀來略曰大師如鑒其誠而許之錫疇不難再渡錢塘

親送大師之雪竇疇亦擬構數椽於徐晃巖與大師之鐘鼓相聞亦浮生一愉快事也悟力却之夏國戚田太傅奉旨頒錫瑞光徹和尚金襴袈裟雪嶠信大師住廬山開先

牧雲門和尚住古南門管熟張氏子二十歲投破山洞間乘出家原名契門力事參究便有省入後參天童悟和尚於金粟以偈呈方丈悟略閱兩行問卽今事作麼生門擬議悟以番菩提珠便打門禮拜悟又向背築一拳曰你若作打會入地獄如箭射異日悟舉薰風自南來殿角生微涼驗衆門呈三頌悟看至末首曰不親切門曰前二首齊悟曰此不親切和前都不親切門便問如何是親切處悟便掌門卽豎一指曰某甲也悟曰你未知落處在門隱隱疑後上天童題萬松關偈曰古路松陰廿里長過時誰覺骨清涼悟曰何不道過時誰不骨清涼門於言下有省又作活眼泉偈寮中思索偶然停筆右手將左臂一觸忽然觸發直下湛然前所疑一掌落處不言而喻一時呈行由曰詣

實供通悟曰。者些都不是實消息。你再供通實消息。看門進前展兩手。悟曰。不是不是。門曰。和尚如今瞞某甲不得。悟曰。瞞即瞞不得。且惑亂你。一上後。乃付囑住古南上堂。拋下拄杖曰。撲落非他物。復擎起作舞曰。縱橫不是塵。汝諸人還見山河及大地。全露法王身麼。復擊香几曰。一片榆楠木。敲來響殺人。上堂向虛空中畫青畫黃。本無甚事。對無位真人說。生說死笑。殺旁觀卓拄杖。

辛巳十四年

五月國戚田宏遇。實紫衣入天童。請悟和尚陞座。八月田宏遇奏請奉旨。詔悟和尚開堂南都大報恩寺。悟以衰邁力辭。

朝宗忍和尚住曹溪寶林。忍先參三峯藏爲侍者。復參天童和尚於金粟久之。印可初住靈祐住曹溪上堂。諸佛諸祖。唯以一大事因緣故。出見於世。據實論此一大事。因緣不用開口。不用動念。直下一二天真。一一明妙。祇貴直截契證。超越死生。不離見聞緣。超然登佛地。所以世尊於明星祇得一

觀六祖於金剛經。直用一聞。諸公若也得恁麼一回。去便堪傳佛心印。方爲佛祖嫡骨兒孫。試問諸人。既是見成舊公案。又用舉作甚麼。迴機同本得一舉一回新。

杭州橫山兜率宏成一默和尚。寂成錢塘人。幼孤事母盡孝。年二十三棄室薙染。遍參耶溪明宗紹覺諸講席。因乞戒謁雲棲修六時課習。一心不亂。逢僧激勸參究。乃於祥符寺請寒灰奇老宿結制。成爲期主。適三峯藏和尚過。祥符奇挈成參問。藏曰。我若開示。只要悟去。無甚工夫。窻子與你擔。爾成遂上三峯。力參七年。不得契悟。時同參澹子垣策之曰。此事因循多年。若不明白。如何折合成。愧汗浹背。而不能答。是夕坐至四鼓。垣又舉竹篋話詰之。成方擬酬對。垣以手薰掩成口。遂有省。乃曰。我會也。垣曰。會則且置。祇如生死到來時。如何成便喝。曰。一喝意旨如何。成曰。截斷老兄舌頭去在。遂趨入方丈。呈所得藏領之命。居第一座。天啓乙丑藏著五宗原付室中四子。而成居其首。越四載。

藏復以源流衣拂授之住兜率院僧問如何是佛  
法的大意成以拄杖拄其口曰急急如律令僧  
擬議成連打三棒塔於鄧尉

祥符儲和尚入天台儲住祥符六年直指堂五宗  
門風垂問臨濟門風廣大圓備囊括千差包羅萬  
有函莽者得其相似穿鑿者失其指歸三要印開  
朱點窄未容擬議主賓分觀體全彰底何愁不眼  
目定動孤蟾獨耀江山靜長嘯一聲天地秋隨緣  
瀟灑底幾時得脚跟點地果是龍生金鳳子何難  
衝破碧琉璃三峯先師謂臨濟一宗跨四家而獨  
步未免抑人揚己少縱多擒山僧道主賓互換責  
在機圓事理雙關應須眼俊君臣向背莫犯當頭  
父子唱隨難分兩口識得心外無法何妨滿目青  
山苟非句裏該玄那許通身鐵壁門風雖異堂奧  
匪殊融鑿五宗方稱大匠○藏雲室十二種日旋  
三昧①生佛未形②爾然素潔③智心識不到④通  
恨塵方⑤旁通一線⑥乍卷乍舒⑦山萬仞壁立  
堪讚歎⑧許汝商量⑨開遮自在⑩湊泊還難  
有二歧路⑪應物隨機⑫和合諸塵⑬披毛戴角  
不可不知⑭熾然無間⑮不入衆數⑯佛眼難窺

①十字縱橫一真不立 儲涌老成凋喪宗風衰下禪林踈遇  
日繁乃抽杖入天台至則館於蒼山下慧日破院  
十月百癡 和尚住建甯蓮峰嗣金粟容

慧刃銛和尚補住祥符銛武進柳氏子參三峯藏  
和尚於鄧尉究雲門折足話一日藏晚參舉話畢  
有僧纔出藏起身便出法堂銛忽有省作頌曰纔  
來便知兩門關箇中力重破千山若問當年折足  
意至今露柱血斑斑藏可之一日值藏上堂次銛  
才出藏曰第一句不許問第二句不須問銛隨聲  
便喝曰且道是第一句是第二句藏便打銛禮拜  
而出既而執侍巾瓶日臻玄奧遂獲印記初居武  
康山之淨名院繼住湖之高峯雙髻後住毗陵祥  
符上堂藤樹交加仔細參並頭拄杖語喃喃夜深  
雙影抱明月輾作連環玉一團僧問如何是號令  
佛祖底句銛曰獨踞妙高峯又問如何是開示人  
天底意銛曰竿頭通一線  
壬午十五年  
春正月悟和尚歸天台通玄

三月儲和尚住台州能仁

六月十六日紹興東山明澈爾密禪師寂渡爾雲門澄晦迹東山香雪塢有大鴻之風

七月七日臨濟第三十世天童圓悟密雲和尚寂於通玄天台縣百里內居民咸見通玄峯四山變白夜有流光如火照耀巖谷門弟子奉全身建塔於天童山幻智菴之右隴嗣法本陳忞年譜後述師以海山容納之量誘掖方來凡聖一日之懷等觀大地說法不帶枝葉爲人絕諸廉纖操惡辣鉗鎚單提持向上碎莽蕩二見之窠窟剪差宗異目之稠林微犯必詞纖情不順所以士大夫中往往有聞時富貴見後貧窮者多矣況諸學子一以從上綱宗納諸海印三昧苟有差互痛與排斥昔人稱佛印元率牛蹊人之田而奪之牛元弗惜師亦有焉力爭祖命靡愛歎身卒俾少室重光濟河復漲三十年間風行草偃馳走天下宿禱嚮往一世鴻儒道滿神州名傳紫閣愚頑知慕德率土盡欽風故遷化則掃邑空都來施則傾廩倒橐坐立之

際千指圍繞願盼之餘蜃樓幻出雖晚年謝跡名藍投身絕壑而蠅趨蟻附奔轅愈殷及夫慧日停輝慈雲掩彩四方聞訃如喪所生千里哭臨有同儒慕山川爲之變色太白況乃效靈童子指點古樓則皆師生平教澤所普被至行所感通若其約束持身之法紹先啓後之謨動必合章程必該典則可謂津梁百世師表人天者也

碩機聖和尚住焦山聖荊溪巫氏子六歲始能言七歲聞鄰老云一子出家九族昇天忽發夙因求出家父母不允年十九病劇幾死泣告其親遂送邑之淨名院斷髮未幾而病愈卽受具於澄古鑒律師學戒五年乃遊講肆意終不懷謁三峰藏參萬法歸一話經二載一夕在月下經行至夜半露地跌坐忽爾身心世界蕩然一空至五更驚地聞鐘聲如迅雷擊開頂門相似起而移足宛在虛空中行一步過了千萬里一般藏曰此乃輕安境界耳遂痛策之經年終不能契旨遂辭職出山歷參博山來黃檗有二老宿益加迷悶因參天童悟於

金粟屢遭痛棒。歷四十餘日。會有一僧問話才開。口悟便打聖從旁猛省。即向前接拄杖一送。送倒曰。老漢今日瞞我不得。隨後便掌悟領之。依止四載。復歸觀藏。給侍左右。朝夕咨扣大法。洞然藏以竹篋衣拂珍重付之。出住潤之焦山。後遷湖之高峰。上堂雲。封谷口。霧鎖長空。把斷要津。不通凡聖。汝等諸人。向甚處下脚。衆中還有見義勇爲底。褊子麼。良久曰。騎驢馬。繞須彌。過山尋蟻穴。能有幾人知。

駕湖妙用禪師。寂用從。與善廣得悟。晦迹吉陽山。與雪嶠信大師善。

癸未十六年

本陳志和尚繼席天童。志學之茶陽林氏子。幼有宿慧。因讀大慧杲錄。忽憶前身雲水。多方歷歷如見。即日走匡廬。開先投明法師。薙染明以志志慕禪宗。爲舉五臺婆子話。遂於言下薦得趙州意旨。自驗生死關頭未破。徧參慈山清黃檗。有諸尊宿終不自肯。後參悟和尚於金粟。機緣不契。直趨雙

徑謁語風信。信問。曾到金粟否。志曰。曾到。曰。曾問話否。志曰。不曾。曰。你怕打那志。曰。某甲一向不曾。置得問頭。請師處借轉問。頭信乃開示。志不肯復回。金粟舉前話。悟曰。你喫飯還問人。借口麼。志擬議。悟便打。後因參殃。輻產難。因緣打破疑團。始明得從上古人關鍵。凡居侍司。掌記室。親炙悟者一十四秋。日臻玄奧。繼席天童。上堂曰。擊道存鋒銳。不犯頭頭顯露。物物全彰。猶是因高就下。曲爲今時。況復言中取則。句裏呈機。舉古明今。拈三攝兩。大似鄭州出曹門。何異南轅而北轍。殊不知當人脚跟下立地一著。如天普蓋。如地普擎。抽一機則千機頓赴。展一目則萬目畢張。透聲色。絕遮欄。互古互今。無處所。還生死。得伊麼。還汗染得伊麼。還榮枯得伊麼。還推遷得伊麼。縱有德山棒如雨點。也則打他不著。臨濟喝似雷奔。也只無伊下口處。更說甚麼百問雲興。千酬瓶瀉。一毫端際。出見無盡身雲。一舉步間。遊歷無邊國土。正是泥裏洗土塊。蝦跳不出斗。諸仁者。從上既有如此廣大門風。

穩密田地何不推他阿爺向後放出渠儂一頭與麼直截承當去正恁麼時接續流通一句作麼生道卓拄杖曰天高羣象正海濶百川朝

寂光三昧律師應詔修建南京大報恩殿勅黃甫宣菱蘆蕩中神木湧見光率衆昇致皆懷楠巨材遠近驚異

雪嶠信大師住嘉禾東塔

林野奇和尚繼住通玄

萬如徽和尚補住龍池

五月聖壽海印印乾法師寂乾廣陵韓氏子分座於京口聖壽悟心融講席下往來巢松一雨若昧法師之間已講貫無滯自念長水從瑯琊開發太原孚因禪納悟明德山鑒擔青龍鈔出蜀擬掃南方魔子而卒自焚於紙燭下宗門豈無長哉我未達耳乃謁博山來於天界尋因山茨際參磬山修力究十有九日而省修益鍛鍊器重之復見悟和尚於天童親炙逾年將抗迹西山而山茨際初住東明老屋敗椽僅蔽風雨乾毅然往佐之東明由

此復振歸京口省融棲八公洞融寂委以聖壽非其志也而義不可辭甫一年而談對坐逝山翁恣和尚傳其生平

十一月杭州顯甯宏垣澹予和尚寂垣姑蘇朱氏子狀貌豐碩有玉彌勒之稱十歲出家於太倉聖像寺十五夢遊地獄遂醒悟人世之幻由是求道念切十九參雲棲問如何是佛知見棲笑而不答垣疑之後謁三峯藏參萬法歸一話稍有省悟未得灑然因與靈隱禮阻雪於長安鎮屢承策勵忽得契證親炙三峯二十年深入法奧乃獲付囑出任臯亭顯甯僧問三峯室中嘗論臨濟三玄要是否垣曰三峯無此話莫謗三峯好曰和尚何得諱却垣曰不特謗三峯又來謗老僧住持八載說法不容紀錄將示寂與數僧問答一僧進前問曰和尚尊候如何垣曰苦又曰和尚是善知識焉得如此垣曰未離三界外還在五行中僧無語垣曰你道者兩轉語那一轉敵得生死僧擬議垣喝出復手書二偈端坐而化

甲申十七年

靈機觀禪師開法湖州資福觀閣之龍溪周氏子。母翁夢一金神入室衛從頗盛。香光馥郁而誕。禮金浦九雲慧曇老宿。交染曇耆。年有道行。爲一方推重。見觀志不羣。乃欣然曰。子乃法門令器。詎可虛滯於此。吾年雖邁。當送子行脚也。卽束裝偕觀出嶺。首參天童悟參。死頗切。雖役重。務未嘗放捨。明年甲戌。參金粟。容愈加猛。礪徹夜不眠。一夕雷電驟閃。不覺話頭脫落。山河大地凝成一片久之。豁然不被從上佛祖舌頭欺瞞。復侍十載。乃住翔鳳山資福。闢草開山。刈茅緝屋。淒涼盈目。豺虎爲鄰。人不堪其憂。而觀怡然獨樂。律身最嚴。同衆食息。禪學之士。自遠趨風。單提向上勘驗。方來參請。無虛日。

春南岳綠蘿通際山茨和尚寂際。通州李氏子。初從東隱若昧法師習講。謁悟和尚於金粟。嗣罄山修責。端伯司理。請住東明。遷南源。登南岳。止擲鉢峯下。蓋虎穴也。桂林王聞而異之。訪卓錫處。步行

三百里就見之。以誤食野芹。怡然而寂。山翁恣序其錄行世。謂的的提持本分。殊無語言文字。與人較嚼。蓋與今時禾黍不陽豔。競栽桃李春者迥異矣。塗毒鼓聲。當有聞之而命不全活者。師蓋未死也。

三月律師寂光奉詔南都懺薦

大行皇帝

天童恣就崑山安禪院啓建薦嚴

毅宗烈皇帝道場疏曰。龍去荆山。曾動軒臣之哭。天崩杞國。每懷恤士之憂。千邦喪統。御之尊萬姓失。大明之照仰五岳。拔地之雄光華。猶昔緬長松擎霄之勢。忠節自慚。敬仗佛光。嚴資仙馭。千聖不攜。己靈曷重。處處爲人作主。頭頭本地風光。能仁儲聞。哀詔到台。訖位陳奠。上堂說偈曰。塗毒鼓聲何處起。三乘五性聞皆死。夜來萬籟動悲風。白日麗天莫知止。

宗統編年卷之三十一

宗統編年卷之三十二

諸方略紀下

大清天下一統  
都順天

世祖章皇帝平定天下在位一十八年

甲申順治元年

冬十月能仁儲和尚開堂國清儲入台深入東掖山三年迹不出天台邑宰文可紀請住國清景德寺衆懇開堂一期全提向上道大振辭天台士民錦帳曰出家辭親割愛於深山窮谷中草衣木食是其分也本不獲已垂手入塵草鞋邊已是七花八裂那堪應物見形虛空中加點畫耶前日機緣因風吹火偶爾成文初非本意斯皆諸當道好生之德救民水火豈山野區區之所能也

乙酉二年

閏六月初四日金陵千華寂光三昧律師寂戒弟子雲居晦山戒顯撰次行實

八月二十日鎮江焦山宏爽問石和尚寂

丙戌三年

雲門石雨方和尚住阜亭佛日

五月初六日雲居觀衡顯愚大師寂衡號傘居徧參雲棲紫柏雪浪諸尊宿結茅華頂一夕踏月經行忽然徹悟入粵參曹溪清大師機緣甚愜清書偈囑之殿元劉孝則給諫熊青嶼請住雲居明月堂成委印首座領衆說法命舟南下金陵開法紫竹林日與元白尊宿提唱綱宗鉗錘來學順治初年豫王欽風命宗伯王鐸迎請說法以病固却憐然坐逝傾城士女持香頂禮酷暑越三晝夜顏色如生

秋木陳忞和尚退天童入五磊請費隱容和尚補住九月十六日無錫華藏宏證大樹和尚寂證無錫朱氏子髻年學佛謁三峯藏和尚力參六載迴無入處一日目前壁立白光照耀忽如胸脊迸裂俯見背後牀帷之物叢林咸稱爲破背比丘後隨癩往髮江慧壽七晝夜目不交睫忽憶世尊不說說迦葉不聞聞頓爾開解閱四載獲付衣拂繼住三

峯上堂喝一喝曰此一喝用在機先立命中電揮雲路用在當機劍刃上雷送禹門用在定盤星子時妙忽合度用在紅爐烈燄處大器鍛成雖然且道者一喝畢竟從何而出管示衆曰夫爲宗師者須具佛祖爪牙。稍僧巴鼻。握杓柄於手中。出一頭於天外。有時大機大用。讓主驗賓。有時踞地隱身。自成不顯。乃至殺活縱奪。舒卷抑揚。互換各成。藏頭露尾。若能全備。如上衆體之妙。方可出世爲人。解粘去縛。以至辨魔異於言前。驗龍蛇於棒下。原是伊尋常手脚。本分草料。又何有奇特哉。僧問如何是爲人底句。證曰綠玉邊峯千箇竹。蒼鱗滿壑萬株松。歷住名利。晚居華藏。祖席寺從密菴。伊菴塗毒之後。宗喝不聞。至證法席。鼎新道風。遐播塔全身於三峰。

冬京口夾山本豫林。舉和尚寂。豫晚號晦夫。崑山陳氏子。十九脫白於姑蘇堯峯。誦金剛般若。應無所住而生其心。有省。初參博山。來次謁天童。悟後參磬山。修付法。歷主武林寶巖。姑蘇堯峯。京口竹

林雖曰雜傭。作不間操七箸。不倚重外護。畢足爲匡徒者。法上堂若論此事。心不可求。智不可學。担斷百匝。千重於中。下機一時。觸却突出。孤危方教峻峭。都盧收拾將來。非心非色。非如非異。要用卽用。要舍卽舍。要行卽行。要藏卽藏。擬思一毫地。便落生死關頭。到者裏作麼生相救得。復曰五蘊山頭自在身了。然物物應天眞。頓教直下無思議。玄要全分見本人。卓拄杖一喝。預計逝日說偈辭衆而寂著有宗門誠範四卷并語錄行世。

丁亥四年

正月八日佛日。明方石雨和尚寂入閩。部院遣官致幣請主雪峯芝山兩刹。方堅辭不就。時東南風雲未息。忽語衆曰。境界如此。不若歸去。好衆莫之覺也。初三日。搥鼓上堂。人人藤斗笠。箇箇水雲包。出門踏著草。途路更迢迢。到這裏不倒斷得一回。直饒說箇回途得妙。就路還家。便是千里萬里。良久云。只因你不能向異類中行。且道異類又如何行。乃握指云。一雞二犬三豬四羊。五牛六馬爲甚。

麼七不道參首座驚問其故。我來日要上龍門座。曰和尚幾時回。方曰初八九便來。初七日至龍門。晚示微疾。次蚤命湯沐浴。囑托後事。畢端坐不語。諸門人問和尚還有分付也。無。方曰更有甚麼分付。適寄浮法師問疾。方一見微笑而逝。越九日封龕。顏貌如生。奉安文室。忽山兵至。欲燬龍門。見方龕儼然不忍。與寺俱焚。昇而出之。百夫震懾。力莫能舉。由是羣相驚異。寺賴以存。二月門人依法茶毗。牙齒數珠不壞。頂骨糝五色。舍利弟子收餘骼及諸不壞者。建塔前山。瘞於金龜殿。天界盛和尚應太平請。因事下獄。事白主棲霞道盛字覺浪。號杖人。閩浦張氏子。生而穎異。幼習舉子業。年十九因祖坐亡。遂發心出家。偶於街次聞墮猶聲。有省。決志棄家。剃染。閱高峯。枕子語有所證。復於倒刹竿句起疑。迷悶成病。乃取古人未悟既悟因緣。反復參勘。至百丈再參。語不覺驟然。曰昔馬駒亦復踏殺天下人。也。一日見壽昌頌臨濟三頓棒。頭開正眼。何曾傳得祖師心。語大呌曰。

此時尚有若而人乎。我當往師之。始出嶺之董嚴從博山來。和尚受具。問從上佛祖行履。不契辭往。壽昌道經書林。見東苑鏡和尚。言下投機。遂折節過冬。一病瀕死。鏡親調藥療之。有間。鏡究其生平參悟及五家堂奧之旨。大驚曰。不期子深入此秘密法門。吾宗慧命。囑子流布去也。因付源流法偈。盛拜受。遂隨鏡禮壽昌。經和尚重加參證。經領之。自是荷擔大法。當仁不讓。一時金陵焦弱侯。周海門。曾金簡諸公。皆師事焉。迨經示寂。辭東苑鏡歸省。親時年方三十。曹能始諸公請於興化開堂。期畢。復上博山。與來和尚問答。雷轟電掣。來奇之。東苑博山兩和尚一時相繼入滅。盛痛有風穴深憂之感。乃一杖復入閩南海內。鉅公名士。肩摩問道。新州荆王豫章建安皆延說法。內庭盛自天界應太平請。會嫉盛者。以原道論下盛獄。盛不辯。居園中一載。著金剛經。以自見。陳太宰旻。昭遣人省盛。索偈。盛書問余何事。棲碧山詩遺之事。白金陵諸公請主棲霞。盛欣然有逸老計。

五磊恣和尚移住台州廣潤

雲門禮和尚住揚州天甯禮自石梁毗尼孟城地藏兩處結制英靈禪禪從之如雲省悟者衆住天甯豁堂昂爲第一座巨渤恒剖玉璞爲西堂江淮之間法道大振衆至七千

國清却田國清有塗田二千畝流入健跳軍戶四十年矣當道按籍爲開復住山儲和尚曰我法以慈濟爲心一切自宜付之無諍稍留難便非道人行履力却之知事請曰田畝二千歲除糧差雜用外合得米千石以之裕衆不亦可乎儲曰二千畝業固重也抑天下千驪莘野耕夫等於一介林下人取辦鋤頭鋤斧蓋亦審之素矣曰此千年常住不可以我一人高尚遂廢其業曰必以恢復爲心何所顧惜然我法中無如是事在昔化行南國虞芮卒有閑田山僧忝持道化德愧古人復使你輩費心力妨道業耶抑此中有不忍言之隱於是卒謝却之山翁恣聞之曰國清真能恢復先業者記之布水臺集

林野奇和尚住東塔

八月雲門雪嶠信大師寂信春遷雲門信真率不羈詆訶諸方無當意者寡耦少徒一節孤往後歸老徑山一夕呼茶飲畢唱自所書小兒曹生死路上好逍遙皎月清霜曉喫杯茶坐脫去了遂示寂覺浪杖人爲建塔雙徑後宏覺恣奉贐書復遷全身塔於雲門右麓

戊子五年

九月瑞光宏徹頂目和尚寂於穹窿草堂徹說法凡十一會居恒穆穆不輕置可否至辨異揀魔驅耕奪食單提陷虎一機同時幾與天童三峯稱鼎時所至人天擁戴勇退急流則真不愧天童之孫三峯之子初八日說偈喚侍者燒香泊然而逝尙書張有譽銘其塔

中興範和尚繼席瑞光百癡和尚補住金粟

冬十月十八日天甯具德禮和尚結制阜亭佛日制完過顯甯

己丑六年

春二月具德禮和尚住靈隱豁堂。岳告山中僧衆曰。靈隱領袖五山。爲自古宗師法窟。今丈室久虛。惟雲門禮和尚具大神力。實堪振起。而寺衆有欲延輩望高大者。惟香谷欲公是岳言。偕諸檀護。削牘迎請。禮曳杖來上堂。曰。白雪與陽春。無人和得。親目前。千聖眼。月浸五湖冰。以拄杖畫一畫。曰。劃破長天。霧風搖雨。後晴靈隱。掀髯只一笑。普門佛日。杖頭生喝。一喝禪子。浩歸宗風。丕振一再鼎新。寶殿樓閣。堂舍林立。疊飛巨剎。規模諸山莫並。三月豁堂岳和尚開法。阜亭顯甯岳杭州衛郭氏子。母王撫岳七歲。聞鄰人歌舌頭。能有幾時。肥卽矢。不茹腥。十歲父愛溪公捨入靈隱出家。十五上天台謁無盡燈和尚。次見古心律師。受沙彌戒。遍參慈山清遠觀可諸尊宿。每以思議不及言說。不到處極力參究。至忘寢食。後參三峯藏於淨慈藏。謂曰。此皆依識解卜度。正爲生死根本。以是求禪。猶北適而南轅也。岳當下竦然。請益藏彈指一下。

曰。吾者裏無逐日長進底禪。乃拈竹筴子。話提撕。七晝夜。至倦。劇放身欲臥。忽聞靜板聲。疑礙撲落。卽呈頌曰。平地不風起。波無端。四面滔天。突出南山。鼉鼻驚頭。一氣歎乾。藏領之天童。悟聞而喜曰。漢月得人之盛。過於老僧。招由相見於太白峰。靈隱者。宿延歸著破堂集。以自見時豪勢。有覩侵飛來峯。卜宅兆者。當事皆左袒之。岳奮然堅持以大義當事。直之峯卒歸寺。橫山一默成和尚。首受三峯藏和尚記。荆獨高。尚不羣。久移衣珠。晚年始憮然有懸絲之歎。適僧素如侍。則曰。靈隱豁堂每言三峯化後。世無真師。思報師恩。爲法腸熱。必肯遍志擔荷。卽往白岳。謂三峯家嗣乏繼。師忍視其遂絕乎。語未竟。岳惻然動容。遂詣橫山。叩請陞座。成舉迦葉阿難付授公案。普告人天。降子爲孫。事兄爲父。具德禮和尚卽請岳繼席。阜亭顯甯上堂。月不住空。未免印泥。印水雲無懸峽。有時落二三。三務使追風良驥行。乎其所不得不。行得水真龍止。乎其所不得不。斯則句句截流。不失溫和之利。

機機赴的全超毒海之源且道還有具如是手眼者麼若無今日快便難逢

夏六月二十一日國清儲和尚住蘇州靈巖儲因葬父出台事竣南還度夏梁溪將歸天台門人辨菴光念靈巖孤秀爲吳山第一請儲住靈巖儲道韻既高法言能發古人之秘奧海內英衲名流皆雲集座下

秋七月二十二日夫山祥符宏鈺慧刃和尚寂

八月巨渤恒和尚繼席天甯上堂一花初放春光逼塞虛空五葉分枝瑞氣宣流大地其始也混萬別於大同何彼何此其次也裂眞源於千派孰是孰非天甯今日於彼此不得處轟霹靂於晴空就是非交結時飛電光於掌上權施物外令展先天言鋒藏八面之威機辯伏千鈞之弩直得山崩海竭佛祖難窺斗變星移主賓合拍在推倒處建立誰云至道無難於建立處踏翻須識大功不宰衲僧分上休話如何後學初機好生著眼恒痛念法道式微流弊遍野思欲鄭重一時挽回風化有捧

香花請陞座者一應謝絕

建昌黃龍元謐聞然和尚寂謚從壽昌經記前後住山二十餘年養靜自高並不開堂道風遐播廣潤恣和尚住越州大能仁寺

庚寅七年

林野奇和尚補住天童

費隱容和尚住石門福嚴

靈巖儲和尚赴台州天甯請

辨菴光和尚住台州靈石光長洲金氏子出家靈巖參儲和尚於能仁得悟出世靈石移能仁

蓮居大眞新伊法師寂嗣紹覺覺雲棲弟子結菴土橋曰蓮居眞依止之嗣其席惴惴無文精戒律登壇靜穆望者意消居恒禮懺修觀寒暑不輟著唯識論行世跌坐稱佛號而逝玉筯垂尺許本金聖先兩法主相次繼其席講淨並不替其時西谿天竺古德內衡兩法師皆宏台宗教觀行業謫著

辛卯八年

江浙大荒靈隱天童諸大禪林盡行散衆

佛滅後二千六百年

壬辰九年

六月飛雪  
赤地千里

春顯甯岳和尚補住三峯

冬古南門和尚補住天童

冬教養英和尚住天台國清寺嗣靈嚴儲

癸巳十年

甲午十一年

徑山容和尚輯祖燈嚴統成愚菴孟和尚闡之官

南澗問和尚靈嚴儲和尚解之

發明法門大段自  
應公論至聞

之官則過矣故直書之  
而是非曲直自見也儲和尚復徑山容和尚書

曰某頻見諸方聚訟盈庭紛紜溢路未嘗不寢食

傍徨撫髀浩歎蓋法門而至今譬之疋癘久病之

夫若更投以攻擊之劑則元氣頓盡其亡可立而

待焉能冀其浸昌浸隆乎此二十年痛心疾首欲

使天下咸歸無競之風盡坐柔和之室吾祖之道

久而愈光雖赴湯蹈刃亦所不辭承紳士殷勤致

懇謂兩家所信諒者惟某一人故不自揣越俎而

治得遷佛祖之繫俾法門不致瓦裂則彼此幸甚

鑾山和尚與靈嚴和尚書曰東震旦土自鼻祖西

來六傳至大鑑宗雖列五派實兩枝總屬大鑑的

骨兒孫梁山得悟於馬祖而仍嗣石頭太陽寄託

於浮山而代付投子兩枝又何嘗非一派也宗教

分河飲水尚謂泥於文字語言豈同爲的骨兒孫

幾欲操戈對壘於千古之下甯不爲識者痛哭嗤

笑乎徑山嚴統有當嚴不嚴之弊遂開不當嚴而

嚴之釁天皇天王其說已久闕疑成信著書立言

之愼固應如是會元以南岳青原俱稱大鑑第一

世足見古人之公而南岳居青原之首亦豈有人

我生滅心乎壽昌雲門真不忝爲曹洞中興之祖

有統系無統系而洞宗的旨敢不尊崇東苑隱德

深潛得棲霞而大闢車溪一段公案去世不遠見

聞當有公評法眼自應洞照也是是非非法門闕

係甯免紛爭獨至藉力有司世譁流布此實下策

不得不爲洞上諸公扼腕棲霞顯聖久係相知徑

山復同法嫡血自無坐視之理昨至吳門審知專

遺座元往還兩間周旋微密在今之世甯復有秉

爲法無私之公如吾老住禪師者乎敬爲前佛後

佛額手稱慶。靈嚴與姜伯璜書。兩宗角立。老僧與南澗和尚。不惜性命。以成彼此之好。何心哉。彼時卽對天界浪兄。愚菴三兄。曰。雲門法眼。歸青原。無減於南岳。歸南岳。何損於青原。吾輩爭之盡成戲論。祥符陰。曰。徑山嚴統固有不當嚴而嚴者。然以十餘年心血。徵求數百年來之散落。續五燈之緒。成一家之言。其有係於繼往開來者。何止一錢千鈞。乃徒以爭論雲門法眼。二宗出自天皇天王之故。以致世諦流布。付之祖龍。不懂大公。惟封私見。擔荷佛祖慧脉者。當如是乎。迄今讀金粟徵修燈錄之啓。不禁爲之痛哭流涕。歎歎累日。若非南澗靈嚴二老人。消此羣端。法門法戰。尙忍言哉。

二隱謐和尚住華亭船子法忍寺。謐嗣林野奇三住劉溪獅峯太史曹爾堪少宗伯曹勳等俱問道。

乙未十二年

秋靈嚴儲和尚受古堯封寶雲禪院。請吳中侍御李樸官詹韓四維太僕陳濟生等請儲住古堯封。喜其嚴整幽邃。可以投老受之。

靈嚴原直賦首座。出住九峯正覺寺。賦毗陵王氏子。裂縫掖出家。從儲自夫椒入天台。艱苦力參。深入閩奧。首衆靈嚴。握竹篋鍛煉方來。諸方龍象。景服儲宏法。嬰難無祖庭內顧憂。賦綱維之力也。寮中唯草鞋衣鉢而已。是秋出山。襜子裏糧。靡然從之行。化江漢首住九峯法令森嚴。道大振。嵩乳密和尚住淮南檀度拈香嗣博山來。九月二十七日。杭州南澗理安通問箸菴和尚寂於吳江應天寺。問吳江俞氏子參磬山修得法住理安上堂。望刹竿便橫趨而過。猶是不唧嚙。漢電影裏穿針弓絃上走馬也。須是個衲僧。始得匙挑不上的。如稻麻竹葦。千割不同的。亦如稻麻竹葦。截斷天下人舌頭。卽不問如何是汝諸人。全身獨脫。句舉拂子曰。漫天網子。百千重。是年夏。磬山解制後。將方丈所有道具。手書分送諸方。乃杖錫出遊。至武康報恩掃塔。晤玉林琇。備托法門。細大預定。行期於九月二十七日。行至吳江寓應天寺。如期坐逝。所著有續燈存稿。宏覺恣爲之銘。塔靈嚴。

龔聞計上堂曰。山僧廿年神契。一面傾心。方期共樹微猷。何意中途唱滅。

丙申十三年

夏三峰豁堂岳和尚移住杭州南屏淨慈岳住三峯。禱子向風門庭整飭。武林居士葛愚古世爲淨慈金湯慨宗鏡塵埋。乃削牘請岳以藏和尚建化之地。不容辭。初夏入寺。久荒之後。薜棘盈前。岳任運自如。未幾三韓周侍郎問道有契。同諸當事興修大殿堂宇。次第改觀。自是南屏名勝與靈隱同稱。

秋中峯讀徹蒼雪法師寂徹。滇南人號南來。與高松沐如河法師標賢首宗。幟於吳西山支硎之間。道韻映帶。落木庵主徐元歎。波靈巖退翁儲和尚。晚年俱相往來。儲住靈巖。每歲二三月間。草花滿田野。八九月間。白鴈青楓。天氣一竹。與由中峰而天池。飯於落木。故儲晚辭有寥寥今古幾知心。慚愧虔公與道林之句。虞山毛隱湖居士晉及宗伯紅豆蒙叟皆善徹。徹將寂。以山繭袍及詩文集屬。

晉行世

慈環聰和尚住京都海會寺。聰費費容孫都門宗風自此大振。

去息復和尚住無錫寶安。溟蘇州徐氏子。參靈巖儲嗣法。

丁酉十四年

本陳恣和尚再住天童

冬十月海會慈環聰和尚結制萬善殿。先是

上符南苑因幸海會。延見聰。奏對稱旨。復召入禁庭。問佛法大意。乃詔結冬萬善殿。賜明覺禪師號。

上後謂天童恣曰。朕初雖尊崇象教。而未知有宗門者。舊知有宗門者。舊則自慈環始。慈環固有造於祖庭者也。

十月十七日。福州鼓山元賢永覺和尚寂賢嗣壽昌經住山三十年。道望孤高。未嘗輕易許可。一人所著有寤言補燈。繼燈禪餘。內外集共八十餘卷。行世。祥符蔭曰壽昌門下。博山來黃龍。謚鼓山賢等。皆敬嚴法道。風韻孤高。住山三二十年。座下管

數百來本色鍵椎而不輕易許可。噫古德風規安可復見於今日也。

十月二十九日宜興龍池通微萬如和尚寂。

十二月俞昭汾和尚住廬山西林乾明寺。嗣靈嚴儲。

戊戌十五年

爲霖霈和尚繼住鼓山。需參承覺賢二十餘年。得其法。嗣住鼓山二十餘年。海內瞻依以爲東南一大法窟。有餐香錄。聖箭堂。共古諸錄行世。

報恩玉林秀和尚。應詔至京。以疾聞。未幾延見旋歸山。

上特留首座茹溪森問答稱旨

上因海會聰奏對之後。留心參究。復召玄水杲說法。內庭乃詔琇行至天津。以疾聞。

上手札諭之入見。說法賜大覺師號。未久乞還山。

夏五月二日高峯宏聖碩機和尚寂於龍牙聖兩主法席。一日忽晦迹遁去。遊楚湘間。弊衲蒙首。世莫能識。臨行時以衣二頂託儲和尚造就。一二禪

學儲代囑峻明。誥嗣法出世龍牙。而聖適掩關。變化遂迎養於東堂。無何示微疾。值五月之朔。忽曰。吾行矣。旁僧曰。二日吉。聖喚僧。僧近前。聖隨與一掌曰。吾爲汝再留一日。遲明整衣鉢端坐而化。冬十月天笠珍和尚住蘄州菩提寺。嗣理安。南菴依和尚住淮南報恩。嗣檀度密。浪杖人盛曰。博山先大師生平勘驗學人。獨於生死性命處著。到天下英奇難於構附。使雪關首座與嵩公不自偶。起幾不盡溺殺於急水灘頭。拋竹篙乎。今者依子實是英奇。衲僧嵩公實是本色尊宿。一旦英奇能死心於本色。而本色能授法於英奇。此非師資之妙合。更自親得博山家法。獨有取於生死性命之不可欺者乎。所以能使博山之家風復振也。兀菴源和尚住湖州道場山。嗣天童恣醒熱粹和尚住延令靈雲。嗣靈嚴儲。

己亥十六年

願雲顯和尚住洪州雲居。顯太倉王氏子。有聲贊序裂縫。拔出世參雲門。禮於揚州天甯。得法化行。

江漢住雲居道大振

原直賦和尚住南岳福嚴賦自九峯移與國嚴頭  
衲子皆趨之與國三峯藏和尚曾受蕭方伯請未  
赴住嚴頭日理齋祖廢塔得四十九粒舍利於匣  
關再來堂南岳福嚴請賦日賦住九峯與國諸利  
皆一期應緣說法賦昔辭老師於姑蘇大鑑堂下  
言全賦行且汎大江掃讓祖最勝輪塔今住南岳  
蓋先請命於老和尚者也到院日諸山老宿鷹眉  
白髮咸迎歎日真讓祖孫也送三峯藏和尚入傳  
法祖堂

楚奕豫和尚住潭州雲蓋豫生緣岷蜀初參藏和  
尚於三峯有省藏寂依安隱忍一載丁丑懷香謁  
儲和尚於夫椒藏雲室歷寒暑二十周始蒙記前  
辭去菴於楚黃之芙蓉山茆茨石室晨夕嚴持禱  
僧傳誦不減善公之住福昌時也越二年遷雲蓋  
緇素聞而手額僉日古佛也越歸恐後豫慨然一  
室復類汾陽靈嚴之道盛行湘漢南岳雲蓋時稱  
甘露雙垂

雍麓晟和尚住梁溪寶安嗣靈嚴儲古道自持諸  
方重之

冬十月十五日天童恣和尚奉

旨開堂春閏三月遣右闡教僧法璽齋勅召恣入京  
進見萬善殿傳諭免禮賜坐慰勞敘譚畢即諭萬  
善惡忠廣濟三處結冬

上時攜學士王熙馮溥曹本榮狀元孫承恩徐元文  
至方丈問法時邛溪森立水杲懸環聰皆承

上召對有三世奏對錄臣僧紀蔭日

帝取金輪誕膺天命智周萬機道融一貫虛懷好問  
念切死生座右大書莫道老來方學道孤墳盡是  
少年人之句以自警惕與宗門耆舊法苑禪學相  
見不令稱臣致拜從容諮訪握手溫顏情逾師友  
因馬蹶而知解頓忘聞雨聲而得大自在真承願  
而來不忘靈山付囑者也

金陵天界道盛覺浪和尚寂盛復住天界倡修報  
恩大藏一日旦起禮佛畢開示大眾飲茹如常亭  
午取紙筆書偈日萬象指頭明卓異縱擒不換機

何利無端。搗斷破蒲鞋。翻然直入千峯去。擲筆而逝。盛坐道場。大小五十餘處。說法四十餘年。著述甚富。有傳燈正宗行世。

庚子十七年

四月。勅封天童道忞宏覺禪師。賜銀印。

五月。望宏覺忞和尚。歸山。留嗣法本月。旅菴本。皆山曉兩和尚。在京開法。善果隆安兩刹。

上躬送出北苑門。差臣劉之武送還山。

御書敬佛二大字及御畫山水蒲桃各一幅。贈行。

并送七寶莊嚴關肚繆作天童山門護法。志有師。堯堂說及參禪要語等。載北遊集。

靈巖儲和尚。辭都諫嚴顯亭。沆請住徑山。

秋八月。靈巖儲和尚住虎邱。太傅金焦齋之俊侍。

御李灌溪模等。以虎邱自隆祖。瞎堂松源諸老唱。

道後。曠數百年。寂然林壑。以儲宗孫見督。八月十。

九入院。禪子至無以容。

冬十月。報恩玉林琇和尚再應詔奉。

旨開堂。結制制畢。即辭還山。賜大覺普濟禪師金印。

曇應杲和尚住天台國清寺。杲毗陵孫文介公。慎行之猶子。太史放園自式之。從弟裂縫掖投夫山。儲和尚出家人。傳小杲補住國清。

辛丑十八年

三月二十九日。福嚴費隱容和尚寂容入坐道場。垂四十年。有古德之機。用古浴得舍利二百四十餘粒。晶瑩五色。有大如菽者。晦山顯著有舍利記。靈巖儲和尚住金粟孤雲鑑和尚寂縑素延補住。五月七日。靈巖首座月函潛和尚住古堯封潛吳興董氏子。學綜天人之奧。文字奇古。裂縫掖出世。居靈巖第一座。儲和尚以古堯封高曠命潛居之。潛絕近今畦徑。敲石鋤雲。日拈提古人所未到。五湖俊逸。禪子多裹糧從之。

六月。遠菴儂和尚繼住天童。

卑牧謙和尚住虎邱。儲遷金粟。命謙主虎邱。厭喧鬧。將投杖湘衡。楚鹽縑素迎歸。開山兜率。德氣凝原。遠近尊為古佛出世。謙生緣廣陵沙氏。脫白射州。嗣靈巖儲。

南岳原直賦和尚住曹溪寶林祖庭賦住曹溪曰  
某服勤靈巖首座寮三年今主曹溪法夫主曹溪  
法號命天下非我老和尚不可某當代老和尚領  
衆遂設儲和尚頂相待側三日告衆曰我寶林第  
一座也一時座下雲湧

杭州皋亭永慶寺大玉菴法師寂珏嗣曲水古  
德賢法師爲雲棲第三世

忍菴琰法師住龍居永慶嗣玉菴珏

鐵關能和和尚住龍池嗣萬如微

今上皇帝

康熙壬寅元年

二月百愚斯和尚住荆溪善權嗣百丈雪

檠菴志和尚住海虞三峰志出世後行杜多行初

依靈隱禮後參儲和尚於靈巖得法後隱澄江興

濟諸方檀護及法門尊宿以三峯祖席請遂入院

古道泣衆遠近趨風

鼓山爲霖霽和尚住泉州開元寺

隆安山曉哲和尚住皋亭山佛日寺

癸卯二年

春正月甯波雪竇通雲石奇和尚寂雲太倉徐氏  
子脫白南廣參悟和尚於金粟一夜經行因僧劈  
面撲破鼻孔有省後於棒下頓脫疑滯隨悟赴育  
王天童一十三年付衣拂出住靈鷲遷雪竇先是  
悟和尚記曰折箸無一雙狗子無一隻是你住處  
雪竇爲古道場兵燹之後徒存巖壑雲住未久四  
衆趨風重新法席人稱爲古佛上堂當陽一著獨  
露無遮八面玲瓏十方軒豁明眼作證豈敢囊藏  
直得瓊樓玉殿百草頭上全彰千丈報身瓦礫堆  
邊頓見塵塵爾剎剎爾突出無位真人發明見成  
公案直饒三世諸佛歷代老古錐到來個個退身  
有分正當恁麼時如何水歸大海波濤靜雲到蒼  
悟氣象閑辛丑返南廣曰我老矣富不忘本也寂  
後仍迎龕建塔雪竇學士史大成撰銘

山夫 和尚繼住雪竇

秋八月皋亭山顯甯眞詠梵音和尚寂詠仁和白  
氏子初依顯甯澹予垣宋了徹垣寂以衣拂託靈

隱禮令擇器付授禮住顯甯詠力參丙戌冬同仁庵義隨禮至高郵結制地藏煎藥次廓然開悟頓見臨濟用處復隨侍禮溫研密諦透盡法中閫與禮念垣末後遺托乃以衣拂授之兼仁菴義亦曾親炙垣者遂并付義住顯甯而令詠輔佐之乙未春住普甯村院苑顏未半載學侶輻輳然改觀時土寇內訌顯甯幾罹兵燹四衆堅請詠堅却禮和尚謂之曰叢林有難忍坐視耶詠不得已移錫進院有二虎朝夕環繞哮吼一月餘盜氛不敢近引去禱子漸集虎亦絕迹八月二十六日示微恙寂前三日鼻中流出一珠大如豆作琥珀色光燦四表泊然坐化雲居顯曰詠與仁庵義後先唱導響振松堂不負靈隱代囑真臨濟睡虎也詠最慈忍不與人牴牾得法門大體而細務必謹又入文字三昧法語精到超出尋常手眼出格諸方重之祥符蔭曰臯亭山三十里五叢林而顯甯最岑寂余脫白龍谿嘗行脚至焉長松疎篁疑虎聲颯然而過入寺土牆竹簷淙淙滴寒泉而灑飛霰時

梵音和尚正住山說法時也飽食黃蘗殘飯而去不及登堂一見至今猶想見此時風景云

冬曠菴志和尚退三峯祖席館婁江潮音尋住華山華山支公舊院吳人士請儲和尚作退居儲命志居之至則振刷林壑吳中耆舊如李灌溪樸鄭桐聲敷教等皆復從遊問道東晉風韻邈然一新

甲辰三年

雲居晦山顯和尚住四祖

曠藻文和尚住台州興化嗣靈嚴儲

延令慶雲濟義仁菴和尚寂

偃亭挺和尚住雲溪挺仁和徐氏子俗號逸亭嗣

愚菴孟初出世錢塘令慕天顏請住河渚雲溪

乙巳四年

玉林琇和尚住天目 天岸昇和尚住金粟

春二月鼎州德山全賦原直和尚寂賦壬寅受荆

州護國請道經桂林傾城留主風穴寺過鼎州竹

帆和尚主德山曰我久望原和尚也率衆請住德

山道大行二月二日應供如常夜三鼓命取水一

盆刀一口。一衆驚集。賦拈起刀。顧衆曰。學道人一切處。如當門按一口劍。相似。擲刀於水。大喝而逝。火浴烈燄中。騰起紫雲。今梵相。寶幘抹額。郡當事數千環擁。震驚。號佛崩角。咸以爲周金剛再來云。觀衆陳士本有德山。紀異。建塔德山曰慧光之塔。

寶雲潛曰。余挈鉢袋從本師浮湘。過潭州黃龍祠。州父老競言。原和尚住。燦心曰。黃龍神緣夢乞。清淨戒事甚奇。而韶州所行烏絲牋。刻曹溪爲虎說。法語。虎領子遠遁。瀟湘天秀。龍虎耀靈。化行江漢。豈偶然哉。

澄鏡月和尙住蘇西園嗣雪寶雲

確菴青和尚住三峰。青蘇州朱氏子。英雋絕人。幼遊講席。棄講參儲和尙於靈巖。從入天台。悟徹大法。於光孝機敏。才洽。首衆靈巖。儲舉住靈巖。辭不願拂衣。遨遊江淮間。至橋李鶴洲太守朱葵石。請出世松陵長慶移三峯祖席。機用縝密。道譽藹然。葵雪青和尚住湖州弁山法華寺。嗣南屏岳初補住三峯。

石葉成和尚住絳昌嗣靈巖。儲操行清眞。法語穩密。有古法昌之風。

山菴林和尚住太平采石乳山普明寺。嗣靈巖。儲仁山震和尚住天台寶華。嗣鄧尉。壁法眼。清峭堪紹鄧尉門風。

冬十月西湖愚菴明孟三宜和尚寂孟錢塘丁氏子。參雲門澄嗣法。歷住顯聖。梵受珠明。問法者曰。繞萬指。晚築愚菴。西湖閉門奉母。母順世。哭之慟目。爲失明。十月初八日。無疾忽語侍者曰。三日後吾行矣。至期衆集相與語曰。師今尊候甚安。豈得撒手便行。孟曰。大衆好看老僧。登場一笑語畢而逝。嗣法門人偃亭挺曰。師天性峻爽。英邁不羈。每引端師子政。黃牛泉大道。以自托。雖屢鋸獅座。往往負泉石之志。住湖上。携小舟。危坐終日。或自爲櫓棹。放之中流。竟夜忘返。客至見鮮衣怒馬。輒避去。孤兒乞士。相往還甚善也。獨喜放生。臨湖築小池。旦晚携錢米就漁人買魚。或蛇鳥蚌鱉。至者輒買。卽窘迫以他物償。全活無算。應機接物。有古雲。

門之風動止諧謔無非密義法席遍江左老並棄去獨以愚菴終其身學者稱愚菴嘗曰吾耻近世禪者高心空腹不明一經故勞勞講說實不得已他人以語言目我失之矣

丙午五年

春正月二十七日揚州天甯濟恒巨渤和尚寂恒住天甯二十年敬嚴道法崇正鋤邪堅剛不磨之力雄峙淮南浴畢書偈曰哆哆啾啾六十二載罵雨訶風大功不宰今朝踢倒婆婆好看頭天外擲筆踟躕而逝

二月退翁儲和尚應湖南撫軍周召南請浮湘視賦德山後事

雨南 和尚住江甯靈谷嗣豁堂岳道風卓冠省會

三月十六日四州夔州海明破山和尚寂明歷主岳岳大峨萬峯中慶鳳山棲雲祥符無際蟠龍佛恩雙桂十刹宗風遐播後當蜀變方便化導救免慘殺者甚衆夔守夢明授一扇展讀其偈曰展聲

滑滑響蒼苔老去尋山一快哉回首五雲堪一笑潯然瀟灑出塵埃覺即遣候而明已化去矣郡守驚異刊布行世

爾愚環和尚住崑山安禪嗣雪竇雲在雪竇職庫司十五年有楊岐寶壽之風

夏五月南屏淨慈岳和尚遽謝院事命嗣法瑯琊宗衡繼席擬退居普甯忽罹無妄當事檢丈室經籍之外蕭然無一物咸太息至江甯下獄在囹圄中隨宜說法人人感動雖獄卒囚兒聞開示皆警發悲悔佛聲浩浩一時稱地獄西方

法鐘覺和尚住常州天甯嗣太白雪雪嗣福嚴容初住育王遷琴川維摩至姑蘇寄笠虎邱山塘放小艇古鶴淵中作山頂扣舷歌以見志蕭灑自得

有政黃牛之風

一足恩和尚住蘇州瑞光嗣頂目徹初住揚州福緣將退遊匡山乃住瑞光頗著道譽

永鐵宗和尚繼席德山嗣原直賦

冬具德禮和尚退靈隱住徑山靈隱百廢具興法

席冠天下功成不居徑山上乘和尚躬詣直指堂以徑山祖庭扶衰振敝請禮慨然應之

四祖晦山顯和尚繼席靈隱

支本孝和尚住湘西南臺白雲乘嗣

諦輝輅和尚住堯峯興福嗣靈隱禮

南澗梅谷悅和尚集列祖提綱及臨濟正宗錄嗣

箸菴問

一樹蔭和尚補住天甯嗣巨渤恒

雲德寶和尚開法潤州報恩嗣永甯淵報恩古刹

久廢爲戎馬之場僅餘敗橡佛像而已寶居之以

恢復力任伉直不徇時流饒懇誅苟有古德之風

丁未六年

七月蘇州遜村報恩通賢浮石和尚寂

八月懷海清和尚住語溪北禪寺嗣洞上紫仙陽

九月天笠珍和尚住南澗理安寺

吼松澄和尚住南禪嗣古鏡符符嗣龍池微

塵姓和尚嗣席靈谷與雨南同參折節承

嗣任道爲衆法席爲南省首推其後普門雪亭

相繼住持道風不替祥符蔭曰南屏岳荷橫山

將絕之緒不以名位介懷其後子孫皆多折節成

就任重道法凡紹隆法脉者宜知所重矣

冬十月十九日徑山宏禮具德和尚寂於揚州天

甯禮再應天甯期制之請欣然至止諸子雲擁應

機說法倍於常時甫經七日命設闔山供是夕劇

談過夜半方寢至五鼓輿易新衣履疾呼侍者頓

足一下曰快隨我上方去先一日法嗣碩揆志迎

師過上方說法故云侍僧亟至而已逝矣門弟子

以陶龕封函迎歸靈隱建塔慧日軒祥符蔭曰鄧

山靈巖靈隱海內稱佛法僧三寶靈隱門庭甲天

下學衆滿數萬指不減南宋佛海時具大方便有

大慧圓悟不及施之手眼至沉幾駿發則又度越

於古雲門真欬唾廻天揚眉倒日所謂弄大旂手

者非歟蓋全力不欺逢緣不借故能瞻荷如來稱

後勁之衲子也

豁堂岳和尚事白還山

退翁儲和尚退靈巖門人舉牧謙迎至楚隱兜率

臺應果首座繼席靈巖

鎮江常樂寺濟廓無鄰和尚寂靈巖儲嗣

戊申七年

多羅惠王悟道受法王三歲愛持棕拂自幼禮誦法華受愍忠寺普潤老宿菩薩大戒法名靜慈康熙七年年甫十八詣西山參天峯清禪師於青塔清問如何是殿下佛性義王云徧體多是又問如何是西來大意王云心之所發師連問如何是大佛頂王云所譚是實又問十二面觀音那一面是正觀音王云行住坐臥又問千百億化身那一身是眞佛王忽然起身端拱而立又問五千四十八卷經論那一卷是眞經王云無思無慮又云普天之下那一員是眞僧王云心佛無二王以偈呈清曰數日前頭非我見我今觀我遮那身見聞即我生之性我見精微義入神空性圓明無滅故我心六照性空眞空空佛性眞爲妙妙處總然分主賓一日參清清問秋蟬夢破三更月古寺敲殘午夜鐘試問見色聞聲畢竟是誰王舉起手云合掌當

胸清云秋風開玉殿夜雨滴金臺只如玉樓人醉杏花天且道得何三昧方得斯人惺惺不睡王正目而視清云揚眉瞬目宏彰大法王作禮清云人王法王今日同條中元日清問果日當空無所不照爲甚麼不照覆盆之下王云逢人且說三分話未肯全拋一片心清深異王之機鋒卓越乃復徵云如何是臨濟宗旨王以牙箸一卓復打圓相清云王年十八悟道卽與優波毼多同也堪繼祖燈乃付以源流衣拂祥符陰曰與朝漢屬皆尊向佛乘俱乘大願力而來者若多羅惠王之蚤登戒品年十八悟證本有而機契無礙則尤超邁僅見眞示見人王身而說法者矣故書以爲吾道慶并以風世焉

碩揆志和尚補住徑山志鹽城孫氏子參靈隱首衆嗣法住上方禪智寺毅然自任刈茅闢土欲圖恢復徑山虎席僉謂非志不可乃遷住

己酉八年

春愚山藏和尚住海甯安國寺嗣孤雲鑑

冬十二月蘇州鄧尉宏璧剖右和尚寂除夕前二日將入滅告衆曰老僧自受先師之命住院三十五年只是稱性而說如今年老不能領衆且放身那畔佛法自有人說遂辭別道舊袈散衣鉢巡視衆寮苦切示誨至深夜歸寢室歛僧伽黎行數步而逝門人華頂震受遺命編次語錄十二卷行世  
庚戌九年

秋七月二十日南屏正岳豁堂和尚寂岳歸山後將泛三泖尋船子姓空遺迹而淨慈嗣法衡以疾往衆乃迎岳還南屏不入方丈但下榻香世界曰吾不久即辭世矣何復以南屏荷我肩耶取歷日選吉沐浴端坐書偈擲筆而逝相國馮溥銘塔宗伯龔鼎孳撰道行碑曰師道風峻上慧藻泉流六坐道場滌凡滋聖理徹詞腴染翰會心無不臻妙益都閣學馮公與師最契欲延之都下師舉政黃牛偈句以謝昔張文定言黃梅曹溪以下諸尊宿皆顏闕一流人特儒門淡薄收拾不住余於豁公亦云

晝林運和尚住夫山祥符運山陰祁中丞之子幼隨其叔密菴老人季超居士學道有得從儲和尚脫白儲令承嗣密菴菴嗣愚菴孟

辛亥十年

秋資福靈機觀和尚住福嚴

徑山碩揆志和尚遷三峰三峯僧鑒青和尚建法堂成退院啓迎儲和尚儲以志事出無端不當久留徑山居恒謂其剛毅有斷主法有條適黃山磧菴和尚書來有合儲心遂請志志住三峯禪學赴之聲鵲起

山學慧和尚住粵西南院嗣德山賦

僧鑒青和尚補住支硎華山磧菴志和尚應請住黃山儲和尚以青退三峯命補住青以舊時聽講之席林巒泉壑有當於心欣然從之

冬十一月望日嘉興古南通門牧雲和尚寂門晚退隱京口之鶴林不陞座上堂往來無定迹示誠法嗣條約十章其首章以饑荒游臻人情蕭索稱和尚者盈街塞路苟求餬口人皆生厭所施何來

此亦甚不知時節者。凡我會下人甯去徒衆煨鑪過日等語。切中時病。預定逝期。怡然坐脫於吳門之觀瀆。廬塔全身於京口黃鶴山。未幾而塔示斜側。啓壙茶毗。獲五色舍利無算。有七會語錄。爇齋別集。行世。祥符。蔭曰宗師。設化。因時而已。出處權宜。無有定法。當天童三峯振興之後。諸方教化盛行。未免有末流之弊。鶴林門和尚身矯其偏。以挽滔滔之變態。可謂救時之尊宿也。

壬子十一年

遠菴優和尚住甯波瑞巖山開善寺

秋九月二十七日。蘇州靈巖宏儲退翁和尚寂。儲退老堯封辛亥。方伯慕天顏。請回靈巖。問道舊學。雲臻不倦。參請七月。粵西郡主專使來迎。不欲往。遂示疾。自製塔銘。自說封骨藏偈。書遺囑。切誡門人。九月二十七日。顧大眾曰。老僧行道不力。有愧三峯先師。遂索浴更衣。跏趺而逝。闍維放異光明。頂齒不壞。舍利無算。塔於堯封山巔。曰大光明幢。諸會語錄百餘卷。行世。嗣法寶雲南潛述行錄曰。

臨濟氏沒七百年。綱宗墜而不舉。雖白日在天。沈雲晦冥。隆萬之後。天童悟和尚藏大機於一棒三峯。藏和尚顯大用於三玄。從奇入正。道合如離。一時見聞之者。無不人人目眩。股栗而不知所措足。吾先師靈巖儲和尚起而躬集大成。大機大用。如日月雷霆之在天下。奔走方內外之豪傑。江出寥廓。禮樂森備。臨濟之道。至先師爲極盛矣。師曠情遠度。以古今爲懷抱。說法獨存古之大意。嘗與東園人華大師書曰。西乾東震。兩大聖人之道。盡失其真者。大段在不知其意。意者行其所無事而已矣。聖人經綸天地。拔擢山川。莫不具大有爲之路。極其有事而總還其無事。此大法也。冬十一月。兜率卓牧謙和尚繼住靈巖。謙住兜率古道。自持恬退秘重。前後天台國清興化及三峯諸刹。請皆力却之。儲和尚簡諸門人中。能任重無加謙者。囑方伯慕公力請繼席。一登座內外歎服。冬杲亮和尚住荊溪寶明寺。嗣退翁儲。

癸丑十二年

堯封月函潛和尚晦迹蒼西潛自儲和尚寂後棲  
遜蒼溪洞庭之間。或一棹浮遊於五湖山椒水湄。  
除上堯封展塔足迹。雖菴園不一。至禪子欲追隨  
之。不可得。唯華山青靈巖謙和尚。間攜竹爐茗餌。  
相從於村澗谿橋邊。繫船一日夕談。

以晉輪和尚住堯封興福嗣靈巖儲

居士毛坤叩請諸方重復天池古刹。天池自毛中  
承重建以後。後人營私。遂成丙舍。驅僧伐木。乾沒  
名山。坤字公厚。爲中承家孫。蚤年從古南靈巖諸  
尊宿。遊知有因果。慨念祖德。賤於後人。乃走諸方  
以還復天池古刹。叩請松帶井人。眎首贈以詩確。  
菴青漏霜潛及諸山名宿。各有詩文獎勉之。

### 甲寅十三年

夏六月乾菴和尚退靈隱五岳和尚繼住

六月二十七日天童宏覺禪師道忞木陳和尚寂  
忞晚號夢隱道人。投老於會稽化鹿山之陽明洞。  
天自卜塔黃龍峯下。有九會百城北遊等錄行世。  
嗣法天嶽晝和尚繼其席。

秋遠碧和尚補住育王嗣天甯覺

天輿贊和尚住常州天甯嗣靈巖謙

冬天笠珍和尚住龍池

補菴喻和尚住蘇州陽山大慈寺嗣靈巖儲初住  
杭州淨土院古道自持不徇流俗。陽山大慈爲晉  
支公道場。荒廢已久。喻居之。芟蘿舉棘。博飯栽田。  
頗存古德風致。

### 乙卯十四年

夏五月卑收謙和尚退靈巖僧鑒青和尚繼住  
諦輝輅和尚住靈隱

七月初十日報恩大覺禪師通秀玉林和尚寂於  
淮安慈雲菴。琇晚居天目。聞善權災。盡屏參侍。不  
食粒米。子身潛出渡江。而北至清江浦。止慈雲菴。  
示微疾。唯飲冷水。索筆書曰。本是無生。今亦無死。  
此是正說。餘爲魔說。擲筆而逝。先是過江。都會以  
後事囑居士黃子升。升以問疾。至值已寂。乃治菴  
送天目建塔。

潭州海會行源璞中和和尚寂。萬如微嗣

丙辰十五年

仰山正志槃菴和尚寂志自黃山移仰山將終焉以老回吳寓穹窿山前真際院寂建塔黃山門人虞山錢陸燦孝廉撰述道行兼銘塔祥符蔭曰槃菴和尚在也出世皆以道自任晚尤循戒彌謹真當於古人中求之也

秋立勝樞和尚住梁溪摩竭嗣靈巖儲

寶華仁山震和尚修三峯燈史

丁巳十六年

秋金陵東山大咸咸和尚寂咸天童志嗣臨寂以海舟慈祖行實示嗣法太守陳寅嘯以力辨諸訛國清觀英毅菴和尚寂於梁溪衆香菴英靈巖儲嗣歷住祥符國清

堯封文果曇應和尚寂

戊午十七年

輪菴揆和尚住紹興大能仁揆茂苑文相國之後少以名家子從儲和尚於靈巖參悟壯遊四方從戰洞庭湖因礮警出家嗣靈巖儲

廣陵聶先樂讀居士續指月錄

己未十八年

龍池行淵素嚴和尚寂淵嗣萬如微初住射州永甯遷吳江接待後住龍池操履縝密縑素重之去息溟和尚住靈巖僧鑒青和尚退居華山

金陵寶華山讀體見月律師寂體承三昧光律師之緒大振南山一宗嚴淨毗尼爲天下戒學之所趨止門人定菴德基嗣其席

今釋澹歸和尚寂

常州太平崇原問松和尚寂原江陵張氏子受具戒於寶華光律師領書記詣天童不契入夫椒見儲和尚服膺痛加錐剗股勤五年嗣法深入天台歷諸方值金粟容陸座原犯衆喝之容曰鼓粥飯原作聽勢容曰裝鑿作啞原呼蒼天而退蔣晦菴請住玉泉未幾棄去侍御許青嶼孝廉李確菴請住太平五月朔預示偈曰草屨脚板尚離披倒跨虚空嫌電遲欲識問松真面目西風黃葉敗殘時臨寂書囑語并偈畢侍者進茶揮手曰不用了跏

跌端坐而逝

庚申十九年

碩揆志和尚住揚州善慶志自三峯退席後遊歷  
茗西五州山水之間住善慶未幾遷靈隱

金山鐵舟 和尚寂嗣磬山問

童碩宏和尚住靈巖因歲饑退宏補住

井人脉和尚住金陵碧峯石頭菴脉字笠居別號

不菴生緣菴田林氏初遊白下講席棄登雙徑謁

禮和尚禮寂參退翁儲於古堯封服膺入室儲寂

復遊白門下孝旨居士請居石頭菴孤懷大意落

落難合衲子多及門而退祥符陰曰庚申之春余

汎棹白門時巢山至和尚隱獅峯團瓢菴莊雲和

尚以筆墨遊戲於藏山樓而井人和尚方高臥石

頭每曳杖過從探梅古寺聯榻空齋今巢山菴莊

已寂而井人亦音問杳然因對秋風爲之一歎

道目眼和尚住弁山龍華嗣伴我侶遷阜亭佛日

舜巨 和尚住淨慈嗣豁堂岳

芙蓉雪厂 和尚遷荊豁法藏

嗣

大覺徵聖圖和尚住支硎圓通寺嗣靈巖儲

寶林宗徹孤朗和尚寂嗣靈巖儲

海虞白雀寺雪爐冶和尚寂治嗣黃山志

辛酉二十年

雪悟思和尚住揚州天甯思嗣巨渤恒初住延令

慶雲退隱廬山鏡湖天甯荒頽之後思至一振起

之衲子復雲集

秋八月二十四日蘇州靈巖式謙卑牧和尚寂謙

赴紹興大能仁之請過武林督關樞部使慕見蒼

留供巢雲堂問道遂坐脫跌坐三日顏色如生傾

城士女瞻禮感歎奉龕還吳建塔夫椒嗣法門人

祥符紀陰曰師誠慤慈愛出於天性尊師重法深

遠大體生平無倨詞傲色淵默持重俯身徇物樂

易和平使人卽而親之軟語甘言皆導肯綮至入

室投機雖上根宿學皆溟滓莫能湊泊惠施不著

鉢無留供說法能得儲和尚之旨有語錄十餘卷

行世

九月二十九日湖州資福行觀靈機和尚寂觀住

資福三十八載。凡樵採之山。安僧之地。尺寸皆縮。衣鉢親置。始則草屋荒基。終焉瓊樓絳殿。門庭嚴冷。風規整肅。諸方咸稱爲楊岐高峯再世。云塔全身於本山。祥符陰曰。禪雖不在於坐。然塵水方濁。非靜以澄之。何以令其淨極。光生。近日諸方禪風。浩浩滔天。資福以乾爆爆一著子。坐斷天下人。而南澗繼之。遂使忙忙貪程之流。不致走殺白雲。後學初機。且使狂心頓歇。但死水活龍。須是點睛得妙。此稱法苑龍門之所以不易易也。

子昂 和尚繼席資福。旋寂松菴正和尚補住。靈隱三目淵和尚寂碩揆志和尚補住。

壬戌二十一年

癸亥二十二年

天興贊和尚退天甯過菴輪和尚補住。贊連遇浴。饑力支叢席。以病瘁退。延輪主法。

中峯曉菴了法師寂嗣蒼雪徹。

京都鎮國寺廣林山菴和尚寂林復乳山法席重。新鎮國寂嗣法載月舟和尚繼其席。

雪菴致和尚補住。靈巖嗣增雪儲。

甲子二十三年

聖駕南巡

冬十一月 幸揚州天甯平山各灑。

宸翰。二天甯曰。蕭閑平山曰。怡情。幸金山。

勅重修飾。御製文紀之勒石金山。

御書扁曰。江天一覽。幸夾山竹林及蘇州瑞光虎。

邱有 御製修竹賦。尙書張玉書等勒石竹林寺。

臣僧紀蔭曰。爰自虞舜定典。五年一巡狩。厥後帝。

王雖有封禪巡幸之舉。然未有超邁古今。如今。

皇上者也。

乘輿南巡。

聖政大端。山野之人不能窺測。亦所不敢訖揚。謹書。

臨幸法門。光垂禪苑者。一。二。大段恭志。

龍蹕。奎章山林千載傳爲盛事。佳話流播眞。

佛心天子垂護無疆者也。

揚州北來國通寺別傳 和尚疏請修理天下名。

山法席 發明疏雖不報書之以見爲法之公而不恤私也 嗣紫蓋。

衡住北來圓通寺荒頽志圖興復而力任不倦至  
天甯觀

上乃上疏

乙丑二十四年

山曉哲和尚寶積錄成錄集於山翁恣和尚載古  
德嘉言懿行及斷簡殘編未竟業而哲足成之學  
士徐元文爲之序

榮巖黃和尚住婁東海甯嗣天童恣

侶巖荷和尚住湖州烏山龍泉嗣金粟昇

如臯大覺天揆晉和尚寂音嗣紫蓋衡

伊阮哲和尚住嘉興竺溪嗣天童恣

冬十一月兜率蛤菴圓和尚寂嗣山翁恣

椒菴音和尚住三峯嗣南岳儲

山猷果和尚住江陰蕩霧嗣天童恣

寄菴園和尚住雲門顯聖嗣且拙 嗣瑞白雪

證南 和尚重興越州開元寺靈隱淵嗣

丙寅二十五年

堯封寶雲南潛月函和尚寂潛晚寓蘇臺之簑衣

菴以著述爲事有玉椒筆乘表正集法華頌太極  
圖表周易七略等書皆發古今人天之秘奧  
利禪亘和尚補住資福嗣靈機觀

丁卯二十六年

穆文德和尚恢復天池嗣靈隱禮初住婁東法輪

夾山與天甯法靜

發明法本無靜以法爲靜  
非法也故書以示儆

天笠珍和尚住南禪時有一居士從南禪往靈隱

參碩揆志和尚問女子出定公案志答之而珍別

其語僧傳至維揚天甯雪悟思和尚晚參舉而評

之夾山聞而上堂批摘天甯天甯因出正辯錄夾

山出杜邪說祥符陰曰古人拈提公案如太阿礪

礪八面受敵而太虎無痕或擡或擲皆塗毒鼓聲

聞者皆死有聞之而不死者則非塗毒鼓聲也靈

隱之答出定語雖未必言中有響南禪之別豈能

句下無私天甯之學亦非黨親不黨理者正辨杜

邪之出均之過矣法門以無諍爲宗行道當先忘

我見雖曰爲法實未忘情不能不爲之扼腕也

戊辰二十七年

揚州天甯上思雨山和尚寂門人師昂元繼席  
香山智操寒松和尚寂嗣百愚斯歷住青龍龍華  
喻葦輦和尚住靈巖未幾退居承天嗣南岳儲  
夏五月二十三日緇素公集虞山燮五論雜詩板  
鶴林牧雲門和尚寂已久時刻其嬾齋後集末附  
五論雜詩皆毀誣三峯靈巖之語鶴林法孫雪鑑  
秀峯兩和尚皆云論詩之刻爲人所誤親資板至  
虞山輿福集闔邑士紳耆舊禮佛懺悔劈板焚之  
鐵牛居士錢湘靈七十九老孝廉札報許青嶼侍  
御曰是役也非爲三峯奮螳臂正是爲古南拔鶴  
箭耳祥符陰曰佛祖住世各相讚歎稱揚以引衆  
生信向增長福慧未聞有毀訾雖黃退人善根者  
況塗汙先達而快己私乎書之以示立言者不可  
不慎毋逞一時之媚忌而爲正人公論所不容也  
己巳二十八年

聖駕南巡

春二月初五日

駕幸鄧山聖恩寺拈香禮佛駐蹕桂軒賜書

松風水月四月初六日幸靈巖登琴臺時寒溪  
揆侍特加

顧問賜靈巖御書嵐翠二字幸杭州靈隱雲

棲等處賜靈隱御書雲林二字

駕渡錢塘祀大禹陵回鑾至姑蘇欲遊華山因

雨阻御書遠清二字御製詩一首曰欲向青

山澗壑行春雲又變曉陰輕勾陳不遣驚禪定恐

礙林間碧草生遣中使馳賜華山僧鑒青青詣

行在謝特見優禮幸江甯大報恩寺復

駕臨金山天甯等處回鑾臣僧紀蔭恭跋

御書遠清後曰帝王治天下以字垂世實自大禹始

嘗覽岫嶠峯前第一碑知天經地畫載更鴻濛結

繩之治比之蚪篆蟲書歸然河漢宜其平成敷奠

萬國敕甯也恭惟

今上皇帝御極致治度越古今道德渾全無能稱述

伏觀二次南巡竊窺聖意大端同乎舜禹至

於仁風道韻光及林泉則又自昔名山大澤之所

未有龍蹕奎章震耀巖壑爲山靈海若之所訶

護者非一而華山遠清二字則尤仰歎用意據典不同況然以此知睿智周知而無一事一物之不得其當也。蓋華山以山如蓮花得名宋儒周敦頤之愛蓮說有曰吾獨愛蓮之出淤泥而不染濯清漣而不妖香遠益清亭亭淨直可遠觀而不可褻玩焉。確菴和尚住是山寒溪揆和尚稱其道韻皇帝聞而欲遊華山雨阻未往錫之詩云云確菴名曉青命意製詞藹然可見復大書遠清二字勅寒溪曉青謁見行在。

帝令進詩染翰撒

御前寶爐以予之可謂千載光華躬逢其盛和尚退而炳香告衆勒石昭後手書五湖山中屬臣僧紀蔭恭跋之蔭踰伏菰蒲何足以測高深唯是久涵至化同沐恩光謹以平昔欽仰聖德之純全及今茲欣慕聖意之淵雅者而颺言之真覺如天之仁有同大舜而無間之德實類神禹是以望秩山川肆覲羣后而民之愛戴咽路歡闐不啻赤子之親慈父近乳母此固從來變輿巡幸之所無

而銀鈎寶勒寵賚禪林則又與嶽瀆千秋昭其莫麗者異矣額手式瞻者知

皇上尊貴渾忘禮遇山林守道之士而凡山林學道者其益銘頌無疆勉効潛修以無負我佛心天子光揚道化之至意其庶幾乎

臣僧紀蔭曰恭惟

聖駕二次南巡有曠古難逢者五事一儀衛不設老幼擁戴而滿路歡填二風日晴和江山効靈而皇情悅豫三供億無需閭閻安堵四蠲赦大霽恩澤淪肌五山林法席均荷恩光其他

聖德汪洋稱頌者曾天之下莫不尊親惟茲編年恭逢其盛額手炳香於以敬祝太平有慶

睿算無疆云爾

僧一珪和尚住夾山珪初住金陵志行道法天竺和尚退竹林還南磧延珪補席

石菴孚和尚住金粟接機明白娓娓不倦湘翁沅和尚住龍華輯散木正傳等錄悟則觀和尚住顯聖祠無際 嗣麥浪怀

大慈補菴喻和尚集靈山一會語錄

錄集嗣退翁  
儲法百餘人

佛滅後二千六百三十八年

祥符陰曰自明萬歷四十三年乙卯至今

皇清康熙二十八年己巳凡七十五年其間天童磬

山廓龍池禹門之緒而臨濟之道以興雲門博山

振清涼壽昌之業而洞上之宗聿起三峯力闡綱

宗善繼述者有靈巖靈隱之廣大精微宏覺丕承

帝管相唱和者有福嚴古南之卓立瀟灑雲棲之淨

業普攝三根寶華之戒範克宏三聚畢亭天谿曲

水蓮居之間台教之輪傳持絢爛秣陵金閭普德

中峯之際相宗之席講貫繽紛利竿相望名藍星

布於江山爐鞴爭開俊禪雲蒸乎龍象

天子佛心統金輪而調御

皇風法運綿玉歷以遐敷令行吳越端藉

一人以指南道亘古今方慶千秋而未艾今茲略紀

僅識大端教之誨之深有望於

大方知我罪我亦何辭於今日見聞未及俟泚筆

以載登高明不遺幸投珠而惠示 三十二終

後序

宗統編年三十二卷 國朝祥符釋繼蔭蔭字湘

雨號宙亭又號損園嗣卑牧謙住祥符康熙二十八

年

聖祖仁皇帝三次南巡 召見 行在契

旨嗣屢

詔入都賜

御書神駿二字以易寺名並水月禪心額又

御製詩一首

御臨諸家書賜之蔭皆恭摹上石以識

恩幸汔今雖寺屋毀敗殆盡而

奎章

聖漢歸然獨存當時毗陵諸山大德莫能方其

寵遇蔭少通儒術深得文字三昧脫白龍溪徧參釋

乘謁退翁儲於靈巖得受記荊退翁爲三峯藏得法

弟子道價傾海內蔭承心印聲譽大起以其餘爲古

文辭與勝國諸遺老相唱和一時有齊己貫休之目

嘗以佛祖紀綱宗師血胤歷數千年來紀述之家或

體例未精或徵采踳駁未足爲千古正傳退翁嘗欲著法苑春秋而未果蔭因博采經史釋乘一仿朱子綱目體例斷以周昭王二十二年我佛降生爲始訖國朝康熙二十八年曰佛紀祖紀五宗紀其自明萬歷四十三年以後諸方之出處附書年甲之下曰略紀以俟後之宗統定而詳系焉上下二千六百四十年間紹述宗風之次序授受法印之機緣備及朝政廢興之有關係氏者淹貫翔核融儒釋爲一貫正其謬闕其疑自爲註以發明之謹嚴一遵史法固法苑之龍門而緇林之實錄也書成表上之

朝許青嶼侍御之漸爲刊板序而行之板藏瑤璫寺仰山西房當時以天童三峯二世互相成礙開悟來學厥後子孫各立門戶分左右祖論者又以三峯子孫尊父嶼祖多不直之陰雖三峯的裔而中立無所倚毗故是書不甚流傳然其論臨濟宗旨至明神廟而後已同淪墜非天童無以見臨濟之廣大非三峯無以見臨濟之精微旨哉言乎此誠正知正見傳之後世而昭昭靈靈自有不得而泯沒焉者粵匪之亂

是書板片蕩焉無存吾那天甯鳧疊上人訪於神駿寺僅僅得一部已於殘編斷簡中湊集成帙幸無缺失亟謀重付剞劂嘉善陳仲泉清玉仁和許息庵樾身慨然出資助成之當夫世風剝弊祖道寢衰九鼎單絲不賴有淹通宗匠宏宣綱要其何以謂人天眼目哉鳧疊之亟欲流傳與蔭之著述是書固同一發明現成公案者也蔭之住天甯嘗重修正殿太守于公琨爲之記事在康熙三十一年固嘗有功於天甯今鳧疊於二百年後重爲流通亦力闡綱宗之一大機緣也印用聚珍板易於譌舛遂并原本之誤爲校刊記附焉

光緒十有三年夏六月毗陵雅浦居士陸鼎翰識後

宗統編年

分卷全 身三一

0 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100 101 102 103 104 105 106 107 108 109 110 111 112 113 114 115 116 117 118 119 120 121 122 123 124 125 126 127 128 129 130 131 132 133 134 135 136 137 138 139 140 141 142 143 144 145 146 147 148 149 150 151 152 153 154 155 156 157 158 159 160 161 162 163 164 165 166 167 168 169 170 171 172 173 174 175 176 177 178 179 180 181 182 183 184 185 186 187 188 189 190 191 192 193 194 195 196 197 198 199 200 201 202 203 204 205 206 207 208 209 210 211 212 213 214 215 216 217 218 219 220 221 222 223 224 225 226 227 228 229 230 231 232 233 234 235 236 237 238 239 240 241 242 243 244 245 246 247 248 249 250 251 252 253 254 255 256 257 258 259 260 261 262 263 264 265 266 267 268 269 270 271 272 273 274 275 276 277 278 279 280 281 282 283 284 285 286 287 288 289 290 291 292 293 294 295 296 297 298 299 300 301 302 303 304 305 306 307 308 309 310 311 312 313 314 315 316 317 318 319 320 321 322 323 324 325 326 327 328 329 330 331 332 333 334 335 336 337 338 339 340 341 342 343 344 345 346 347 348 349 350 351 352 353 354 355 356 357 358 359 360 361 362 363 364 365 366 367 368 369 370 371 372 373 374 375 376 377 378 379 380 381 382 383 384 385 386 387 388 389 390 391 392 393 394 395 396 397 398 399 400 401 402 403 404 405 406 407 408 409 410 411 412 413 414 415 416 417 418 419 420 421 422 423 424 425 426 427 428 429 430 431 432 433 434 435 436 437 438 439 440 441 442 443 444 445 446 447 448 449 450 451 452 453 454 455 456 457 458 459 460 461 462 463 464 465 466 467 468 469 470 471 472 473 474 475 476 477 478 479 480 481 482 483 484 485 486 487 488 489 490 491 492 493 494 495 496 497 498 499 500 501 502 503 504 505 506 507 508 509 510 511 512 513 514 515 516 517 518 519 520 521 522 523 524 525 526 527 528 529 530 531 532 533 534 535 536 537 538 539 540 541 542 543 544 545 546 547 548 549 550 551 552 553 554 555 556 557 558 559 560 561 562 563 564 565 566 567 568 569 570 571 572 573 574 575 576 577 578 579 580 581 582 583 584 585 586 587 588 589 590 591 592 593 594 595 596 597 598 599 600 601 602 603 604 605 606 607 608 609 610 611 612 613 614 615 616 617 618 619 620 621 622 623 624 625 626 627 628 629 630 631 632 633 634 635 636 637 638 639 640 641 642 643 644 645 646 647 648 649 650 651 652 653 654 655 656 657 658 659 660 661 662 663 664 665 666 667 668 669 670 671 672 673 674 675 676 677 678 679 680 681 682 683 684 685 686 687 688 689 690 691 692 693 694 695 696 697 698 699 700 701 702 703 704 705 706 707 708 709 710 711 712 713 714 715 716 717 718 719 720 721 722 723 724 725 726 727 728 729 730 731 732 733 734 735 736 737 738 739 740 741 742 743 744 745 746 747 748 749 750 751 752 753 754 755 756 757 758 759 760 761 762 763 764 765 766 767 768 769 770 771 772 773 774 775 776 777 778 779 780 781 782 783 784 785 786 787 788 789 790 791 792 793 794 795 796 797 798 799 800 801 802 803 804 805 806 807 808 809 810 811 812 813 814 815 816 817 818 819 820 821 822 823 824 825 826 827 828 829 830 831 832 833 834 835 836 837 838 839 840 841 842 843 844 845 846 847 848 849 850 851 852 853 854 855 856 857 858 859 860 861 862 863 864 865 866 867 868 869 870 871 872 873 874 875 876 877 878 879 880 881 882 883 884 885 886 887 888 889 890 891 892 893 894 895 896 897 898 899 900 901 902 903 904 905 906 907 908 909 910 911 912 913 914 915 916 917 918 919 920 921 922 923 924 925 926 927 928 929 930 931 932 933 934 935 936 937 938 939 940 941 942 943 944 945 946 947 948 949 950 951 952 953 954 955 956 957 958 959 960 961 962 963 964 965 966 967 968 969 970 971 972 973 974 975 976 977 978 979 980 981 982 983 984 985 986 987 988 989 990 991 992 993 994 995 996 997 998 999 1000 1001 1002 1003 1004 1005 1006 1007 1008 1009 1010 1011 1012 1013 1014 1015 1016 1017 1018 1019 1020 1021 1022 1023 1024 1025 1026 1027 1028 1029 1030 1031 1032 1033 1034 1035 1036 1037 1038 1039 1040

0512